

М.И момназаров

МУМТОЗ ФОРС
АДАБИЁТИ

Тошкент - 2011

891.5
n-48

ЎЗБЕКИСТОН РЕСПУБЛИКАСИ ОЛИЙ ВА ЎРТА МАХСУС ТАЪЛИМ ВАЗИРЛИГИ

ТОШКЕНТ ДАВЛАТ ШАРҚШУНОСЛИК ИНСТИТУТИ

**Шоислом Шомуҳамедов,
Муҳаммаджон Имомназаров**

МУМТОЗ ФОРС АДАБИЁТИ

(Үқув құлланма)

Урду адабиёти фани магистратура ўкув режасидаги танлов фанлардан бўлиб, у Ҳиндистонга ислом дини кириб келиши натижасида шаклланган мусулмон адабиёти ва унинг ривожи ҳакида маълумотлар беради.

Масъул муҳаррир:

*Сотибодиева С. Тошкент давлат шарқшунослик институти
“Хорижий шарқ мамлакатлари адабиёти” кафедраси доценти,
фил.ф.н.*


Тақризчилар:

*Ходжаева Т.А.. – Тошкент давлат шарқшунослик институти
“Жанубий Осиё тиллари” кафедраси доценти, фил.ф.н.*

Файзуллаев А. Жаҳон адабиёти журнали муҳаррири.

МАДДАДА ЭРГОФ ЁТМУМ

Мазкур ўкув қўлланма Тошкент давлат шарқшунослик институти
Ўкув-услубий кенгашида кўриб чиқилган ва нашрга тавсия қилинган
(23 декабрь 2011 йилдаги 3-сонли баённома)



©Тошкент давлат шарқшунослик институти, 2011

МУНДАРИЖА

Кириш	4
1дарс	5
2-дарс. Исломгача эроний тиллардаги адабиёт ва.....	14
унинг ўзига хос жиҳатлари	14
3-дарс.Ислом минтақа адабиёти ривожланишининг	40
биринчи даври. Форс тилидаги мумтоз шеъриятнинг шаклланиши ва илк ривожи.	40
4-дарс.Фирдавсий ва унинг “Шоҳнома” асари	63
5-дарс. ИСЛОМ МИНТАҚА АДАБИЁТИ РИВОЖИНИНГ	98
ИККИНЧИ ДАВРИ.ТАСАВВУФИЙ-ИРФОНИЙ АДАБИЁТНИНГ ЮКСАЛИШИ	98
6-дарс. ИСЛОМ МИНТАҚА АДАБИЁТИ РИВОЖИНИНГУЧИНЧИ ДАВРИ. “МАЖОЗ ТАРИҚИ”	130

Кириш

Волийи мулки тариқат гар Низомийдур манга,
Манзили маънига Хизрироҳ Жомийдур манга.

Хотиримга Хисравидин ҳар замон шўре етиб,
Банда давроннинг бори ширин қаломидур манга.

Пири Ансорий сўзидин чошини нутқум топиб,
Сўзда ҳосил шарбати юҳъийл-изомийдур манга.

Ҳофизи Шероз лутфидин тараққийлар топиб,
Жилвагоҳ аҳли тасаввуғнинг мақомидур манга.

Юзима Аттор ҳар лаҳза дўкони файз очиб,
Доим андин атрпарвар жон машомидур манга.

Файзи Фирдавсий гаҳи кўнглим очибдур бийддек,
Гоҳ Хоқоний футуҳининг паёмидур манга.

Гоҳ табъим Анварий нури била равишан бўлуб,
Гоҳ Саъдий жомининг файзи мудомидур манга.

Топибон ишиқи Ироқийдин замирим нашъайи,
Ҳосил, аҳли ишиқнинг шўри тамомийдур манга.

Нусхай таъйид Бедилдин топиб файзи сухан,
Маъни ичра номаи иқболи томийдур манга.

Қўйса ҳосид даҳли бежо сўз аро йўқтур гамим,
Ким бу маънида Навоий руҳи ҳомийдур манга.

Тонг эмас, Мунис, агар бўлсан киромий қадрким,
Устоди зоҳиру ботин Киромийдур манга.

Шермуҳаммад Мунис

1дарс.

1. Ижтимоий ҳаёт, маънавият, адабиёт.

Бугунги кунда “жаҳон илми” деганда назарий жиҳатдан кўпроқ Европа минтақасида шаклланган илмий андазалар тасавур этиладиган бўлган. Аслида Ер юзининг турли минтақаларида (масалан, Жанубий Осиё ёки Ҳиндистон яримороли минтақаси, қадим Хитой маданияти таъсирида шаклланган Узок Шарқ минтақаси, XV-XIX асрлар мобайнида Америка, Австралия ва бошқа ўлкаларга ёйилган Европа минтақа маданиятлари мавжуд бўлиб, улар бошқа минтақалар билан турли даражада ҳамкорликка киришган мустақил ва залворли маданият тизимларини ҳосил қилган ва шунга яраша ўз мустақил илмий андазаларига эгадир. Масалага жиддий ёндашадиган бўлсак, табиий ва аник фанлар, шунингдек, техника фанларида бундай минтақавий андазаларнинг ўзаро фарқлари кўпроқ тарихий аҳамиятга эга бўлиши мумкин. Аммо турли ижтимоий фанлар назариясини шакллантиришда бундай ўзига хосликлар бенихоя жиддий аҳамият касб этади. Сабаби, табиий фанлардан фарқли ўларок, ижтимоий фанлар нақлий (яъни, аждодлар меросига таянувчи) ва аклий (яъни, мантикий изчилилкка таянувчи) илмлар ўйгунилигига ва тарихий шаклланган анъаналарга асосланади. Шу сабабли, масалан, Европа минтақаси ҳалклари тарихан босиб ўтган турли цивилизация босқичлари асосида чиқарилган назарий хуросаларни асло бошқа минтақалар тарихий такомилига кўр-кўронा кўллаб бўлмайди. Адабиётшунослик, ахлоқшунослик каби муайян минтақа ижтимоий ҳаёти билан бевосита боғлик бўлган фанларда ҳам бундай ёндошувлар воқеликка мувоғик илмий хуросаларга олиб келмаслиги ўз-ўзидан равшан. Афсуски, то хозиргача бизнинг зиёлиларимиз орасидаги ижтимоий фанлар вакилларининг аксарияти бу муҳим масалага етарли эътибор қарататгандарни йўқ.

Муаммони қисқа ифодалайдиган бўлсак, “жаҳон маданияти” тушунчаси турли ўлка ва минтақаларнинг ўзига хос маданиятлари мажмуудан иборат бўлиб, мавхум бир шаклдаги умуминсоний маданият ҳаётда асли мавжуд эмас. Инсоният тарихий тараққиёти жараённида аввал муайян кичик жамоалар доирасида шаклланган маданият унсурлари бора-бора кенгроқ миқёс касб этиб, турли элат ва миллатлар, минтақалар маданияти даражасига кўтарилиб борган ва ниҳоят Янги даврга келиб яхлит бир воқелик сифатида идроқ этила

бошлади. Бу холатни шартли чизма шаклида қуйидагича тасвирлаш мумкин:

1-ЧИЗМА. ЖАҲОН МАДАНИЯТИ ВА ТУРЛИ ХАЛҚЛАР МА’ННВИЯТЛАРИНИНГ ЎЗАРО НИСБАТИ



(Ушбу чизма мураккаб воқеликни шартли равишда акс эттиради. Чунки, барча халқлар ва мінтакалар ма’ннавияти ўзига хос бўлиб, уларнинг барчасини бир чизмада акс эттириш имконияти йўқ.)

Ўзбекистон миллий мустақилликка эришган дастлабки кунлардан эътиборан Президент Ислом Каримовнинг қатор нутк ва алоҳида асарларида бу масалага маҳсус тўхталиб, миллий ма’ннавиятимиз анъаналарига таянган ҳолда ижтимоий фанлар назариясини шакллантиришнинг ўзига хос умумметодологик асосларини олға сурмоқда. Бу асослар, айниқса, унинг “Ўзбекистон XXI асрга интилоқда” китобида ёркин ифодасини топган¹. Биз

¹ Ислом Каримовнинг “Ўзбекистон XXI асрга интилоқда” китоби ва бошқа асарларида ушбу мавзуда баён қилган мулоҳазалари бўйича батафсил маълумот олиш учун карант: Имомназаров М. Миллий ма’ннавиятимиз назариясига чизгилар. Т., “Шарқ”, 1998, с.46-60; Имомназаров М., Эшмуҳамедова М. Миллий ма’ннавиятимиз асослари. Т., ТИУ нашриёти, 2001, с.16-30; Имомназаров М., Сайдов У. Миллий тараккиётимизнинг ма’ннавий-ахлоқий асослари. Т., “Академия”, 2005, с.3-16;

Президентнинг шу ва бошқа асарларида баён қилинган фикрларни умумлаштирган ҳолда қуйидаги соддалаштирилган холосатизимларни келтирамиз:

2-ЖАДВАЛ. ИЖТИМОИЙ ФАНЛАР НАЗАРИЯСИНИ МИЛЛИЙ ЗАМИНДА ШАКЛЛАНТИРИШНИНГ УМУММЕТОДОЛОГИК АОССЛАРИ

(Президент Ислом Каримов асарлари асосида)

a) кўп қутубли дунё

(Бу қоида Тавҳид ҳақиқатининг моҳиятидан келиб чиқади ва ма’ннавий меросимизда аллақачон эътироф этилгандир)

б) инсон – дунё меҳвари

(Чунки инсон қўнгли Ҳақнинг мазхаргоҳидир)

в) иқтисод, сиёсат, ма’ннавият: инсон ва жамият ҳаётидаги уларнинг ўзаро уйгунилиги зарурати

3-ЖАДВАЛ. ИНСОН ВА ЖАМИЯТ ҲАЁТИНИНГ УЧ СОҲАСИ (ёки Инсон фаолиятининг уч йўналиши)

Иқтисод

(Инсоннинг моддий воқелик (атроф-табиат) билан амалий муносабати)

сиёсат

(Ҳар бир инсоннинг ўзга инсонлар билан бевосита муносабатлари)

ма’ннавият

(Инсоннинг Ҳаққа, Борлиқнинг моҳиятига муносабати)


Имомназаров М. Миллий ма’ннавиятимиз асослари (лотин ёзувида) Т., Ўзбекистон файласуфлари миллий жамиятияни нашриёти, 2006, с.14-27.

(Ушбу соҳалар инсоннинг Борлиқ билан турлича мустақил муносабатларига оид бўлиб, улардан ҳар бирининг манбаси ҳам, мақсади ҳам алоҳидадир)

Юқоридаги жадвалда **маънавиятнинг** инсон ва жамият ҳаётининг асосий соҳаларидан бири сифатидаги таърифи келтирилган. Аслида **маънавиятнинг** ҳақиқий маскани ва макони инсон қалбидир. Буюк аждодларимиз таърифига кўра маънавият - ҳар бир инсоннинг **кўнгил** **кўзгусида** олий Ҳақиқат нурининг акс этиши бўлиб, бу таъриф моҳиятан **Инсон руҳидаги Борлиқ ҳақиқати билан** **уйғулилки** англатади. Маънавият – ўз мазмунига кўра кўп киррали мураккаб ботиний ҳодиса бўлиб, шу маънода Президентимиз уни “*Инсоннинг, Ҳалқнинг, Жамиятнинг, Давлатнинг куч-қудрати*”, “*инсонни руҳий покланиши ва юксалишига даъват этадиган, унинг ички оламини бойитадиган, иймон-иродасини, эътиқодини мустаҳкамлайдиган, вижданини уйготадиган қудратли ботиний куч*” деб улуғлади. Бу таърифлардан келиб чиккан ҳолда маънавиятни инсоннинг ўз моҳияти олдидаги масъуллиги, ўзлигини англаши деб ҳам айтиш мумкин. Инсоннинг Борлиқ абадиятига дахлдорлиги айни унинг маънавияти туфайлидир. Жаҳон мумтоз адабиёти намояндлари яратиб қолдирган ўлмас маънавий мерос бунинг ёрқин далили бўла олади.

Жаҳон илмида **иқтисод** ва **сиёсат** соҳаларига оид муаммолар назарий жиҳатдан ҳар томонлама ўрганилган бўлса-да, инсон ва жамият ҳаётидаги асосий соҳанинг бири бўлган **маънавият** яхлит ҳодиса сифатида назарий тадқиқ мавзуси бўлмаган. Унинг ўрнига **маънавиятга** нисбатан иккиласми ҳодиса бўлган **маданият** ва унинг (яъни **маданиятнинг**) таркибий қисми бўлмиш **ахлоқ** ҳодисаларини алоҳида-aloҳида олиб ўрганишга катта эътибор қаратилган. Аслида эса бу ҳодисаларнинг ўзаро нисбати бошқачароқdir. Қуйида **маънавият**, **маданият**, **ахлоқ** ва **сиёсат** ҳодисаларининг ўзаро ҳақиқий нисбатини соддалаштириб ифодаловчи чизмани келтирамиз:

4-чизма. МАЪНАВИЯТ, МАДАНИЯТ ВА СИЁСАТНИНГ ЎЗАРО НИСБАТИ



(Чизмадан кўриниб турипти-ки, санъат ва адабиёт шаклан маданиятга тегишли бўлиб, унинг мазмунида **маънавий қадриятлар** ўз аксини топади.)

2. Адабиёт нима?

Унинг моҳияти ва инсон ҳаётига таъсири.

Ҳозирги замон Европа адабиётшунослиги асосан адабиётнинг шаклий жиҳатларини ўрганишга эътибор қаратиб келмоқда. Шўролар даврида эса адабиётга ҳукмрон мафкура тарғиботининг оддий бир воситаси сифатида караб, унинг асл моҳияти назардан четда қолди. Ҳолбуки аслида ҳақиқий санъат ва бадиий адабиёт **Борлиқ ҳақиқатини англаб етишининг мустақил йўналиши** бўлиб, бевосита инсон **маънавий камолотини тъминлашга хизмат қилади**, бу соҳага бирор-бир фалсафий ёки мафкуравий тизимнинг ёрдамчи воситаси сифатида караш эса унинг асл моҳиятини камситишга олиб келади.

Бола ўйнайди. **Ўйин** - Борлиқ ҳақиқатини амалий англаб етиш - ўзлаштиришнинг илк кўриниши. Ёш бола Борлиқни англаб етиш учун ҳаётий жараёнларни ўйинда **моделлаштиради**.

Санъат, жумладан, бадий адабиёт, юқоридаги чизмада ҳам акс этганидек, миллий маданиятнинг таркибий қисми бўлиб, бадий тафаккур ҳосиласидир. Бадий тафаккурни эса ўз навбатида ҳаёт моҳиятини англаб етишнинг мустақил йўли сифатида баҳолаб, моҳиятан тахайюл ўйинлари² воситасида Борлик ҳақиқатини моделлаштиришга уриниш, дея таърифлаш мумкин. Шу йўл билан ҳайкалтарош тошни “жонлантиради”, мусаввир ранглар товланишини ишга солади, мусиқа санъати инсон туйгуларига бевосита коинот уйғунлигини олиб киради.

Бадий тафаккурнинг энг қудратли ва имкониятлари чексиз воситаси **сўз санъатидир**. Боланинг ўйини - бегараз. Шундан улгу олиб, адаб ва шоир ҳам ўз ишига бегараз ёндошсагина, ҳаёт ҳақиқатини уйғун акс эттира олади, десак адашган бўлмаймиз. Дарҳақиқат, мумтоз адабиёт бегараздир.

Адабиёт инсон маънавиятини шакллантирувчи асосий манбадир, ёш авлодни **маънавий барқамол** қилиб тарбиялашда унинг аҳамияти бекиёсdir. Адабий асар кўз олдингизда кечаетган айқаш-үйқаш ҳодисалар гирдобини маълум тизимга келтириб, ундан сизнинг кўзингизга, онгингизга маъно, мазмун чиқариб беради. Бадий асар етти яшардан етмиш яшаргача ҳаммага тушунарли, ҳамма ҳам ундан ўз фахм-фаросатига лойик бир ҳисса чиқара олади. Шу сабабли **адабиёт - ибрат мактаби, меҳр парваришидир. Мумтоз адабиёт Борлик ҳақиқатининг ботиний жиҳатини зоҳирӣ тимсоллар воситасида мажозий баён этиш қудратига эга**. Ана шу хислати туфайли у инсон руҳини Борлик ҳақиқати билан уйғуллаштиришга ёрдам берувчи асосий воситалардан бири ҳисобланади.

3. Ислом минтақа адабиётшунослигининг назарий асослари

Ер юзида турли алоҳида минтақа маданиятлари мавжудлиги ва уларнинг ҳар бири ўз мустақил илмий мезонлари ва андазаларига эга эканлигини юқорида қайд этиб ўтдик. Бу мезон ва андазалар ўша минтақа ҳалқарининг неча мингийиллик тарихий тажрибалари асосида, узоқ муддатли маънавий такомили жараённада шаклланади. Жумладан, **ислом минтақа маданияти таркибига киравчи турли**

² “Имагинация” (русча “воображение”, Форобий ва Ибн Синолар фалсафасида “такайюл”) асотир тафаккур, фалсафий ва бадий тафаккурнинг Борлик ҳақиқатини англаб етиш ва ифодалашдаги асосий восита эканлиги таникли рус олими Я. Голосовкернинг “Логика мифа” китобида ишонарли исбот қилиб берилган.

халқлар адабиётларининг исломгача ва ислом дини кенг ёйилгандан кейинги даврдаги ўзаро яқин ҳамкорликда ривожланиши мобайнида умумминтақа адабиётшунос-лигининг ўзига хос назарий асослари ҳам яратилди. Шунга мувофиқ минтақа микёсида адабиёт назариясига оид бир қатор илмлар вужудга келди. Бу илмлар икки йўналишда бўлиб, улардан биринчиси **адабиётнинг шакли, яъни бадий тасвир воситаларига оиддир**. Жумладан, аruz илми, қофия илми, бадий санъатлар назарияси (илми бадеъ), илми баён, илми маъоний ва ҳ.к. Ислом минтақасида дастлаб бу илм йўналишлари араб тилидаги адабиёт тажрибасига таянган бўлса, кўп ўтмай бошқа ҳалқлар ҳам бу соҳага ўз ҳиссаларини кўша бошладилар. Буюк аждодларимизнинг бу соҳадаги хизматларига мисол сифатида X - XV асрлар мобайнида Марказий Осиёда яшаб ижод этган Абу Абдуллоҳ ал-Хоразмийнинг “Мафотиҳ ал-улум” (“Илмларнинг калиплари”) асарининг маҳсус боби, Абу Ҳафс ан-Насафийнинг “Мажмаъ ал-улум матлаъ ун-нужум” (“Илмларнинг жам бўлиши - юлдузларнинг чиқиши”) қомусий рисолалар тўпламига киритилган “Мухтасар ал-аруз ала усул ал-маъруз”, Абул Ҳасан Наср ал-Марғилонийнинг “Маҳосин ал-калом”, хоразмлик аллома Рашидиддин Ватвотнинг “Ҳадойик ас-сехр фи дақоқиқ уш-шеър”, Маҳмуд аз-Замахшарийнинг “Ал-кустос фил аруз”, Юсуф ас-Саккокийнинг “Мифтоҳ ал-улум”, Аҳмад Тарозийнинг Мирзо Улуғбек замонида туркий тилда яратилган “Фунун ал-балога” асарларини, Навоий ва Бобурнинг аruzга оид рисолаларини эслаб ўтиш мумкин.

Адабиёт назариясининг иккинчи муҳим йўналиши бадий адабиётнинг мазмуний жиҳати, яъни бадий тафаккур қонун-коидаларига алоқадор бўлиб, бадий ижод тариқи (методи) масаласи ушбу йўналишнинг бош мавзусидир.

Янги даврда Европа адабиётида **барокко, классицизм, романтизм, реализм** номлари билан аталувчи ҳодисалар пайдо бўлди. Тадқиқотчилар бундай ҳодисаларни **адабий йўналиш ёки оқим** (“литературное направление или течение”) деб атадилар ва кейинчалик (аникроғи, XX аср бошларида) шунинг асосида **ижодий ёки бадий метод (творческий или художественный метод) назарияси** шакллантирилди.

Қадим юнонларнинг фалсафасини чукур ўргангандан аждодимиз Абу Наср Форобий (873-950) ўз ижодида ушбу муаммога ҳам маҳсус тўхталиб, “Шеър санъати қонунлари ҳақида рисола” (Рисола фи қавонин синоънат аш-шеър) ва “Шеърият ҳақида” (Китоб аш-шеър) асарларини яратди. Бу рисолаларда Аристотель асарларида

ишлатилган “мимезис” (табиатга тақлид) ва “имагинация” тушунчаларини араб тилига “мухокот” ва “тахайюл” атамалари билан таржима қилиб, бадий тафаккурнинг асос унсурларини ислом мінтақа ілміда илк мартаба мантикий изоҳлаб берди. XI асрға келиб Абу Қохир ал-Жўржоний (вафоти 1078 йил) Қуръони карим оятларининг юксак бадий құдратини ілмий таҳлил асосида далиллаб беришга бағищланған “Далойил ул-эъжоз” ва “Асрор ул-балоға” асарларыда мутлақо ўзига хос бадий тимсол назариясини кашф этди. XIII аср охири - XIV бошларыда Амир Хусрав Дехлавий (1253-1325) ўзининг “Расоил ул-эъжоз” ва бошқа асарларыда ушбу муаммоларнинг янгича ечимларини берди. Ва ниҳоят, XV аср охирида Алишер Навоий ўзигача 8 аср давомыда мінтақа мікёсіда кенг ривожланиб борган бадий тафаккур ілмини янада юксак назарий умумлашмалар даражасига күтариб, жаҳон маънавияти такомилига ўзининг мустақил босқич даражасидаги кашфиётини олиб кирди.

Қадим юонон тилида “методос” нима маънени билдирса, IX- XV асрлар ислом мінтақа маданиятининг ілмий атамалар тили бўлмиш араб тилида “тарик” сўзи ҳам худди шу маънени, яъни “йўл”, “Борликни англаб этиш ва акс эттиришнинг ўзига хос йўли” маъносини англатар эди. Алишер Навоий ушбу атамадан ижодий фойдаланиб, ислом мінтақа адабиётида “ҳақиқат тарики” ва “мажоз тарики” деб аталмиш икки адабий йўналиш ва бадий ижод тарики мавжудлигини кашф этди ва уларнинг ҳар бирини қисқача таърифлаб, XII-XV асрларда яшаб форсий ва туркий тиyllарда ижод этган улуғ шоирларнинг қайси бири қайси йўналишга мансуб эканлигини аниқ кўрсатиб берди. Шундай қилиб, бадий ижодга Борлик моҳиятини идрок этиш ва ижодий акслантиришнинг алоҳида бир йўналиши сифатида онгли ёндошув ислом мінтақасида Европадан бирнече аср илгари мукаммал шаклланди³.

Алишер Навоий ўз умрининг охирида (1500 йилда) ёзib қолдирган “Маҳбуб ул-қулуб” рисоласидаги ушбу масалага оид назарий мuloҳазаларни кейинроқ ислом мінтақа адабиётининг ривожланиш даврлари ҳақида гапирилганда батафсил келтириб ўтамиз.

³ Афсуски, XX асрда Алишер Навоий ижодини ўрганиш масаласида улкан ютуқларни кўлга киритган аллома навоийшуносларимиз шўролар даври мағкуравий қолиллари доирасидан чишик имкониятларидан маҳрум қилингандиллари туфайли ушбу масалага етарли ётибор ажратса олмадилар.

Мавзу юзасидан саволлар:

1. Бугунги кундаги Европа адабиётшунослик илмининг асосий камчилиги нимада?
2. Ўзбекистон Президенти Ислом Каримовнинг қайси асарларида ижтимоий фанлар назариясини шакллантиришнинг ўзига хос умумметодологик асосларига махсус ётибор қаратилган?
3. “Жаҳон маданияти” тушунчаси нимани англатади?
4. Санъат, жумладан, бадий адабиёт ниманинг ҳосиласи?
5. Бадий тафаккур нима ва уни қандай таърифлаш мумкин?
6. Инсон ва жамият ҳаётининг асосий уч соҳаси ёки инсон фаолиятининг уч йўналиши қайсалар?
7. Маънавиятнинг инсон ва жамият ҳаётининг асосий соҳаларида бири сифатидаги таърифини айтинг.
8. Адабиёт нима?
9. Адабиётнинг тарбиявий жиҳати нимада?
10. Умуммінтақа адабиётшунослигининг назарий асослари кимлар томонидан яратилган?
11. Бизнинг мінтақада яратилган адабиёт назариясига оид илмларнинг биринчи йўналиши нимани ўрганади?
12. Адабиёт назариясининг иккинчи йўналишида асосий ётибор нимага қаратилади?
13. Бадий тафаккур илмининг ривожига Алишер Навоийнинг кўшган ҳиссаси нимада?
14. Бадий ижод тарики деганда нимани тушунасиз?

Адабиётлар:

1. Каримов И.А. Юксак маънавият - енгилмас куч. Т., “Маънавият”, 2008.
2. Каримов И.А. Истиқлол ва маънавият. Т., 1994.
3. Каримов И.А. Маънавий юксалиш йўлида. Т., 1998.
4. Имомназаров М.С. Миллий маънавиятимиз назариясига чизгилар.Т., 1998.
5. Имомназаров М.С. Миллий маънавиятимизнинг такомил босқичлари. Т., 1996.

6. Имомназаров М., Эшмуҳамедова М. Миллий маънавиятимиз асослари. Т., ТИУ нашриёти, 2001.
7. Имомназаров М., Саидов У. Миллий тараққиётимизнинг маънавий-ахлоқий асослари. Т., “Академия”, 2005.
8. Имомназаров М. Миллий маънавиятимиз асослари (лотин ёзувидаги) Т., Ўзбекистон файласуфлари миллий жамиияти нашриёти, 2006.

2-дарс. Исломгача эроний тиллардаги адабиёт ва унинг ўзига хос жиҳатлари.

1. Адабиёт тарихи ва маънавий камолот.

Инсониятнинг маънавий камолоти унинг бутун тарихий тараққиёти давомида, даставвал қабила ва элатлар миқёсида, кейинроқ муайян мінтақалар доирасида юз берган бўлса, охирги 150-200 йилга келиб ахборот оқимларининг ўзаро алмашуви тезлаша борган сари энди умумжаҳоний муаммога айланмоқда. Албатта, жаҳонда турли мінтақалар аро ахборот алмашинуви ҳарқанча тезлашгани билан ҳарбир миллатнинг ўзига хос маънавий қиёфалари буткул йўқолиб кетаётгани йўқ, қайтага баъзан уларга онгли эътибор кучайиб бормоқда.

Ҳарбир ҳалқнинг маънавий камолоти баъзан шиддат билан юксалиб борса, баъзан маълум даражада таназзулга юз тутиши, унда баъзан асрлар кунларга, ва аксинча, кунлар асрларга тенг бўлиши мумкин. Маънавий такомил жараёнининг ўзига хослиги шундаки, agar тарих ҳодисалари, шахслар, воқеалар ўткинчи бўлса, моддий маданият унсурлари вақт ўтиши билан емирилса, маънавият эса юксалиб, бойиб, тобора кенгроқ кўлам ва теранроқ мазмун касб этиб бораверади. Миллатнинг аксарияти маънавий таназзулга юз тутган фожей шароитларда ҳам миллий маънавият йўқолмайди, кўлам ва мазмунда ўзи етишган камолот босқичини йўқотмайди. Бунда миллий тил ва бадиий адабиётнинг ҳам хизмати жуда катта эканлигини назарда тутиш керак.

Ислом мінтақа маданияти доирасига кирувчи ҳалқларнинг маънавий камолот жараёнини даврлаштиromoқчи бўлсак, ушбу уч асосий даврни алоҳида ажратиб қараш мақбул кўринади:

- 1. Исломгача турли миллатлар маънавиятининг шаклланиши** (энг қадимги даврлардан – VII ёки VIII аср бошларигача).
 - 2. Ислом мінтақа маданияти доирасида турли миллатлар маънавиятининг такомили (VIII - XV асрлар).**
 - 3. Янги давр жаҳон маданияти миқёсида миллий маънавиятлар ахволи (XVI - XX асрлар)**
- “Мумтоз форс адабиёти тарихи” курсининг мавзу доираси асосан **IX - XV асрлар**, яъни ислом мінтақа маданияти доирасида форс тилида яратилган адабиёт билан чекланади. Аммо асосий мавзуни тўғри идрок этиш учун жуда ихчам бир тарзда **биринчи** ва учинчи давр адабиётининг ҳолати ҳақида ҳам тасаввур бериб ўтиш лозим кўрилди.

2. Исломгача Эрон ва Турон ҳалқлари адабиётини даврлаштириш масалалари.

Исломгача бутун башарият, жумладан, ислом мінтақаси ҳалқлари жуда узоқ тарихий жараённи бошдан кечирдилар, буюк маънавий камолот йўлини босиб ўтдилар. Аждодларимиз аввало табиат билан муносабатда маълум уруг, қабила жамоаси таркибида ўзлигини англаб етган бўлсалар, замонлар ўтиши билан аста-секин мінтақа миқёсига чиқдилар. Бу жараённинг қандай кечганилиги ҳақида муайян тасаввур ҳосил қилиш учун гапни бизга энг яқин адабий тимсолларга мурожаат қилишдан бошлайлик:

Алишер Навоийнинг «Фарҳод ва Ширин» достони биринчи қисмида Чин хоконининг ўғли Фарҳод тилсимланган сандик сирини билиш қасдида Юнон юртига сафарга чиқади. Бу йўлда у аввал даҳшатли аждахони, сўнг зардуштий динидаги ёвузлик руҳи Ахриманни ва ниҳоят темиртанли тилсимни енгигиб ўтиб, донишманд Сукрот сухбатига етишади. Сукрот энг баланд тоф бағридаги гордан жой олган эди. Навоий шуларни алоҳида таъкидлаб дейди:

*Бу уч манзилдан ўткарганга маҳмил
Дейшиган тоз эрур тўртинчи манзил.4*

Демак, Фарҳод Сукротга етишгунча уч манзилни босиб ўтганилиги маълум бўлмоқда. Навоийнинг мажозий тасвирида **биринчи манзилдаги аждахони** - ибтидоий тош асири маънавиятида

⁴ Алишер Навоий. Муқаммал асарлар тўплами. 8-жилд. Т.-«Фан»- 1991, с. 125

инсон табиатидаги ёввойилик тимсоли, **иккинчи манзилдаги Ахримани** - бронза даври «Авесто» маданиятидаги асотир тафаккурга хос хурофотлар тимсоли, **учинчи манзилдаги темир одамни** - ўз номи билан **темир даври** - ҳарбий демократияга асосланган улкан империялар даврида олиб борилган аёвсиз қирғин урушлар ва шафқатсизлик тимсоли деб талқин қылсақ, **Фарходнинг Юононга сафари** тимсолида биз минтақа халқларининг исломгача неча минг йиллик маънавий камолот йўлини – уларнинг ўз ички душманлари - **ёввойилик, хурофот, шафқатсизлик** хислатларини бир-бир енгиг ўтиб, маънавий камолот босқичларидан **донишмандлик** сари кўтарилиб борганигини кўришимиз мумкин. Булар - бадиий адабиётдаги мажозий тимсоллар талқини. Аммо воқе хаётда ҳам минтақа халқларининг **маънавий такомили** деярли шундай изчилликда ривож олади деб тасаввур қылсақ, ҳакикатдан узоқ бўлмайди.

Ислом минтақа маданиятининг буюк назариётчиларидан, XIV асрнинг йирик файласуф-тарихчиси ва сиёsatшуноси, Амир Темурга замондош ва сухбатдош бўлган Ибн Халдун (1332-1406) ўзининг тарих илмига бағишинанган “Мукаддима” асарида **инсон жамоалари тараққиётини** икки катта **босқичга** ажратади. Улардан биринчиси - **ибтидоий жамоа**, яъни уруг ва қабила жамоаси бўлиб, бунда инсонларнинг бир жамоага уюшуви **қон-кардошлиқ** муносабатларига асосланган бўлади. Бу даврда аксарият инсонлар ўзлигини факат ўз жамоаси, нари борса, қабила ва элати миқёсида англаб етган. Маънавий камолотнинг **юқориrok босқичига** кўтарилиган инсонлар учун хос бўлган жамоани аллома **“шаҳар жамоаси”** деб атаган⁵. Асли бу тушунча факат “шаҳар” эмас, “давлат” маъносини ҳам билдирган. Юононларнинг “полис” сўзи бугун биз тушунган “шаҳар”ни эмас, Афина, Спартада **шахар-давлатларни** англатганлигини дунё тарихидан биламиз. Инсонлар жамиятида илк давлатнинг пайдо бўлиши асл ибтидоидаги шаҳарлар шаклланиши билан боғлиқ.

Агар ибтидоий жамоа одамлари энг оддий тош қуроллари воситаси билан тириклик ўтказишига уринган бўлсалар, илк шаҳар жамоаларининг шаклланиши металл эритишнинг йўлга қўйилиши билан боғлиқ. Илк шаҳар-давлатларда бронза қуроллар кенг миқёсда кўлланилгани археологларнинг тадқиқотлари ва энг қадимги ёзма манбалардан маълум. Дарвоқе, ёзувга эҳтиёж ҳам илк шаҳар-

⁵ Бу тушунча аввал Форобийда учрайди. Қаранг: “Фозил шаҳар жамоаси одамларининг карашлари”.

давлатларда пайдо бўлган. Инсоният темир қуроллардан фойдаланишни ўргангач, буюк салтанатлар даври бошланади. Чунки баъзи шаҳар-давлатлarda муайян сабабларга кўра металл эритиш технологияси ривожланиб, ўзгалардан олдинрок темир ва пўлатдан жанг қуроллари ишлаб чиқилгач, иқтисодий-сиёсий ва ҳарбий кудрат касб этган элатлар теварак-атрофдаги ўлкаларни забт этишга киришган ва бора-бора турли ўлкаларни зўрлик билан бирлаширган йирик империялар ташкил топа бошлаган. Кўйида исломгача минтақа маънавияти ривожидаги асосий босқичлар ва уларда эроний тилларда яратилган асосий адабий манбалар ҳақида жадвал келтирамиз:

5-жадвал. ИСЛОМГАЧА МИНТАҚА МАЪНАВИЯТИНИНГ РИВОЖИ ВА АДАБИЙ МАНБАЛАР

Босқичлар	Тарихий давр Ибтидоий жамоа даври (тош асри) Энг қадимги давлардан милоддан аввали 3 – мингийилликгача	Адабий манбалар Жамшид ҳақидаги асотир ва бошқа баъзи асотирлар (“Авесто” таркибида)
1-босқич - Илк маънавият унсурларининг шаклланиши	Шаҳар- давлатлар даври (бронза асри) Милоддан аввали 3-2 мингийилликлардан – 1-мингийиллик ўрталаригача	“Авесто” китоби ва “Маздаясна” эътиқоди
3-босқич – Миллат ва миллий давлатчилик ғояларининг шаклланиши	Буюк салтанатлар (империялар) даври (темир асри) Милоддан аввали	“Зенд-Авеста”, Денкарт”, “Бундахишн”, “Карнамак Артахшер Папакан”, “Худойнамаклар”, “Арта Вираф-намак”, “Ядгар Зареран”, “Драхт асурик”, “Меноги храд”,

1-мингийллик
үрталааридан
милодий 9-асргача

“Пандномалар”, монийлийка
оид асарлар ва х.к.

Энди ушбу 3 тарихий даврда яратилган адабий ёдгорликларга
қисқача түхталиб ўтамиз:

A) Ибтидоий жамоа даври асотирлари

Алишер Навоийнинг қаҳрамони Аждаҳо (Ажи Даҳака)ни енгиб
утган **биринчи манзил** ёки «Авесто»га кўра **Жамшид даври** шартли
равища аждодларимиз маънавий камолотининг биринчи босқичи -
тош асри ёхуд **ибтидоий жамоа даврига** ишора, деб қабул қилиш
жоиздир. Бу даврда инсон турли тош қуроллар ясаш ва улардан
фойдаланишини ўрганди, камон ва ўқ ёй, ибтидоий сопол идишлар
кашф этилди, ибтидоий чорвадорлик ва дехқончилик шаклланди, илк
уй ҳайвонлари ва маданий ўсимликлар пайдо бўла бошлиди. Бу
даврда **аждодларимиз** руҳида инсон ҳайти учун муҳим бўлган **Она**
табиатга меҳр, ер, сув, оловни эъзозлаш, яратувчилик меҳнатини
улуғлаш каби маънавий фазилатлар пайдо бўлди. Улар аста-секин
табиат ва инсон аро **уйғунлик мавжудлигини** хис эта бошлиди,
меҳнат завқини түйиши.

Албатта, бу даврда ҳануз ёзув ихтиро қилинмаган, шу
сабабли ёзма манбалар ҳақида гап бўлиши мумкин эмас. Умуман,
ибтидоий жамоа одамлари ижтимоий ҳаётнинг иқтисод, сиёsat,
маънавият каби турли соҳаларини бир-биридан ажралмаган ҳолда
тасаввур этгандар. Бу даврда иқтисодий эҳтиёжлар, хукуқ ва ахлок,
дин ва санъат бир-биридан алоҳида, мустақил ҳолда тасаввур этилган
эмас. Шу сабабли бизнинг бу давр маънавияти ҳақидаги
мулоҳазаларимиз ҳам қадимшуносларнинг турли ашёвий
топилмалари, ҳамда кейинги давр манбаларида, жумладан «Авесто»
китобида ўз аксини топган маълумотларга таянади.

Биринчи мисол: «Авесто»нинг бизгача сақланиб етиб келган
тўрут қисмидан бири «Вендидад» китобининг **учинчи боби**
дехқончилик, хонаки чорвадорлик, оила, покиза ҳаёт, оловни
улуғлашга бағишланган. Бу боб Ахура Маздага саволлар ва унинг
жавоблари асосига курилган.

Жумладан, Зардушт шундай савол беради:

- Эй, моддий оламнинг яратувчиси! Ер юзида қайси ўлка сенга
энг мақбулдир?

Ахура Мазданинг жавоби:

- Қаерда тақводор инсон ўзига оила қурса, унда олов ва сут, аёл
ва фарзандлар, чорва бўлса, ўша ўлка мақбулдир, бундай ўлкада чорва
ҳам мўл, аёл ва фарзандлар ҳам мўл, олов ва турли неъматлар ҳам,
озуқа ва итлар ҳам мўл, тақводорлик ҳам ортиқдир...

Эй, Зардушт Спитама! Қаерда галла, ўт-ўланлар, емиши учун
турли сабзавот ва мевалар кўп етиширилса, қўриқ ерлар сугорилиб,
ботқоқликлар қутилиса, қўй ва моллар кўп боқилиса, улар гўнги ерга
(тупроққа) солинса, ўша ўлка энг мақбул ўлкадир. Кимки бу ерга, эй,
Зардушт Спитама, ўнг ва чап қўли билан ишлов берса, ўша,
дарҳақиқат барака топади.

Севгувчи эр ўз маҳбубаси-аёлинни юмшиқ ўринда қандай эркалаб,
унга ўғил ё бошқа фарзанд баҳши этса, дехқоннинг ерга ишлов бериши
ҳам шунга ўхшишидир.

Шунда ер унга айтади:

- Эй, инсон, сен мени ўнг қўлинг ва чап қўлинг билан парвариш
этсанг, чап қўлинг ва ўнг қўлинг билан ишлов берсанг, мен сенга мўл
ҳосил ва турли неъматлар етказиб бераман.

Ким агар бу ерга ишлов бермаса, эй, Зардушт Спитама, агар
ўнг қўли ва чап қўли билан ерни парвариш этмаса, ер унга айтади:

- Эй, инсон, сен менга парвариш бермас экансан, билки, абадул-
абад ўзгалар эшиги олдида саргайиб, тиланиб турувчилар қаторида
бўласан, сенинг олдингдан эртаю кеч турли таомларни олиб ўтишиади
(сен эса қараб қола берасан)...

Ким галла экса, у тақводорлик уруғини экади, галлани ўриб
янчишига тайёрлашганда, девларни тер босади, тегирмонни ун
тортишига ҳозирлашганда, девлар тоқати тоқ бўлади, ундан ҳамир
қоришига киришганларида, девлар зор қаҳшаб фарёд чекишиади,
ҳамирдан кулча ясаб, тандирга ётишганда, девлар даҳшатдан уввос
тортишиади».

Иккинчи мисол: Яна «Вендидад» китобининг **иккинчи** бобида
Жамшид (асли Йима ваҳишта - гўзал Йима) **ҳақидаги асотир** (миф)
баён қилинади. Ушбу асотир мазмуни куйидагича:

Бутун оламлар парвардигоридан Зардуштга пайғамбарлик
рутбаси иноят бўлгач, у тангрига мурожаат килиб сўрайди:

«Эй, бутун дунёнинг яратувчиси, муқаддас зот Ахура Мазда
(Олий билимлар эгаси)! Сен мендан илгари инсонлардан қай бири
билан суҳбат қилгансан, кимга илк бор Ахура Мазданинг муқаддас
динидан таълим бергансан!»

Олий билимлар эгаси бўлмиш ягона тангри унга шундай жавоб қиласди:

«Эй, Ҳақ бандаси Зардушт! Сендан шгари мен ишк бор инсонлардан Йима (Жамшид)га, чорва ва ишлқи подалари эгаси ўшал гўзал инсонга хабар йўлладим. Мен унга: «Эй, Вивахвант ўғли гўзал Йима! Сен менинг динимни ўрганиб, уни ҳимоя этишига тайёргарлик кўргин», дедим. Аммо, эй, Зардушт, ул гўзал Йима шундай жавоб қиласди:»Мен бундай вазифа учун яратилмаган бўлсам, ўқимаган бўлсам, мен дин-эътиқодни чуқур ўзлаштириш ва ҳимоя қилишига қодир эмасман». Шунда, эй, Зардушт, Мен - Ахура Мазда - унга буюрдим: «Агар сен, эй, Йима, менинг динимни ўзлаштириш ва ҳимоя қилишига тайёр бўлмасанг, унда мен яратган дунёни обод қил, кенгайтириш. Сен ушибу ер юзини ҳимоя қилишига, эҳтиётлашга ва бошқариб туришига масъул бўл!» Ва, эй, Зардушт, ул гўзал Йима менга жавоб қиласди: «Мен сен яратган дунёни обод қиласман, уни кенгайтираман, уни ҳимоя қилишига, эҳтиётлашга, бошқариб боришига мен тайёрман.»⁶

Шундан сўнг 900 йил давомида Йима (Жамшид) ер юзини обод қилиб, тури хунарларни жорий қиласди. Бой мoddий маданият бунёд этилади. Аммо умрининг охирида Жамшид эришилган ютуқлардан турурланиб кетиб, кибрга берилади. Ўзини «яратувчи» эълон қилиб, бутун халқдан ўзига сажда қилиш, сигинишни талаб қила бошлайди. Шунгача, ривоят қилишларича, ўлим ҳам, касаллик ҳам, совуқ ҳам, очлик ҳам бўлмаган экан. Жамшид ўзини «худо» деб эълон қилгач, ер юзига ўлат тарқайди, очлик ва қаҳратон совуқ бошланади. Ва охирнатаижада даҳшатли ёвуз куч - Ажи Даҳака (Фирдавсий “Шоҳнома”сига кўра Заххок) юртга бостириб кириб, ўз хукмронлигини ўрнатади ва минг йил эл-юрт зулм ва зулмат ичидаги колади.

Бизнинг назаримизда, ушбу **асотир**⁷ якунидаги фожиада тош даври маънавиятидаги ноқисликка, янги маънавий босқичга ўтиш эҳтиёжидан туғилган инсон онгидаги бўхронга ишора бордир. Инсонни бу бўхрондан кутқариш учун эса илоҳий ваҳий лозим бўлган, яъни ибтидоий одам шуурини илк бор илоҳий нур ёритган.

Б) «Авесто» китоби ва «Мазда ясна» эътиқоди.

⁶ Брагинский И. С. Из истории таджикской и персидской литературы. М.-«Наука»-1972, с. 50-51.

⁷ Асотир нима деган саволга кейинроқ мукаммал жавоб берилади.

«Авесто»да тош аспи маънавияти унсурлари акс этганини кўрдик. Аммо бу китобда улар **асотир** кўринишида акс этган ўтмиш хотиралари, холос. «Авесто» маънавиятининг асл моҳияти уларда эмас. «Авесто» китобида қадим аждодларнинг неча минг йиллик маданий мероси ўз аксини топган. Аммо унинг яхлит тизимга уюшуви, бизгача етиб келган асос моҳияти Зардушт (асли китобда “Заратуштра”) номи билан боғлиқ. Зардушт «гоҳ»лари неча минг йиллар давомида уни табаррук туттган инсонлар томонидан илоҳий ваҳий, деб тан олиб келинди. Бугун бу ҳақда аниқ бир нарса дейиш имкондан ташқари. Куръони каримда Зардушт пайгамбар сифатида, «Авесто» ёки унинг узвий бир қисми илоҳий китоб сифатида эсга олинмаган. Аммо шуни ҳам алоҳида қайд этиш лозимки, илоҳий китобда Зардушт ёлғон пайгамбарлар сифатида фош этилган ҳам эмас, «Авесто» ҳақида маҳсус раддия ҳам билдирилмаган. Ушбу сир ёлғиз Аллоҳга аён.

«Авесто»⁸ китобининг мазмун-моҳияти ҳақида сўз юритишдан аввал бу қадим манба қайси замон ва қайси халққа тегишли деган саволга жавоб қидириб кўрайлик.

Зардушт «Гоҳ» ларидан бирида башарият тарихи **уч даврга бўлинади:** 1-давр - ибтидоий тузум бўлиб, ер юзида эзгулик ҳукм сурган, инсонлар гуноҳ нима билмаганлар. Аммо Вивахвант ўғли шоҳ Йима (Жамшид) «одамларнинг кўнглини олмок учун» уларга гўшт ейишни ўргатган. Шундан сўнг 2-давр - эзгулик ва ёвузлик аро аёвсиз кураш даври бошланган. 3- давр - келажак бўлиб, эзгулик ёвузлик устидан галаба қозонгач бошланади.

Қадим юонон тарихчиси Плутарх Зарадуштра Троя урушидан 6 минг йил илгари туғилган деб хисоблаган. Агар Троя уруши милодий эрадан 1200 йил илгари юз берганини назарда тутсак, бу гапга кўра Зардушт яшаган давр бугунги кундан 9 минг йил олдин бўлиб чиқади. Аристотель Зардушт вафотини Платон (мил. авв. 428-348 й.) вафотидан 6 минг йил илгари бўлган деб кўрсатади. Гермодор ва Гермини Зороастр (юончча талаффуз) Троя урушидан 5 минг йил илгари яшаган, деб хисоблайдилар. Зардуштийлик дини ва унинг тарихини жиддий ўрганган олим Мэри Бойс бу диннинг шаклланиш даврини милодий эрадан илгариги XIV-XII асрларга тааллуқли деб топади. Яқингача ҳам бир қатор олимлар Зардушт пайгамбарлик эълон қилган даврни милодий эрадан олдинги VII асрга оид деб

⁸ Китобининг асли номи «Апастак» бўлиб, парфиёна тилида «матн», ёки бошка талкинларга кўра «тайин этилган», «мукаррар қилинган» «ўрнатилган» маъноларини билдиради.

келдилар. Аммо 2001 йилда инглиз тилида нашр этилган “Зороастрим” китобининг муаллифи Питер Кларк⁹ бугунги кунда кўччилик олимлар Мэри Бойснинг фикрига қўшилишларини таъкидлайди.

Дарҳақиқат, Зардушт «гоҳ»лари тил жиҳатидан «Авесто»нинг асотир тафаккур акс этган қисмларидан қадимиyroқдир¹⁰. Бу Зардустнинг тафаккурда ўз замондошларидан бир неча аср ёки минг йиллар илгарилаб кетиб қолганини англатадими ёки «гоҳ»лар матни вахий бўлиб, Зардушт пайғамбарлик рутбасига сазовор этилганми? Бу саволларга жавоб топиш бугунги илм даражасида имкондан ташқари.

Ҳар ҳолда ўлкамизга Искандари Мақдуний лашкарлари билан эллинизм таъсири етиб келгунга қадар бўлган энг қадимги мукаммал шаклланган диний эътиқод «Авесто» китобларида акс этган «Маздаясна» эътиқоди бўлиб, уни Янги давр фанида кўпинча пайғамбари номи билан «зардустийлик» деб келишган. Дунёда кенг тарқалган яна бир янгилиш тасаввур зардустийликни фақат Эрон билан боғлаб, «Авесто» маданиятини шу худудгагина алоқадор деб билишдир. Тўғри, сосонийлар империяси даврида (мелодий 224-651 йиллар) Эронда зардустийлик давлат дини даражасига кўтарилиган. Аммо бу диннинг келиб чиқиши сосонийлардан эмас, ҳатто Искандар Мақдунийдан ҳам илгариги даврга тўғри келиши назарда тутилса, **сосонийлар даври зардустийлиги** мутлақо иккиласи ҳодиса эканлиги аён бўлади¹¹.

«Авесто» тили ўша даврларда ёқ жуда қадими тил ҳисобланар ва илк Эрон империясининг расмий тили бўлмиш қадим форс тилидан жiddий фарқ қиласи эди. «Авесто» тили шарқий Эрон тиллар гурухига кирувчи сугд, хоразмий ва бохтарий тиллари билан кўпгина умумий жиҳатларга эга. Бу асар Искандар истилоларидан анча илгари 12 минг бузоқ терисига ёзилганлиги кўп манбаларда ёд этилади. «Авесто»нинг қадимги ҳисобланган қисмларида темир курол ҳақида маълумот йўқ, аммо **сарик рангли болта** ҳақида эслаб ўтилади. Шу каби далиллар асосида «Авесто» китоблар мажмуасининг асосий қисмини **бронза асли** маданий қатламидан бизгача етиб келган буюк мерос сифатида олиб қарашимиз мумкин. Милодий эрадан илгариги V-I минг

⁹ Бу китоб 2010 йилда Тошкентда рус тилида босилиб чиқди. Таржимон - санъатшунослик фанлари номзоди, Тошкент консерваторияси профессори А.Х.Хакимова. Кейинги иқтибослар шу китобдан олинди.

¹⁰ Ушбу матнни тайёрлашда тарих фанлари доктори Мирсадик Исҳоков ва фалсафа фанлари номзоди Муҳаммаджон Қодировларнинг материалларидан фойдаланилди.

¹¹ Питер Кларк ҳам ўз китобида бугунги мавжуд «Авесто» матнлари мазмунидаги тарихий қатламларни фарқлаш йўлидан борган.

йилликлар орасида шаклланган бу маданий яхлитлик, албатта, ўз ички такомил босқичларига эга бўлган. Башарият такомилидаги бу маданий босқичларнинг биринчисини юкорида келтирилган мисолларга таянган ҳолда Жамшид (Йима) даври, яъни **ибтидой жамоа маданиятига** оид деб ҳисобласак, ундан кейинги босқични шартли равишда **илк шаҳар жамоаси маданиятига** мос келади, деб қайд килиш мумкин.

Қадим Турон юртида милодий эрадан 3-4 минг йил илгари хозирги Туркманистон худудида ва милоддан илгари XVIII-XVII асрлар Жанубий Ўзбекистонда илк (ибтидой) шаҳар жамоалари пайдо бўла бошлаганини археологларимиз далиллаб беришиди. Туркманистон жанубида Намозгоҳтепа, Олтинтепа, Ўзбекистонда Сополлитепа, Жарқутон ёдгорликлари бу илк шаҳар маданиятининг намуналаридир. Шундай килиб, металтургиянинг кашф этилиши, тош куроллар ўрнини мис ва бронза куроллари эгаллай бошлиши, тарихчилар шаҳодатига кўра, **илк шаҳар жамоалари** пайдо бўла бошлаган даврга тўғри келади. Бу босқичда ўтроқ дехқончилик асосида вужудга келган доимий манзилгоҳлар аста-секин илк шаҳарлар даражасига қараб юксалиб борди. Шаҳарда хунармандчилик ривожланиб, турли касбдаги кишиларнинг алоҳида маҳаллаларга бирикуви юзага келди.

Хуллас, қадимшунослирнинг охирги кашфиётларига таянган ҳолда исломгача аждодларимиз маънавий камолотининг **иқкинчи босқичи**, яъни **илк шаҳар жамоаси даври** бугунги кундан камида 4-5 минг йил илгари бошланиб, то Искандар Мақдуний замонигача ёки, аниқроғи, Эронда Ҳахоманишийлар (Ахмонийлар) сулоласи империя тузган милодий эрадан олдинги VI асртагача давом этгани ҳақида тахмин қилиш мумкин.

Зардустийликнинг ҳақиқий ватани ҳақида «Авесто» китобининг ўз маълумотларига суюниш, бизнингча, энг мақбул йўллариди. «Авесто»нинг бугунгача сакланиб қолган қисмларидан бири «Вендидад»нинг биринчи бобида Ахура Мазда яратган қуйидаги ўлкалар саналади:

- 1) Арийана Ваэжа, 2) Гава, 3) Моуру (Марғав), 4) Бахди, 5) Нисая, 6) Харойива, 7) Вэкерта, 8) Урва, 9) Хнента, 10) Хараҳвавти, 11) Хетумант, 12) Рага, 13) Чахра, 14) Варна, 15) Хапта Ҳиндав, 26) Упа Аодшу Рангхайя.

Олимларнинг тадқиқотлари натижасида булар тақрибан кейинги давр тарихчилари асарларидан маълум бўлган қуйидаги ўлкаларга тўғри келиши аниқланди: 1) Хоразм ёки Аму ва Сир оралиги, 2)

Сүфдиёна, 3) Марғиёна, 4) Бактрия(Балх), 5) Ниса (Парфия пойтахти - хозирги Туркманистаннинг жануби ғарбидаги), 6) Ҳирот, 7) Кобул, 8) Тус(хозирги Эроннинг Хурносон вилояти), 9) Гўргон (Астробод), 10) Ҳорут, 11) Гилманд(хозирги Афғонистон шимоли), 12) Рей (Техрон), 13) Чехра (Хурносонда), 14) Варна (Каспий денгизи жануби), 15) Ҳинд дарёси бўйлари, 16) Рангҳа дарёси келиб чиқувчи жой. Албатта, баъзи жой номлари ҳануз баҳсли. Аммо «Авесто» китобида санаб ўтилган ерлар бутун Мовароуннаҳр ва Хурносон (жумладан, хозирги Эрон ва Афғонистоннинг шимолий ўлкалари)ни қамраб олганлиги кўриниб турибди. «Авесто»да Орол денгизи (Ворукаша ёхуд Вурукаша) ва Амударё (Дойтия) ҳам таъриф этилади. Демак, дастлабки даврларданоқ «Авесто» китоби ва «Маздаясна» эътиқоди эроний ва туроний ҳалклар қадимдан аралашиб яшаган яхлит бир минтақани қамраб олган ва шу ҳудудда таркалгандир¹². Дарҳакикат, «Авесто» матнлари мазмуни Фарбий Европа, Сибир ёки Африка, Жанубий Ҳиндистон минтақалари шароитини эмас, бевосита бизнинг минтақа иқлими, оби-ҳавоси, ер-сув шароитида табиат ва атроф-воқеликка нисбатан инсон онгига шаклланиши мумкин бўлган муносабатларни акс эттиради. Унда биз ота-боболаримизнинг она заминга, ҳалқимиз учун асосий тириклик манбаи бўлган оқар сувга, оловга ихлоси, эъзозини ҳис қиласиз, яна амалий яратувчилик фаолияти, айниқса, ерга ишлов бериш ва чорва ҳайвонларини парваришлаш, аждодларимиз тарафидан ниҳоятда муқаддас бир юмуш, олий ибодат деб қабул қилинганининг ҳам гувоҳи бўламиз.

Биз зардустийлик деб ўрганган эътиқод тизими асли манбада «Мазда ясна даэна» (Маздага сифиниши дини) деб аталган. «Мазда» сўзи «билим», «билимдонлик», «донолик», «донишманд», «оқил» маъноларига тўғри келади. Бу сўз олдига «Ахура» (яни «парвардигор», «бутун борликнинг эгаси, ҳукмрони») сўзи кўшилса - **Ахура Мазда** исми ҳосил бўлади. Шундай қилиб, «олий, илоҳий билимлар эгаси» маъносидаги Ахура Мазда «Маздаясна» динида ягона тангри, борликни яратувчи кудратли зотнинг номланишидир.

IX асрда тузилган «Авесто» шарҳига оид «Денкарт» китобида баён этилишича, қадим замонда Наврўз байрамига тайёргарлик кунларида муқаддас хаома ичимлиги тайёрлаётган коҳинлардан бири Зардуст саҳар палласида дарё ёқасига сув олиш учун тушади. Шу пайт дарёning ўртасида нурли сиймо - Ахура Мазданинг Воху Маана

¹² Эроний ва хиндий тиллар гурухида сўзлашувчи қабилалар, тилшунос олимларнинг фикрига кўра, хозирги Марказий Осиё ҳудудига милодий эрадан аввалги XVI-XII асрларда кириб келганлиги тахмин қилинади.

(Эзгу фикр) исмли малаги пайдо бўлади. Воху Маана Зардустни етаклаб Ахура Мазда ҳузурига олиб боради. Борлиги эзгу нур билан йўғрилган Ахура Мазда замину осмондаги барча эзгу нарсаларнинг яратувчиси эканини Зардустга билдиради. Одамлар орасида Ахура Маздага сифиниши эътиқодини ёйишга Зардустни масъул қилиб, уни «пайғамбар», яъни хабар етказувчи қилиб танлаганини эълон қиласи. Бу тасвир асосида бир катор тадқиқотчилар «Мазда ясна» дини ваҳий орқали билдирилган илк самовий эътиқод бўлса керак, деб тахмин кильмокдалар. Дарҳакиқат, тош аспи, ҳатто бронза аспи одами ҳам ўз-ўзидан Коинотни ҳис қилган, Коинот сирини ўша даврда англаб ета олган деб ўйлашга ақл бовар кильмайди. Зардуст «гоҳ»лари эса коинотдан, чексиз борлик ва унинг моҳиятидан сўзлайди, бир сўз билан айтганда, «гайб сири»дан огоҳ этади.

Зардуст яшаган даврда аждодларимиз ҳали ёзувга эга эмас эдилар. Зардуст Ахура Мазда пайғамбарлигига мушарраф бўлиб, у ҳақида, унинг дини ҳақида турли қавмларга хабар етказган замонларда ўша даврнинг турли қабила ва уруғ маъбудларига бағишлиланган мадҳия-алқовлар, афсун ва асотирлар кенг тарқалган бўлган. «Авесто» китобини тўлалигича Зардустга нисбат берилмайди. Асли «Авесто» таркибида бевосита Зардуст номи билан боғлиқ матнлар «Ясна» китоби таркибиға киритилган 17 кўшиқдан иборат «Гоҳ»лар бўлиб, илмий адабиётларда уларни «Гате» ёки «Госе» ҳам дейишади. «Госе» сўзининг сўнгги ундош товуши ўта юмшоқ тиши оралиги, тил олди сирғалувчи товуш бўлиб, талаффузи инглиз тилидаги th ҳарфлари билан ифодаланувчи товушга яқиндир. Бу товуш тилнинг тарихий ривожида кейинчалик ҳ ҳарфи билан ифодаланувчи товушга айланган ва бугунги кундаги «дуюҳ», «сегоҳ», «чоргоҳ» атамалари таркибида учровчи «мусиқий оҳанг», «қўшиқ» маъносига мос келувчи «гоҳ» тушунчаси ўша қадимги «госе»дан келиб чиққандир. Зардуст «гоҳ»лари мадҳия ва панд йўсинидаги муножотлардан иборат бўлиб, «Авесто» таркибидаги «Ясна» китобининг 28-34, 43-51 ва 53 бобларини ўз ичига олади. Улар асосан Ахура Мазда динини тарғиб этишга бағишлиланган.

«Гоҳ»ларда Ахура Мазда ваҳийси билан тинч-осойишта яратувчиликка қаратилган ҳаёт, оқил ва адолатли ҳукмдор раҳнамолиги, ижтимоий ва маънавий уюшиш ғоялари ташвиқ этилади. Турли ҳурофотлар, ёлғон ва талончилик, ҳуда-бехуда ҳайвонлар қонини тўкиб, курбонликлар ўтказиш қаттиқ қораланади. Ҳар бир қабила, ҳар бир уруғ ўзи ўйлаб топган ёлғон маъбудаларга сифиниб, бефойда курбонликлар келтириб юрган бир пайтда, Ахура

Мазданинг якка-ягона парвардиғор, Борликнинг донишманд, одил ва оқил мутлақ яратувчи ва идора этувчи эканини эълон этиш, инсонларни ягона тангрига эътиқод этишга чақириш ўша давр одамлари учун улуғ бир маънавий ҳидоят эди.

Агар Зардуст инсоният тарихидаги минглаб пайғамбарларнинг биринчиларидан бўлган бўлса, унинг тақдири ҳам ўша қадим давларда ўтган ўзга набилар ҳаёти сингари мураккаб ва мешақатли бўлди. «Гоҳ»ларда Зардуст ўзи бунга ишора этади:

Бошим олиб қайга кетай, қайдан топай панох,
Ўз қавмимда тан олмаслар, кувлар уруғдошларим...

Умуман «гоҳ»ларда ҳаётий воеа-ҳодисаларга ишоралар жуда кўп. Уларда ўй ҳайвонларини, моддий неъматларни етиштириш тарғиботи жуда изчил бўлиб, табиат бойликларини нест-нобуд этиш, талончилик, инсон меҳнатига беписандлик ёвузлик сифатида талқин этилади. Ҳамма ёвузликларнинг боши ёлғончилик ва бебошвок ҳаётдадир.

Қандай бўлганда ҳам, Зардуст гоҳлари «Авесто» матнининг умумий руҳидан маълум даражада фарқ қилиб, китобнинг кўпчилик қисми, юқорида айтиб ўтганимиздек, инсоният онги такомилида асотир тафаккур боскичини акс эттиrsa, Зардуст «гоҳ»лари **тавҳид** гоялари асосига курилган, яъни олам ва коинотнинг ягона Парвардиғоридан хабар беради, уни Олий ва муқаддас (аниқроғи, мутлақ) билим эгаси - Ахура Мазда деб улуғлайди. Демак, «Авесто» китобининг ilk шаклланиш даври тарихий нуқтаи назаридан, милодий эрадан бир неча минг йиллар илгари башарият маданий-маънавий такомилида юз бера бошлаган эврилиш билан боғлиқ бўлиб, ибтидоий уруғ-жамоалар ўрнига ilk сугорма дехкончилик ва хонаки чорвадорлик заминида шакллана бошлаган ilk шахар маданияти, давлатчилик асосларининг вужудга келиши, яхлит мағкуравий тизимга эҳтиёж туғилиши каби ҳодисалар билан бевосита алокадордир.

Зардуст даврида «Авесто» китоби бирор бир тартибга солиб йигилганмиди, бунинг аниқ жавоби йўқ. Ҳар ҳолда Зардуст ягона Ахура Мазда номидан пайғамбарлик килгани, факат унинг хабарини элга ёйишга урингани эътиборга олинса, дастлабки таълимот кейин шаклланган «Авесто»дан фарқ қилган, унинг таркибидаги муқаддас дуо ва такбирлар ёлғиз Ахура Маздага бағишланган бўлиши керак.

«Авесто» китоби дастлаб 12 минг ошланган бузоқ терисига ёзилганлиги ҳақида маълумотлар борлигини эслаб ўтдик. Ўша қадим китобда 1200 боб (фрагард) мавжуд бўлиб, қадим юнон тарихчилари хабар беришича, 2 миллион мисра (сатр)ни ташкил этар экан. Бу китобнинг бизгача яхлит етиб келишига Искандари Мақдуний истилолари монелик қилди. Ривоятларга кўра, Искандар китобнинг бир нусхасини Юоннга жўнатиб, қолганларини ёқиб юборган. Кейинчалик аршакийлар шоҳи Валаҳш «Авесто» китобининг коҳинлар ёдида қолган барча қисмларини тўплаб, асл матнни тиклаш ҳақида фармойиш берган. Сосонийлар сулоласининг асосчиси Ардашер Попокон(227-243) даврида донишманд вазир коҳин Тансур раҳбарлигига «Авесто» матни қонунлаштирилган. Ардашернинг ўғли Шопур (243-273) ушбу китобга кирмай қолган илми нужум, тиб, риёзиёт, фалсафага оид қисмларни тўплаб, қайта кўчиритирган. Кейинги шоҳлар даврида матн яна бир неча марта бойитиб кўчирилган. Ушбу иккинчи қайта йигилган матн, «Денкард» китобида берилган маълумотларга кўра, 348 бобни ўз ичига олувчи 21 китобдан иборат бўлган. Ҳар бир китоб «наск» деб аталган. «Денкарт» китобида ушбу ҳар бир китобнинг мавзу ва мазмуни қисқача баён этилган. Жумладан, 1-наск - саҳоват, валийлик, савоб ишларнинг мазмун ва моҳияти; 2-наск - диний маросим амаллари; 3-наск - Маздаясна эътиқоди моҳияти ва ақидалари; 4-наск - оламнинг яралиши, фано ва бақо, руҳларнинг қайта тирилиши, киёмат; 5-наск - самовот, осмоний жинслар, 6-наск - покланиш қонун-қоидалари; 7-наск - коҳинлар ҳаёти тартиб-интизоми; 8-наск - хуқукий масалалар; 10-наск- Виштаспнинг шоҳлик замони, унинг Зардуст шаҳрларини қабул қилиши; 11-наск - башарият тарихи; 12-наск - Зардустнинг эзгу ишлари ва болалик даври; 13-наск - ҳар бир ишда адолат, ўзгалар ҳакидан қўрқиши, тош-тарози ўлчовида ҳалоллик, авлиёлар тарихи; 14-наск - аддиявий ва ҳарбий қонунлар, никоҳда кондошликка қарши қонунлар, дин ахкомлари; 15-наск - коҳинлар таълимни, мунажжимлик ва фолбинлик; 16-наск - мулк ва оила хуқуқи; 17-наск - девлар ва жинларга қарши амаллар, расм-руsum, таҳорат ва бошқа покланиш қоидалари (ушбу қисм мавжуд «Авесто» матнida «Видевдат» аталувчи бугунгача тўлиқ етиб келган китоблардан бирининг мазмунини ташкил этади); 18-наск - руҳнинг у дунёдаги «саргузаштлари» хусусида бўлиб, 19-наск - Ахура Мазда ва унинг олти улуғ фариштаси- ўлмас муқаддас малоикалар шаънига алковлардан иборат. Ушбу 21 китобнинг умумий ҳажми олимлар хисоблашига кўра 345700 сўздан иборат бўлган.

Араблар босқини натижасида бу кейинги йигилган китоблар ҳам йўқ қилинган. Ҳозирги кунда Ҳиндистонда истиқомат қилувчи **парслар** («Маздаясна» динига эътиқод қилувчилар)нинг олий коҳинлари қўлида фақат «Видевдат» («Девларга қарши амаллар») наски тўлигича ва яна бир неча китобдан айрим қисмлар сақланиб қолган. Бу мавжуд матн 4 китоб, 140 боб, 83000 сўздан иборат бўлиб, сосонийлар даври матнининг бор-йўғи чорак қисмини ташкил этади. Ушбу асарнинг бугунгача етиб келган энг қадимги кўллэзмаси 1278 йилда кўчирилган.

Ўрта форс тилидаги аталиши «Видевдат» бўлган (янги давр талаффузига кўра «Вандидод», «Авесто» тилида эса «Ви даево датем») биринчи китоб 22 боб (**фрагард**) бўлиб, унинг биринчи боби юкорида санаб ўтилган ўлкалар таърифидан иборат, яъни ўзига хос Авесто жўрофиясини ташкил этади. Иккинчи бобда афсонавий подшоҳ Жамшид (Йима Ҳшайта) ҳақидаги асотир баён этилади. Учинчи боб, юкорида ҳам тилга олинганидек, дехқончилик, хонаки чорвадорлик, оила, покиза ҳаёт, оловни улуғлашга багишланган. Бу боблар Ахура Маздага саволлар ва унинг жавоблари асосига курилган. Китобнинг қолган боблари покизалик, гуноҳ ва савоб, ҳалол ва ҳаром масалаларига багишланган бўлиб, улар қаторида оловни, сувни, тупроқни уй ҳайвонлари, турли дараҳт ва ўсимликларни улуғлашга багишланган дуолар ҳам мавжуд.

Маздаясна динида покизалик масаласига алоҳида эътибор қаратилади. Масалан, «Вендидад»нинг 17-боби тўлигича соч ва тирноклар парваришига багишланган. 18-бобда Ахура Мазда хабарчиси Суруш ва унинг қуши ҳисобланмиш хўрот тўғрисида маълумот берилади. 19- бобда ёвузылик даҳоси, девлар хукмдори Ангра Майнюнинг ёлғончилик деви Друж (ҳозирги форс тилида «дуруғ», яъни “ёлғон”) ёрдамида Зардуштни йўлдан оздириш ёки ўлдириш учун уринишлари тасвир этилади. Зардуштга Ахура Мазда мадад беради. Чексиз замон тимсоли Зурван (Зрвана акарана)га муножот ҳам ушбу бобдан ўрин эгаллаган. Бобда вафот этгандар рухи Чинвад_кўпригидан ўтиши жараёни тасвирланади. Ёвузылик рухи бу кўприкдан ўта олмай тубсиз зулматга қулайди, такводор инсонлар рухи эса Чинвад кўпригидан эсон-омон ўтиб, Хара тогига Гаронмана маконига етишадилар. 20-бобда энг биринчи табиб - Трита ҳақида, 21- бобда эса муқаддас ҳўқиз, булутлар, күёш, ой, юлдузлар, бепоён ёғду ҳақида мадҳиялар, 22-бобда Ахура Мазданинг Ангра Майнюга қарши жангига ва Зардуштнинг бу курашдаги иштироки ҳақида гап боради.

Иккинчи сакланиб қолган китоб «Висперед» (ўрта форс тилида Виспарт, «Авесто» тилида «Висператаво» - “Барча қудрат эгалари”) дейилади. Унда «карде» («Авесто» тилида «керети») деб аталувчи 24 боб мавжуд бўлиб, тўлигича дуолар китобидир. Бу китоб бирмунча кейин «Авесто» таркибига қўшилган деб тахмин қилинади.

Учинчи китоб «Авесто»нинг энг катта қисми «Ясна» бўлиб, 72 бобдан иборат¹³. Аввал ҳам айтиб ўтганимиздек, ушбу китобнинг 28-34,47-51 ва 53 боблари Зардушт «Гоҳ»ларидан иборат бўлиб, илгари улар бошқа китоблар таркибида бўлгани тахмин этилади. «Авесто» яхлит китоб ҳолига келтирилган пайтлардаёқ ушбу «Гоҳ»лар тилини тушуниш ҳатто «Маздаясна» дини коҳинларига ҳам осон бўлмаган.

«Ясна» китобининг бошқа боблари асосан қурбонлик пайтида ўқилувчи дуолар, турли эзгу зотлар шаънига мадҳиялар, маросим дуолари, муқаддас хаома ичимлигини, эзгулик хабарчиси Сурушни, сув рухи -Ардвисура Анахитани ва олов рухи Атарни мадҳ этиувчи, ёвуз рухлар -девларни ҳайдовчи дуолардан ташкил топган. Зардушт «Гоҳ»лари орасида «Ясна ҳапта ҳатай»(етти боб Ясна) деб номланувчи қисм мавжуд бўлиб, бу 7 боб «гоҳ»ларга тенг тутилади. Ундан муқаддас ҳўқиз рухи ва унинг яратувчисига аталган мадҳиялар ҳам жой олган. «Ясна» китобининг баъзи боблари бир-бирини маълум даражада тақрорлайди.

Тўртинчи китоб- «Яштлар» деб аталади. Ундаги ҳар бир боб («яшт») алоҳида бир маъбуд ёки маъбудага («йазат», форсча «йазид» сўзи шундан; «ясна» сўзининг ҳам келиб чиқиши «яз» ўзагидан бўлиб, бу ўзак «сажда», «таъзим», «топинч» маъноларига эга, яъни «йазид» ёки «йазат»нинг асл маъноси «топиниш обьекти», «маъбуд» бўлиб чиқади) багишланган мадҳия- алқовлардан («яшт»- «алқов», «мадҳия») тузилган бўлиб, жами 22 бобдан иборат. Ҳозирги пайтда Эронда, хижрий қуёш ийилдаги қатор ой номлари ушбу бобда тилга олинган маъбудлардан баъзиларининг исми билан аталган. Масалан, Мехр (Митра - нур фариштаси), Тир (Тиштрия - Муштари юлдузи), Обон (Ардвисур Анахита- сув фариштаси), Фарвардин (такводорлар рухи-“Фравашай” сўзидан). Бу номлар билан аталган маъбудалар 5,8,10,13-«яшт»ларда мадҳ этилади. Бундан ташқари Хурмуз (Ахура Мазда), Куёш (Хуршид- Хваршет), Ой (Моҳ), Суруш, Баҳром (Вараҳран – Вертрагна - чақмок фариштаси), Хома (муқаддас ичимлик) ва бошқаларга багишланган алқовлар (гимнлар) ҳам ушбу тўпламдан ўрин эгаллаган.

¹³ «Ясна» боблари «ҳот» деб аталади.

«Авесто» ҳажми катта китоб бўлганлиги сабабли коҳинлар кундалик фаолиятида фойдаланиш учун кейинчалик унинг ихчамлаширилган шакли – «Кичик Авесто» (Хурде Авесто) яратишган.

Зардушт таълимотининг ахлоқий қарашлари ниҳоятда ибратлидир. «Маздаясна» эътиқодининг ахлоқий тамал тоши – «эзгу ўй, эзгу сўз, эзгу амал» бирлиги қоидаси ҳам шу даврдан келаётган улуг бир маънавий қадрият дейиш мумкин. Бу эътиқодга амал қилган ҳар бир инсон ибодат олдидан куйидаги ният сўзларини баралла овозда айтмоғи лозим эди:

«Кувонсин Ахура Мазда, энг лойик Ҳақ таолонинг иродаси рӯёбга чикиб, Ангра Майню даф бўлсин. Эзгу ўй, эзгу сўз ва эзгу амални алқайман. Ўзимни буткул эзгу ўй, эзгу сўз ва эзгу ишларга бағишлиман. Қабиҳ ўй, қабиҳ сўз ва қабиҳ ишлардан юз ўғирман... Ҳақни шарафлаб дейман: «Ҳақиқат олий неъмат, бу неъматдан ул киши баҳраманд ва савоб унга бўлгайки, у агар энг эзгу Ҳақ йўлида савоб ишдан қолмаса... Маздага сигинаман, Зардушт ёвлари бўлган девларга ёвман. Ахура Мазда сўзига даъват этаман, деб имон келтираман... Нурафшон Ахура Маздага сигинишим туфайли унинг севинчига топинчу ҳамдларим, суюнчу олқишлиарим бўлсин. «Эзгуликда беназир эгам...» дея бошлайман ушбу ибодатимни...»

Хуллас, «Авесто» китобида жамланган билимлар тош асрининг охирги боскичи ва бронза асли даврида, яъни 5 минг йилдан ошик давр ичida Туронзамин ва ҳозирги Эрон, Афғонистон ва Хиндистоннинг шимолий ўлкаларида истиқомат қилган турли элат ва ҳалқлар яратган бой ва ранго- ранг маънавий меросни ўзига хос бир яхлитлик ва шу билан бирга ички мураккабликда акс эттирган бўлиб, минг афсуски, унинг жуда кўп қисми бизгача ўша даврлардаги мукаммаллигида етиб келмади. Искандари Макдуний истилолари, араблар босқини бу ўринда ҳалокатли таъсир қилди. Аммо бу бой мерос ўша қадим даврлардақ дунёнинг турли ҳалқлари маданияти тараққиётiga катта таъсир кўрсатгани буғунги кун илмiga сир эмас. Айниқса, қадим юонон маданияти (фалсафаси, адабиёти, илми) бу таъсирдан баҳраманд бўлганлигига кўплаб гувоҳликлар мавжуд¹⁴.

«Авесто»ни ўрганиш ислом даврининг биринчи боскичида анча кенг ўйлга қўйилган эди. Тарихчи Масъудий, Ибн Балхий, Табарий, Беруний ва бошқалар бу китоб ҳақида тайинли маълумотлар келтиришган.

¹⁴ Бу ҳақда қаранг: Ф.Сулаймонова.Шарқ ва Farb.T., “Ўзбекистон”, 1997, с.22-40.

Янги давр Европасида бу китобни ўрганиш XVIII асрдан бошланди ва толмас француз тадқиқотчиси Анкетиль Дюперрон (1731-1805) «парслар» орасида неча йил юриб, «Авесто» тилини ўрганиб, «Авесто»нинг мавжуд китобларини француз таржима қилди ва бу таржима 1771 йилда босилиб чиқди. Ўша даврдан бери бу масалани Европа олимларидан П. Бартоломе, Родэ, Р.К. Раск, Г. Риттер, Э. Бюрнүф, Весторгород, Ф. Шпигель, Ф. Юсти, С. Дехарле, В. Гейгер, П. Рот, Бенфей, Фр. Виндишман, Х Бартоломе, М. Хауг, К. Гельднер, И. Дармстетер, Е. Бенвенист, Ф. Альтгейм, И. Гершевич, Н.С. Ниберг ва бошқалар, парсларнинг ўзларидан чиқсан бир катор олимлар, қатор рус шарқшунослари, жумладан, Вс. Миллер, К. Коссович, К. Залеман, А.О. Погодин, В.А. Рагозина, В.В. Стuve, С.П. Толстов, Е.О. Бертельс, А.О. Маковельский, С.Н. Соколов, И.С. Брагинский ва бошқалар ўрганиб келишиди. «Авесто» китобининг илмий-танқидий матнлари ва бир қанча Европа тилларига таржималари босилиб чиқди. Аммо бу ҳақдаги баҳслар ҳануз тинган эмас.

«Авесто» мазмунида турли қабила асотирлари билан тавҳид эътиқодидан таълим берувчи қарашлар ўзаро чатишиб кетгани сезилади. Бу даврда қадим Дажла ва Фурот дарёлари оралиғида (Месопотамияда) ҳамда Нил дарёси қўйи окимида қудратли ёзма маданият яратилган, илк давлат тизими шаклланган эди. Аждодларимиз бир пайт ўша йирик давлатлар билан турли муносабатларга киришганлар. Улар яратган «Авесто» маданияти маънавий мазмунига кўра, шумер ва акkad тилларида Бобил ва Ашшур давлатлари худудида яратилган асотир маданияти ёдгорликларидан асло кам эмас, балки ортиқ бўлиши мумкин. Аммо, афсуски, Искандар Макдуний босқини туфайли юртимизнинг энг қадимги ёзма ёдгорликлари шафқатсиз йўқ қилинди, бизгача мукаммал етиб келмади. Бизнинг бу давр ҳақидаги тасаввурларимиз «Авесто» китобидан бизгача етиб келган жузвлар (қисмлар), ўзга ўлкалар қадим ёзма маданият ёдгорликлари ичидаги маълумотлар ва археологик топилмаларни қиёсий ўрганиш натижасидагина шаклланаб бормоқда. Бу даврда илк шаҳарлар маданияти вужудга келди, турли ҳунарманд тоифалари ажralиб чиқа бошлади, яхлит эътиқод юзага кела бошлади, инсон илк бор Коинот нуридан бевосита баҳраманд бўлди. Асотир тафаккурни, қабилачилик хурофтларини енгиб ўтишга илк қадам - иккиланиш, тойишлар билан огушта биринчи тетапоя қадам - қўйила бошланди. «Авесто» китобида акс этган воқелик яхлит олганда кўпроқ шу даврга мос келади. Бу

даврнинг энг буюк маънавий ютуғи илк бор, гарчи асотир тафаккур билан қоришик бир даражада бўлса ҳам боболаримиз руҳида **иљм ва имон уйғулиги** шакллана бошлагани, дейиш мумкин. Агар «Маздаясна», «Ахурамазда» сўзларида яширинган маъноларни Куръони карим «Бақара» сурасининг 255-ояти («Оят ал-курси») мазмуни билан маълум даражада мувофиқ келишига эътибор қиласиган бўлсак, ўша пайтда ҳам инсоний билимлар манбаи ёлғиз илоҳий бокий билим деб тасаввур қилинганини сезамиз. Аммо у даврлар одамининг аксарияти асотир тафаккур даражасида дунёни тасаввур қилганиклари сабабидан, Зардушт «гоҳ»лари (муножотлари)даги тавҳид ғоялари мушриклик адашувлари билан қоришиб кетган эди.

Зардуштдан кейинги асрларда унинг таълимоти ёйилган юртларда маҳаллий элатлар, қабила ва уруғлар орасида тарқалган асотир тасаввур асосидаги мушриклик унсурлари, ҳар бир элатга хос ибтидоий маъбудаларга топиниш хурофий анъаналари аста-секин Маздаясна эътиқоди билан муросага келтирилган. Натижада соғ якка худолик тизими қобигига қадим хурофий маросим ва удумлар ҳам жойлаша борган. «Авесто» китобининг такомил йўли ушбу жараённи бутун ички мукаккаблигига акс эттирувчи зиддиятли ва кўп қатламли асотир тасаввурлар ва ягона тангрига эътиқоднинг қоришиқ ифодаси сифатида намоён бўлади. Бу ҳақда илмий адабиётда В.А.Лившиц, С.Н.Соколов, Мэри Бойс, Питер Кларк сингари таникли мутахассис олимлар ҳам фикрларини баён қилишган.

«Авесто» китобида ўз аксини топган ғояларни дуалистик талқин қилиш ҳам фанда кенг тарқалган. Бунга маълум даражада «Ясна» китобининг 30-бобидан ўрин олган фанда «ахлоқий дуализм» деб номланувчи инсонлар оламига хос Яхшилик ва Ёмонлик орасидаги кураш тасвири ҳам сабаб бўлган, дейиш мумкин. Кейинчалик, милодий III-асрда яшаган Моний зардуштийликни ушбу руҳдаги талқинига ургу бериб, ўзининг машхур монавийлик бидъатини яратди. Унга кўра бу олам икки асоснинг, икки ибтидонинг, яъни ёргулек ва зулмат, яхшилик ва ёмонлик орасидаги тўхтовсиз курашдан иборатdir. Моний Ахурамазда(Хурмуз)ни ёргулек ва яхшилик илоҳи, Анхрамайну(Ахриман)ни зулмат ва ёмонлик илоҳи деб талқин қиласи ва улар ўртасидаги кураш абадий давом этади, деб ҳисоблайди. Авестонинг баъзи жойларини илоҳий учлик руҳида талқин қилишлар ҳам учраб туради.

Хуллас, «Авесто» китоблари мажмуи исломгача бўлган маданиятимиз ва маънавиятимизнинг ҳолатидан бизни анча мукаммал

хабардор қилувчи ёзма манба сифатида бекиёс қийматга эгадир ва биз уни жиддий тадқиқ ва таҳлил этмоғимиз жуда зарур. Факат ундаги баён ва услубнинг ниҳоятда ўзига хослигини унутмай, бу матнлар дастлаб яратилган давр руҳини тўғри идрок эта билмоғимиз тақозо этилади.

В) Буюк салтанатлар даври адабиёти

Минтақада аста-секинлик билан шаҳар-давлатлар ўз худудини кенгайтириб бориб, Хоразм, Сугд, Бохтар, Парфия, Марғиёна, Паркана (ёки Даван), Бақтрия, Чоч, Мидия каби ўлкаларида мустақил давлатлар шакллана бошлади. Темир қуроллар ишлаб чиқиш йўлга кўйилгач, буюк салтанатлар шаклнининг иқтисодий-харбий имкониятлари пайдо бўлди. Инсоният тарихидаги дастлабки буюк салтанатлар Дажла ва Фурот дарёлари оралиғида (ҳозирги Ироқ ва Сурия, қадимги Месопотамия худудида) Бобил ва Ашшур шаҳар-давлатлари замирида шаклланди. Милодий эрадан аввалги VI асрда эса Ахоманийлар сулоласидан Кайхусрав (ёки Куруш) минтақадаги илк буюк салтанатга асос солди. Ахоманийлар сулоласининг 200 йиллик ҳукмронлигига Искандари Мақдуний чек қўйди. Ундан кейин Селевкийлар, Аршакийлар (Парфияда), Кушонлар (Марказий Осиё ва Шимолий Ҳиндистонда), Сосонийлар (Эронда) сулолалари ҳукмронлик қилди.

Империялар даврида қабилалар ва шаҳар-давлатлар аро ҳокимият учун курашлар авж олиб, унда голиб чиқсан сулола атроф-воқеликни, табиат унсурларини ва моддий бойликларни қандай тасарруф этса, ўзга қабила, уруғ, жамоа вакиллари бўлмиш инсонларни ҳам шундай тасарруф этишга уринди. Натижада «мулк» тушунчаси сиёsat йўналишига ҳам кириб келди, у нафақат ер-сув, ҳайвонот ва буюмларга, балки енгилган уруғ, қабила, элат вакилларига нисбатан ҳам кўлланила бошланди. Юрт **мулк** аталди, ҳукмдор **малик** бўлди.

Жумладан, ҳукмдорлик ҳуқуқининг белгиланишида “фарр” (“Авесто” тилида “хварно”) принципи қонуний асос сифатида қабул қилинган. Унинг маъноси шуки, олий дунёвий ҳокимият сулоланинг бир вакилидан иккинчисига ўтишида муайян илоҳий белги содир бўлади, яъни муайян бир жонивор, куш ёки ёғду шуъласи ҳукмдорликка танланган кишини ажратиб кўрсатади. Эрондаги Аҳмонийлар, Сосонийлар даврида ушбу принципга изчил риоя этилган. Жоҳиля даврида “фарр” соҳибининг ҳукми мутлақ бўлиб, унга ҳеч ким эътиroz билдиришга ҳакки бўлмаган. “Халқ ҳукми”,

"халқ иродаси" деган тушунчалар у давр учун буткул нотаниш эди. Демак, жохилия даврида барча инсонлар тенг қадр топган эмас эди. Бу тартиб-коидаларнинг жиддий ўзгариши Исо алайҳиссалом даъвати билан бошланди, дейиш мумкин.

Сосонийлар даврига келиб маздаясна эътиқоди яна янгидан буюк бир империянинг дини сифатида хўкм сурди, янги муҳитда ривожланди, баъзи жиҳатлари янгиланди. Ҳақиқатни тан олиш керак, бизнинг бугунги қўлимиздаги «Авесто» матнларига доир маълумотлар Сосонийлар даври ёзма ёдгорликлари орқали етиб келгандир. Бу даврда «Авесто»нинг барча сакланиб қолган қисмлари ўрта форс (ёки пахлавий) тилига таржима қилинди, илмий, диний ва бадиий адабиётда «Авесто» матнлари кенг истифода этилди. Араблар Хурросон ва Мовароуннахри эгаллаганларидан сўнг, кўпчилик ислом эътиқодини қабул қилганда ҳам маздаясначилар ("мажусийлар") Самарқандда, яна бошқа баъзи жойларда яшаб келдилар, ўз эътиқодларидан қайтмадилар. Фақат мўғул босқини Ўрта Осиё худудидаги мажусий жамоаларига тўлиқ барҳам берди, дейиш мумкин. Ҳозир бу эътиқодни маҳкам тутганлар, асосан, Ҳиндистонда «парслар» номи билан жамоа бўлиб яшайдилар. Эроннинг жануби-шарқида ҳам анча-мунча бор, деб ҳисобланади. Уларнинг кўпчилиги «Авесто»ни, албатта, мустакил мутолаа қила олмайди. «Авесто» матнларининг талкини тўлиқ ҳолда коҳинлар тоифаси қўлида.

Искандардан кейин Эрон ва Турон халқлари эллинизм унсурлари (юон маданияти билан Шарқ маданиятининг синтези), буддизм, христианлик (кўпроқ, насронийлик қиёфасида), Ҳиндистон ва Хитойдаги бошқа турли эътиқодлар билан танишди. Маздаясна эътиқоди билан баъзи бошқа қараашлар таъсири остида милодий аср бошларида монавийлик таълимоти юзага келди ва минтақада кенг шуҳрат қозонди.

Бу даврда адабий манбалар миқёси ва мазмуний мундарижаси жуда кенгаяди. Минтақада нафакат эроний тиллар гурухи доирасида, балки туркий тилларда ҳам кенг миқёсда адабиёт пайдо бўлади. Суғд тили, қадим хоразм тили, бохтар ва парфиёна тилларида адабий ёдгорликлар яратилади. Пахлавий тили, ўрта форс тили (парсик), суғд тилларида "Моний инжили"дан парчалар, "Ниёни зиндагон" ("Ҳаёт хикмати"), "Ковон" ("Пахлавонлар китоби"), "Розон" ("Сирлар китоби"), "Муножотлар китоби", "Шопурокон" каби Моний бидъатига оид асрлар ҳақида хабарлар ва кўплаб парчалар етиб келган. Суғд тилидаги "Муғ қальяси битиклари" орасида Рустам ҳақидаги афсонадан бир парча сакланиб қолган. Бу даврдан етиб

келган энг кўп ёдгорликлар пахлавий адабиёти деб номланувчи манбалар мажмуи бўлиб, уларнинг энг машҳурлари "Зенд-Авеста" («Авесто» матнларининг таржима ва шархлари), "Денкарт" ("Дин амаллари" - 7 китоб, 169 минг сўз), "Бундахишн" ("Илк яратилиш" - 13 минг сўз), "Меноги храд" ("Ақл руҳи" - 11 минг сўз), "Карнамак Арташер Папакан" ("Ардашер Попокон жангномаси" - 5 минг 600 сўз), "Арта Вираф-намак" ("Авлиё Вираф китоби"), "Ядгар Зареран" ("Баҳодир Зарер ёдномаси" - 3 минг сўз), "Драхт асурик" ("Хурмо дарахти ва эчки мунозараси" - 800 сўз). Булардан ташкири алоҳида номланмаган бирқанча "Пандномалар" ёки "Андарзлар" (пахлавийда "Handarz") ҳам мавжуд бўлиб, улардан Ҳусрав Ануширвон ва унинг вазири Бузургмехр пандномалари кейинги даврларда ҳам машҳур бўлган¹⁵. Сосонийлар даври ёдномаларидан яна бир гурухи "Худойнамаклар" номи билан шуҳрат қозонган бўлиб, сулола тарихини ёритишга бағишлиланган. Бу асарларнинг асосий қисми ислом даврида "Сияр ул-мулук" номи билан араб тилига ўйрилган.

"Денкарт" ва "Бундахишн" китоблари **Маздаясна эътиқодининг Сосонийлар даври талқинини ўзида акслантирувчи асарлар бўлиб, Эрон ислом лашкарлари томонидан фатҳ этилгандан анча кейин IX аср бошларида пахлавий тилида яратилган**. Бу асарларда қадим матнлар орқали бизгача етиб келмаган жуда кўп маълумотларнинг мавжудлиги қадим матнларларнинг аксарияти "араблар босқини" даврида йўқ қилинган, деган дъяволар унчали тўғри эмаслигини кўрсатади. Ислом минтақа маданияти даврида улар аста-секин ўз ҳаётий аҳамиятини йўқота бошлагач, асрлар давомида, балки кўпроқ мўғуллар босқини даврида унтилиб кетган бўлиши эҳтимолга яқинроқ.

Исломгача аждодларимиз маънавиятининг шаклланиш даврига хос энг умумий хусусият унинг асосан асотир тафаккур заминида ривожланганидадир. Бу нарса айниқса "Авесто" китоби мисолида ёрқин намоён бўлади. Фақат Аллоҳнинг охирги китоби – Қуръони карим нозил бўлиши билан инсонлар онгидан асотир тафаккур қолдиклари тамомила сикиб чиқарилиши учун мустаҳкам замин пайдо бўлди.

3. Асотир тафаккур нима?

¹⁵ Каранг: Изведать дороги и пути праведных.(Пехлевийские назидательные тексты). М., «Наука», ГКВЛ, 1991.

«Авесто» маънавияти Ҳиндистоннинг «Веда» маданияти, қадим Шумер, Бобил ва Ашшур маданиятлари, қадим Юнон ва Рум антик маданиятлари моҳиятига монанд бўлиб, улар сингари тош асридан бошлаб шаклланиб келган асотир тафаккур асосидаги маънавият эди, унда дунёни, атроф-муҳитни идрок этиш ўзига хос тарзда кечарди. Инсон маънавий камолотининг дастлабки босқичларида бу идрок тарзи анча-мунча ижобий аҳамиятга эга бўлган эса-да, кейинчалик унинг чекланганлиги, ички қусурлари билиниб қола бошлади. Бу маънавий камолотда бўхрон ҳолатини юзага келтирди, минтака ҳалқлари тараққиётida маънавий тургунлик ҳавфи пайдо бўлди. Навоий тимсолларидан фойдаланиб таъбир этганда, аждаҳони енгиб ўтган Фарҳод олдида энди Ахриман-девни енгиш зарурати пайдо бўлди. Маздаясна эътиқоди асотир тафаккур қобигидан чикиб кета олмади.

Асотир яъни миф ибтидоий инсон онгига Борлик ҳақиқатининг хаёлий тимсоллар воситасида ифодаланиши бўлиб, ҳозирги замон одами асотирни афсона сифатида тушунади, аммо қадимги дунё одамлари **асотирнинг Борлик ҳақиқатини ифодалашига шубҳа қиласанлар**. Масалан, қадимги юонолар Зевс, Аполлон, Афродита каби турли санамларни Олимп тогига абадий яшайди деб тасаввур қиласанлар ва улар шарафига ибодатхоналар куриб, курбонниклар келтирганлар. Асотир ва бадиий асарнинг умумий томони Борлик ҳақиқатини тимсоллар воситасида англаш ва англатишга уриниш бўлиб, уларнинг ўзаро фарқ қиласанларни - асотирни ўз даврининг одами ҳақиқат деб қабул қиласанлар, санъат асарини эса инсонлар мутлак ҳақиқат деб ўйламайди, балки ибрат мактаби сифатида тушунади.

Демак, **асотир тафаккур** - Борлик моҳиятини идрок этишга дастлабки уриниш бўлиб, ибтидоий жамоа, қисман қадимги дунё ва ўрта асрлар одамининг фикрлаш тарзига хосdir. Бу даврларда аксарият инсонлар **ғайб оламига оид нарса-ҳодисалар ва мавхум тушунчаларни моддий воқелик ашёларидан ажратиб тасаввур қиласанлар**.

Мушрикликнинг келиб чиқиши ҳам инсон онги ривожининг айни шу даражаси билан боғлик. Араблар исломгача ҳукмрон бўлган тафаккур тарзини **жоҳилия даври** деганда ҳам инсон онгининг асотир тафаккур даражасидаги ҳолати назарда тутилган.

«Авесто» китоби мазмунида **асотир тафаккур** кенг миқёсда ўзлигини зоҳир этган. Бунинг ёркин бир мисоли сифатида Маздаясна эътиқодига оид **Амшосипандлар** масаласига эътибор қаратамиз. Авестошунос катор олимлар, жумладан, ҳозирги замон инглиз

тадқиқотчиси Питер Кларк ўзиниг “Зороастризм” китобида мавжуд “Авесто” матнларини даврлаштириб, улардан Зардуст (Заратуштра) номи билан боғлиқ “Гоҳларни” энг қадимги даврларга оид деб билади. **Амшосипандлар** (**Амиша Спинта – авесто тилида “Абадий онг” маъносини билдиради**) умумий номи кейинги давр матнларида пайдо бўлади. Питер Кларк фикрига кўра “Яштлар” Зардуст давридан анча кейин тахминан милоддан аввалги VII-VI асрларда шаклланган. **Амшосипандларнинг Бундахишин** (Питер Кларк китобининг русча таржимасида негадир “Бундабишен” деб ёзилган) китобидаги талқини эса, назаримизда, Сосонийлар даври қарашларидан дарак беради.

Зардуст “Гоҳ”ларида **Сипанд Мийну** (**Спинта Майню – Тафаккур олами**) асосан **оламларнинг яратувчиси Ахура Мазданинг (Ахураҳ Маздаҳ – Олий билим, дононлик, огоҳлик эгаси)** сифати бўлиб англашилади. Қолганлари **Ахура Мазданинг нурлари** деб тавсифланиб, қуидаги мавхум тушунчаларни билдириб келади:

Ардабеҳешт (Ашаҳ Вахиштаҳ – Гўзал ҳақиқат, Муқаммал низом ва тартиб)

Бахман (Вуҳвмана – Эзгу ният, Эзгу фикр)
Испандормаз (Спинта Ормантай – Комил акл)
Шахриёр (Зашра Вайраях – Умид дунёси)
Амурдод (Амирмитота – Умрбоқийлик, абадият)
Хўрдод (Хавраватот – Комиллик, Тўғрилик)

Питер Кларк китобида улар қуидагида берилилган:

Аша Вахишта – (Лучшая истина; Праведность)
Воҳу Мана – (Добрая мысль/Разум; Доброе Предвидение)
Спента Арманди – (Святая Преданность)
Кшатра Ваирья – (Сила; Власть/Царство Бога)
Хаувартат – (Целостность и Благоденствие)
Америтат – (Долгая жизнь и Бессмертие)¹⁶

IX асрда паҳлавий тилида ёзилган “Бундахишин”¹⁷ да эса улар энди асотир тафаккур таъсирида **Хўрмузд** (яъни Ахура Мазда)га

¹⁶ Питер Кларк. Зороастризм. Т., 2010, С. 79.

¹⁷ “Бундабишен” - Питер Кларк. Зороастризм. Т., 2010, С. 106.

ёндош илохий қудратлар сифатида тавсифланиб, ҳар бири муайян моддий нарса-ходисалар билан бевосита боғлиқ ҳолда тасаввур қилинади:

Ардабеҳешт – олов ҳомийси (огонь)

Баҳман - чорва ҳомийси (скот)

Испандормаз – замин ҳомийси (земля)

Шаҳриёр – металлар ҳомийси (металлы)

Амурдод - ўсимликлар ҳомийси (растительность)

Хўрдод – сув ҳомийси (вода)¹⁸

Инсон ақлий такомилидаги асотир тафаккур босқичида мавхум тимсол-тушунчалар қандай қилиб моддий олам ашёларига алоқадор мустақил олий мавжудотларга “айлануб кетиши” мумкинлиги келтирилган қиёсларда ўзининг очик ифодасини топганини кўриб турипмиз.

Исо алайҳиссаломгача юборилган пайғамбарлар ҳар бири бир қавмга Аллоҳ ҳақиқатидан хабар берган бўлсалар, Руҳуллоҳ барча инсониятга тегишли Ҳақиқат хабарини келтирди. У биринчи бўлиб, барча инсонлар ягона Тангри олдидаги тенг, ўзаро оға-ини, опа-сингил, биродар деб, Аллоҳ ҳукмини эълон қилди. “Ўрта асрлар” деган тушунча бехуда эмас, бу давр инсоният учун Қадим дунёдан Янги тафаккур тарзига ўтиш босқичидир. VII асрда келиб, Мұхаммад(С.А.В.)га нозил этилган Куръони карим оятларида ниҳоят узил-кесил ҳақ ботилдан жудо этилди, инсонлар ягона Аллоҳнинг ер юзидағи халифалари экани очик-ойдин баён этилди. Халқ ҳокимияти, озод фуқаролар жамиятига таянувчи тузумнинг умумбашарий маънавий асослари, шундай қилиб, Тавҳид таълимотида мужассам бўлди.

Ўтилган мавзу бўйича саволлар:

1. Миллатнинг маънавий такомил жараёни.
2. Миллий маънавиятимиз тарихий такомилини даврлаштириш муаммолари.
3. Алишер Навоийнинг «Фарҳод ва Ширин» достонида турк эли маънавий такомилининг рамзий ифодаси.

¹⁸ Питер Кларк. Зороастризм. Т., 2010, С. 112.

4. Ибн Халдун ибтидоий жамоа ва шахар жамоаси ҳакида.
5. «Авесто»да ибтидоий жамоа маънавияти унсурларининг акс этиши.
6. Жамшид (Йима вахишта) ҳақидаги асотир ва унинг моҳияти.
7. Асотир ва асотир тафаккур.
8. «Авесто» китобида мантака халқлари маънавий такомилининг қайси босқичи ўз аксини топган?
9. «Маздаясна» эътиқодининг моҳияти.
10. Марказий Осиё ва Ўзбекистон худудидаги илк шаҳарлар.
11. «Авесто»да тавҳид эътиқоди ва асотир тафаккур таъсири.
12. Зардушт «гоҳ»ларининг етакчи гояси.
13. «Маздаясна» эътиқодининг ахлоқий тамал тоши.
14. «Авесто» китобида тилга олинган ўлкалар.
15. «Авесто» матнлари тақдири.
16. «Авесто» китобининг ҳозирги кунда сақланиб қолган қисмлари.
17. Авесто»нинг жаҳон илмида ўрганилиши.
19. Буюк салтанатлар даврида яратилган адабиёт.
20. Амшосипандлар нима?

Адабиётлар:

1. Авесто. Тарихий-адабий ёдгорлик. Т., “Шарқ”, 2001, 384 сах.
2. Авесто. Яшт китоби. Т., “Шарқ”, 2001, 128 сах.
3. Авеста: «Видевдат» китоби. Т., ТДШИ, 2007, 96 сах.
4. Книга деяний Ардашира сына Папака. М., «Наука» ГРВЛ, 1987, 164 стр.
5. Изведать дороги и пути праведных.(Пехлевийские назидательные тексты). М., «Наука», ГКВЛ, 1991.
6. Питер Кларк. Зороастризм. Т., Изд. “Musiqä”, 2010, 256 стр
7. Мэри Бойс.Зороастрыйцы. Верования и обычаи. М., «Наука» ГРВЛ, 1988, 304 стр.
8. Сулаймонова Ф.Шарқ ва Фарб.Т., “Ўзбекистон”, 1997, с.9-188.
9. Луконин В.Г. Древний и средневековый Иран. Москва, ГРВЛ, 1987, 296 стр.
10. Османов М.-Н. Своды иранского героического эпоса. («Худайнаме» и «Шахнаме») как источники «Шахнаме» Фирдоуси. //

Ученые записки Института Востоковедения. Том XIX. Вопросы истории и филологии народов Востока. М., 1958, с.153-189.

11. Мирзозода Х. Таърихи адабиёти тожик. Китоби I (I). Душанбе, "Маориф", 1987, с.15-102.
12. Литература Востока в Средние века. Часть II. М., Изд. МГУ, 1970, с.3-40.

3-дарс.Ислом минтақа адабиёти ривожланишининг биринчи даври. Форс тилидаги мумтоз шеъриятнинг шаклланиши ва илк ривожи.

1. Ислом минтақа маданияти доирасида маънавий такомил жараёни ва бадиий адабиёт ривожи.

Куръони карим оятлари нозил этила бошлагач, VII аср давомида **Тавхид эътиқоди асосидаги инсоний биродарлик жамоаси - "умма"** тушунчаси шаклланган бўлса, VIII аср иккинчи ярми - IX аср бошларидан (750 йил - Абу Муслим кўзголони ва Аббосийларнинг ҳокимиятга келиши, 813 йилда Маъмуннинг халифалик таҳтига ўтириши натижасида) минтақанинг уч буюк ҳалқи - араб, форс ва туркий элатлар аро сиёсий қудратда ўзига хос мувозанат ҳолати вужудга келди, яъни Исломнинг асл ғояси - мусулмон умматининг менглиги амалда жорий бўлишига воеъ имкон туғилди. Натижада ислом дини кенг тарқалган улкан бир ҳудудда ягона ғоя остида бирлашган яхлит **маданий минтақа** ташкил топди ва у VIII-XV давомида маънавий жиҳатдан узлуксиз такомил топиб борди. Ушбу маънавий такомил жараёнини қўйидаги жадвал билан ифодалаш мумкин:

6-жадвал. ИСЛОМ МИНТАҚА МАДАНИЯТИ ДОИРАСИДАГИ МАЪНАВИЙ ТАКОМИЛ БОСҚИЧЛАРИ

Ислом минтақа маданиятининг ривожланиш босқичлари	Тарихий давр	Шахс ва миллат маънавиятининг такомил босқичлари ёки маърифат йўллари
---	--------------	---

I Сунна	VIII-IX Асрлар	<i>Ибрат</i>
II Ислом маърифатчилиги	X-XI Асрлар	<i>Илм</i>
III Тасаввуф тариқатлари ёхуд Ирфон	XII-XIII Асрлар	<i>Риёзат</i>
IV “Мажоз Тариқи”	XIV-XV Асрлар	<i>Мехр</i>

Ушбу маънавий такомил жараёнининг бош ғояси **Тавхид таълимоти** бўлиб, бу таълимотнинг мазмун-моҳияти асрлар давомида буюк аждодларимиз томонидан борган сари терарроқ англаб етилди ва шунинг асосида мукаммал маънавий-ижтимоий қарашлар тизими ишлаб чиқилди. Бу жараёнда бадиий адабиётнинг алоҳида, айтиш мумкинки, ҳал қилувчи ўрни бўлганлиги диккатга сазовордир.

VIII-IX асрларни ўз ичига олган **Сунна босқичи** Тавхид Ҳақиқатини бутун кўлами билан англаб етишнинг дастлабки погонаси бўлиб, бу босқичда Пайғамбаримиз(сав) суннатларининг асоси бўлмиш ҳадис илми мукаммал даражага кўтарилиди ва энг мўътабар олти ҳадис тўплами тузилди. Бу босқичнинг етакчи тамойили Ибрат маърифатида ифодаланади, яъни Сунна ибрат орқали эътиқод бўлиб, Мухаммад (сав) ибрати асосида Аллоҳнинг борлиги ва бирлигини, унинг чексиз қудратини, Халлоқи олам, яъни Борликнинг ягона яратувчиси ва эгаси эканлигини тан олиш ва бунга чин дилдан эътиқод қилишни англатади. Рус тилидаги “единобожие” (яккахудолик) атамаси айни шу маънони ифодалаб келади.

Бу даврда бадиий адабиёт бутун минтақа бўйлаб асосан араб тилида яратилди. Аммо “араб тилидаги адабиёт” дегани соғ маънодаги “араб адабиёти” тушунчасини англатмайди. Чунки бу адабиёт фақат араблар ютида ягона бир миллат вакиллари томонидан эмас, балки бутун ислом минтақасида ислом динини қабул қилган барча ҳалқларга мансуб ижодкорларнинг умумий ҳаракати натижасида шаклланди ва ривож олиб борди. Жумладан, бу давр араб тилидаги адабиётнинг буюк вакиллари Ибн

ал-Муқаффа (724-759), Башшар ибн Бурд (714-784), Абу Нулас (762-813) каби сиймолар томирида аյжам кони оққанлиги маълум.

Ислом минтақа маданияти доирасидаги маънавий таомил жараёнининг иккинчи босқичи **Ислом маърифатчилиги босқичи бўлиб**, X-XI асрларда ўзининг энг юксак таомилини намоён қилган ва Тавҳид Ҳақиқатини мантиқий тафаккур даражасида англаб етишга эришилган бу босқичдаги етакчи тамойилни **Илм маърифати** деб таърифлаш мумкин.

Инсон маънавий таомилидаги бу инқилобий ўзгаришнинг мазмун-моҳияти шундаки, охирги илоҳий қалом – Куръони карим оятларига таянган ҳолда инсоният Ибтидоий жамоа, кисман Қадимги дунё ва Ўрта асрлар одамининг асосий фикрлаш тарзи бўлмиш **асомир тафаккур** (яъни ғайб олами ва мавхум тушунчаларни моддий ашё ва ҳодисаларга боғлиқ ҳолда тасаввур килиш), Борликни идрок этишнинг оқибати мушрикликка олиб келувчи бундай даражасидан юқори кўтарилиб, ҳозирги замоннинг **асосий тафаккур турлари** бўлмиш **мантиқий тафаккур** (яъни сабаб-оқибат боғланишлари асосида фикр юритиш), **тимсолий тафаккур** (яъни ўз фикрини рамз ва тимсоллар воситасида ифодалаш), **тарихий тафаккур** (турли манбалар орқали аникланган маълумотларга таяниб хуносалар килиш), **эвристик тафаккур** (асосий тафаккур турларидан, илоҳий илҳом, илмий ва бадиий ижод жараённида тамомила янгича гоялар, ечимлар, тимсол ва тасаввурларнинг яхлит шаклланиши), **ирфоний тафаккур** (мураккаб таркибли тафаккур турларидан, илоҳий илҳом, риёзат ва илоҳий жазба натижасида ҳосил қилинган ладуний билимларни тимсол ва ишоралар воситасида ифодалаш) ва улар асосида хилма-хил мураккаб таркибли тафаккур турлари: **фалсафий тафаккур** (мантиқий ва эвристик тафаккур асосида Борлик ҳақиқатини моделлаштиришга уриниш), **илмий тафаккур** (мантиқий ва эвристик тафаккурга ҳамда маҳсус амалий тажрибаларга таянган ҳолда муайян назарий муаммони ҳал қилишга уриниш), **риёзий (математик) тафаккур** (аниқ формулалар, чизмалар, тенгламалар, ракамлар нисбати воситасида ўз фикр ва гояларини ифода этиш), **эстетик тафаккур** (муайян ҳаётий ҳодисаларга гўзаллик ва ички уйғунлик талабларидан келиб чиқиб муносабатда бўлиш), **бадиий тафаккур** (асосан **тимсолий** ва **эвристик** тафаккур асосида ижодкорнинг Борлик ҳақиқати ҳақидаги ўз тасаввурларини. ҳаётий ёки ҳаёлий тимсоллар тизими воситасида моделлаштириши бўлиб, бадиий тимсол ҳақиқатни ўзида тўлиқ ифодалашга даъво қилмайди, факат унинг баъзи қирраларига ишора қиласди), **ахлоқий тафаккур** (

инсонларнинг амалий фаолиятини муайян маънавий-ахлоқий тартиб-қоидалар нуқтаи назаридан баҳолаш), **сиёсий тафаккур** (ижтимоий ҳодисаларга муайян сиёсий манфаатлар нуқтаи назаридан ёндошиш), **ҳуқуқий тафаккур** (инсонларнинг хатти ҳаракатларига муайян конунлар билан белгиланган ҳуқуқий нормалар нуқтаи назаридан ёндошиш) кабилар мукаммал шакллана бошлади.

Бу босқични “Ислом маърифатчилиги” деб аталишининг сабаби бу даврда яшаб ўтган улуғ қомусий алломаларимиз исломгача инсоният ҳосил қилган барча билимларни қиёсий тадқиқ этиб, инсоният англаб етган барча мавжуд билимлар моҳиятан Тавҳид эътиқодига мувофиқ эканлигига амин бўлдилар. Шунга кўра минтақа ҳалқлари томонидан Тавҳид таълимотини тушуниш ҳам таомиллашиб, ягона Аллоҳга сифиниш маъноси Аллоҳ яратган Борликнинг ягоналиги (русча “единобытие”) ва уни Аллоҳ ато этган ақл ва мантиқий тафаккурга таяниб ҳар жиҳатдан ўрганиш, у ҳақда жиддий билим ҳосил қилиш фарз эканлигини англаб етиш даражасига кўтарилиди. Бу даврда Борлик ҳақиқатини англаб етишнинг асосан ақлга, мантиқий тафаккурга таянувчи қуидаги турли мувозий (параллел) йўналишлари шаклланди:

7-жадвал. ИСЛОМ МАЪРИФАТЧИЛИГИ БОСҚИЧИДА ШАКЛЛАНГАН БОРЛИҚ ҲАҚИҚАТИНИ АНГЛАБ ЕТИШНИНГ ТУРЛИ ЙЎНАЛИШЛАРИ

(“Ҳақиқат изловчи”ларнинг 4 тоифаси):

(Имом Абу Ҳамид Газзолий (1058-1111)нинг “Ал-Мунқиз мин ад-далал”

ва Умар Хайём (1048-1122)нинг “Дархостнома” асрлари
асосида)

Йўналишлар (тоифалар)	Асосий оқимлари	Асосчилари ёки машҳур вакиллари
A) Қалом (Мутакаллимла р)	1) Мўътазила	Восил ибн Ато (699-748)
	2) Ашъария	Абул Ҳасан ал-Ашъарий (873-935)
	3)	Абу Мансур Мухаммад ал-Мотуридий ас-Самарқандий (870-944)

Мотуридия		
В) Фалсафа (Файласуфлар)		Абу Наср Форобий (873-950) Абу Али ибн Сино (980-1037),
Б) Ботиния (Ботинийлар)		“Ихвон-ус-сафо” илмий гурӯҳи (Х аср) (52 рисоладан иборат комусий мажмуа яратган) Бадаҳшонлик буюк шоир ва мутафаккир Носир Ҳусрав (1004- 1088)
Г) Тасаввуф (Суфийлар)		Жунайд Бағдодий (вафоти 910 йил) Мансур Ҳаллож (858- 922) Абдуллоҳ Ансорий (1006-1089), Абусаид Абулхайр (967-1049), Абдулҳасан Хароқоний (вафоти 1033 йил)

Бу даврга келиб энди ислом минтақасида бадиий адабиётнинг ҳам қамрови ва кўлами кенгайиб, араб тилидаги адабиёт ёнига Ҳурносон ва Мовароуннаҳрда форсий ва туркий тиллардаги мумтоз шеърият кўшилди. Қудратли маҳаллий хукмдорлар – Сомонийлар, Газнавийлар, Корахонийлар, Салжуқийлар саройлари доирасида мустакил адабий мактаблар шаклланди.

2. Форс тилидаги мумтоз шеъриятнинг шаклланиши ва илк ривожи.

Ислом минтақа адабиёти VIII - XV асрлар мобайнида дунёни идрок этиш ва уни ижодий акслантириш нуктаи назаридан катта тараққиёт йўлини босиб ўтди. Алишер Навоийнинг назарий

кузатишлари билан адабий жараённинг боришини қиёслаб хулоса килинса, бу тараққиётни уч катта даврга ажратиш мумкин.

Биринчиси, VIII - XI асрлар бўлиб, араб мумтоз адабиётида “янгиланиш” ҳаракатига асос солган Башибар ибн Бурд (714-784), Ибн ал-Муқаффа (724-759), Абу Нунос (762-813), Абул Атахия (748-825) каби машҳур шоир ва адиблар ижоди билан бошланади. Бу даврда кенг маънодаги адаб илмига асос солинди. Ибн ал-Муқаффанинг (724-759) «Ал-Адаб ас-Сағир», «Ал-Адаб-ал-Кабир» асарлари ёзилди. Халил ибн Аҳмад (718-792) лугатшунослик асосларига бағишилган «Ал-Айн» асари таркибида аруз илмининг назарий асосларини яратиб, ҳам тилшунослик, ҳам адабиётшуносликка замин ҳозирлади. Кейинги аср охирида Ибн ал-Мутағиз (861-908) адабиётшуносликнинг яна бир таркибий қисми «илми бадеъ» (шеърий санъатлар ҳакида илм)ни кашф этди. Алишер Навоий гувоҳлик беришича, шу забардаст сиймолар орасида ислом даврининг илк туркий шоирни Адиб Аҳмад ҳам бор эди. Адиб Аҳмад биринчилардан бўлиб Расулуллоҳ ҳадисларига туркий тилда шеърий шарҳлар бағишилган аллома шоирдир¹⁹. IX асрда Эрон худудида ҳануз пахлавий тилида йирик асарлар (“Денкарт”, “Бундахишн”) яратилмоқда эди. Янги форс тилида яратилган шеъриятдан факат Аббос Марвазий, Абу Ҳафс Сўғдий, Абу Солик Гургонийлар ижодидан жуда кам намуналар етиб келган.²⁰

Форс тилидаги ҳақиқий мумтоз адабиёт дастлаб IX аср охирлари - X аср биринчи ярмида Мовароуннаҳрда шаклланди. Отаси Хорун ар-Рашид томонидан Ҳурносон ва Мовароуннаҳрга ноиб қилиб тайинланган кичик ўғил Маъмун ўз атрофиға маҳаллий ҳалқларнинг йирик зодагонлари, олимлар ва ижод аҳлини тўплай бошлади. Хорун ар-Рашиддан сўнг ҳалифалик таҳтига ўтирган катта ўғил Амин сиёсатидан норози бўлган аъжам ҳалқларининг жасур саркардаларига таянган Маъмун 813 йилда ҳалифаликни акасидан тортиб олгач, ўз атрофидагиларга катта лавозимлар инъом этди. Жумладан, **Тоҳир ибн Ҳусайнга** Ҳурносон ўлкасини бошқариш, **Асад ибн Сомон** ўғиллари - **Нуҳ ибн Асадга** (ваф. 841) – Самарқанд, **Яҳё ибн Асадга** – Шош ва Усрушана, **Илёс ибн Асадга** – Ҳирот, **Аҳмад ибн Асад** (ваф. 864) – Фарғона ҳокимлиги топширилди. Шундай қилиб, 821-873 йиллари Ҳурсонда **Тоҳирийлар** сулоласи ҳукмдорлик килган бўлса,

¹⁹ Адиб Аҳмад Юғнакийнинг яшаган даври ҳакида фанда баҳсли фикрлар мавжуд. Аммо биз бу борада Навоий келтирган нақлини рад этишга аргизгулик жиддий далил-исботни учратмадик.

²⁰ Литература Востока в Средние века. Часть II. М., Изд. МГУ, 1970, с.28-40.

акалари вафотидан сўнг **Аҳмад ибн Асад** Самарқандга кўчиб келиб, бу ерни ўз пойтахти деб эълон қиласди ва шу билан Мовароуннахрнинг асосий қисми (Хоразм ва Чагониёндан ташқари) **Сомонийлар** тасарруфига ўтади. 873 йили Хуросонда **Ёқуб ибн Лайс** қўзғолон кўтариб, Нишопурни босиб олди ва **Саффорийлар** (мисгарлар) сулоласига (873-903) асос солди. Аммо Бухоро Саффорийларга бўйинсунмади ва **Сомонийлар** ихтиёрига ўтди. Отасида сўнг тахтга ўтирган **Наср ибн Аҳмад** (864-892) 875 йилда Мовароуннахрни бошқаришга халифадан расман ёрлиғ олди ва укаси **Исмоилни** Бухорога ҳоким қилиб тайинлади. 900 йили **Амр ибн Лайс** Балх яқинида Исмоилдан енгилиб, Хуросон, Табаристон, Гургон, Сийистон ва Рай ўлкалари ҳам **Сомонийлар** кўлига ўтди.

Наср ибн Аҳмад ва Исмоил Сомонийлар даврида Самарқанд ва Бухорода ижод аҳли учун қулай шароит вужудга келиб, Абу Абдуллоҳ Рудакий етакчилигидаги бақувват форс шеърият мактаби шаклланди²¹. Бу мактаб, айниқса, **Аҳмад ибн Исмоил** (907-913) ва **Наср ибн Аҳмад II** (913-943) даврларида гуллаб-яшнаб, ўзининг олий босқичига кўтарилиди. Тадқиқотчиларнинг охирги ҳисоб-китобларига биноан Абу Абдуллоҳ Жаъфар бин Мұхаммад Рудакий тақрибан 858 йилда ҳозирги Тоҷикистоннинг Панҷикент туманидаги Панҷруд қишлоғига ўртаҳол оиласда дунёга келган. Самъоний (ваф. 1167) ўзининг “Китоб ул-ансоб” асарида уни “самарқандлик шоир” деб атайди. Наср ибн Аҳмад I умрининг охиригача Самарқандда ҳукмдорлик қилганлигини ҳисобга олсан, шоир ижодининг дастлабки даври (30-35 ёшларигача) Зарафшон воҳасида ўтганлигини тасаввур қилиш мумкин. Бухоронинг Сомонийлар пойтахтига айланиши Исмоил ибн Аҳмад давридан, яъни IX асрнинг охирги ўйнилигидан бошланади. Рудакийнинг Бухорога, шоҳ саройига расман таклиф қилиниши **Наср ибн Аҳмад II** ҳукмдорлик тахтига ўтирган йилларга тўғри келишини инобатга олсан, бу даврда у 50 ёшдан ошган машҳур

²¹ Мустакилликгача яратилган илмий тадқиқотлар ва дарсларнинг форс тилидаги мумтоз адабиётни даврлаштириш турлича берилган бўлиб, уларда бальзан ўта сунъий ёндошувлар ҳам кўзга ташланади. Масалан, Москва давлат университети нашриётида 1970 йилда чоп этилган бир дарсларда VIII - IX асрлар “Ўйниши даври олди адабиёти” (Литература периода Предвозрождения) деб алоҳида даврга ажратилган. Ваҳоланки, бу даврнинг асосий қисми, яъни VIII асрдан то IX аср охирги чорагигача асосий асарлар ё араб тилида ёки ўрта форс (пахлавий) тилларida яратилган бўлиб, Сомонийлар давридагина янги форс тилидаги йирик адабий мактаб шаклланди. Бу мактабнинг ривожи ва унинг асосий намояндадарни яшаб, ижод этган давр IX аср охирги чорагигандан бошланиб, X асрни деярли тўлиқ камраб олади. Қизиги шундаки, китоб муаллифлари ўзлари ўйлаб топган бу “давр” адабиётидан уч-тўрт катор шеърий парчадан бўлак тайинли бир намуналар келтира олишмаган.

шоир эди²². Демак, тарихда Бухоро адабий мактаби сифатида шуҳрат қозонган ижодий муҳит аслида анча кенг худудни камраб олади.

Ҳижрий 1335 йилда Техронда чоп этилган Мазохир Мусаффонинг “Посдорони сухан” китобининг “Давраи нуҳустин. Аҳди Рудакий” деб аталган қисмида 11 шоир асарлари ҳақида мулоҳазалар ўрин олган²³. 1985 йилда рус тилида нашр этилган “Рудакий ва унга замондош шоирлар” китобида эса X асрда ижод этган 23 шоир ижодидан намуналар берилган²⁴. Улардан 11таси - Шахид Балхий, Фазл Рабанжоний, Фароловий, Абу Шукур Балхий, Башшар Марғозий, Робиа Каздорий, Абулмасал, Лавкарый Чангзан, Шокир Бухорий, Тайён Марғозий, Маъруф Балхий - Рудакий билан замондош бўлиб, бир вактда, бир адабий доирада ижод қилишган. Булардан ташқари бошқа манбаларда Абулхусайн Муродий, Абулмуайяд Балхий, Сипехрий Бухорий ва бошқаларнинг номлари учрайди. Бу давр шоирларининг баъзилари (Масалан, Шахид Балхий, Абулхусайн Муродий Бухорий, Башшар Марғозий, Робиа Каздорий кабилар) икки тилда – араб ва форс тилларida ижод этишгани маълум. Бу давр шеъриятида араб адабиётининг таъсири остида қасида жанри етакчилик қилганини кўрамиз. Шу билан бирга форсизабон шоирлар ижодида қитъа, рубойи каби кичик ҳажмли шеърлар, ғазал жанрининг дастлабки намуналари, ҳамда маснавийда ёзилган асарлар ҳам учрайди. Эпик асарларнинг илк намуналари сифатида Рудакийнинг “Калила ва Димна”, “Синдбоднома” деб номланувчи достонларидан сақланиб қолган айрим байтлар, ҳамда унинг ўш замондоши Абу Шукур Балхийнинг “Офариннома” асарини тилга олишимиз мумкин. Мутакориб вазнида панд-насиҳат ўйсинида ёзилган бу маснавийдан 300 байтга яқини бизгача етиб келган.

Х асрнинг иккинчи ярми Сомонийлардан **Нуҳ ибн Наср** (943-955), **Абдулмалик ибн Нуҳ** (955-962), **Мансур ибн Нуҳ** (962-977) ва ўлқадаги бошқа кичикроқ ҳукмдорлар – Абу Яхё Тоҳир Чоғоний (987 йилда катл қилинган), Мозандарон ва Табаристон ҳукмдорлари **Зиёрийлар** (Вушмгир - 935-967, Қобус ибн Вушмгир – 987-1012) ва бошқалар ҳомийлигига ижод қилган ўндан ошиқ шоирларнинг асарларидан намуналар бизгача етиб келган. Булардан Бадеи Балхий, Дақиқий, Тоҳир Чоғоний (юқорида номи тилга олинган Чоғониён

²² Рудакий яшаган давр, унинг ҳаёти, адабий мероси, ижодидаги етакчи мавзулар ҳақида муқаммал маълумот А.Мирзоевнинг Москвада нашр этилган “Рудакий. Жизнь и творчество” номли йирик тадқиқотида берилган.

²³ Мазохир Мусаффо. Посдорони сухан. Чакомасароён. Жилди I. Техрон, Чопи Сино, 1335ҳ., сах. 3-89.

²⁴ Рудаки и поэты его времени. «Сов. писатель». Ленинград. отд., 1985, 272 стр.

амири), Мунджик Термизий, Хусравий Серахсий, Кисой, Мантикий Розий, абу Тохир Хусравоний, Иморо Марвазий, Қамарий Журжоний, Абу Зираъа, Абулҳасан Оғожий асарларидан намуналар “Рудакий ва унга замондош шоирлар” китобида келтирилади. Бундан ташкари академик А.Мирзоев китобида²⁵ Абу Тайиб Мусъабий, Абу Абдуллоҳ Валвалижий, Абу Исҳоқ Жуйборий, Равнакий Бухорий, Маънавий Бухорий, Ҳаббоз Нишопурний, Абулфатҳ Бустий каби яна 10га яқин шоирларнинг номлри тилга олинади. Бу даврда эпик шеъриятга ва фалсафий мулоҳазаларга мойиллик ҳам кучайиб борди. Дақиқияга Нұх ибн Мансур (977-997) даврида шеърий “Шоҳнома”ни яратиш вазифаси юкланди, Абулҳасан Кисой Марвазий(953-1049)нинг фалсафий-ахлоқий қасидалари дунёга келди.

3. XI аср форс тилидаги сарой шеърияти.

IX-X асрлар давомида Мовароуннахр ва Хурсонда ҳар уч тилда асарлар яратилган бўлса, XI аср бошларидан араб тили асосан илм тили сифатида сақланиб қолиб, Ғазнавийлар саройида асосан форс тилида ва Қорахонийлар саройида туркий ва форсий тилларидаги шеърият ривож топди. Бу даврда Унсурий, Фаррухий, Манучехрий ва бошқалар форс тилида мадҳиявий қасиданинг мумтоз намуналарини яратган бўлсалар, Фирдавсий Тусий (940-1020) 60 минг байтли улкан тарихий эпопея - “Шоҳнома”ни қоғозга туширди. Туркий тилда замонасининг долзарб ижтимоий ва фалсафий карашларини кенг кўламда акс эттирган Юсуф Ҳос Ҳожибининг “Қутадғу билиг” достони (1069 йилда ёзилган) дунёга келди. Кейинги икки асар шу давргача Эрон ва Туронда яралган бой маънавий мероснинг ўзига хос бадиий қайта ишланган қомуси эди. Араб тилида Абул Аъло ал-Мааррий (973-1058)нинг юксак фалсафий мазмундаги асарлари ҳам шу давр маҳсулни эди.

Ислом минтақа маданияти доирасида VIII-XI асрларда араб тилида ёзилган шеърият намуналарини ўзида жамлаган “Йатимат ад-даҳр” асарининг мусаннифи Абу Мансур ас-Саолибий 350ҳ./961м.да Нишопурда туғилди ва 429ҳ./1038м.да ўша ерда вафот этди. Унинг издоши “Думят ул-қаср”нинг муаллифи Абул-Ҳасан ал-Боҳарзий 1074 йилда қатл этилди²⁶. Араб мумтоз адабиётининг ҳақиқий равнақи ҳам айни шу асрларга тўғри келади, десак, кўп

²⁵

²⁶ Абу Мансур ас-Саолибий. Йатимат ад-даҳр фи маҳосин ахл ал-аср. Т., “Фан”, 1976, сах. 7-28.

янглишмаймиз. Дарҳақиқат, агар андалуз шеъриятини айтмасак, бу тилда ал-Мааррийдан кейин фақат Ибн ал-Фарид(1181-1234)нинг ишқий-ирфоний шеъриятидан бошқа жаҳон миқёсида ярк этиб кўзга ташланадиган ижодкор учрамайди. ²⁷ Минтақа миқёсида энди шеърият асосан форсий ва туркий тилларда яратила бошлади ва унинг шуҳрати жаҳонга тараалди.

Тожикистонда нашр этилган “Гулшани адаб” мажмуасида X асрда яшаган шоирлардан фақат 3 киши - Рудакий, Дақиқий ва Робия шеърларидан намуналар берилган бўлса, XI аср шоирларидан 16 ижодкорнинг асарлари ҳақида маълумотлар мавжуд. “Посдорони сухан” китобининг “Асри Шоҳноме. Аҳди Фаррухий ва Манучехрий” деб аталган 2-қисмида 11та шоир асарларидан намуналар берилган бўлса, 1984 йилда Душанбеда чоп этилган “Сабаки Рудаки” мажмуасида XI асрнинг фақат биринчи ярмида яшаб, ижод этган жами 23 ижодкорнинг шеърларидан намуналар йиғилган. Улардан энг машҳурлари Айюқий, Унсурий (965-1040), Фаррухий (980-1037), Абу Али ибни Сино (980-1037), Манучехрий (1000-1040), Асжадий (ваф. 1041), Абусаид Абулхайр (967-1049), Бобо Тоҳири Уръён (ваф. 1055), Фахриддин Гургоний (ваф. 1063), Абулқосим Фирдавсий (932-1020), Асадий Тусий (1010-1073), Носир ибни Хусрав (1004-1088), Қатрони Табризий (ваф. 1072)лар бўлиб, Унсурий девонидан 64 қасида, 12 ғазал, 66 рубоий (жами – 2500 байт), Фаррухийдан 213 қасида, 28 ғазал, 37 рубоий, 3 таржеъбанд (жами – 8875 байт), Манучехрийдан 57 қасида, 11 мусаммот, 2 ғазал, 66 рубоий ва ҳ.к. лар бизгача этиб келган. Бундан ташқари Фирдавсийнинг 60 минг байтли “Шоҳнома”си, Айюқийнинг “Варқа ва Гулшоҳ” (2100 байт), Фахриддин Гургонийнинг “Вис ва Ромин” достонлари тўлигича, Унсурийнинг “Вомик ва Узро” достонидан 515 байт, Асадий Тусий, Носир ибни Хусрав, Қатрон Табризий каби сермаҳсул шоир ва адилларнинг девонлари ва бошқа йирик асарлари бизгача этиб келганини назарда тутсак, орадаги фарқ жуда катта эканлиги равшан бўлади.

Бу даврда ҳануз аксарият шоирлар ижодида қасида жанри етакчилик килади. Масалан, Носир ибни Хусравнинг Кобулда нашр этилган девонининг 1-жиллида 530 сахифада 278 қасида ва 4тагина рубоий келтирилган бўлиб, қасидаларнинг 242таси деярли тўлиқ ва қолганларидан 15-2 байтлар орасида сақланиб қолган парчалардан иборат. Бу нуқтаи назардан 1088 йилда вафот этган Носир ибни Хусрав

²⁷ Ханна ал-Фахури. История арабской литературы. Том 2. М., Изд. иностр. лит., 1961, 484 стр.

девонининг XI асрнинг биринчи ярмида ижод этган Унсурий ва Фаррухий девонларидан таркибий жиҳатдан деярли фарқи йўқлиги очик кўринади.

Аммо Носир Хусрав шеъриятининг Газнавийлар сарой шоирлари ижодидан моҳиятан фарқи мазмуний жиҳатида бўлиб, Унсурий, Фаррухий, Манучехрий, Асжадийлар асосан мадҳиявий қасидалар ёзишган бўлса, Носир Хусрав қасидаларида фалсафий оҳанглар етакчилик килади. Бу унинг дунёкараши билан боғлиқ бўлиб, уни тушуниш учун яна Ислом миңтақа маданийти доирасидаги маънавий такомил жараёнининг иккинчи босқичи **Ислом маърифатчилиги босқичида шаклланган** Борлик ҳақиқатини англаб этишнинг турли йўналишларидан бири бўлмиш Ботиния оқимига эътибор қаратиш керак бўлади.

Ботиния – Ислом маърифатчилиги босқичида шаклланган Борлик ҳақиқатини идрок этишга оид 4 йирик йўналишнинг бири бўлиб, унинг асосида **исмоилия** бидъати ётади. Шиа мазҳабидан ажралиб чиқкан бу бидъат намояндлари бошқа шиалар каби олтинчи имом Жаъфар ас-Содик (700-765) нинг кичик ўғли Мусо ал-Козим (вафоти 799 йил) ни эмас, катта ўғли Исломилни имомликдаги вориси деб тан оладилар (Исломил бин Жаъфар отаси ҳаёт чоғида 762 йилда вафот этган) ва имоматни шу 7-имомда якунланади деб хисоблайдилар²⁸. Мисрда Фотимиийлар давлат тепасига келгач (909 йил), исмоилийларнинг миңтақа бўйлаб фаолияти авж олди ва таъсири ҳам кучайди. Давр ақл ва мантиқий тафаккур даври эди. Шунга муносиб равишда исмоилия бидъати тарғиботчилиари ўзларининг мураккаб фалсафий тизимини ишлаб чиқдилар. Улар билимни зоҳирий (ташқи) ва ботиний (ички) даражага ажратдилар. Зоҳирий билим авом учун мўлжалланган бўлиб, асосан шиа мазҳаби шариат аҳкомларига мос келарди. Ботиний билим эса факат танланган тор доира - хослар орасидагина тарқалиши назарда тутилар ва борлиқни идрок этишнинг мураккаб фалсафий тизимидан иборат эди. Ботиний билимлар комуси сифатида шуҳрат қозонган буюк мерос - X асрда яратилган 52 рисоладан иборат «Расоили иҳвон-ус-сафо ва хуллон ул-вафо» («Пок биродарлар ва вафодор дўстлар рисолалари») мажмуаси бўлиб, бу мажмууда 14 рисола риёзиёт (математика)га, 17 рисола табиий фанларга, 11 китоб Олий ҳақиқат сирлари ва яна 10 китоб диний масалаларнинг мантиқий таҳлилига бағишлиланган эди. Бу мукаммал комус исломгача ҳосил бўлган илмий-фалсафий меросни чуқур ўзлаштириш асосида юзага келган бўлиб, миңтақа илмининг

²⁸ Маълумки, шиалар 12 имомга эътиқод қиласидилар.

кейинги ривожига катта таъсир кўрсатди. Ботиния йўналиши асосан исмоилия бидъатига боғлаб талқин этилса ҳам, аслида ўша даврларда кўпчилик расмий ақидага муҳолиф қарашлар шу ном остида умумлаштириб талқин қилинганини ҳам назардан қочирмаслигимиз керак. «Пок биродарлар» гурухидан ташқари исмоилиянинг Ан-Насафий (942 йилда ўлдирилган), Ал-Кирмоний (вафоти 1021 йил) сингари бошқа машҳур назариётчилари ҳам фанга маълум. Мовароуннаҳрда исмоилия бидъатини тарғиб этган энг буюк шахс шоир ва мутафаккир Носир Хусрав (1004-1088) бўлиб, у исмоилия қарашларини жиддий фалсафий руҳда талқин қилиб, айниқса, ижтимоий адолат масалаларига алоҳида диккатини қаратди²⁹.

Шоир ўз табиатига кўра ёшлигиданоқ фалсафий тафаккурга мойил бўлса-да, аммо то 40 ёшларигача ҳаёт тарзи ва қарашлари ўз тенгдошлари - ўша давр “дунёвий адабиёт” вакиллариникидан катта фарқ қилмас эди. У тақрибан 40 ёшларида Фотимиийлар ҳукм сурган Мисрга сафар қилди ва 1052 йилда Хуросонга ботиния гояларининг оташин даъватчиси бўлиб қайтиб келди. Унинг ушбу йўналишдаги асосий асарлари - “Рўшнойнома”, “Саодатнома”, “Важҳи дин”, “Зод-ул-мусофирин”, “Сафарнома”, “Жомеъ-ул-ҳикматайн” ва фалсафий қасидалари шу кейинги даврга - XI асрнинг иккинчи ярмига тааллуклидир.

Ислом маърифатчилиги босқичида Борлик ҳақиқатини идрок этишнинг яна бир йирик йўналиши – тасаввуфий-ирфоний оқим ҳам шакллана бошлаган бўлиб, унинг шеъриятдаги намояндлари Абусаид Абулхайр (967-1049) ва **Бобо Тоҳири Уръён** (ваф. 1055) рубоййларида ўз аксини топди³⁰. Аммо ҳануз бу йўналиш адабиётда етакчи мавқеъга кўтарилиган эмас ва ирфоний гоялар шеъриядта ўзининг тўлаконли мажозий ифодасини топган эмас эди.

Бу даврда соғ фалсафий гояларнинг бадиий ифодаланиши қисман Абу Али ибн Синонинг “Қасидат ан-нафс” маснавийиси ва “Ҳайй ибн Яқзон”, “Рисолат ат-тайр”, “Соломон ва Абсол” каби мўъжаз насрый киссаларида кузатилади.

²⁹ Носир Хусрав қарашлари ва исмоилия бидъатининг моҳияти ҳақида муфассал маълумот олиш учун қаранг: 1) Бертельс А.Е. Насири Хосров и исмаилизм. М., 1965, 290 стр.; Додихудоев Х. Философия крестьянского бунта. Душ., “Ирфон”, 1987, 432 стр.

³⁰ Таронаҳои дилангез. Душанбе, “Ирфон”, 1986, с. 5-64 (11-84).

1. “Дунёвий адабиёт” тушунчаси. Унинг моҳияти ва асосий хусусиятлари.

Шарқ адабиётини ўрганишга оид XX асрда яратилган адабиётшунослика оид катор асарларда “дунёвий адабиёт” тушунчаси тез-тез тилга олиниди. Марксистик мағкура руҳида яратилган бундай тадқиқотларда бу атама одатда салбий маънода ишлатилувчи “диний-мистик адабиёт”нинг муқобили сифатида келади ва бутун Ўрта асрлар адабиётига нисбатан кўлланилаверади. Аслида ҳам шундайми? Бизнинг назаримизда, бу тушунчани ўзининг аниқ тарихий маъносида мумтоз адабиёт ривожининг аниқ бир даврига нисбатангина кўллаш ўринлидир. Шу мулоҳазалардан келиб чиқиб биз бу атамани айни **VIII - XI асрлар форе тилидаги мумтоз шеъриятнинг шаклланиши ва илк ривожи даврига нисбатан кўллашни мақсадга мувофиқ деб топдик.**

VIII - XI асрларда ислом минтақасида шаклланган турли адабий мактаблар ҳам илмий доиралар сингари кўпроқ у ёки бу хукмдор саройида марказлашган бўлиб, уларнинг мазмуний мундарижасида **мадҳия қасидалар, ишқий ғазаллар, ҳамриёт** (май мавзуи), зуҳдиёт (дунё ва унинг ҳою ҳаваслари бебақолиги ва уларга меҳр кўймаслик мавзуи), **хижо** (муайян шахсларга йўналтирилган ҳажв) каби мавзу турлари етакчилик қиласиди. Бу даврда “энг ёлғон шеър - энг яхши шеърдир” ва “энг рост шеър - энг яхши шеърдир” деган ибораларда ўз аксини топган шеъриятга **икки хил ёндошув** шакллангани илмий адабиётларда қайд этилган ва бунга муайян дараражада ўша давр адабиётининг мавзу қамрови ва вазифаси, **ижтимоий воқеликда тутган мавқеи** ҳам сабабчидир.

Бу давр адабиётининг аксарият намуналарига хос бўлган энг асосий хусусият ақлга таяниш бўлиб, ислом минтақа маданияти доирасидаги маънавий такомил босқичларининг иккинчиси - Ислом маърифатчилиги босқичида Борлиқ ҳақиқатини англаб етишнинг етакчи йўналиши бўлган илм маърифатига тўлиқ мос келади. Мисолларга мурожаат қиласиз.

Сомонийлар даври адабиётининг таникли вакилларидан Абу Абдуллоҳ Рудакийнинг сафдоши ва замондоши Абу Шукур Балхий шундай ёзади:

Хирадманд гўяд: “Хирад – подшо-ст,
Ки бар хос-у бар ом фармонраво-ст.
Хирадро тани одаме лашкар аст,

Ҳаме шаҳват-у орзу чокар аст.

(Ақликлар айтур, ақл – подшодир,
Ақл барчага бир фармонраводир.
Тана аъзолари – ақл лашкари,
Шаҳвату орзулар унинг чокари.)³¹

Айни шу фикрларни кейинги асрда “Шоҳнома”нинг кириш кисмida **Абулқосим Фирдавсий** ривожлантиради:

Хирад беҳтар аз ҳар чи изад бедод,
Ситоши хирадро беҳ аз роҳи дод.
Хирад раҳнамо-ю хирад дилқушой,
Хирад даст гирад ба ҳар ду сарой.
Аз ў шодмони ва-з ў-ят гами-ст,
Ва-з ў-ят фузуни ва-з ў-ят ками-ст.

Хирад тира-ву марди равишан равон
Набошад ҳами шодмон ўек замон...
Каси к-ў надорад хирадро зи пеш
Дилаш гардад аз кардайи хеш реш.

(Худо неъматларин олийси идрок,
Ақлни васф этар кимки дили пок.
Ақл йўл кўрсатиб дилни этар шод,
Ҳар икки оламда ақлли обод.
Ақлдан ғамгинлик, шодлик, ўқтамлик,
Ақлдан борлигу, йўқлигу, камлик.
Бадан соғ бўлса-ю ақл – нотавон,
Бундай инсон бўлмас ҳеч вақт шодмон...
Киши иш қиласкан беаклу идрок,
Қилмишидан бўлур юрак-бағри чок).³²

Кўрамизки, агар Рудакийнинг замондоши ақлни инсон вужудининг хукмдори деб улууглаётган бўлса, **Фирдавсий** уни Аллоҳ инсонга ато этган неъматларнинг энг олийси деб талқин қилмоқда. Бундай фикрларни Рудакийдан ҳам, Юсуф Хос Ҳожибдан ҳар қанча истасак топиш мумкин. Бу давр алломалари барчаси имонли, тақволи,

31

32 Иктибослар III. Шомухамедовнинг “Форс-тожик адабиёти классиклари ижодида гуманизм тараккниёт” асаридан олинди. С. 25.

чин маънодаги мусулмон инсонлар, аммо тавхид ғоялари ҳали булар онгида Сунна босқичи даражасида англаб етилган, тавхид таълимотининг маъно теранликлари қидириш аксарият ҳолларда ҳануз бу давр шеъриятига хос эмас.

Бу давр шеъриятида бадий адабиётнинг инсонлар маънавий камолотига хизмат қилиш вазифаси ҳануз амалийроқ кўринишда идрок этилиб, Рудакийнинг қўйидаги байтлари бунга ёрқин мисол бўла олади:

Чаҳор чиз мар озодаро зи ғам бехарад,
Тане дуруст-у хўйе ник-у номе ник-у хирад.
Ҳар он-ке изадаш ҳар чаҳор рўзи дод,
Сазад ке шод зияд жовидон-у ғам нахўрад.

(Тўрт нарсани берди менга оқилларча ўйламок
Тансиҳатлик, яхши одат, яхши ном, яхши фикр,
Тангри кимга қилган бўлса бу тўрт нарсани насиб,
Мангу шодлик билан яшаб, ғам емаса ҳам арзир³³).

Қаранг-ки, шоир комил ишонч билан, инсон тани сиҳат бўлса, феъли кенг бўлса, элу юртда яхши ном қозонган бўлса, ва яна алоҳида таъкид этилмоқда-ки, ҳар ишни ақл тарозусида ўлчаб амалга ошиrsa, демак, бундай инсон албатта баҳтли бўлади ва шоду хурсандлик билан умр кечиради, деб мулоҳаза юритмоқда. Бир қараганда, шоирнинг фикрлари жуда тўғрига ўҳшаб туюлади ва тан олиб айтиш керак-ки, бугунги кунда ҳам кўпчилик инсонлар бу фикрга тўлиқ кўшилиб, ўз ҳаётларида унга амал қилиб яшашга уринадилар. Рудакий йигитлик давру давронларини сурib, эл орасида шуҳрат қозониб, Наср ибн Аҳмад Сомоний саройи даврасида юкори обрў-эътиборларга эга бўлган пайтларда шундай некбин қайфиятларни бошидан кечирганилиги шубҳасиз. Аммо шоирнинг афсус-надоматларга тўла “Қариллик қасидасини” ўқисак, унинг олдинги тасаввурлари ҳаётнинг аччик ҳақиқатига қанчалик мувофиқ келмаслигини биламиз-қўямыз. Фирдавсийнинг ҳам бутун умрини бағишлиб ёзган улкан эпопеяси ўз даврининг ҳукмдорлари наздида ўз вақтида етарли қадр топмаганлиги, улуғ шоир ўз мислсиз ижодий меҳнати натижасидан кутган умидлари юзага чиқмагани ҳақидаги ривоятлар бизгача етиб келган. Демак, фақат ақл, истеъдод, яхши феъл ва яхши ном билан баҳтга эришиш, шоду хуррам ҳаёт кечириш

мумкин деган қарашлар давр воқелигига кўп ўринда ўзини окламаслиги бора-бора равшанлашиб борди. Бундай ҳолатнинг сири Фирдавсийнинг қўйидаги сатрларида бироз очилгандек бўлади:

Хира德 гар сухан бар гузинад ҳами,
Ҳамонро гузинад ки бинад ҳами.

(Ақл агарчи танлаб-танлаб сўз юритса ҳам,
Унинг танлови фақат кўринадиган нарсаларгагина оидdir.)

Маълумки, материалистик дунёқараш фақат моддиятни, содда ҳалқ тили билан айтганда, кўзга кўринадиган, кўлга илинадиган, сезги аъзоларига таъсир қиласидиган нарсаларнинг мавжуд Борлик сифатида тан олади. Бундай қарашнинг мукаммал эмаслиги аллақачон башариятнинг илгор сиймолари томонидан қайта-қайта исботланган. Албатта, “дунёвий адабиёт” дегани мутлақо материалистик дунёқарашга таянувчи адабиёт дегани эмас. Аммо бу адабиёт мавзулари моддий дунё ҳою ҳавасларидан жуда ҳам узоқ кетмагани унинг барча намояндлари ижодида ярқ этиб кўзга ташланиб туради. Фикримизнинг исботи учун яна бир киёсий мисол келтириш билан чекланамиз.

Абу Абдуллоҳ Рудакийнинг бизгача тўлиқ етиб келган икки қасидасидан бири “Қариллик қасидаси” бўлса, иккинчиси “Модари май” (Майнинг онаси) қасидасидир. Иккинчи қасиданинг ташбиб қисми тўлигича узумдан шароб тайёрлаш жараёнининг бадий тасвирига бағишлиланган. Шеър шундай бошланади:

Модари майро бикард бояд қурбон,
Бачайи уро гирифту кард базиндон.
Бачайи уро аз-у гирифт надони,
То-ш накуби нуҳуст-у з-у накаши жон.
Гарчи набошад ҳалол дур бикардан
Бачайи кучак зи шири модару пистон,
То нахўрад шир ҳафт маҳ ба тамоми
Аз сари Ўрдибиҳишт то бўуни Обон.
Онгах шояд зи рўйи дину раҳи дод
Бача ба зиндони тангу модар - қурбон...³⁴

(Майнинг онасини қурбон қилмоқ зарур,

³³ Ўша асар, с.27.

³⁴ Посдорони сухан, с. 28.

Боласини ушлаб, зиндонбанд этмок зарур.
 Аммо уриб-эзгилаб, жонини олмагунингча,
 Ундан боласини ажратиб олиб бўлмас.
 Агарчи эрта баҳордан то куз фаслигача,
 Роса етти ой она сутига тўймагунича,
 Мурғак болачани она кўксидан
 Ажратиб олинса, ҳалол бўлмайди.
 Ана ундан кейин онани – курбон килиб,
 Болани тор зиндонга ташланса,
 Ажаб эмас, дину адолатга мос келса...)

Қасида жуда машхур бўлганлигидан унинг матнини тўлиқ келтириб ўлтирумаймиз. Бизнинг мақсадимиз **Рудакий** шеърини XI аср биринчи ярми **Ғазнавийлар** саройида таркиб топган форс тилидаги адабий мактабнинг номдор шоирларидан бири Манучехрий Домгонийнинг айни шу мавзудаги машхур мусаммати билан киёслашдир. Манучехрийнинг мусаммат-қасидаси қўйидагича бошланади:

Оби ангур биёред, ки Обонмоҳ аст,
 Кор якруя ба коми дили шоҳаншоҳ аст,
 Вақти манзар шуду вакти назари хиргоҳ аст,
 Дасти тобистон аз рўйи замин кутоҳ аст,
 Оби ангури хазониро хўрдангоҳ аст,
 Ки кас имсол накардаст мар ўро талабе.

(Узум шарбатини келтиринг-ки Обон ойи кирмоқда,
 Ишлар шоҳаншоҳнинг кўнгил хоҳишига мос келмоқда,
 Кўнгилочар давр келди, чодирга юзланадиган пайт келмоқда
 Ёзниг қуввати кетиб, кунлар қисқаришга бошламоқда,
 Кузги узум шарбатидан хузурланиш навбати этмоқда
 Шу кунгача ҳали бирор ундан тотиб кўриб улгурмади.)

Шоҳи ангури кўҳан духтаракон дод басе,
 Ки на аз дард бинолиду на бар зад нафасе,
 Ҳамаро зод ба як дафъа на пеше на пасе,
 На варо қобилае буд на фарёдрасе,
 Инчунин осон фарзанд назодаст касе,
 Ки на дарде бигирифташ мутавотир на табе.

(Кекса ток занги қатор қизчаларни дунёга келтирди,
 Аммо на уни дард тутгани билинди, на овози чиқди,
 Барча гўдаклари бир йўла туғилди, олдин-кетини бўлмади,
 На унга бирор доялик килди, на тепасида меҳрибони бўлди,
 Ҳали ҳеч ким бундай осонгина фарзанд кўрган эмас,
 На тайнинли азоб чеккани, на иситмаси чиққани сезилмади.)

Чун бизод он бачагонро сари ангушти дижам
 В-андар овехт ба рўда бачагонро ба шикам,
 Бачагон зод мудаввар ҳама бекадду қадам,
 Саду си баччаву андарзада ду даст ба ҳам.
 Ду сар андар шикам ҳар як на бешу на кам,
 На дар эшон ситухоне, на раге, на асабе.

(Зарра қайгу чекмай ул гўдакларни туғиб ташлагач,
 Барчаси киндиги кесилмасдан қорнидан осилганича қолди,
 Болачалар юм-юмалоқ, на қадди бор, на оёғи,
 Бир юзу ўттиз болача, барчаси қўлини қўлига берган,
 Ҳар бирининг қорнида икки бошча на кўп эмас, на кам эмас,
 Ҳеч бирида на суяги бор, на томири, на асаб толалари.)

Чун нигах кард бад-он духтаракон модари пир,
 Сабз буданд якояқ чу сагири чу кабир,
 Кардашон модар бистар ҳама аз сабзхарир,
 На хуриш дод мар он баччакаконрову на шир,
 На шагаб карданд мар он бачагонро, на нафир,
 Бачайи гурсина диди, ки надорад шағабе?...

(Ул қизчаларига қари онаси назар солса,
 Катта-ю кичик барчасининг ранги кўкимтири,
 Барчасига онаси яшил барглардан жой солиб берди,
 Ул мурғакларга на таом берди, на сут берди,
 Болачалар ҳам на тўпалон қиласди, на дод солади,
 Ҳеч кўрганмисиз оч гўдакнинг дод солмай жим ётганини?..)

Шу жойдан воқеаларга боғбон (шоир “разбон”, яъни “узумзор эгаси” деб атайди) аралашади. “Бу гўдакларга онаси қарамаса, сут бермаса, булар барчаси очидан ўлиб кетади-ку, қандок киласман энди, ажаб иш бўлди-ку, мени девона қиласди булар”- дейди у. Боғбон тезлик билан бориб сув очиб келади ва узумларни сугора бошлади.

“Агар буларга сут етказиб бера олмасам ҳам ҳеч бўлмаса эрта-кеч сувини бериб туриш қўлимдан келади-ку, Аллоҳ бир натижка кўрсатар,” – дейди у ўзига-ўзи. Болачалар роса сув ичиб семиришади, тебраниб-тебраниб қўйишади-ю, тўшақдан туришмайди, аста-секин чехраларига ранг кириб, тўлишади. Боғбон туну кун тепаларидан кетмай шаробу шарбат билан зиёфат қилишда давом этади. Ўз-ўзига айтади: “Бу қизчалар менинг мулким, гўё жони-таним, булар токи ток устида экан менинида меҳмон, узумзор – беҳиши фирдавсим, булар ундаги хурлар, устиларида яшил совут.”

Бир куни боғбон отланиб шаҳар тушадиган бўлди, узумзор эшигини занжирлаб, қулф солди, бирор кира олмайдиган килди. Боғбон шу кетганича бир хафта шаҳарда колиб кетди, қариндошуругникида меҳмон бўлди, аммо кўнгли-хаёли ток қизларида, охири сабри чидамай, отини орқага бурди.

Узумзорига етиб келиб, эшиқдан кириб қараса, қизлар бари етилиб, юzlари доғ босиб қорайиб, баъзисини юзи қонталаш қизил, бошқалариники сомондек сарғайган, уятдан бошлари ҳам, лаблари нозли, коринлари ҳомиладан дўппайган.

Боғбон қошлари чимирилиб, “Ло ҳавла ва ло қуввата илло биллоҳ” дуосини ўқиб, “мени не бало урди, буларга нима бўлди, ёш қизчалар катта-ю кичик бари бир кечада ҳомиладор бўлиб, оғир гуноҳга ботишипти-ку”, - деб бўғилиб, Ток қизларига ўшқира бошлади: “Ўзи кечагина онадан туғилган бўлсаларинг, ҳали киндикларинг ҳам кесилмаган бўлса, оналаринг кўкрак тутмаган, сут бермаган, юzlарингни ҳам ювмаган бўлса, ҳаммаларинг насли бузук қизлардек ҳомиладор бўлиб ўтирасаларинг, менинг қилган меҳнатларимга жавобларинг шу бўлдими? Ростини айтинглар, бу оламда йўқ ишлар қаердан бино бўлди, ким сизларни бу ҳолга солди? Бу қандай бебоклигу бедодлигу бешармлик? Бунинг устига битталаринг, иккиталаринг, учталаринг, етмиш-саксонталаринг эмас, барчаларинг шу ахволга тушиб ўтирасаларинг”, - деб уларни сўрока тутди.

Духтарони раз гуфтанд, ки “мо бегунаҳем, Мо тани хеш ба дасти бани одам наниҳем, Мо ҳама сарбасар обистани хуршеду маҳем, Мо тавонем, ки аз халқи замон дур жаҳем, Натавонем, ки аз моҳу ситора бираҳем, З-офтобу маҳамон суд надорад ҳарабе.

(Ток қизлари жавобида айтишиди-ки: “Бизда гуноҳ йўқ, Биз ўз танимизга инсон зотини якинлаштирганимиз йўқ, Биз барчамиз ойу куёшдан ҳомиладор бўлдик, Биз олам аҳлидан ўзимизни олиб қочишимиз мумкин, Аммо офтобу ойдан қандай беркинамиз, Офтобу ойдан қочган билан кутулиш имкони йўқ.)

Рўз ҳар рўзе хуршед биёяд бари мо,
Хештан барфиканад бар тани мову сари мо,
Чун шаб ояд, биравад хуршед аз маҳзари мо,
Моҳтоб ояду дархусбад дар бистари мо,
В-ин ду тан дур нагарданд зи бому дари мо,
Накунад ҳеч кас ин беадабонро адабе.

(Худонинг берган куни қуёш бизни тобласа,
Эртадан кечгача устимиздан кетмаса,
Шом тушиб, қуёш тепамиздан кетгач,
Ой чиқиб келиб, кўрпамизга кириб олса,
Бу иккиси бизнинг тому дарчамизни ҳеч тинч қўймаса,
Бу беадабларнинг адабини бериб қўядиган ҳеч зот борми ўзи?)

Бачагонмон ҳама монандай шамсу қамаранд,
З-он ки ҳамсирату ҳамсурати ҳар ду падаранд,
Тобноканд азеро ки ду улви гуҳаранд,
Бачагон-он банашибтар, ки аз ин боб гаранд,
Чехраву рангу руҳу одати обо сияранд,
Тўхматолуда нагарданд ба дигар сабабе”...

(Болаларимиз барчаси айни қуёшу ойнинг ўзгинаси,
Уларнинг сийрати ҳам суврати ҳам худди оталаридек,
Юзлари чараклаб туриши сабаби ҳам ўшалар туфайли,
Болаларнинг насл-насаби, оталари ўшалар бўлгач,
Қиёфалари, ранги-рўйи, феъллари ҳам наслларига тортган,
Бошқа сабаблар қидириб тўхматга қолишлирига ўрин йўқ.)

Ток қизлари шундай сўзлар билан ўзларини оқлашади, аммо боғбон уларнинг сўзларига қаноат ҳосил қилмай, дейди: “Мен бундай сафсаларларга ишонмайман, токи барчаларингни ўткир пичоқ билан бошларингни таналарингдан жудо қилиб, қоринларингни ёриб, устибошимни қонларингга бўяб, ўз кўзим билан бу харомибаччаларнинг

оталари қүёш билан ойдан бошқа бир зот эмаслигига амин бўлмагунимча қўймайман. Агар улар ростдан ҳам юзлари нурли ой ва қўёш болалари бўлса, агар бошқа бир зотга алоқаси бўлмаса, уларни сўйган билан жонлари узилмайди, насл-насабига тортиб, юзлари чараклаб тирилиб келаверади”.

Боғбон шундай деб, келиб ток қизларининг барчасини қийратиб сўйиб ташлади, аммо улар бўғзидан бир томчи қон томмади, уларнинг бирортаси на оҳ чекмади, на типирчиламади, боғбон барчасининг лошини келтириб бир катта тогорага солди, уларнинг устига чиқиб, газабини боса олмай, роса тепкилади. Ҳар бирининг терисини шилиб, устикону жигарини обдон эзди, қонини сузид олиб бир хумга жойлади, хумнинг оғзини сирачлаб, маҳкам беркитди, устидан иссик бўлсин деб жун палос билан ўради. Куз ўтиб, қиш чиққунча беш-олти ой (Рабиъ ул-аввал, Рабиъ ус-соний, Жумодул-аввал, Жумоду ус-соний, Ражаб, Шаъбон ойлари) шундай ташлаб қўйди. Баҳор келгач боғбон ҳукмдор каби кибр билан, қани баччаларнинг ахволи нима бўлди экан деб, ўз кўзи билан кўришга келди. Юлдузларга қараб, туннинг учдан бири ўтгач, хумнинг оғзини очди. Қараса, тош хум ичидан улар барчаси яхлит бўлиб бирлашиб, осмондаги тўлин ой каби юзи яшнаб, шўълаланиб кўкка нур сочиб турарди.

Боғбон хulosса қилдики, “бу пари қизлар чиндан бегуноҳ эканлар, дарҳақиқат, ҳомилалари қўёш ва ойдан эканлигига шубҳа қолмади, юзлари қорайгани ҳам ою қўёш таъсиридан экан, энди уларни қамоқ-қийноқдан озод қилиш пайти келипти, энди ўзим ҳам бугун бир базм тузиб ярасам бўлар экан. Чангуб руоби билан созандаларни таклиф қилиб, гулу кабобу писта-бодомлар, мева-чевалар билан дастурхон ясатиб, ушбу ёқутранг шаробнинг мазасини бир тотинсам, гул жамолию кабоб ҳидидан хузур қилиб, ҳайқирсан, “эй, дилга роҳат баҳш этувчи гулгун кадаҳни келтиринг, токи ул олийнажот, олийфазилатлар эгаси улуг ҳукмдорни шарафлаб ёд этайлик”...

Рудакийнинг қасидасидаги 35 байти ташбибдан 18 байти (36 мисра) май тайёрлаш жараёнининг тасвирига бағишлиланган бўлса, Манучехрийнинг мусамматида токда узумнинг етилишидан то май солинган хум очилгунча бўлган даврнинг мажозий тасвири 23 банд (ҳар бир бандда 6 мисрадан, жаъми 138 мисра) давомида батафсил ёритилган. Рудакийда асосий тимсоллар факат май-бола ва унинг онаси - узум (ток занги эмас)дан иборат бўлса, Манучехрий тасвирида воқеа қатнашчилари сафи кенгайиб, кекса она (ток занги), унинг қизчалари (узум доналари), боғбон (узумзор эгаси),

қўёш, ой ундаги тўлақонли рамзий тимсолларга айланади. Демак, юкоридаги ҳолатлардан келиб чиқиб, Рудакий шеърини мажозий ҳикоя деб фараз қиласак, Манучехрий асарини мажозий достонга тенгглаштириш мумкин.

Айтилганларга хulosса қилиб бир нарсага эътибор қаратайлик. Нега VIII - XI асрлар ислом минтақа адабиётини “дунёвий адабиёт” деб атадик? Маълумки, Рудакий IX аср охири - X аср биринчи ярмида яшаб ижод қилган. Манучехрий ижоди XI аср биринчи ярмига тўғри келади. Ҳар икки шоир учун умумий бўлган бир мавзу баённида қандай ривожланиш юз берганини амалда кузатдик. Аммо ҳар икки шоир яратган мажозий тасвир ортида бир хил воказелик туради. Одамни сархуш қилиб, унга кайфият баҳш этувчи майнинг қандай хосил бўлиши гўзал бир ифодалар билан тасвиф этилмоқда. Аммо бундан инсон тарбиясига қандай наф бор, ёки Борлиқ ҳақиқатини англаб етиш учун унга нечоғлиқ билим берилмоқда? Келтирилган тасвирларда бадиий адабиётнинг эстетик завқ бериш хусусияти кучли бир тарзда намоён бўлмоқда, лекин адабиётнинг иккинчи бир вазифаси – инсоннинг маънавий камолотига ижобий таъсири кўрсатиш жихати очик-ойдин оқсаб турилти. Яъни шеърдаги зоҳирий гўзаллик мазмуний теранлик билан уйғунлашган эмас. Тасвирдаги май – оддий маънодаги маст қилувчи ичимлиқдан ўзга нарса эмас. Бу деганимиз дунёвий адабиётда ижтимоий-ахлоқий мавзулар тилга олинмаган деган маънони билдирамайди. Бу давр адабиётининг дунёвийлиги шундаки, ундаги барча тасвир ва талқинлар моддий дунё чегараларидан ташкари чиқмайди, бу давр шоирлари Аллоҳнинг ягоналиги, унинг илми ва қудрати чексизлиги, Халлоқи олам ва жами башарият Парвардигори (яъни йўқдан бор қилувчи, ризқ берувчи ва Ҳақ йўлида тарбият қилувчи) эканлигини билсалар ва тан олиб эътиқод қиласалар-да, хануз гайб олами билан моддий олам орасидаги муносабатлар хусусида жиддий тафаккурга берилиш уларга хос эмас. Чунки башариятнинг маънавий такомили бир кунда, бир йилда, бир асрда амалга ошадиган ходиса эмас.

Ўтилган мавзу бўйича саволлар:

- Ислом минтақа адабиёти ривожланишининг биринчи даври қайси асрларни ўз ичига олади?
- Форс тилидаги мумтоз шеъриятнинг шаклланиши ва илк ривожи қачон ва қаерда бошланди?

3. Ислом минтақа маданияти доирасида маънавий таомил жараёни қайси босқичларни ўз ичига олади?
4. Ислом минтақа маданияти доирасидаги маънавий таомил жараёни ва бадиий адабиёт ривожининг ўзаро нисбати қандай?
5. Минтақа маънавиятида “Ислом маърифатчилиги” босқичи ва форс тилидаги адабиётнинг ривожи.
6. Сомонийлар хукмронлиги ва Рудакий етакчилигидаги Бухоро адабий мактаби.
7. Рудакий ва унга замондош шоирлар давраси.
8. Рудакийнинг бизгача тўлиқ етиб келган қасидалари.
9. Дақиқий.
10. XI аср форс тилидаги сарой шеърияти.
11. Фазнавийлар сарой шеърияти вакиллари.
12. X - XI аср достончилиги намуналари.
13. Носир Хусрав ижодининг ўзига хос жиҳатлари.
14. X - XI асрларда тасаввуфий ва фалсафий шеърият намуналари.
15. “Дунёвий адабиёт” тушунчаси. Унинг моҳияти ва асосий хусусиятлари.
16. VIII - XI асрлар адабиётининг етакчи мазмуний мундарижаси.
17. X - XI асрларда бадиий адабиётнинг инсонлар маънавий камолотига хизмат килиш вазифасини идрок этилиш даражаси.
18. Рудакий ва Манучехрий шеъриятида узумдан май тайёрлаш жараёнининг мажозий тасвири.
19. Манучехрийнинг “Оби ангур биёред, ки Обонмоҳ аст” деб бошланувчи мусаммат-достони мазмуни ва моҳияти.
20. Дунёвий адабиётда мажоз.

Адабиётлар:

2. М.-Н. О.Османов. Стиль персидско-таджикской поэзии (IX-X вв.). М., «Наука» ГРВЛ, 1974, 268+296 стр.
3. Мирзоев А. Рудаки. Жизнь и творчество. М., «Наука» ГРВЛ, 1968, 320 стр.
4. Рудаки и поэты его времени. «Сов. писатель». Ленинград. отд., 1985, 272 стр.
5. Осори Абу Абдулло Рудаки. Сталинобод, 1958, 280 сах.
6. Сабаки Рудаки. (Китоби якум). Душанбе, “Ирфон”, 1984, 304 сах.
7. Рудаки. Стихи. М., «Наука» ГРВЛ, 1964, 512 стр.

8. Мирзозода Х. Таърихи адабиёти тожик. Китоби I (I). Душанбе, “Маориф”, 1987, с.15-102.
9. Литература Востока в Средние века. Часть II. М., Изд. МГУ, 1970, с.3-40.
10. Таронаҳои дилангез. Душанбе, “Ирфон”, 1986, 92+116 сах.
11. Гулшани адаб. Жилди I. Душанбе, “Ирфон”, 1974, 432 сах.
12. Ш.Ш.Шомухамедов. Форс-тожик адабиёти классиклари. Т., 1963.

4-дарс. Фирдавсий ва унинг “Шоҳнома” асари

1. “Шоҳнома” ёзиш анъанаси

X-XI асрлар форс мумтоз адабиётининг энг буюк обидаси хеч шубҳасиз Абулқосим Фирдавсийнинг “Шоҳнома” асариdir. Улуг шоир ҳозирги Эроннинг шимоли-шарқида жойлашган Фирдавс шаҳри (қадимги Тоборон шаҳри) яқинидаги Бож кишлогида камбагаллашган ер эгаси оиласида тақрибан 936-940 йиллар орасида дунёга келиб, 1020-1025 йиллар оралиғида қадимги Тус шаҳрида (ҳозирги Машҳад шаҳри яқинида) вафот этган. Унинг ҳаёт йўли ҳақида ишончли манбалар ниҳоятда кам. Биз ҳатто унинг асл исмини ҳам аник билмаймиз. Фирдавсий ўз эпопеясини Дақиқий (956-980)нинг фожеали ўлимидан кейин ёзишга бошлаган ва унинг 60.000 байти “Шоҳнома” асари 30-35 йиллик изчил ижодий меҳнат натижасидир.

Эрон хукмдорлари тарихини ёзиш анъанаси Сосонийлар сулоласи даврида шаклланган бўлиб, улар ўша даврда “Хватай-намак” (“Худай-наме”) деб аталган. Кейинроқ улар “Сийар ал-мулук” номи билан араб тилига ўғирилган. Фирдавсийгача X асрда янги форс тилида “Шоҳнома” номи билан яратилган 5 асар ҳақида маълумотлар бизгача етиб келган. Булар – 1)Масъуд Марвазийнинг шеърий “Шоҳнома”си (ундан бизгача бирнеча байт етиб келган), 2)Абу Али Балхийнинг насрий “Шоҳнома”си (бу асар мазмуни ҳақида турли манбаларда хабар берилади), 3)Абу Али Балхий асари (бу муаллиф ҳақида фақат Бируний хабар берган), 4) Сомонийлар лашкарбошиси, Тус шахрининг ҳокими Абу Мансур Муҳаммад ибн Абдураззок (вафоти 963 йил) ўз вазири Абу Мансур Муаммирийга Эрон подшоҳлари тарихини тузишни топширади. Муаммирий (Маммарий) Хуросоннинг турли шаҳарларидан 4 донишманд мўбад(маздаясна дини уламолари)ни топтириб йигиб келиб уларга

подшохлар тарихини ёзиши буюради. “Абу Мансур Шоҳномаси” номи билан машхур бўлган бу насрый асар 957 йилда тайёр бўлади. Ва, ниҳоят, 5) Дақиқийнинг шеърий “Шоҳнома”сидан 1000 байт Фирдавсий асарининг таркибида бизгача етиб келган. Олдинги 4 “Шоҳнома” ҳакида турли манбалар аниқ хабар берсалар-да, уларнинг асл матнлари бизгача етиб келган эмас.

Олимларнинг аниқлашига кўра, Фирдавсий ўз асарини кўпроқ насрый Абу Мансур “Шоҳнома”си маълумотларига таяниб ижод этган. Шу билан бирга М.-Н.Османовнинг маҳсус тадқиқотидан маълум бўлишича, шоир бошқа манбалардан ҳам унумли фойдаланган. Албатта, насрый “Шоҳнома” лар кўп жиҳатдан ўша давр анъаналарига биноан ёзилган тарихий мазмундаги асарлар бўлиб, уларда тарихий воқеалар ва ўтмиш асотирлари ҳакида батафсил ёки қисқача хабар берилади, маълумотлар келтирилади, асосан баён услуги қўлланилади. Фирдавсий “Шоҳнома”си эса бадиий асар бўлиб, унда воқеаларнинг бадиий тасвири берилади, рассом бўёқлардан кандай фойдаланса, шоир ҳам тил имкониятларидан худди шундай фойдаланади. Шоир қалами остида тарихий воқеалар, афсона ва асотирлар китобхон кўз олдида жонли намоён бўлади, тарихий шахслар ва афсонавий қаҳрамонларнинг тимсоллари тирик инсонларга айланиб ҳаракатланади, фикрлайди ва сўзлайди, азобланади ва шодланади, гўё биз билан мулоқотга киришади ва бизнинг руҳимизга ҳам таъсир киласди.

Фирдавсий “Шоҳнома”сининг биринчи таҳрири 994 йилда (хижрий қамарий 384 йил) поёнига етган. Аммо шоир яратган асаридан кўнгли тўлмай уни яна таҳрир қилиб тўлдиришга киришган ва асарнинг иккинчи таҳрири хижрий қамарий хисобида 400 йилда (милодий 1010-1011 йиллар орасида) тайёр бўлди. Бу улуғ эпопея нафақат ҳажм жиҳатидан, балки ўз бадиий кудрати ва мазмун кўламига кўра ҳам ҳайратланарли ва маҳобатлидир. Буни ёркин тасаввур қилиш учун унинг қисқача сюжети билан танишиб чикиш кифоя.

2. Асар муқаддимаси

Асар муқаддимаси 225 байтдан иборат бўлиб ягона Тангри ҳамди билан бошланади:

Ба номи худованди жону хирад

К-аз-ин бартар андиша бар нагзарад.

Худованди ному худованди жой,

Худованди рўзидаҳои раҳнамой...

Кейинги фасл аклни улуғлашга (“Ситойиши хирад”) багишлиланган бўлиб, 16-34 байтларни қамраб олади. Ундан сўнг олам ва одамнинг яратилиши, Пайғамбар (сав) мадҳи, асарнинг яратилиш сабаблари ва манбалари ҳақида тўхталиб, охирида 48 байт Султон Маҳмудга мадҳия келтирилади. Шоир инсоннинг ер юзида халифа қилиб яратилганлигига алоҳида аҳамият беради:

Занжирнинг охирги ҳалқаси инсон,

У – қалит, бандларни очади осон.

Сарвдек тик бошини кўтармии мағур,

Борлиги – яхши сўз, ақлу тафаккур.

Ақл бирла идрок фақат унга ёр,

Бутун тилсиз олам фармонига зор.

Шундай экан, инсон ўз олий мақомига муносиб иш тутмоли зарур:

Оламда биринчи ҳисоб эт ўзинг,

Ўйинчоқ бўлмасин айтур ҳар сўзинг...

Танангни меҳнатда айлагил бардам,

Билим бирла меҳнат доимо ҳамдам.

Ёмонликдан бўлай дессанг мосуво,

Ёғилмасин дессанг бошингга бало...

Фалак шиларига боқиб айла фан,

Дармон ҳам ўшандан, дард ҳам ўшандан.

Достонни текширган олимлар унинг асосий мавзунин уч бўлакка тақсим қилгандар. Биринчиси афсонавий қисм бўлиб, унда шоир қадимиий асотирларни бадиий ишлаб чиқади. Иккинчиси қаҳрамонлик эпоси хисобланади. Бу бўлим, асосан, Рустами Достон унинг отаси Зол, бобоси Сом ва бошқа баҳодирлар ҳақидаги қиссалардан иборат. Учинчиси - тарихий бўлим. Бунда Эрон ва Ўрта Осиё ҳалқларининг Сосонийлар давридан бошлаб то араблар бостириб келгунгача тарихи бадиий бўёкларда ёритиб берилади.

3. Афсонавий ҳукмдорлар ҳақидаги қисм

Муқаддимадан сўнг шоир афсонавий шоҳлар — Каюмарс, Хушанг, Тахмурас, Жамшид, Захҳок, Фаридун ва унинг ўғиллари ҳаётидан ҳикоя киласди, бу қисм жами 1716 байтдан иборат бўлиб, биринчи уч ҳукмдор тарихи қиска (156 байт), кейингилари билан боғлиқ воқеалар анча батафсил тасвир этилади(1560 байт).

Каюмарс қадим асотирларга биноан «Шоҳнома»да ҳам биринчи одам, ҳам дунёнинг биринчи подшоси. Унинг даврида одамлар ҳали олов нималигини билмайдилар, ер ҳайдаб экин экишни, мол бокишни, уй қуришни ҳам билмайдилар, улар тоглардаги ғорларда яшаб ов билан кун кечирадилар, ҳайвон терисига ўралиб юрадилар.

Каюмарсга жаҳоншоҳлик буюрди,

Илк бора манзилин тоз ичра қурди.

Тахту бахтин топиб тоздан фаровон,

Йўлбарс терисидан қиласди чопон.

Каюмарс 30 йил шоҳлик қиласди. Унинг Сиёмак номли бирдан-бир суюкли ўғли девлар билан жангда ҳалок бўлади.

Сиёмакнинг ўғли **Хушанг** бобоси қўлида тарбия топади ва девлар билан жанг қилиб, отаси қасосини олади. Бобоси вафотидан сўнг подшолик унга мерос қолади. Унинг 40 йиллик хукмронлик даврида одамлар оловдан фойдаланиши, ариклар қазиш, сув чиқариши, ҳайвонларни кўлда бокишни ўрганадилар. Аммо унга ҳам жаҳон вафо қилмади.

Тахтга Хушангнинг ўғли **Тахмурас** ўлтиради. У девларни енгидиб. инсонларга хизмат қилдиргани учун «Девбанд» лақабини олади. Бу ҳам 30 йил подшолик қиласди. Унинг даврида кишилар мато **тўқишини**, бичиб-тишини, отларни бокиб минишни, хўроз, товуқ ва бошка қушларни бокишни, киргий, лочин кабиларни овга солишни ўрганадилар. Тахмурас девларни жиловлаб миниб юради, улар шоҳга 30 хил ҳат ўргатадилар. Унинг Шодак номли ақлли ва билимдон вазири ҳам бўлади. У шоҳни фақат яхшиликларга бошлайди. Шоир бу бўлимни ҳам қуидаги лирик чекиниш билан тугаллади:

Оламдан кўз юмб кетди тоҗдор,

Яхши ишлар қолди ундан ёдгор.

Эй ҷарҳ, ўриб ташлаш гар бўлса одат,

Экмоқ, ўстирмоқлик бизни не ҳожсат?!

Букун кўтарарсан биронни юксак,

Эрта тупроқ аро жонсиз бир кесак.

Тахмурас вафотидан сўнг унинг ўғли **Жамшид** тахтга ўтиради. У ёшлигидан яхши тарбия олган, ўқимиши, билимдон ва одил подшо бўлади. У 70 йил хукмронлик қиласди. Унинг даврида мамлакат гуллаб-яшнайди, табиат сирлари очилади, ер ўз бойликларини одамарига нисор этади. Одамлар турли ҳунарларни ўрганади, Улар металл эритиб, ундан курол-аслаҳа яшасни, конлардан олтин, кумуш, олмос, ёкут, феруза каби кимматбахо металл ва тошларни

олиб ишлатишни; турли гиёҳ, ўт, илдизлардан доривор ҳамда хушбўй атрлар ясашни ихтиро этадилар.

Одамлар тинч меҳнат билан машғул, фаровон ҳаёт кечирадилар, Ахриман аскари - девлар ҳам уларга хизмат қиласди. Улар ғиши қўйиб, иморатлар соладилар ва одамларни мейморлик сирларидан огоҳ этадилар. Курол-аслаҳа факат ваҳший ҳайвонларга қарши ишлатилади.

Жамшид одамларни тўрт гурух, табақага тақсим қиласди. Руҳоний-муъбадларни **котузийлар** деб атайди ва уларга баланд төғ чўққилиридан жой қилиб беради. Улар абадий оловни, қадим анъаналарни сақлайдилар, илму фанни ривожлантирадилар.

Котузий атамиши гуруҳ дунёда,

Танламиши ибодат иўлини афтода,

Бу гуруҳни ҳалқдан ажратиб подиши,

Жойларин кўрсатди тозу тоши аро.

Иккинчи гурух – **нисорийлар**, улар ҳалқ тинчлиги ва давлат мустаҳкамлигини сақловчи жанговар аскарлар эди.

Иккинчи гуруҳни сўнгра сафлар шоҳ,

Нисорий атапур баҳодир сипоҳ.

Жанговар қаҳрамон, паҳлавон шунда,

Лашкарлар шукуҳи, юртга шон бунда.

Учинчи табақа кишилари - **насудийлар** дехқончилик билан банд бўлган тинч меҳнат аҳллари.

Учинчи гуруҳни насудий деди,

Қани, ким уларнинг гамини еди?

Ўзи экиб, ўзи пиширап, ўрар,

Беминнат, бедакки ўз кунин кўрар.

Бирорга қарамас, эгнида жандо,

Кўнгли тўқ, қулоқ тинч, лабида ханда.

Тўртинги гурухга ҳар нарсада моҳир ҳунармандлар киради ва улар **ахтухуштый** деб аталади.

Тўртшичи гуруҳни ахтухуштый дер

Булар ҳунарига қойил осмон, ер.

Ҳунарда тинимсиз, шичан, донишманд,

Тоза руҳи доим фикру ўйга банд.

Ҳамма ўз жойида, барча ўз иши билан банд. Мамлакат кундан-кунга яшнаб кетади. Беморлар гиёҳлардан дори-дармон оладилар, Жамшид ҳатто девларга таҳтини кўтартириб осмонга учади. Шундай бахтиёрлик ва фаровончилиқда Жамшид подшолиги давом этади.

*На дард, на ёмонлик кўрмас бир инсон,
Девларни ҳам банди қылганди султон.
Неча йиллар шундай ўтади ҳаёт,
Эзгуликдан ўзга иш бу шоҳга ёт.
Жаҳон унга тобеъ бўлди сар-басар,
Жаҳондор шукуҳ-ла таҳтда ўлтирад.
Улуғлик таҳтига кўз ташлаб гоҳ-гоҳ,-
Ўзидан бошқани кўрмай қолди шоҳ.*

Жамшид одамлар меҳри ва мақтоворидан гуурланиб кетади. У уламо-ю ҳукамо, айёну акобирни йигиб, нутқ сўзлайди ва қўлга киритилган ютукларни бир-бир санаб, сўнгиди: “Буларнинг ҳаммасини сизга мен бердим, бас, шундек экан, мени “жасонофарин” (яъни дунёни яратувчи) ҳисоб этинг ва хизматимда бош эгиб туринг, ким менга

тобеълик қиласа, ул Ахриман” дейди мутакаббирлик билан:

*Емоқ-ичмоқ, уйқу, оромингиз - мен,
Кийим-кечак, орзу ва комингиз - мен.
Дору дармонидан созланди дунё
Инсондан чекинди ўлим, дард, бало.
Бошида ҳуш, тандаги жонингиздурман,
Ҳамон мендан кўриб бу ишлар барин,
Энди мени атанг жасонофарин.*

Буни эшитган муъбадлар чурқ этмай бош эгиб қоладилар. Шундан бошлаб мамлакат улуғлари ундан юз ўғирадилар. Юртда парокандалик бошланади. Жамшид қўркув ва саросимага тушиб қолади. Зодагонлар халқдан яширинча араб шоҳи Захҳок билан тил бириктирадилар. Захҳок босиб келганда Жамшид қочиб кетган эди. Таҳти Захҳок эгаллади. Юз йилдан сўнг Захҳок Жамшидни Хитой денгизи қирғокларидан топиб, арралатиб икки бўлиб ташлайди.

1) Темирчи Кова ҳақида қисса

Захҳок воситаси билан одамзод тухумини куритишини режа қилган иблис ошпаз қиёфасида келиб, Захҳокка хизмат қиласди ва қуш гўштидан лаззатли таомлар пишириб беради. Унинг таомларидан мамнун Захҳок: «Мукофотига нима тилайсан?» деганида ошпаз иблис: «Менга ҳеч нима керак эмас, елкангдан ўпич олишга рухсат берсанг, шу менга катта мукофт», дейди.

*Шоҳдан фақат битта истагим бордир,
Истик бажсо бўлса, омадим ёрдир.*

*Фармон этсаиг, шул он ўрнимдан қўтиб,
Кўзга суртсам икки кифтларинг ўтиб.*

Захҳок рози бўлади. Иблис унинг икки елкасидан ўпич олиб, ўзи фойиб бўлади. Захҳок елкасидан эса икки илон ўсиб чиқади. Золим Захҳок елкасидан ўсиб чиққан икки илонни тўйдириш учун ҳар куни эл фарзандидан икки йигитни ўлдириб, миясини қовуриб илонларга едирад эди.

Миниб таҳтга Захҳок бўлиб шаҳриёр,

*Давр сурди минг йил жуда баҳтиёр.
Бўйсунарди унга тамоми жаҳон,
Шу аҳволда ўтди узун бир замон.
Тутуб ҳар томонни қаро деву жисин,
Битуб яхши одат, олиб авж кин,
Хунар хору, жоду бўлиб аржуманд,
Адолат иўқолди, ёмонлик баланд.
Узайди ёвузлик - Ахриман қўли,
Чин сўзга қисилди инсонлар тили.*

Шу ердан темирчи Кова ҳақидаги қисса бошланади. Бу қисса «Шоҳнома»нинг энг таъсирили эпизодларидан ҳисбланади. Кова номли темирчининг 19 ўғли бор эди. 17 таси Захҳок илонларига ем бўлади. Охири ўн саккизинчи фарзанди ҳам ўлимга олиб кетилгач, мазлум ота подшоҳ ҳузурига кириб боради. Шоҳнинг «Сенга ким зулм қилди?» - деган саволига жавобан Кова:

*Қўлларин бошига уриб дер: «Эй шоҳ,
Менинг номим Кова, адолат, доддоҳ,
Сендан ситам кўрдим, сендандир раво,
Одил бўлсанг қўлмоқ дардимга даво.
Мен бир темирчиман безарар, бегаши,
Сен шоҳдан бошимга ёгар бу оташ.
Сен шоҳсан, бўлсанг-да ажсадошайкар,
Шоҳ бўлиши керак адолатпарвар.
Агар етти иқлим шоҳлигингда жасам
Нечун бизга қисмат фақат дарду гам.
Энди ишларингдан менга бер ҳисоб,
Жаҳон ҳайратингдан танг қолсин шу топ.
Магар ҳисобингдан бўлади маълум
Фарзандимдан нечук айладинг маҳрум.
Нечук фармон этдинг, илонлар есин,
Гуноҳспз ўғиллар тоза миясин?»*

Захъок бундай жасоратдан ҳайратга тушади ва ўзини адолатли кўрсатиш мақсадида Ковага ўғлини қайтариб беришлари ҳакида фармон беради. Бу пайтда Эрон шоҳлари таҳтининг қонуний вориси Фаридун улғайиб золим шоҳга қарши кураш бошлаган, қасос яқин эканлигини сезган Захъок қаттиқ ваҳимада, ҳокимиятни қўлида сақлаб қолиш учун ўзини одил подшо қилиб кўрсатиш ҳаракатига тушган. У гўё ўзи қилган эзгу ишларини қайд эттириб бир ёрлик тайёрлатган, ор-номусдан маҳрум сарой аъёнлари бу ёрлик тагига имзо чека бошлаган эдилар. Темирчи Кова шу аснода саройга кириб келган эди. Захъок ўртадаги ёрлиққа унинг ҳам имзо чекишини сўрайди. Шунда Фирдавсий қалами остида болалари ғамидан забун оддий темирчи буюк бир ватанпарвар, исёнкор инсонга айланиб кетади:

*Ёрлиқни ўқиган Кова темирчи,
Кўзидан ўт чақнаб, ўртанди ичи.
Аёнларга деди: «Худо бехабар
Девга малай бўлиб қолибсиз, аксар.
Ахриман сўзига берибсиз дилни,
Дўзаҳ сари тўғри олибсиз йўлни.
Бу ёрлиққа исмим чекмасман асло,
Ҳеч қўркув соломлас менга аждаҳо.
Ғазабидан қалт-қалт титрай бошлади,
Ёрлиқни йиртди-ю, ерга ташлади.*

Эшикка югурниб чикқан Ковани халқ қуршаб олади. У ўзининг пешбандини байроқ қилиб золим ҳукмдорга қарши исён кўтаради. Бу байроқ остига тўпланган халқ золим шоҳин таҳтдан қулатади ва одил **Фаридунни** таҳтга ўтқазишиади. Мамлакатда яна адолат, ободончилик бошланади.

Кова образини Фирдавсийнинг катта ижодий ютуғларидан деб ҳисоблаш мумкин. Унинг жасорати орқали шоир халқнинг улуғвор образини ёрқин бўёкларда чизиб беради.

Фаридун адолат билан давлатни бошқариб, унинг қўл остида халқ баҳтили ва фаровон умр кечиради. У 500 йил шоҳлик қиласи ва З ўғил фарзанд кўради. Улар турли илмлар ўрганиб, жанг ва ов сирларини эгаллаб ўсадилар.

У вақтлар бола туғилиши биланоқ исм қўйиш одат бўлмаган. Бола ўсиб, балоғатга етгачгина унинг хулқ-атворига караб исм берилган. Ўғилларига исм қўйиш вақти етгач, бир куни уч акаука ширкор қилиб юришганда, Фаридун даҳшатли аждаҳо қиёфасига кириб уларга бирма-бир ҳужум қиласи. Катта ўғил ўзини панага олиб қочади. Бекорчи хатарга ўзини урмайди. Ақли

бору жасорати йўқ. Иккинчи ўғлига ҳужум қилса, у аждарни енгмоқчи бўлиб, хатарли жанг бошлади. Демак, бу ўғилда жасорат зўр, аммо ақлу тадбиркорлик етишмайди. Шу пайт кенжа ўғил акасига ёрдамга келади ва: «Эй аждаҳо, биз уч оғанинимиз, бир бўлиб ҳужум қилсак, маҳв бўласан, қайт!» деб хитоб қиласи.

Аждар чекинади. Фаридун ўз қиёфасида саройига қайтади. Ўғиллари келгач, уларга исм қўйиш маросимини ўтказади: каттасига ақли саломат маъносида Салм исмини беради; ўртансасига ботир маъносини берувчи Тур деган номни беради; ҳам оқил, ҳам меҳрибон, олийжаноб ва жасур бўлган кенжа ўғлига олижаноб эроний маъносида Эраж номини беради.

Фаридун кексайиб, соғлиги заифлаша бошлаганини сезгач, мамлакатни уч ўғлига тақсим қилиб беради. Мамлакатнинг ғарбий қисмида ЙРум вилояти Салмга, Чин билан бирга шарқий қисми Турга тегади ва бундан сўнг бу ўлка Турон деб атала бошлади. Ота Марказий Эрон ерларини севимли ўғли Эражга беради ва уни валиаҳд эълон қиласи.

Ахриман Салм билан Турнинг дилига қаттиқ ҳасад ўтини солиб, уларни йўлдан уради. Акалар Эражга қарши фитна уюштириб, ундан тахту тожни тортиб олмоқчи бўладилар. Аскар йигиб, оталарига талабнома хати юборадилар. Шунда Эраж акаларининг ақлу ҳушига ишониб, аскарсиз улар ҳузурига беради ва ўртадаги адоваратни яхшилик билан ҳал қилмоқчи бўлади. Тур сўзга қулоқ солгиси келмай, остидаги курси билан Эражнинг бошига туширади. Шунда ҳам Эраж уларга мурожаат этиб:

*Ўз уканг қонига ташнапик нечун,
Пир отанг дилига гүшналик нечун?!
Дунёни истадинг, топдинг, тўйма қон,
Ношукур бўлмагин, не деяр Яздан?! —*

деб уларни ваҳшиёна қотилликдан қайтармоқчи бўлади. Аммо ҳасад олови ақл кўзини кўр қилган акалар Эраж кўксига ханжар урадилар. Сўнг унинг бошини кесиб оталарига юборадилар.

Шундай қилиб, даҳшатли жиноят содир бўлади, мамлакатдаги барча катта-кичикнинг ғазаби алнга олади. Бутун Эрон улардан юз ўгиради. Шу воқеадан бошлаб Эрон ва Турон орасида абадий адоваратли урушлар қизиб кетади ва бу фожеали хусуматчилик “Шоҳнома” охиригача давом этади.

Эражнинг қайлиги Моҳофарид фарзанд кутар эди. Фаридун энди шунга умид боғлайди. Аммо ундан киз туғилади. Фаридун

ўйлаган қасос соати яна чўзилиб кетади. Энди кекса Фаридун шу набирачани авайлаб парвариш қиласи ва бўйига етгач, Жамшид авлодидан бўлган баҳодир Пашантга турмушга беради. Ёш оила ўғил кўради, боланинг хусни жамоли мисоли жаннатдан нишона эди. Шунга кўра кекса Фаридун унга **Манучехр** деб от кўяди. Паҳлавон бола тез ўсиб-улғаяди, барча илму хунарларни эгаллади. Ва ниҳоят, кўшин тортиб, Салм ва Турни жангда ҳалок этиб, бобоси Эраж қасдини олади. Ёвуз Ахриман бу гал ҳам ниятига етолмайди.

Кекса Фаридун жаҳоннинг нокомиллигидан шикоят қилиб, оламдан кўз юмади. Унинг катта ўғиллари Ахриман йўлидан кетдилар, охири учала ўғил ҳам ҳалок бўлди. Уларнинг иккисида ўз биродарлари хунидан қиёматга қадар ювилмас дод қолди. Фаридуннинг ягона кишвари ўзаро абадий душман бўлган мамлакатларга бўлинниб кетди.

Афсонавий ҳукмдорлар ҳақидаги қисм шу билан тугайди. “Шоҳнома”нинг академик Е.Э.Бертельс раҳбарлигидаги олимлар гурухи тузган 9 жилдли танқидий матнинда бу қисм 1-жилднинг ярмидан озроғини эгаллаган.

4. Паҳлавонлик саргузаштлари ҳақидаги қисм

(Бу мавзу “Шоҳнома”нинг энг катта қисмини ташкил этиб, 27404 байтдан иборат ва танқидий матнининг 1-жислд 135-саҳифасидан б-жисл охиригача тўлиқ қамраб олган.)

Манучехр катта бобосига олтин даҳма курдиради, бутун мамлакат етти кун нилдек кўк либос кийиб мотам тутади. Ҳафта ўтгач, Манучехр тож кийиб, подшолик таҳтига чиқади. Фаридун шоҳлиги даврида кўшин бошида Кова ўғли Карон ва девлар билан урушда яқзарб лақабини олган Сом турар эдилар. Бу даврда Эрон ва Турон орасидаги қонли қасос урушлари гоҳ сўниб, гоҳ аланталаниб давом этаверади. Манучехр 120 йил подшолик қиласи. Энди майдонга Сейстон баҳодирлари чиқадилар.

Шоҳ Манучехр кўпроқ Сейстон ҳокими Сомга таянарди. Сомнинг кўп замон фарзанди бўлмайди. Охири овда юрганида хотини ўғил туқкани ҳакида хабар етади. Аммо бола оқ сочли түғилади. Ҳафа бўлган Сом буни иблис килмиши деб тушунади ва: «Менга бундай мўйсафид бола керак эмас», деб уни Элбурз тоғида одам оёғи тегмаган жойларга олиб бориб ташлашни буоради.

«Бу иснондан ташлаб кетай Эронни,

Юртимдан бегона кезай жаҳонни!»
Шундай деб юз бурди кўзларда газаб,
Бахтидан норози, дилида азоб.
Кулларга буюрди, тинчитинг дея,
Бу юртдан узоқча иргитинг дея.

Шундай қиласидилар, афсонавий Симурғ қуши болани кўтариб ўз уясига кўяди ва ўз болалари қатори уни ҳам бокиб тарбиялайди. Сом бошқа фарзанд кўрмайди, ибодатхонага кириб, ўз қилмишидан тавба қиласи ва Элбурз тоғига бориб, ўғлини топиб келади. Энди **Зол** вояга етган кўҳлик ва паҳлавон бир йигит эди.

У ўғлига боқди бошидан-оёқ,
Тахту тоғсга лойиқ қўринди шу чоқ.
Чехраси қуёшдек, тана шердек зўр,
Дили паҳлавону қўл қиличга жсур.
Сом дили жаннатдек барқ уриб кетди,
Дилда не хуш сўз бор ўғлига етди.

Сомнинг ўз ўғлини топиб келганидан хабар топган Манучехр икки ўғли (Наузар ва Зораён)дан бири Наузарни Сом юртига юбориб, уларни ўз хузурига чорлайди. Сом ва Зол Манучехр даргоҳига келадилар. Зол хуснига ва ақлу идрокига барча қойил. Улар Зобулистонга қайтиб кетадилар. Сом ўғлига ҳарбий хунар ва билимларни астойдил ўргата бошлади.

Кунлар ўқиши-ўрганишда ўтади. Сом яна Эрон душманлари билан урушга отланади. Зобул хонлигини Золга топшириб ўйлга чиқар экан, унга одил ва қарамли бўлиш, ўз она юрти Зобулни обод этишга ҳаракат қилиш, илму фан, хунару санъатга ҳомийлик қилиш кераклиги ҳақида насиҳат қиласи. Барча яхшилик ва фаровонлик илму хунардан келишларини алоҳида уқтиради.

2) Зол ва Рудоба достони (1612 байт)

Отасидан айрилиб колган ўспирин Зол усиз ўзини қайга кўйишини билмайди. Охири мамлакатни бир айланиб чиқишига карор беради.

Сомнинг кўл остидаги амирлардан бири Кобулистон ҳокими Мехроб эди. Зол унинг қизи **Рудобага** ошиқ бўлиб қолади. Рудоба ҳам уни севади. Аммо Мехроб золим подшо Заҳҳок авлодларидан эди.

Шунинг учун Золнинг Рудобага уйланишига қарши чиқадилар. Иблис авлодига кўшилишни истамайдилар. Шунда Зол шоҳ Манучехр хузурига боради. У ўзининг ақлу фаросати или шоҳга ёқиб

қолади. Айтган гаплари жуда ўринли, мунажжимларга маслаҳат солишади. Мунажжимлар Зол ва Рудоба қўшилсалар, мисли кўрилмаган паҳлавон дунёга келишини башорат қиласалар. Зол Рудобага уйланади.

Рудобанинг ой-куни етади, аммо туголмай қийналади. Шунда Зол ўзининг тутинган онаси Симурғ ёнига маслаҳатга боради. Симурғ Рудобанинг корнини ёриб болани олиш кераклигини маслаҳат беради ва қандай гиёхлардан дору ясашини айтади. Шундай қиласалар. Бу қийноклардан кутулган Рудоба “бирустам”, яъни «кутулдим» деб юборади. Шундан боланинг исми «Рустам» бўлади. Бу хабардан Сом ниҳоятда севинчга тўлади:

*Иргиб туриб, ундан узмайин кўзин,
Дер эди: «Бу бола нақ менинг ўзим».
Хабарчини чорлаб келтириди шул дам
Бўйини кўмгунча сочдишлар дирҳам.*

Рустам тез ўсиб паҳлавон йигит бўлади. У афсонавий кучга эга, у етти ёшлигига оқ филни енгади, ўтирганда ҳам бўйи ҳаммадан баланд, юрганда ўз оғирлиги залворидан оёғи ерга ботиб кетади. Уни факат ўзи учун яратилган Раҳш номли отгина кўтара олади. В ақл-заковатли, ҳарбий ишда истеъоддли, маҳорати юксак саркарда ва енгилмас паҳлавон бўлиб етишади. У ватан балогардони. Уни Фирдавсий ҳам, Ўрта Осиё ва Эрон халқлари ҳам жуда севадилар. У ватанга, халқига узоқ хизмат қиласи, фидойилик кўрсатади.

Аслида сейстонлик баҳодир Рустами Достонни «Шоҳнома»нинг бош қаҳрамони десак, хато бўлмайди. Шуни қайд қилиб ўтмоқ керакки, сейстонликларнинг аждодлари - саклар Эрон мифологияси, афсона ва қаҳрамонлик ривоятлари пайдо бўлган даврдан анча кейин Сейстонга кўчиб келган эдилар. Фирдавсий истифода этган қадимги Эрон «Худойнома»ларида Рустам ҳақида маълумотлар ё бутунлай бўлмаган, ё аҳамиятсизроқ персонажлар катори тилга олинган. Сейстон баҳодирлари ҳақидаги ривоятлар Эрон қаҳрамонлик эпосига қайси вақтда қўшилганлиги аниқ эмас. «Шоҳнома»да эса Сейстон баҳодирлари, айниқса, Рустами Достон асосий ролни ўйнайди. Шуниси қизиқки, Сейстон баҳодирлари ҳақидаги киссалар сакларнинг Сейстонга кўчишидан анча олдин тўқилган эди. Рустамнинг девлар билан жангни ҳақидаги ҳикоят Муғ қатъасидан топилган сўғд ёзувларида сакланиб қолган. Шахристондан учинчи асрга доир Рустам ва Сухроб жангни тасвири топилган.

«Шоҳнома»да Рустам энг машхур Эрон паҳлавони, у Эрон ҳарбий кучларининг таянчи, ўз ватани Эрон ва унинг ифодаси

хисобланган Эрон шоҳига чексиз садоқати билан яққол кўзга ташланиб туради. Фирдавсий Рустам портретини жуда йирик ва улкан қилиб тасвирлайди, уни йирик планда кўрсатади. Масалан, у бўйирса тоғлар ларзага келади, юрганида залворидан оёғи тошга ҳам ботиб кетади, ўтирган чогида ҳам бўйи ҳаммадан баланд ва ҳоказо. Рустам енгилмас ва магрур табиатли баҳодир, У ўз ватани, ўз халқи озодлиги йўлида ҳар қандай қаттол жангдан ҳам тап тортмайди, аммо шу билан бирга у ҳарбий найрангга ҳам уста.

Манучехр ўлимидан кейин тахтга катта ўғли **Наузар** ўтиради. Унинг ақлсизлиги ва ўзбошимчалиги мамлакатда норозилик уйғотади. Лашкарбошилар уни тахтидан туширмоқчи ҳам бўладилар, аммо Сом бунга йўл қўймайди. У конуний шоҳга бўйсуниш лозимлигини уқтиради. Сомнинг ўзи подшони йўлга солиб қўяди, мамлакатда бошбошдоқлик камаяди, яна хотиржамлик ўрнатилади ва ободончилик йўлга қўйилади. Аммо Сомнинг ўлимидан кейин Эрон ва Турон ўртасида кўп йиллик урушлар яна бошланиб кетади. Турон шоҳи Афросиёб Наузарни асир олади ва катл эттиради. Эронлилар Фаридун авлодидан кексайиб қолган Зав Тахмоспни тахтга ўтказадилар. Унинг беш йиллик шоҳлиги тинчликда ўтади. Завнинг ўлимидан кейин Эрон тахтига унинг ўғли **Гершасп** ўтиради. Гершасп 9 йил подшолик қиласи. Унинг даврида Рустам вояга етиб, ўзига Раҳш номли отни танлаб олади:

*Қора кўзли саман, узун думли от,
Оёқлари қора, туёғи пўлот.
Қора палос узра чумоли изи -
Бўлса қора тунда кўради кўзи.
Кувватда фил, бўйи туядан узун,
Кудратда Беҳистун шеридан устун.*

Гершасп ўлимидан кейин Эрон тахти яна бўш қолади. Бу вақт Турнинг набираси Пашанг ҳукмронлик қиласи эди. У энди бобосининг қасоси учун уруш бошлаш пайти келди деб ўйлади ва алп баҳодир Афросиёбни чакириб, Эронга юриш бошлаш ҳақида фармон беради.

Кобулда отаси Сомга мақбара кураётган Зол энди Эрон паҳлавонларига бошлилиқ қиласи. Туронлилар билан уруш давом этади. Эрон тахтига подшо, аскарларга бошлиқ керак эди. Эрон кексалари, баҳодирлар ва муъбадлар маслаҳатга йигилиб, Элбурз тоғи тепасидаги водийда Фаридун авлодидан бўлган Қубодшоҳ яшайди, шуни олиб келиш керак, дейишади. Рустам бориб, **Кайкубодни** олиб келада ва тахтга ўтказади. Унинг юз йиллик подшолиги даврида ҳам

Эрон ва Турон урушлари давом этади. Рустам Афросиёб билан жанг қиласи.

Кайқубоддан сўнг таҳтга Кайковус ўтиради. Рустамнинг кўп жасоратлари Кайковуснинг шоҳлиги даврида юз беради. Кайковус узокни ўйламайдиган, палапартиш иш қиласидиган, ўзига бино қўйган тақаббур шоҳ эди.

Гев Золга дер эрди: «Яратгаи худо,
Бўлсин энди унга ўзи раҳнамо.
Ёнида бўлмаса саҳоба чандон,
Мен дея олмайман Ковусни инсон».

Кайковус Зол ва бошقا баҳодирларнинг маслаҳатига кўнмай, ўзбошимчалик билан Мозандаронга юриш қиласи ва девлар қўлига асир тушиб қиласи. Зол уни кутқаришга Рустамни юборади.

3) Рустамнинг етти жасорати (Ҳафт хони Рустам) – (355 байт)

Мозандарон йўлида Рустам етти қаҳрамонлик кўрсатади. Унинг оти Раҳш шер билан олишиб уни енгади, ўзи жазира машибдан чидам ва буюк матонат билан ўтишга ва зийраклик, аклу заковат ила (кийик йўлидан) чашма кашф этишга муваффақ бўлади, аждаҳо билан жанг қилиб уни енгади. Жодугар кампир билан олишиб, унинг сеҳрларидан кутилиб, ўзини фош этиб қатл қиласи. Мозандарон паҳлавони Авлодни асир олади, Аржангев устига юриш қилиб, унинг калласини узиб, девлар орасига отади, девлар саросимада тумтарақай қочишади. Рустам Кайковус ва у билан бирга асир олинган баҳодирлар Гударз, Тус, Гев ва бошқаларни топади.

Кайковуснинг кўзи кўр бўлиб қолганлиги, унга Оқ девнинг кони даво эканлигини билгач, Рустам Оқ девни излаб кетади, уни гордан топиб ўлдиради, бориб Кайковус ва унинг паҳлавонларини озод этади. Мозандарон шоҳи Рустам билан жангда унинг важоҳатидан кўркиб, тош бўлиб қотиб қиласи.

Рустам наизасига тушиғач назари,
Ўзини йўқотди девлар раҳбари.
Тоғ қояси бўлиб қолди жодугар,
Хайратда боқарди эроний лашкар.

Сўнг у жодугар подшони Рустамнинг зўри билан тошдан чикариб, танасини юз пора қилиб майдалаб ташлайдилар.

4) Кайковуснинг Ҳомоварон шоҳи билан жсанги (625 байт)

Кайковус ўз таҳтига кайтиб келади, аммо у яна тинчмайди, турли ҳаваслар кетидан қолмайди. Ҳомоварон шоҳига қарши юриш бошлайди. Рустам Ҳомоварон шоҳи ила жанг қиласи.

Кайковус Ҳомоварон шоҳининг қизи Судобага уйланади. Ҳомоварон шоҳи Кайковусни меҳмонга чорлайди ва алдаб асир тушибади. Рустам бориб, жанг билан яна Ковусшоҳни кутқариб келади. Бу вактда Афросиёб яна Эронга босиб киради. Рустам уни ҳам ҳайдаб чиқаради. Кайковус яна тинчмайди, энди осмонга учгиси келиб қолади. Девлар маслаҳати ила кажава курдириб, унинг тўрт чеккасига тўрт бургутни боғлаб осмонга кўтарилади. Бир жойга бориб ҳолсизланган бургутлар ила ерга қулаб тушади. Рустам уни излаб узоқ чангальзордан топиб келади.

Шундан сўнг «Шоҳнома»нинг энг фожиали ва машхур достони «Рустам ва Суҳроб» киссаси бошланади.

5) Суҳроб ҳақида достон (1059 байт)

Дилларни ўртовчи бу киссани шоир фалсафий чекиниш - дебочадан кейин:

Недур жсанги Суҳроб ва Рустам, - эшиит,
Кўп эшиитдинг, энди буни ҳам эшиит.
Бу шундоқ достонким, тўлур кўзга ёш
Ва Рустам ишидан дил бўлур харош, -
байтлари ила бошлайди.

Кунлардан бир кун Рустам Турон чўлларида ов қилиб юриб, ниҳоят оч қиласи ва чарчайди. Май ичиб, бир қулонни бутунлигича кабоб қилиб еб, уйқуга кетади. Туриб қараса, оти Раҳш йўқ. Уни қидириб Самангон шаҳрига кириб келади. Шаҳар хони уни энг кадрли меҳмонлардек кутиб олади. Баҳодирнинг отини қидиришни одамларига буюриб, Рустамдан хеч ташвишланмасликни илтимос қиласи. Кечаси хоннинг қизи Таҳмина Рустамнинг ёнига кириб, муҳаббат изҳор қиласи. Рустам муъбадларни чақириб, никоҳ ўқитиб, кизга уйланади. Эртаси куни Раҳшни топиб беришади. Эрон паҳлавони ўз юртига қайтар экан, Таҳминага бир гавҳар бериб, агар фарзандимиз қиз бўлса соchlari орасига, ўғил бўлса билагига боғлаб кўясан, дейди.

Ой-куни етгач, Таҳмина ўғил туғади, исмини Сухроб қўядилар. Сухроб ҳар лаҳза ўсиб-улгаяди, азамат паҳлавон бўлиб етишади. Сухроб ўн ёшга кирганда у билан беллашадиган киши топилмайдиган баҳодир бўлади. Бир куни Сухроб онаси ёнига келиб: «Менинг отам ким? Айтасан, айтмасанг бу дунёда тирик қўймайман», деб туриб олади. Отасининг номини эшитган ёш баҳодир дунёда биринчи паҳлавоннинг ўғли эканлигидан ниҳоят хурсанд бўлади ва фаҳрланиб:

*Мен Рустам ўғли-ю, у бўлса отам,
Фақат бизга лойиҳ, дунё ҳам, тоғж ҳам! — дейди.*

Сухроб отаси ҳақида ҳар кимдан дарак истайди, ниҳоят Турон аскарларини тўплаб Эронга юриш қиласди. Ота-бала қовушиб кетишидан қўрқкан Афросиёб Сухробни отасидан чалғитиш учун Бармон ва Хумон номли икки лашкарбошини қўшиб юборади. Сухроб Эроннинг паҳлавон қизи Гурдофарид билан жанг қиласди, охри Оқ қалъани олади.

Эронга Сухроб бошчилигига ҳужум қилиб келган туронийларга ҳеч ким бас келолмагач, шоҳ Кайковус Сейстонда дам олиб ётган Рустамни тез етиб келишга ундаиди. Аммо Рустам шошмай-нетмай, пойтахтга бағуржга етиб келади. Унинг кеч қолганидаи ғазабланган Ковусшоҳ Рустамни койииди, унинг инсоний қийматини ерга урувчи сўзларни айтади ва ҳатто дорга осишига ҳукм этади. Бундан сўнг шундай воқеа юз беради:

Подиоҳга газаби қўзгаб Таҳамттан

*Деди: «Нечун бунча тутаб ёнасан.
Ишиларинг биридан биридир баттар,
Расволик шоҳликка нечук келишар.
Бор, тирик Сухробни тутуб дор қил,
Жаҳлинг тутса, ёвинг осиб xor қил».*

Шу сўзларни айтиб Рустам келиштирмоқчи бўлиб, ёнига келган паҳлавон Тусга ҳам қўлини силтаб шоҳ олий даргоҳидан чиқиб кетади:

*Газабин кўтарай?! Шоҳ Ковуси ким?
Менга қўл кўтарган ўшал Туси ким?
Билагим кучидан менинг зафарим,
Шоҳлигимдан эмас, ҳам йўқ лашкарим.
Рахш эгари таҳтим, фуқаром - замин.
Дубулга - тоғсиму чўқморим - нигин.
Найза, ўқ-ёй, гурзи - паноҳим менинг,
Кўши билагим, дилим - подиоҳим менинг.*

*Қаро тунни тигум қўлур шуъладор,
Боши сочиб, боши ўриб, этамен шудгор.
Мен асиззодаман, қулмас, арзандар,
Фақат яратганга эрурман бандар..
Тополмассен мени Эронзаминда,
Энди мен ҳавода, сизлар заминда..*

Рустам отга қамчи босиб жўнаб қолади. Ишнинг бундай тус олишидан барча паҳлавонлар ҳайратда қоладилар. Зеро Эрон кўкига қора булатлар чиқиб, хавфу хатар кучайиб турганда, Рустамнинг кетиши барчани ташвишга солади.

НИҲОЯТ
Ниҳоят, Эрон баҳодирлари донишманд Гударздан Рустам билан шоҳни ярашириш чорасини кўришни илтимос қиласдилар. У Рустамдан шоҳни кечириб, Эрон ҳимоясига чиқиши илтимос қиласди. Бунга жавобан Рустам:

*Эгарим - менга таҳт, тўғрилик — йўлим,
Тўним - совут, дилда йўқ ваҳми ўлим,
Менга Ковус недур, бир ҳовуч тупроқ,
Ким қўрқар газабдан бўлса бебошвоқ.
Кўнглим қолди, эмди баридан тўйдим,
Худодан бошқадан қўрқмаёқ қўйдим*

Рустам йўлидан кайтмайди. Гударз унга ҳалқ Рустамни Сухроб паҳлавондан қўрқиб қочиб кетди, дейиши мумкинлигини айтади. Шундагина Рустам йўлидан кайтиб ёвга қарши чиқишига кўнади. Шуниси дикқатга сазоворки, Рустам келганда, шоҳ ундан кечирим сўрай бошлайди. Фирдавсий бу саҳнани шундай тасвиirlайди:

*Шоҳ уни узоқдан кўриши билан,
Пешвоз чиқди, сакраб туриб таҳтидан.
«Афё айла, қизишидим, ~ деди унга шоҳ,-
Яздан шундай қормииш лойимни, эвоҳ!
Бошимда қаттол ёв бир қилич мисол,
Юрагим емирилди мисоли ҳилол.
Сендан чора кутдим, титроқ асабим,
Кечикдинг-ку голиб келди газабим”.*

Шундай қилиб, шоир Рустамни нечоғлик юксакликка кўтариб улуғласа, шоҳни шу даражада ерга уради, тубанлаштиради, Жанги баҳодир олдида шоҳ ўз қаҳру газабини ичига ютишга мажбур бўлади ва кечирим сўрайди. Бунда муаллифнинг улуғлиги ҳам, «Шоҳнома»нинг ҳалқчиллиги ҳам яққол намоён бўлади.

Сухроб юришга отланган пайтда унинг Таҳмина Рустамни танийдиган лашкарбошилардан бири Жандаразмни ёш паҳлавонга

хамроҳ қилиб юборган эди. Бир кечада Рустам душман қароргоҳидан хабар олай деб келганида, Жандаразм уйдан чиқиб қолади, Рустам уни бўғиб ўлдириб, ўз қароргоҳига қайтиб келади. Шу воеа туфайли Сухроб лашкарида Рустамни танийдиган киши қолмайди.

Сухроб Эрон баҳодирларидан ким билан жанг қилмасин, ҳаммасининг исмини суроштириб, отасини қидиради. Асирга тушган Ҳажирдан паҳлавонлар номини айтгига беришни талаб қиласди. Аммо «кўркканга қўшалоқ қўринади» деганларидек, Ҳажирга Сухроб жуда баҳайбат паҳлавон кўринади ва Рустамни енгиб қўйса, Эрои ҳимоясиз қолади, деган андишага бориб, Рустамни кўрсатмайди. Унинг чодирини Ковусга ёрдамга келган хорижий бир паҳлавоннинг чодири деб танитади. Сухроб Ҳажирга дўқ қилиб ҳам кўради, ёлвориб ҳам кўради, қандай бўлмасин отаси ҳақида дарак топишни истайди. Аммо бўлмайди. Рустам билан Сухроб жанг майдонида учрашадилар. Рустам одатда ҳеч вакт ўзининг кимлигини айтмас эди. Бу гал ҳам ўз номини яширади. Биринчи кунги жангда ҳеч ким ғалаба қозонолмай баҳодирлар ажралишиб кетишади.

Иккинчи кун Сухроб яна ташвишга тушади. Кўнгли гаш, худди отаси билан жанг қилгандек, яна отасига карши бораётгандек туюлаверади. У яна ҳаммани сўрқ қила бошлади. Лекин ҳеч қандай натижага эришолмай, жангта киришга мажбур бўлади. Шоир ҳар иккала паҳлавонга ҳам афсонавий куч-кувват бағишилаган, улар оддий одамда бўлмайдиган сифатларга эга. Аммо улар орасидаги жангу жадал тасвирида улуғ санъаткор барибир ҳаёт ҳақиқатидан чекинмайди. Рустам тенги йўқ паҳлавон, аммо у қариб қолган. Сухроб ёш, шунинг учун иккинчи кунги жангнинг охирида Сухробнинг каттиқ зарбаси билан Рустам отидан учиб тушиб ерга йикилади, ғолиб Сухроб унинг тепасида тиф кўтаради...

Рустам қараса, ёш паҳлавонга кучи етмайдиган, шунда у хийла ишлатишига мажбур бўлади, муғамбирлик билан соддадил ёш баҳодирни алдайди. Унга ханжар уришга тайёр турган Сухробга:

Рустам назар ташлаб, сўз очар базур,
Сен ҳали навқирон, ҳали кўзинг кўр.
Мен сенга очайин, шергир баҳодир,
Жувонмардолар аро бор қандайин сир.
Бошқача биздаги оину одат,
Тантлилардан имон топади зийнат.
Якка олишува биринчи бора,
Ёвни йиқса, ерда ётса бечора,
Биринчи бор ерга урса лошини,

Адоватда дарров кесмас бошини.

Ҳали иш кўрмаган ёш Сухроб бу алдов сўзларга ишониб сингилган ракиби кўйиб юборади. Рустам ёшлигига азбаройи куч-кудрати ва оғирлиги залворидан юрганда оёғи ерга ботиб кетарди. Охири Аллоҳга ёлвориб кучининг бир қисмини ундан олиб қўйишни сўраган эди. Энди мажбур бўлгач, кечаси билан ибодат қилиб, худодан ўша ёшлигига олиб қўйган кучини қайтариб беришни сўрайди. Натижада эртаси кунги даҳшатли жангда Рустам Сухробни йиқитади ва қаттиқ ярадор қиласди.

Ўлим тўшагида ётган Сухроб оҳ чекиб, отасини кўролмай қолганига ўқинади. Тепасида турган ғолибига:

- Менинг отам ўлимидан хабар топса, сени соғ қўймайди, денгиз остига тушсанг ҳам, осмонга чиқсанг ҳам топиб, қасосимни олади, - дейди.

- Отанг ким? - деб сўрайди ниҳоят Рустам ундан.
- Рустам, - деб жавоб беради Сухроб ва енги остида белгили гавҳар боғлиқ эканини айтади.

Шунгагина кекса баҳодир ўғлини таниб, бошига тупроқ сочиб, дунёни бузиб дод солади. Рустам Ковусдан малҳам сўрайди. Аммо ота-боланинг топишиб кетишидан кўрккан подшо малҳам бермайди. Сухроб ҳалок бўлади. Бутун Эрону Турон мотам тутади, Рустам ва Зол бошлиқ Сейстон паҳлавонлари чукур қайгуда қолиб, нола қиласдилар. Сухробнинг онасига хабар етгач, унинг ноласи кўкка чирмашади. Ўғли аламида бир йилдан сўнг у ҳам дунёдан кўз юмади. Бу аламли достонни шоир Сухробнинг онаси ҳақидаги қуйидаги мисралар билан тугатади:

Кечакундуз йиглаб, кетганди путур,
Сухробдан сўнг бир йил этмади умр.
Фикру ўйи интиқ Сухроби томон,
Жонон ўғли томои руҳ бўлди равон.
Шундай деган эди шириңсўз Баҳром:
«Мурда аламида бўлмаги мудом.
Ўзинг ҳам қолмассан, кетурсан охир,
Бу абадий йўлга ҳозир тур, ҳозир.
Отанг ўз навбатин берса ҳам бу гал,
Унинг ҳам навбати етишгай тугал.
Дунё шу, бу сирга топилмас калит,
Қидириб ўзингни айлама кўп хит.
Берк эшик бу, ҳеч ким очолмас қушид,
Беҳуда этмагин умрингни барбод».

Бу аянчли воқеалар тасвиридан таъсирланган китобхон Рустамни айёрликда, қаллобликда айблаши мумкин, аммо аввало бундай ишлар ҳарбий санъатда мубоҳ (шаръян йўл қўйиладиган) хисобланса, иккинчидан Фирдавсий Рустамни қанчалик севмасин, уни фақат яхшиликлар йигиндиси қилиб тасвирламайди, уни камчиликлардан ҳам холи бўлмаган жонли одам сифатида талқин этади. Рустамнинг олдига қўйган олий мақсади эзгу мақсад - ўз ватанини ёв қўлига топшириб қўймаслик, уни ҳалокатдан кутқариш, ҳар қандай инсон каби унинг ўзи ҳам ўлгиси келмайди, албатта. Шунинг учун ҳам билак кучи етмаган жойда ақл тажрибасига суюниб, хийла ишлатиши табиий бир ҳол. Яна бир жиҳати, юқорида таъкид этилганидек, Рустамнинг она томон аждодларидан бири иблисдан тарқалган Захҳок авлодига бориб тақалади. Унинг билмасдан ўз ўғли билан жангта кириш фалокати ҳам, охирида ўз укаси ўқидан ҳалок бўлиши сабаблари ҳам бир томондан шу билан боғлиқ.

6) Сиёвуш достони (3775 байт)

(Бу достон ҳајсм жиҳатидан ҳам асардаги энг йирик яхлит парча бўлиб, танқидий матннинг 3-жислени тўлиқ өгаллаган)

Фирдавсийнинг дил арзандаси бўлган паҳлавонлардан яна бири Сиёвушдир. Сиёвушга бағишланган достоннинг таъсир кучи Суҳроб ҳакидаги киссаникидан қолишмайди. Бу достон ҳам асрлар давомида китобхонлар қалбини ларзага солиб келмокда. Бу киссанинг кириш кисмida шоирнинг ўзи буни башпорат қўлган эди:

Мевали бир дараҳт мендан қолажсак,
Чаманда ноз этар, ҳар ким олажсак.

Фирдавсийнинг улкан эпопеяси кўпинча жангнома сифатида талқин қилинади. Дарҳакиқат, унинг саҳифаларида жанг жадаллар тасвири кўп учрайди. Аммо паҳлавонларнинг жасоратларини юксак маҳорат билан куйлаган шоир асари моҳиятан минг-минг бегуноҳ одамларнинг конлари беҳуда тўкилувчи кирғин-барот урушларнинг олдини олиш, ҳалқлар ўртасида тинч-тотувлик муносабатлари ўрнатилиши, барча ихтилоф ва келишмовчиликларни тинч йўл билан ҳал этишга чакириш ғоялари билан сугорилган.

Сулҳ жангдан яхшироқ эрур бегумон,
Ҳушёр бўл кетмасин қўлдан молу жон.

Жумладан, Рустам ўз ўғлининг котили бўлганлигини билгач, Суҳробни қўтариб йиғлаб юрар экан, буни ўқиган китобхонда урушга қарши чуқур нафрат ҳислари туғилади:

Ҳар кимининг ўз номи, шон-орзуси бор,
Жанѓдан сулҳ афзалроқ келади минг бор.
Тоқсу таҳт дея қон тўйманғиз асло,
Кимга вафо қўлмиши беш кунлик дунё.

Бу жиҳатдан «Шоҳнома»нинг юксак чўққиларидан бири «Сиёвуш» достони мундарижаси, айниқса, ибратга моликдир.

Фирдавсий инсон ҳаёти учун тинчликнинг қадрини ниҳоят юкори кўтариб Суҳробнинг ўлими, Рустамнинг фожиасини нечоғлик таъсирчан ёзил берган бўлса ҳам бутун ҳаётини сарф этиб ёзган «Шоҳ асари»ни қайта қайта ўқиб таҳрир этар экан, кўнгли тўлмайди. У тинчлик элчиси, балки тинчликнинг жарчиси бўлган Сиёвуш образини яратади. Агар у Суҳробни 45-55 ёшлар орасида яратган бўлса, Сиёвушни 67-70 ёшлар орасида яратган деб тахмин қилиш мумкин. Ёшлигида ўзи ҳам жангчи бўлган Фирдавсий руҳиятида бу даврга келиб ўзгариш юз беради, эндиликда у уруш ва сулҳ масалаларига янгича қарай бошлади.

Мамлакат обод, ҳалқ фаровон бўлмоғи учун тинчликнинг нечоғлик қадрли эканлигини, элнинг хотиржамлиги баҳосини янада чуқурроқ тушуна бошлади ва юракдан ҳис этади. Энди унинг учун ерсув талашиб, соҳта обрў талашиб қон тўкиш жаҳолат, ақл хиравлигидангина иборат бўлиб кўринади.

Жаҳолатда бекор қон тўқмак нечун,
Дилни адоватга асир этмак нечун?! -

деб ёзади шоир, ҳамда сулҳ ва адолат ҳақидаги ғоялари ифодаси, жаҳон адабиётида энг қадим ва юксак маҳорат билан ёзилган драматик фожиадан иборат бўлган «Сиёвуш» достонини ёзил, асари таркибиға кўшади.

Тадқиқотчилар «Сиёвуш» достонини жаҳон адабиётида уруш ва тинчлик масалаларини бадиий-фалсафий таҳлил қилувчи илк асарлардан деб баҳолайдилар. Бунда Сиёвуш образи тинчлик машъали бўлиб порлайди, у тинчликнинг буюк яловбардори.

Балки Фирдавсий Сиёвуш образида ўз эстетик идеали - ақли, билимдон, ва энг муҳими, адолатпаноҳ подшо образини яратиб, ҳалклар дўстлигига эришиб, юртга фаровонлик баҳш этмоқчи бўлган хукмдорнинг ҳаёт йўлини кўрсатиб бермоқчи, кўп ижтимоий муаммоларни шу йўл билан ҳал этмоқчи бўлгандир. Аммо адаб дилидаги тасвирда ҳаёт ҳақиқатига содиклик тамойили бу идеалдан устун келди. Сиёвуш фожеаси шундан далолат беради. Шуни ҳам айтиш керакки, ёшлигида кўпроқ «урушшоқ буқа» деб аталган Рустам тимсоли ҳам бу достонда яна ривожлантирилади. Унинг янги

кирралари очилади. Энди унинг инсоний хислатлари кўпроқ намоён бўлади. У, аввало, Сиёвушдаги энг яхши хислатларни тарбиялаб етиштирган мураббий, иккинчидан у Сиёвуш билан бирга Афросиёбга қарши борар экан, Сиёвушнинг жанжални тинч йўл билан ҳал этиш хақидаги фикрларини кувватлайди, эҳтиёт чораларини ҳам кўришга ундаса-да, уни ўз йўлидан қайтаришга уринишмайди, қаршилик кўрсатмай, ўзига кўйиб беради.

Шундай килиб, бу достонда буюк эпопеянинг асл ғоялари янада чукурроқ ва ёрқинроқ ифода этилади. Шоир инсонга озор бермасликка, ёмонликнинг уругини куритишга даъват этади. Одам энг қимматли гавхар, кимки кишига ёмонликни раво кўрса, унинг ўзи фалокатга дучор бўлади, деб ишонади шоир:

Бирорга согинса ҳар ким ёмонлик,

Ниҳоят ул ўзи топмас омонлик.

Бошқалар ҳаётини ўз ҳаётидек сақлаш лозим деб уқтирган инсонпарвар шоир ҳатто чумолига ҳам озор бермасликка чақиради:

Ким чумоли кўнглин этар экан гаш,

Ичи қародир у, юрак-багри тош.

Ҳар ишда юмишоқлик кўрсатгил аввал,

Ишинг бошламасин урушу жсанжал.

Шоир ҳаётни қадрлашга ундаиди-да, зарурат мажбур қилмаса, кон тўкмаслик кераклигини жуда кўп жойда таъкидлайди.

Билиб қўй, яхшимас қон тўкиши асло,

Бегуноҳларга ҳеч келтирма бало!

Сабабсиз жсанг бошлар экан қай инсон,

Бўйлур жигари қон, ранги заъфарон.

Урушларни факат ватанга хужум бўлгандагина жоиз деган шоир барча нарсанинг ижодкори инсон деб билади.

Инсондан яхшилик, нур ва равшанлик,

Инсонспиз дунёда йўқ фаровонлик.

Шунинг учун ҳам инсоний фазилатлардан чекинган ҳар бир кишига Фирдавсий дев, жин тамгасини босади.

Ким одамийликдан чекинса агар,

Уни дев, жин дегил, одаммас дигар.

Сиёвуш - Кайковуснинг ўғли. Хотини вафот этган Кайковус ёш ва гўзал қиз Судобага уйланган эди. Бу вақтда Снёвш эндингина вояга етган кўхлик паҳлавон йигит бўлади. Ўгай она Судоба уни севиб колади. Сиёвуш эса унинг севгисини рад этади. Мунофикс Судоба унга тухмат қиласи. Сиёвуш оловдан ўтказадилар. Покизи ниятли Сиёвуш оловдан омон чиқади.

Кайковус Судобани қатл этмоқчи бўлади, аммо гина-кудуратдан узоқ покиза юракли Сиёвуш отасидан унинг гуноҳидан ўтишни сўрайди. Бир оз вақт ўтга, отаси Сиёвушни Афросиёбга қарши урушга юборади. Сиёвуш тинчлик тарафдори. Афросиёб билан сулҳ тузади, Отаси уни сотқинликда айблайди. Рустам қўлида тарбия топган Сиёвуш ҳарбий санъатни яхши эгаллаган довюрак паҳлавон эди. У ҳеч қандай қаттол жангдан тап тортмас, аммо урушнинг нақадар вайронгарчиликлар, дарду алам келтиришини, подшолар орасида бир парча ер талашиб кон тўкишлар, қанча одамлар ёстигини куритиши, оналар бошига мотам, чексиз аламлар солишини чукур ҳис қилас, инсоний қалбида урушга қарши исён бор эди. Шунинг учун туронийлар тарафига ўтади. Афросиёбнинг номдор паҳлавонларидан Пирон унга ўз қизи Жарирани никоҳлаб беради. Сиёвуш ундан Фуруд исмли ўғил фарзанд кўради. Аммо донишманд Пирон бу билан қониқмайди. Сиёвуш сингари у ҳам Эрон ва Турон ҳалқлари ўзаро тинч-тотувликда яшашини орзу қилас эди. Шу сабабли у Сиёвушга Афросиёбнинг қизи гўзал ва оқила Фарангисга уйланишни тавсия қиласи. Кейин Афросиёб хузурига бориб кизини Сиёвушга никоҳлаб беришга кўндиради. Афросиёб эронлик шахзодани ўзи томонга оғдириш умидида уни киёв қилишга рози бўлади.

Сиёвуш Турон ва Эрон ўлкалари оралиғида Гангдиж ва Сиёвушгирд каби янги обод шаҳарлар бунёд этади. Аммо ғаламис ҳасадчилар унга тухмат қиласидилар. Уни яширинча Афросиёбга сотқинликни режалаштиромоқда деб қайнотасига ёмон кўрсатиб қатл этилишига эришадилар. Унинг ноҳақ қони тўкилган жойдан қизил гул ўсиб чиқади.

Оёқ-қўйин боғлаб, қўй каби сўйди,

Томоги тагига зар дастиүй қўйди.

Сарв бошин айлади танидан жудо,

Тоза қон дастиүйга тўлди бенидо.

Ажабо, дастиүйни қаерга қотил

Тўккан бўлса, ундан чиқди қизил гул.

Сизга маълум бўлгай унинг ниишони:

Бу гиёҳнинг номи «Сиёвуш қони».

Халқ Сиёвушни жуда севар эди. Сиёвуш ўлимидан хабар топган эронийлар Туронга яна хужум бошлийдилар. Рустам бошлиқ Эрон аскарлари Сиёвуш қасосини олиб ҳаммаёқни яксон қиласидилар. Бутун Туронзаминга ўт қўйиб кулини кўкка совурадилар, бор тирик жонни қирғин қиласидилар. Севимли шогирди Сиёвушнинг хоинона

ўлдирилишига чидолмаган ва ғазабу аламини ичига ютолмаган Рустам ўз юртига қайтиб келиб, Судобани ҳам ўлдиради.

7) Сиёвушнинг ўғли Фуруд ҳақида достон (627 байт)

Сиёвуш ўлдирилган пайтда унинг севимли ва вафодор хотини Фарангис ҳомиладор эди. Туроннинг мард паҳлавонлардан Пирон уни отасининг ғазабидан қутқариб яширади. Фарангисдан кейинчалик Эрон шохи бўлиб сайланиб, отасининг ўчини олувчи Кайхусрав дунёга келади. Пирон уни эҳтиётлаб тарбиялаш учун ишончли бир чўпонга топширади. Орадан йиллар ўтади, Туронда Сиёвуш ўғли Кайхусрав ўсиб вояга етган эди. Донишманд Эрон баҳодирларидан Гударз уни тушида кўради ва паҳлавон ўғли Гевни Туронга жўнатади. Кўп саргузаштлардан кейин Гев Кайхусравни топади ва онаси билан Эронга олиб келади. Кайковус аввал унинг паҳлавонлиги ва ақлу идрокини амалда синааб кўриб кейин уни ўз ўрнига муносиб топади.

Тус бошлиқ эронликларнинг Туронга юришлари бошланади. Кайхусрав Тусга тайинлаб айтади-ки, сен кўшинни Калот тарафдан олиб ўтмагин, уерда менинг оғам Фуруд хукмдорлик килади. Тағин орада бирор тушунмовчилик келиб чиқмасин. Аммо Тус шоҳ гапини назарга илмай кўшин йўлини айни Фуруд ҳукми остидаги ерлар сари буради. Сиёвуш ўғли бундан ҳабар топиб онаси Жарира билан маслаҳат қилади. Жарира ўғлига Эрон лашкарига қаршилик кўрсатмасликни, балки улар билан иттифоқликда Афросиёб сари юриш килиб отаси хунини олиш лозимлигини айтади. Фуруд рози бўлиб Эрон кўшини билан учрашгани ёнита баҳодир Таҳорни олиб лашкарсиз иковлон йўлга тушадилар. Эрон кўшинига яқинлашгач, бир тог тепасидан кузатиб Фуруд Таҳордан Эрон паҳлавонларини суриштира бошлади. Бу орада эронлилар уларнинг шарпасини пайқаб колиб, лашкарбошига ҳабар беришади. Тус бирдан ғазаби кўзгаб, бирор бориб аникласин уларнинг кимлигини, агар бизнинг кўшиндан бўлса, бошларига 200 таёқ урилсин, бегона бўлса, ушлаб бу ерга боғлаб олиб келинсин, қаршилик қилса, қатл қилинсин, деб буйруқ беради. Шунда Гударз ўғли Баҳром бу вазифани бўйнига олиб, тоғдагилар олдига етиб боради. Ўзаро савол-жавобдан Баҳром Фуруднинг кимлигини билгач, Тусга масалани тушунтириш учун қайтиб кетади. Кетаётуб Сиёвуш ўғлини Туснинг феълидан огоҳлантиради ва агар мендан бошқа одам келса, хушёр бўл, унга ишонаверма, деб тайинлайди. Баҳром қайтиб боргач, Тус жаҳл

билан “мен сенга нима дедим, нега уни тутиб олиб келмадинг, кўрқдингми?” деб зарда килади ва унинг ўрнига ўз куёви Ревнизни жўнатади. Фуруд бегона одам жанговар ҳолатда келганини кўриб Туснинг феъли бузилганини пайқайди ва шашт билан келаётган паҳлавонни ўқ узид ерга қулатади. Кейин паҳлавон Зарасп ҳам ҳалок бўлади. Жангта энди Тус ўзи отланади. Таҳорнинг маслаҳати билан Фуруд унинг ўзини эмас, отини мўлжалга олади. Ундан кейин паҳлавон Гевни ҳам пиёда қайтишга мажбур қилади. Бежан билан саваш ҳам натижасиз тугайди. Шундан сўнг эрон лашкари Калотнинг бош қалъаси Сипадқўҳга ялпи ҳужумга ўтади. Натижада ҳар икки томондан жуда кўп номдор паҳлавонлар ва оддий аҳоли ҳалок бўлади, жумладан, Фуруд ҳам тенгсиз жангда оғир яраланиб дунёдан кўз юмади. Туснинг ўзбилармонлиги ва жаҳолати Сиёвуш зурёдининг ноҳақ ўлдирилишига сабаб бўлади.

Тус туронлilarга қарши ҳужумни давом эттиради, аммо унинг бошқарувидаги қўшин Турон паҳлавонлари қаршилигига дош бера олмай орқага қайтишга мажбур бўлади. Кайхусрав Тусни қилган бадкирдорликлари учун зинданга ҳукм килади.

Навбатдаги уч достон жсангномалар йўригигда бўлиб,
улар жами 3325 байтдан иборат:

8) Қомуси Күшоний билан жанг (1586 байт)

9) Рустамнинг Чин Хоқони билан кураши (1508 байт)

10) Рустамнинг Ақвондев билан олишуви – 231 байт

Бироз вақт ўтиб, яна Турон устига юриш бошланади. Рустамнинг илтимоси билан шоҳ Тусни зиндандан озод этади ва уни лашкарбоши қилиб тайинлайди. Эронликлар Сиёвуш учун қасос олиш мақсадида Туронга бостириб кириб, мамлакатни вайрон қиладилар.

Пиронга қарши жангда Тус мағлубиятга учраб, жанг майдонидан чекинади ва Ҳомовон тогида яшириниб ётади. Эроний саркардалар шоҳга элчи юбориб, ундан мадад сўрайдилар. Кайхусрав Рустамни ёрдамга юборади. Кўпгина мамлакатлар, шу жумладан, Қомус Күшоний билан Чин ҳоқони Турон лашкарига мадад йўллайдилар. Рустам жангга пиёда киради, чунки Туронга кетатуриб йўлда унинг аргумоги - Раҳшнинг оёғи синган эди. Рустамга қарши паҳлавон Ашқобуз жанг қиларкан, эроний баҳодирнинг пиёда жангта

кирганидан мазах қилиб кулади. Рустам Ашкобузни ўқ-ёй билан отиб ўлдиради.

Қомусга қарши жанг қылган Рустам арқон отиб, душманини боғлаб олади ва «буни қилич билан чопиб ташланглар!» деб эронлик мұхорибларға буоради. У бир қанча мамлакат пахлавонлари устидан ғалаба қозонади. Чин хоқонини тор-мор этади ва тантана билан аввал Эронга, кейин ўз диёри Сейстонга қайтиб келади. «Шоҳнома»нинг яна бир кичик қиссасида шоҳнинг фармони билан Рустамнинг даҳшатли Оқвондевни ўлдиргани ҳикоя қилинади.

11) Бежан ва Манижа достони (1335 байт)

(Ундан кейин Гев ўғли Бежан
ва Афросиёб қизи Манижаса орасыдаги
севги-вафо достони нақт этилади)

Кайхусрав Бежан ва Гўргинни Гургон водийси халқларини ваҳший қобонлар хужумидан халос этишга юборади. Гўргин кўрқоклик қилиб бир чеккада ўзини панага олиб туради, Бежан қобонларни қириб ташлайди. Аммо жангдан кейин Гўргин хиёнат килиб, Бежандан кутулмоқчи бўлади ва уни лола сайлига борайлик, у ерга кўп гўзаллар келишади деб, алдаб Турон ерларига олиб киради. У ерда Манижа Бежан билан учрашиб, бир-бирларини севиб қоладилар ва Манижа Бежанни ўз ҳарамига олиб киради. Бундан хабар топган Афросиёб уни тутиб олади ва қатл этмоқчи бўлади. Лекин Пироннинг маслаҳати билан уни ўлдиришдан воз кечиб, чукур ўрага ташлатади. Манижани эса саройдаи кувиб юборади. У кўчаларда тиланчилик қилиб кун кечиради. Кечалари зиндан бошига келиб Бежанга овқат таш- лайди. Кайхусрав Бежанни кутар эди. Охири Ойнаи жаҳонда кўриб, унинг аҳволидан хабар топади ва Рустамни юборади.

Рустам савдогар киёфасида Афросиёб шаҳрига қириб боради ва Бежанни кутқаради. Ҳамма ишлардан вokiф бўлгач, Афросиёб пойтахтига тунги ҳужум уюштириб, қирғин қилиб қасос олади, Бежан билан Манижани Эронга олиб келади.

12) «Ўн икки жсанг» (2518 байт)

«Бежан ва Манижа» достонидан кейин «Ўн икки жанг» достони бошланади. Бу достонда эронийларнинг Туронга яна бир юриши ҳикоя қилинади. Ўн икки марта жанг бўлиб буларда Турон лашкари

асосан тор-мор этилади. Пирон, Бармон, Ҳумон, Фаршидварт ва Туроннинг жуда кўп бошқа пахлавонлари бу жангларда ҳалок бўладилар.

13) Кайхусравнинг Афросиёб билан узил-кесил жсанги (3107 байт)

(Ибтиодода яна Султон Маҳмуд мадҳи – 97 байт)

«Шоҳнома»га тизилган навбатдаги достонда Кайхусравнинг Афросиёбга қарши даҳшатли уруши ҳақида накл этилади. Кайхусрав бекордан-бекорга ўлдирилган ўз отаси Сиёвш учун қасос олиш мақсадида Афросиёбга қарши юришга шахсан ўзи бошчилик қиласи. Узоқ давом этган жангларда Кайхусрав Афросиёбнинг кўшин тўдаларини бир неча марта тор-мор этади. Афросиёбнинг ўзи уласи Гарсеваз билан бирга горга яшириниб олгани ҳам ёрдам бермайди. Ҳаум исмли дарвиш Афросиёбни кўлга тушириб, Кайхусрав ҳузурига олиб келади. Кайхусрав Афросиёбни унинг Гарсеваз билан бирга кўшиб жазолайди.

Ўз отаси учун қасос олган Кайхусрав Эронга қайтиб келиб, таҳтини узоқ кариндоши Лухраспига топширади ва жуда кўп пахлавонлари билан биргаликда корбўрон ичидагойиб бўлади.

(Кайхусрав подшоҳлиги тасвири Москва наширида - 2 жилд,
Душанбе наширида 2,5 жилдни қамраб олган)

6-жилддан Лўҳросп подшоҳлиги ҳақида сўз кетади (901байт)

Лухраспнинг Зарир ва Гуштасп исмли ўғиллари ўсиб-улғаядилар. Гуштасп отасининг таҳтига ўтироқчи бўлади, бироқ отасидан рад жавоби олиб, Эрондан чиқиб кетади. У Румога келиб, кўпгина жасоратлар кўрсатади ва Қайсарнинг кизи Қатоюнга уйланади.

Гуштасп подшоҳлиги тасвири 1523 байт бўлиб,
ундан дастлабки 1009 байти Дақиқий сўзи билан берилган.

Гуштасп Румодан қайтиб келгач, Лухрасп таҳти унга беради. Эронда Гуштасп хукмронлик қилған даврда Зардушт исмли пайғамбар пайдо бўлади. Гуштасп ўз фуқаролари блан биргаликда Зардуштнинг янгини қабул қиласи.

Аммо Туроннинг хукмдори Аржасп Гуштаспдан бу янги диндан чекинишни талаб этади ва шуни баҳона қилиб, жанжал чикаради. Турон билан Эрон ўргасида яна уруш бошланади. Бу янги урушда Турон паҳлавони Бидарафш найза отиб, подшоҳ Гуштаспнинг иниси Зарирни ва Эроннинг яиа бир энг кучли паҳлавонини ўлдиради. Шундан кейин Эрон лашкарига подшоҳнинг ўғли Исфандиёр бошчилик қиласи. У Зарир учун қасос олади ва туронийларни тор-мор келтиради. Бироқ, Исфандиёрга рашк қилиб юрган эроний паҳлавон Гуразм Гуштаспга ўғли устидан чақимчилик қиласи-да, подшоҳ ўғли Исфандиёрги Гунбадандиж қалъасига хибс этади. Исфандиёргинг кишанбанд этилганидан хабар топган Турон шоҳи Аржасп яна Эронга бостириб киради, шоҳ Гуштаспнинг кекса отаси Лухраспни кўлга тушириб ўлдиради, Гуштаспнинг кизларини олиб кетади.

Гуштасп донишманд Жамаспдан маслаҳат сўраганда, у туронийларни фақат Исфандиёргина енга олишини башорат қиласи. Бу маслаҳатга кулоқ солган Гуштасп Жамаспни Гунбадандижга юбориб, Исфандиёрги озод эттаради.

Исфандиёр пойтахтга етиб келганда, Гуштасп ундан Аржаспни тор-мор келтиришни ва сингиллари Ҳумой билан Бехофаридни Турон подшоҳи асоратидан озод этишни илтимос қиласи. Исфандиёр рози бўлади. Унинг Туронга сафари «Исфандиёргинг етти жасорати» номли достонда баён-этилган.

14) Исфандиёргинг етти жасорати (849 байт) (Ибитодода яна Султон Маҳмуд мадҳи – 23 байт)

Исфандиёр жасоратлари ҳам Рустамнига ўхшаш. Исфандиёр Турон ўйлида икки улкан бўрини ўлдиради, шерларни енгади, аждархони ўлдиради, жодугар кампир учрайди, уни ҳам ўлдиради. Симург билан ҳам олишиб, унга ғолиб келади. Қор бўронидан омон чиқади ва ниҳоят, дарёдан кечиб ўтиб Гургкорни катл этади.

Булар ҳаммаси Аҳриман аскарлари, унинг найранглари эди. Буларни енгиб чиқкан Исфандиёр савдогар қиёфасида Руиндижга кириб боради ва Турон шоҳи Аржасп билан иноклашади. Аржасп ундан Эрои шоҳи Гуштасп ва унинг ўғли мис танли Исфандиёр ҳакида сўрайди.

Жавоб бундай бўлди: «Улуз шаҳриёр!

Ҳар ким ҳар хил гапни этади тақрор.

Бирор: «Исфандиёр отага қарши,

Хафадир, шу сабаб қўзғолиши - иши».
Бошқа: «Исфандиёр етти жасорат –
Кўрсатиб, келтирап Аржаспга ворат,
У Турон элида жсанглар қиласмиши,
Мардлик-ла Аржаспдан қасос олармиши».
Аржасп қулиб деди: «Дунё кўрган мард
Бундай деб ўзига юқтиргмагай гард!
«Етти жасорат»га зоз жазм этса ҳам
Мени Аҳриман де, демагил одам».

Сўнг Исфандиёр Аржаспни аскарбошилари билан меҳмонга чақиради. Базм қизигандан қизийди, барчанинг кайфи ошганда, Исфандиёр одамлари қальъа дарвозаларини очадилар ва олов ёқиб, қалъадан ташқарида кутиб ётган эронийларга белги берадилар, ичкаридан ва ташқаридан бўлган хужумда Аржасп ҳам, унинг ўғли баҳодир Кўҳром ҳам Исфандиёр тифидан ўлим топадилар. Эронийлар қалъани вайрон этиб, Исфандиёр сингилларини куткариб олиб келадилар.

15) Исфандиёр ва Рустам тўқнашуви (1676 байт)

Сўнг Исфандиёр ва Рустам тўқнашуви ҳакида ҳикоя қилинади. Персонажларнинг психологик тасвири жиҳатидан Рустам ва Исфандиёр тўқнашуви ҳам жуда мураккаб. Бу достонда улуг Фирдавсийнинг сюжет курилишини ишлаш ва драматик тўқнашув ташкил қилиш маҳорати яққол намоён бўлади. Юкорида зикр этилганидек, Фирдавсийгача бўлган давр Сейстон қаҳрамонлик достонлари умумий Эрон эпосига кўшилмаган давр эди. Демак, Исфандиёр ҳакидағи ривоятлар ва Рустами Достон қиссалари турли манбаларда мавжуд эди.

Фирдавсий юксак маҳорат ва буюк жасорат билан уларни бир достонга бирлаштириди. Шуниси диққатга сазоворки, гениал шоир олдида Рустамни ҳам, Исфандиёрги ҳам ижобий қаҳрамон сифатида тасвирлашдек мураккаб ва қийин вазифа турар эди. Чунки, у ўзи танлаб олган ижодий йўл билан борар, манбалардан воқеаларни, кишилар характеристини мумкин қадар ўз ҳолича сақлар эди.

Икки манбадан олинган бу икки қаҳрамон эса ижобий, уларни тўқнаштирган Фирдавсий бирортасини ҳам аксига айлантиrolmas эди. Ижодий йўлда боши берк кўчага кириб қолгандек кўринган бу қийин аҳволдан ҳам шоир нозик маҳорат билан йўл топиб чиқиб кета олди. Шоир Исфандиёрги ҳам буюк баҳодир, ижобий қаҳрамон

сифатида чизиб беради, аммо у ўзининг ноҳақ гоя учун бўлган кураши натижасида завол топади.

Гуштасп Исфандиёрни зиндандан халос этиб, Аржаспга қарши юборишга мажбур бўлгани ҳакида гапирилган эди. Гуштасп туронийларни енгиб шоҳ кизларини куткариб келса, отаси шоҳлик тахтини бўшатиб беришини ваъда қилган эди.

Мана шу ердан Исфандиёрнинг (гарчи у ижобий қаҳрамон бўлиб қолаверса ҳам) ахлоқий тушкунлиги бошланади. У энди ўз жони, ватанининг шухрати, ҳалқнинг озодлиги учун эмас, отаси тахтини эгаллашини мақсад қилиб жангга боради. Кези келганда эсга олиб ўғаш жоизки, Рустам жангни жадалга тўлиқ узок умрида («Шоҳнома»га кўра, у 300 йил умр кўради) бирор марта ҳам бундай ўз фойдасини кўзлаб жангга кирмайди, доимо ватани учун фидойилик кўрсатади. Исфандиёр отаси кўйган шартни бажаради ва тахтини унга топширишини талаб этади. Аммо Гуштаспнинг тахтдан кетгиси йўқ. У энди саркаш ўғлидан бутунлай қутулиш фикрига келиб қолади ва янги найранглар ўйлаб чикара бошлади.

Гуштасп ўғлига янги зардўштий динини қабул қилишдан бош тортган Сейстон баҳодири Рустамни боғлаб, киshanлаб келтирсангина тахтга эга бўлажагини айтади.

Шундай қилиб, икки ахлоқий йўналиш тўқнашади. Исфандиёрнинг мансабпастлик, ҳокимиятпастлиги билан Рустамнинг кудратли озод руҳи тўқнашади. Рустам подшо амрини бажо келтириб, бош эгиб саройга боришга рози, аммо қўл-оёғига киshan солишлирга асло йўл кўймайди. Бу эса Рустамнинг фожиаси эди. У озод баҳодир сифатида ўзини кишанлатишга йўл кўёлмас эди, аммо шу билан бирга шоҳлар пахлавони, ҳукмдорлар хизматкори сифатида Эрон тахтининг қонуний вориси бўлмиш Исфандиёрга қўл кўтара олмас ҳам эди.

Рустам Эрон шоҳлари ва Эрон мамлакати олдидаги хизматларини санаб Исфандиёрдан шуларни эътиборга олишни сўрайди, уни ўз уйига меҳмонга чақиради, кимматли совғалар ваъда қиласди, киshanлаш фикридан қайтишини ўтниб сўрайди. Исфандиёр кўнмайди.

Бирор марта ёвдан енгилиш нималигини билмаган баҳодир Рустам ўзини занжирбанд этишга асло кўнмайди ва шу билан бирга у шаҳзода билан жанг қилишни ҳам гайриоддий, одобдан ташқари, деб ҳисоблайди. У жуда оғир ахволда қолади. Охири унда одамийлик, қаҳрамонлик, магруона озодлик руҳи куллик ва бандилик туйғусидан устун келади.

Шу билан бирга шоҳпастлик ғояларига содик бўлган Фирдавсий шоҳ қотилини (ҳатто у ўзининг энг севимли қаҳрамони Рустам бўлса-да) жазосиз колдирмайди. Бундан Рустамни ҳам олдинда огоҳ қиласди. Мис танли Исфандиёрга ўқ ўтмас эди. Унга кор қиласиган ўкни Рустам Симурғдан сўраб олади. Симурғ унга ўқ бера туриб шаҳзодани ўлдирган кишининг ўзи ҳам узок яшамаслигини айтади. Аммо Рустам хорлиқдан кўра ўлимни афзал қўради ва жангда Исфандиёрни ўлдиради.

Бунда ҳам Фирдавсий назарида инсон қадр-кимматининг, шахсий озодлик ғояларининг хорлиқ, ҳокимларга сўзсиз бўйсуниш ғояларидан устун турганлигини кўрамиз.

(16) Рустам ва Шағод достони (357 байт)

Рустам ярим ўғай (ота бир, она бошқа) укасининг ҳийласи билан қазилган чуқурга йиқилиб ҳалок бўлади. Паҳлавон ҳам ўлим олдидан чинор ортига бекинган иниси Шағодни ёй ўки билан дарахтга михлаб қўяди.

Рустамга бутун ҳалқ мотам тутади, Зобулда дағн этиб, шукуҳли даҳма қурадилар. Унинг олдига Раҳшни кўмид, устига мармардан ҳайкал қўядилар. Рустам ўғли Фаромарз бориб, Кобул шоҳини тор-мор қиласди, унинг барча авлодини қириб ташлайди. Шағод михланиб ўлган дарахтга ўт қўйиб кулини елга совуради. Шундай қилиб, у отаси Рустам қасосини бажо келтиради.

Бундан кейин Эрон тахтига ўлтирган Баҳмон Сейистонга ҳужум қиласди, Фаромарзни ўлдиради ва кексайиб кетгай Зол бошлиқ Сейистон баҳодирларини асир олади. Баҳмон Золни катл этмоқчи бўлади, чолнинг зор-зор илтимоси унга таъсир этмайди. Фақат Паշутуннинг илтимоси билан Баҳмон Зол ва унинг авлодларини озод этиб Сейистонга жўнатади.

Шу билан «Шоҳнома»нинг қаҳрамонлик бўлими тугаб, тарихий бўлим бошланади. «Шоҳнома»нинг бу қисми Зардўштнинг пайдо бўлиши ва оташпастлик динининг жорий килинишидан бошлаб, Ўрта Осиё ва Эрон ерларига араб истилочилари бостириб келгунгача бўлган тарихий воқеаларни афсоналар билан кўшиб тасвиirlаб беради.

Бу бўлим аввалида Фирдавсий тарихий воқеаларга романтик тус бериб бадиийлаштиради, Искандар (Александр Македонский)ни ҳам Эрон шоҳлари авлоди сифатида таърифлайди.

«Шоҳиома»нинг бош ғояси - ватанни улуғлаш, ҳалқ қудратини кўз-кўз қилиш, ҳалқ баҳодирларини васф этишдир. «Шоҳнома»нинг ҳалқчиллиги бирдан кўзга ташланмаслиги мумкин, унда бу ғоя очиқдан-очиқ юзада ётмайди, лекин бутун поэма ҳалқчиллик рухи биштан сугорилган. Поэманинг айрим бўлаклари, айрим достон ва байтларигина эмас, унинг рухи ҳалқчил.

Шоир подшоларни ўз раияти ҳолидан огоҳ бўлишга, унга меҳрибонлик кўрсатишга чакиради, ҳалқни ортиқча соликлардан озод этиш, золимлар зулмидан ҳимоя этиш лозимлигини уқтиради. Фирдавсий шоҳларга уларнинг лашкари дехқон экинзорларни пайхон қиласлиги, ҳатто рақиб мамлакатнинг аҳолисини ҳам ранжитмасликлари кераклигини тарғиб килади.

Фирдавсий ҳалқ исёни бошида турган Маздак ва маздакийлар ҳаракатига хайриҳоҳлигини очиқ-ойдин ифода этади. Барча ўрта аср ёзувчилари, тарихчи олимлари Маздак ҳақида ёзар, уни «муттаҳам»лиқда «кофир» ва «қотиллик»да айблаб, лаънатлар ўқир эканлар, фақат икки улуғ шахс - Абу Райхон Беруний ва Абулқосим Фирдавсийгина бу ижтимоий воқеага ижобий баҳо бердилар.

Фирдавсий таърифида маздакийлар - ўз меҳнати самараасидан маҳрум, оч-ялангоч қолган ва ҳақли равишда исён кўтарган кишилар. Маздак образини эса шоир алдоқчи, қаллоб, муттаҳам эмас, оч ҳалқка нон топиши йўлини кўрсатиб берган донишманд йўлбошчи сифатида чизиб беради. Маздак ҳақидаги қиссани Фирдавсий шундай байтлар билан бошлади:

Дунёда яшарди Маздак отли зот,
Нотиқу билимдон, тадбирли устод.
Улуғ аслзода, донишманд киши,
Кубодга маслаҳат - ҳунари, иши...³⁵

Фирдавсийнинг ёзишига кўра, оч кишилар Маздак ёнига келиб, уларни ўз ҳимоясига олишин илтимос қиласди. Маздак уларга ваъда бераб, шоҳ ёнига йўл олади. Маздак подшога шундай савол беради:

- Илон чаққан кишидан тарёкни аяб бермаган кимсанинг мукофоти не бўлур?

- Бундай золимнинг жазоси — ўлим! - дейди шоҳ Қубод. Бундай жавоб олган Маздак ҳалқни тинчлантиради. Эртаси кун у яна шоҳга савол беради:

- Аё шоҳ, қўл-оёғи боғлиқ кишига нон бермай, унинг очдан ўлишига сабаб бўлган кишининг мукофоти не бўлур?

- Ундейнинг жазоси - ўлим! - дейди шоҳ.

Шоҳдан бу сўзни эшитган Маздак саройдан чиқиб, очларга мурожаат этади ва бадавлат кишилар, шу жумладан, шоҳлик омборларидаги донни талаб олавериш кераклигини уқтиради. Шоҳга хабар этади, у Маздакни чакириб уни жавобгарликка тортади. Маздак шоҳга ўз савол-жавобини эслатади:

Маздек жавоб берди «Саодатли шоҳ,
Ҳар сўзинг бекиёс ақлдан гувоҳ.
Сенинг сўзларингни айтдим улусга,
Неки деган бўлсанг ҳар бир ҳусусда.
Дедингки, биронни чақса-ю илон,
Бирор тарёкини гар тутса ниҳон,
Баробардир, дединг, қотиллик билан,
Шундай ҳукм этдинг одиллик биан.
Оч қолган кишининг нондир тарёки,
Буни ҳис этгайми тўқнинг идроки!?

Шундай қилиб, Маздак келтирган масал ҳам, унинг қаҳрли сўзлари ҳам, меҳнаткаш ҳалқ нонини тортиб олиб, ўзини очлик ўлимига маҳкум этган золимларни фош қилувчи айнома бўлиб жаранглайди.

«Шоҳнома»нинг иккинчи асосий ғояси яхшилик ва ёмонлик орасидаги азалий ва абадий кураш ғоясидир. Мутахассислар бу ғоя эронийлар ва Ўрта Осиё ҳалқларининг «Авесто» китобига кирган қадимий диний ақидалари, афсона ва ривоятларидан бошланганлигини қайд қиладилар.

Бунда дунё Оҳуро Мазда бошчилигидаги яхшилик кучларининг Аҳриман кўл остидаги ёвузлик лашкарига қарши кураши сифатида талқин этилган. «Шоҳнома»да эронийлар, уларнинг кўшинлари эзгулик кучлар мужассами ҳисобланса, туронийлар, румийлар ва барча кўчманчилар ёмонлик - Аҳриман тарафидан юборилган бало ҳисоб этилади. Фирдавсий, умуман, босқинчиларни Аҳриман яратган кучлар ҳисоблайди. Шу жумладан, араб босқинчиларини ҳам. Шуни қайд қилиш керакки, шоир мусулмон бўлгани учун Мұхаммад пайғамбарга катта ҳурмат изҳор этади. Аммо, шу билан бирга, у Эронга босқинчиллик қилиб келган арабларни асти кечира олмайди. У халифат аскарлари Эронни забт этишда кўрсатган босқинчиллиги ва зулмiga қарши исён кўтаради. Фирдавсийнинг арабларга қарши сўзлари кўпинча муаллиф номидан эмас, персонажлар тилидан айтилади. Масалан, лашкарбоши Рустам ўз биродарига ёзган хатида араблар ғалаба қозонса, не бўлари ҳақида ёзади:

³⁵ Жуманиёз Жабборов таржимаси.

Бир четда қолади ростлик, аҳд-паймон,
 Хурматда бўлади эгрислик, ёлғон.
 Хунармано, дехқонлар бўлади аскар,
 Мева бермай қўяр насаб ва ҳунар.
 Бари илиб кетар қўлга тушганин,
 Фарқу этилмас нафрат билан оғарин.
 Пинҳони ошкордан баттарроқ бўлур,
 Шоҳлари тош кўнгилу бебошвоқ бўлур.
 Ёмонлик ўйлайди отага бола,
 Ўзидан отанинг диида нола.
 Тубанликдан асло подгию қилимас ор,
 Улуғлик ҳам, олий насаб ҳам бекор.
 Кишишарда асло қолмагай вафо,
 Қилимишлар, гап-сўзлар жсафо, гирт жсафо.
 Эронию араб, турклар қотишиб,
 Ургуз пайдо бўлур бари чатишиб.
 На турку на араб, на дехқон бўлур,
 Тиши ҳазил-мазах, сўз ёлғон бўлур.

Захҳок хукмронлиги даври тасвирига жуда яқин бу сўзлар шу зайл давом этади. Энди Эрон подшоси Яздигард III тилидан эшитинг, у араб босқинчиларини шундай таърифлайди:

*Етган бўлса керак хабар сизга ҳам,
 Бошингизга тушди не бало, ситам.
 Илонхўр, девчехра девоналардан,
 Ақлу ҳуш, инсофдан бегоналардан.
 На бойлик, на таҳту на олий насаб,
 Барин барбод этар, кетар ел ялаб.
 Кўн гавҳару бойлик елга берилди,
 Кўн азиз каллалар ерга қорилди.
 Баланд чарх паргори шундай айланар,
 Энди бу подшолик топади зарар.
 Қарга боғши, рангсиз, номсиз, номуссиз,
 Бу галада на эс, на ҳуш бор, эсиз...*

Улуғ санъаткор Фирдавсийнинг ҳаётга муносабатида зиддиятли ўринлар ҳам йўқ эмас, албатта. Тарих саҳифасидан тушиб кетишига маҳкум этилган ярим патриархал ва ярим феодал ер эгалари (*дехқонлар*) тоифасининг ғоявий ҳаммаслаги бўлган Абулқосим Фирдавсий ўзининг улкан эпопеясида ҳалк орзу-умидлари билан бир қаторда мана шу синф дунёқарашини ҳам ифода этади.

Жумладан, «Шоҳнома»нинг асосий ғояларидан бири олий ҳокимият - подшоликнинг отадан болага мерослиги - яъни феодал легитимизм ғоясиким, Фирдавсий бу ғоянинг илоҳийлигига, азалий ва абадийлигига асло шубҳа кильмайди ва бунга ҳеч шак келтирмайди. Факат худо ато қилган шуъла (*farr*) эгасигина таҳтвориси бўла олишига унинг имони комил.

Шоир ҳокимиятнинг подшоликдан бошка шакллари ҳакида ўйлаб ҳам кўрмайди, у ижтимоий тузумнинг бойлар ва камбағалларга, ҳоким ва маҳкумларга бўлинишидан ўзга шаклларини кўра олмайди. Унинг фикрича, ҳалкни феодал шоҳ идора қилиб туриши керак. Бундай ғоялар айниқса, Баҳром Гўр шоҳлиги давридан олинган куйидаги эпизодда яққол кўзга ташланади: бир куни Баҳром Гўр ўз аъёнлари билан гуллаб-яшнаган бир қишлоқ ёнидан ўтиб борар экан. Қишлоқ аҳди унга шоҳона хурмат-иззат кўрсатмади. Баҳром Гўрнинг ғазаби қайнаб, бир муъбадга булатни жазолашни топшириди. Муъбад бундай фармон олгач, қишлоққа кириб боради ва: «эндиликда бу қишлоқда ҳамма бир-бирига тенг, бунда на ҳоким бор, на қишлоқ оқсоқоли, ҳамма ўз ҳолича яшайберсин!» - дейди.

Бу сўзлардан кейин қишлоқ аҳли меҳнат қилмай ҳеч кимга бўйсунмай кўйишади. Бу жойда ҳокимиятсизлик ва бошбошдоқлик авж олиб кетади. Қароқчилик, талончилик, ҳатто қотишлиқ кундан-кунга кўпаяверади. Қишилар ўз жойларини ташлаб бошқа ёкларга кўчиб кетишида. Обод қишлоқ тез орада харобазорга айланади. Бир йилдан кейин шу ердан ўтиб колган Баҳромшоҳ буни қўриб ҳайрон колади. «Нечун бу обод жой шундай аҳволга тушдид?» - деб сўрайди. Муъбад бўлган воқеани сўзлаб беради. Баҳром Гўр ўтган ишдан афсусланиб, қишлоқни аввалги ҳолатга келтиришни буюради. Муъбад қишлоққа келади, бир кексани оқсоқол тайин этади ва эл орасида ёмонлик тар-катувчиларга карши қаттиқ чора кўришни буюриб, қайтиб кетади. Қишлоқда тартиб ўрнатилиб, бир йилдан сўнг қишлоқ яна асл ҳолига қайтганлиги айтилади. Фирдавсий дунёқарашининг асл моҳияти бу ҳикояда яққол намоён бўлиб турибди, яъни ғоявий тенденция тўғридан-тўғри ифодаланган. «Шоҳнома» бошдан-оёқ шу ғоя билан рухан сугорилган.

Аммо «Шоҳнома»нинг бугунги киммати муалифнинг тарихий ва синфий қарашларидағина эмас, балки инсон ҳаёти кўринишларининг моҳирона тасвиrlарида, қишиларнинг ўзларига хос эзгулик ва камчиликлари, ижобий ва салбий одатлари, табиатлари тасвирида.

Адабиётлар:

- Абулқосим Фирдавсий Тусий (940-1020). “Шоҳнома”. Т., Ғафур Ғулом номидаги Адабиёт ва санъат нашриёти, 1975-1977.
- Фирдоуси. Шахнаме. Критический текст. (В 9ти тт.) М., 1961-1968.
- Абулқосим Фирдавсий. Шоҳнома. Иборат аз 9 жилд. Душ., “Адиб”, 1987-1991.
- Луконин В.Г. Древний и средневековый Иран. Москва, ГРВЛ, 1987, 296 стр.
- Османов М.-Н. Своды иранского героического эпоса. (“Худайнаме” и «Шахнаме») как источники «Шахнаме» Фирдоуси. // Ученые записки Института Востоковедения. Том XIX. Вопросы истории и филологии народов Востока. М., 1958, с.153-189.
- Мирзозода Х. Таърихи адабиёти тоҷик. Китоби I (I). Душанбе, “Маориф”, 1987, с.15-102.
- Литература Востока в Средние века. Часть II. М., Изд. МГУ, 1970, с.3-40.
- Сулаймонова Ф.Шарқ ва Ғарб.Т., “Ўзбекистон”, 1997, с.9-188.
- Абдулхусайн Нушин. Сухани чанд дар бораи “Шоҳнома”. М., «Наука» ГРВЛ, 1970, 116 сах.
- Шоислом Шомухамедов. Абулқосим Фирдавсий. Т., ТДШИ, 2006, 72 сах.
- (“Шоҳнома”нинг 1 ва 2 қисмлари қисқача мазмуни 23-45 саҳифаларда тўлиқ баён қилинган. Аммо 3 (тарихий) қисм деярли баён қилинмаган.)
- Гулшани адаб. Жилди I. Душанбе, “Ирфон”, 1974, сах. 29-77.

5-дарс. ИСЛОМ МИНТАҚА АДАБИЁТИ РИВОЖИНИНГ ИККИНЧИ ДАВРИ. ТАСАВВУФИЙ-ИРФОНИЙ АДАБИЁТНИНГ ЮКСАЛИШИ

1. Шеъриятга янгича ёндошув. Саноий ва Анварий.

Атроф саҳро. Ҳудудсиз кум денгизи жазирамада олов янглиг жимиirlаб кўзни қамаштиради. Ҳоргин йўловчилар бир ютум сувга зор ўлароқ олға қараб бемадор сургалишади. Барчанинг нигоҳи олис уфқларда. Нихоят, сафларнинг олди қаторидан хаста ва ҳазин овоз келади: «Олдинда бир кўм-күк водий нишона бермокда».

Беҳисоб кўзлар умидвор ўша томон талпинади:

- “Қани? Қани ўша водий? Ҳаёт водийси! Бахт водийси!”

Аммо йўловчининг нигоҳи яна алданади. Уфқларда ҳеч нарса йўқ. Факат жазирама кум денгизи. Кўринган шарпа эса — аёвсиз саҳронинг навбатдаги «ҳазили» — сароб.

Сув — бу ҳақиқат. Йўловчилар — инсоният. Асрлар оша «баҳт» дея, «обиҳаёт» дея, «Ҳақиқат» дея олға силжиб келаётган инсоният. У ўз йўлида не-не кичик, жузъий ҳақиқатларни кўлга киритмади, не-не кудуклар, сардобалар, булоқ ва жигитлардан ўз ташналигини муваққатан, бир муддат қондириб бормади. Аммо йўлдан тўхтагани йўқ. Чунки унга Инсонлик моҳиятини, аҳли Башар тушунчасининг асл мазмунини ечиб бергувчи, ҳар бир инсоннинг тўқис ва устувор баҳтини таъмин этиш тарикини ёритиб бергувчи улуғ Ҳақиқат керак. Жузъий, кичик ҳақиқатлар — бу қудук ва сардобалар — йўлчи учун бир дам ҳордик, нафасни ростлаб олмоқ учун бир кичик имкон, холос.

Ўрта асрлар Шарқ мумтоз шеъриятининг энг ёрқин сиймоларидан бири, буюк форс суфий шоири Фаридиддин Аттор ана шундай олий Ҳақиқатни умр бўйи ёниб излаганлардан бири эди.

Ҳақиқат Борлиқ янглиг мураккаб, ранго-рангdir. Ҳар бир инсон уни маълум нисбийликдагина англаб етишга қодир. Бунинг устига турли даврлардаги одамларнинг тафаккур даражаси турлича. Асотир тафаккур, илмий тафаккур, ирфоний тафаккур...

Инсоннинг дунёни, Борлиқ ҳақиқатини англаб етиш жараёнига хос бўлган тарихий такомил турли миёсда: 1) умуминсоният ривожида, 2) инсонлар жамоасининг турли замоний ва маконий бирлашмалари доираеида, 3) ҳар фард инсон умри давомида рўй беради. Буларнинг ҳар бири ўз навбатида бошқаси билан мураккаб боғланиш, туташув ҳосил қилмасдан иложи йўқ. Демакки, агар бирор ҳодиса ҳақида мулоҳаза юритишга, унинг моҳиятини жиддий англаб етишга қасд қилинса, уни атроф-вокелик, ўзи мансуб бўлган умумий ва хусусий ҳодисалар силсиласида олиб қаралмоғи, макон ва замонидан узиб олмай идрок этилмоғи асли ҳақиқатни, яъни ўша ҳодиса моҳиятини тўғри ёритишига ёрдам бериши мумкин.

Ислом минтақа адабиёти VIII - XV асрлар мобайнида дунёни идрок этиш ва уни ижодий акслантириш нуктаи назаридан катта тараққиёт йўлини босиб ўтди. Ислом минтақа маданияти доирасидаги ҳалқларнинг маънавий камолот йўли билан минтақадаги адабий жараённинг ривожига оид Алишер Навоийнинг назарий

кузатишларини ўзаро киёслаб хулоса қилинса, бу тараққиётни, биринчи навбатда, уч катта даврга ажратиш мумкин.

Биринчиси, VIII - XI асрларга оид бўлиб, IX аср охири - X аср биринчи ярмида Сомонийлар саройида Абу Абдуллоҳ Рудакий етакчилигидаги бақувват форс шеърият мактаби шаклланишидан бошланади ва XI аср охирларигача давом этади. Бу адабиёт **Фазнавийлар саройида** асосан форс тилида ва **Қорахонийлар саройида** туркӣ ва форсий тилларида ривожланиб, бадиий маҳорат ва тасвир кўлами юксалиб борди.

Бу давр адабиётининг аксарият намуналарига хос бўлган энг асосий хусусият **ақлга таяниш** бўлиб, ислом минтақа маданияти доирасидаги маънавий такомил босқичларининг иккинчиси - **Ислом маърифатчилиги** босқичида Борлик ҳақиқатини англаб етишнинг етакчи йўналиши бўлган илм маърифатига тўлиқ мос келарди. Бу давр адабиёти асосан соғ дунёвий мавзуларни куйлашга бағишлиангани учун уни дунёвий адабиёт деб номлаш мақсадга мувофиқдир.

VIII - XI асрларда ислом минтақасида шаклланган турли адабий мактаблар ҳам илмий доиралар сингари кўпроқ у ёки бу хукмдор саройида марказлашган бўлиб, уларнинг мазмуний мундарижасида **мадхия қасидалар, ишқий ғазаллар, ҳамриёт** (май мавзуи), **зухдиёт** (дунё ва унинг ҳою ҳаваслари бебақолиги ва уларга меҳр кўймаслик мавзуи), **хижо** (муайян шахсларга йўналтирилган ҳажв) каби мавзу турлари етакчилик қиласидарди.

Аммо XII асрга келиб энди бу мавзулар улуғ мутафаккир шоирларни қониқтирилай қўйди. Улар бирин-кетин бу йўналишни тарк эта бошладилар. Анварий ёзади:

*Газалу мадху ҳично – ҳар се бад-он мегуфтам,
Ки маро шаҳвату ҳирсу газаби буд ба ҳам...³⁶
/ Ишқий ғазаллар, мадхиялар, ҳажв – ҳар уч йўналишда
шеърлар битганим
сабаби,*

Қонимда шаҳвату ҳирсу газаб туйгулари жўш урганидандир.../

XII аср шоирининг бу эътирофлари энди минтақа мумтоз шеъриятидаги катта бир босқич ниҳоясига этиб, бадиий тафаккурнинг янги босқичи бошланётганининг нишонаси эди.

Ислом минтақа адабиёти ривожидаги **иккинчи** иирик давр XII-XIII асрларни ўз ичига олиб, Алишер Навоий минтақа адабиётига оид назарий мулоҳазаларини айни шу давр шоирларидан бошлайди.

Навоий форсий “Шоҳнома”ни яхши билса-да, бадиий ижод тарики ҳақида мулоҳаза юритганда Фирдавсийни эсламайди, балки саноқни форс мумтоз шеърияти вакиллари ичидан биринчилардан бўлиб саройни ва мадхиягўйликни тарк этиб, шеъриятга жиддий фалсафий-ижтимоий ва ахлоқий масалаларни олиб кирган Абдулмажд **Саноий** (1048 - 1140)дан бошлайди. Чунки унинг - “Сайрул-ибод илал-маод” (“Аллоҳ бандаларининг қайтар маконга сафари”) ва 10 минг байтдан ортиқ ҳажмдаги “Ҳадойик-ул-ҳақиқа” (“Ҳақиқат боғлари”) достонлари минтақа адабиётида янгича йўналишга асос соглан эди. Ундан кейин XII аср иккинчи ярмида яшаб ижод этган Абдулвосиъ **Жабалий** (вафоти 1160), Анварий (вафоти 1191), Асириддин Ахсикатий (1108-1196), Ҳоқоний (1120-1199), Захир Фарёбий (вафоти (1202) каби катор таниқли шоирлар ҳам сарой мадхиягўйлигини тарк этиб, ижтимоий-фалсафий руҳда қасидалар ёзишга киришдилар.

Саноий ўз даврида ҳам, кейинги даврлардаги форс адабиёти тарихига оид аксарият тадқиқотларда ҳам тасаввуф шоир сифатида тилга олинади. Навоий Саноий ижодини баҳолашда бу анъанага зид бориб, уни “ҳақиқат тариқи” суханварлари қаторида эмас, “ҳақиқат асрорига мажоз тариқини маҳлут” қилганлар сафида тилга олган. Дарҳақиқат, асрлари ўз вақтида буюк халафлари (издошлари) томонидан сўфиёна руҳда талқин этилган бўлишига қарамай, Саноий ҳам, Анварий ва Ҳоқонийлар ҳам ҳануз том маънодаги суфий шоирлар эмас эдилар. Саноийнинг “Ҳадойик ул-ҳақиқа” асарини Европа шарқшунослари узок вақт “тасаввуф комуси” деб талқин этган бўлсалар-да, бу асарни дикқат билан ўрганган Е.Э. Бертельс бундай қарашни кувватламайди. Дарҳақиқат, 10 бобдан иборат бу иирик достондан, Навоий асосли равиша таъкидлаганидек, тасаввуфа оид мавзулар бошқа фалсафий-ижтимоий масалалар билан аралаш (маҳлут) ҳолда баён этилган.

Саноий ва Анварийлар бошлаб берган шеъриятга янгича ёндошув уларнинг яқин издошлари - XII аср охирги чорагидан бошлаб форс тилидаги шеърият осмонида порлаган икки ёрқин юлдуз **Низомий Ганжавий** (1141-1202) ва **Фаридиддин Аттор** (1147-1229) сиймолари мисолида икки алоҳида йўналиш бўйича ривож олди.

Бу икки йўналишнинг фарқи нимада?

Маълумки, адабиёт мавзуларининг марказида инсон, унинг руҳият дунёси ётади. Инсоннинг кечинмалари эса, асосан, икки йўналишда кечади:

³⁶ Самадов Т. Анвари ва газалиёти у. Душанбе, 1988, С.26

бири - инсоннинг Олий ҳақиқатга, Ҳаққа, Борликнинг мохиятига, содда қилиб айтсақ, махлукнинг Холикқа муносабати, нисбати масаласи;

иккинчиси инсоннинг ўзи сингари махлукларга, яъни ўзга инсонларга, атроф-воқелик, мавжуд жамиятга муносабати.

Биринчи йўналиш Инсонни ўз кўнгли билан сұхбатга чақиради, руҳиятнинг ички теран қатламларига йўналган бўлади.

Иккинчи йўналишда ижтимоий муносабатлар тизимида ҳар бир инсоннинг ўрни масаласига кўпроқ эътибор қаратилиди.

Кейинчалик Жалолиддин Румий (1207-1273) ёзган эди:

*Аттор рух буду Саноий ду чашми ў,
Мо аз наи Саною Аттор омадем.³⁷*

(Аттор рух эди, Саноий унинг икки кўзи,
Биз Саноий ва Аттор изидан келдик.)

Саноий “икки кўз”га киёс этилмоқда. Кўз ташқаридаги нарсаларни кўради, ичкаридан ташқарига йўналган бўлади. Аттор эса “руҳ” - унинг назмдан мақсади “асрори илоҳий адоси” (“илоҳий сирларни баён этиш”) - инсон руҳиятидаги илоҳий асрор пардаларини бирма-бир очиб кўрсатиш. “Маснавийи маънавий” дек буюк ирфоний қомусни яратган Жалолиддин Румий ҳам айни шу йўлдан борди. Тасаввуф шеъриятининг мохияти аслида шу.

Форс тилида ижод этган буюк озарбайжон шоири ва мутафаккири Низомий Ганжавий эса фақат инсон руҳиятининг ички қатламларига теран назар ташлаш билан чекланиб қолмай, ўз достонларида шахснинг Ҳақ ва жамият олдидаги масъулияти масаласига ҳам алоҳида эътибор қаратишни лозим топди, яъни, унинг асарларида ирфоний ва ижтимоий муаммолар олий бир уйғунликда ифодаланди. Айни шу уйғунлик ифодасига кейинчалик Алишер Навоий томонидан “Мажоз тарики” деб ном берилган эди.

Аммо XII асрда ҳануз “Ҳақиқат” ва “мажоз” тазоди кун тартибига рўйирост қўйилган эмас, Низомий асарларида “мажоз” атамаси умуман истеъмолга ҳам кирган эмас эди. Навоий бу йўналишда мумтоз натижаларга эришган зот асарларини ўз

ижодий йўлини белгилашда порлоқ бир намуна сифатида танлаган бўлса-да, назарий тадқиқотларида Низомий номини бирор гурухга мансуб этиб тилга олмайди.

Тасаввуф шеърияти XI асрдаётк Абусаид Абулхайр (967-1049), Бобо Тоҳир Уръён (ваф. 1055) каби суфий шоирлар ижодида юз кўрсатабошлаган бўлса ҳам, ҳануз адабиётда етакчи мавқеъга кўтарилиган эмас ва ирфоний ғоялар шеъриятида ўзининг тўлақонли мажозий ифодасини топган эмас эди. Авваллари кичик лирик жанрлар (рубой, ғазал) билан чекланган ирфоний шеърият XI асрдан бошлиб эпик рух касб эта бошлади. XII - XIII асрларда форс тилида Фаридиддин Аттор (1147-1229) ва Жалолиддин Румий (1207-1273)ларнинг тасаввуфий эҳтиросга йўғрилган буюк эпик асарлари, араб тилида ирфоний ишқнинг оташин куйчиси Ибн ал-Фарид (1181-1234) шеърияти ва Ибн ал-Арабий (1165-1240) яратган тимсолий тафаккурнинг мумтоз намунаси “Футухоти Маккия” асари дунёга келди.

Ирфон - ўзликинг англашдир. Мен кимман? Ягона Аллоҳга менинг нисбатим қандай? Тасаввуф шу саволга жавоб кидиради. Унинг жавоби қисқа ва содда қилиб ифодаланганда, куйидагичадир: Ҳақ - ягона ва мутлақ борлиқ, Аҳад (яккалик, бирлик). Ҳақ ўз жамолини кўрмоқ истайди ва ўзига кўзгу сифатида фоний дунёни (яъни, биз кўриб турган моддий борлиқни) бунёд этади. Сўфийлар Ҳақнинг асл зотини Ҳақиқат ва унинг мазҳари, киёсан айтганда, кўзгудаги аксини “мажоз” (“иноскование”, метафора), деб атайдилар. “Ҳақиқат” ва “мажоз” тазоди шундан бошланади.

Алишер Навоийнинг “Махбуб ул-қулуб” рисоласи “Аввалги қисм”ининг “Назм гулистонининг хушнағма қушлари зикрида” деб аталган 16-фасли шоирлар таърифида бўлиб, шундай бошланади:

“Ул неча табақадир: аввалги жамоа нуқуди кунузи маърифати илоҳийдин ганийлар ва ҳалқ таърифидин мустағнилардур. Ишлари маоний ҳазоинидин маърифат жавҳарин термак ва эл файзи учун вазн силкида назм бермак. Назм адоси багоят аржуманд ва бениҳоят шариф ва дилписанд ўлдузи учун оёти каломда нозил бор ва ҳадиси мўъжизизомда тилаган топар, чун маал-қасд эмас, эл ҳурмати жиҳатидин ани шеър демас”³⁸

(Насрий баёни: Улар бир неча гурухдир. Биринчи гурух маърифати илоҳий ҳазинасининг нақдиналари билан бойиган ва ҳалқ таърифига эҳтиёж сезмаганлардир. Ишлари маънилар ҳазинасидан

³⁷ Бертельс. Б.Э. Ибранные труды. Низами и Фузули. М.-«Наука»-1962, с.174.

³⁸ Алишер Навоий. Муқаммал асарлар тўплами. 14-жилд. Т.-«Фан»-1998, с.24

Маърифат гавҳарини термоқ ва у гавҳарни эл файз топсин учун назм ипига тортмоқ. Назмларининг ифодаси ғоят куттуғ ва бениҳоят ёқимли ва улуг бўлганлигидан илоҳий калом оятлари ва Расулуллоҳнинг мўъжизали ҳадислари мазмунини излаган киши улардан топа олади ва қасддан ёзилмагани сабабли эл уларга эҳтиром билдириб, шеър деб аташга журъат этмаслар”.)

Алишер Навоий бу тоифа вакилларини “ҳақиқат тариқининг сұханвари”, деб атайди ва улар жумласидан тасаввуф адабиётининг энг буюк сиймолари **Фаридиддин Аттор** ва **Жалолиддин Румий** номларини тилга олади. Олим бу гурух вакилларини “авлиёи огоҳ ва машойих ва аҳлулоҳ”, деб улуғлайди.

Низомий Ганжавий эса фақат инсон руҳиятининг ички катламларига теран назар ташлаш билан чекланиб қолмай, ўз достонларида шахснинг Ҳақ ва жамият олдидағи масъулияти масаласига ҳам алоҳида эътибор қаратишини лозим топди, яъни, унинг асарларида ирфоний ва ижтимоий муаммолар олий бир уйғунликда ифодаланди. Айни шу уйғунлик ифодасига кейинчалик Алишер Навоий томонидан “Мажоз тариқи” деб ном берилган эди. Сўфийлар Ҳақнинг асл зотини Ҳақиқат ва унинг мазхари, киёсан айтганда, кўзгудаги аксини “мажоз” (“иноскование”, метафора), деб атадилар. Шу асосда тасаввуф адабиётида “ишиқи ҳақиқий” ва “ишиқи мажозий” тушунчалари шаклланди.

Шундай қилиб, дунёвий адабиёт ва тасаввуф адабиётининг ўзаро фарқи шундаки, Рудакий ва Манучехрий асарларида мажозий тасвир фақат эстетик завқ бериш, оддий хаёт ҳодисаларини нағис тимсоллар орқали ифодалашга хизмат қилган, яъни шаклни гўзалликка биринчи даражали эътибор қаратган бўлса, XIII-XIII тасаввуф шеърияти вакиллари олдинги давр шоирлари бадиий тасвир соҳасида эришган ютуқлардан унумли фойдаланган ҳолда мажозий тасвирни ирфоний туйғулар тараниуми билан уйғунаштириб, шеъриятга жиддий мазмунларни сингдириш, уни инсоннинг маънавий баркамоллиги, инсон руҳининг Борлик ҳақиқати билан уйғуналигини таъминлаш йўлида хизмат килдиришга киришди.

2. Низомий Ганжавий

Яқин ва Ўрта Шарқда VII-XVI асрларда бекиёс маънавий бойлик яратилди. Мусулмон маданияти деб машҳур бўлган ушбу бебаҳо ҳазина асосан араб, форс ва туркий тилларда дунёга келди,

аммо унинг ривожига минтақанинг барча ҳалқлари ҳам ўз улушларини қўшдилар.

Ушбу маданий-маънавий камолотнинг мустақил ва тамомила янгича бадиий идрок йўналишига асос солган забардаст мутафаккир шоир, қардош озарбайжон юртининг фарзанди Низомий тахаллусли Илес ибн Юсуф эди. У Кавказ орти ўлқасининг қадим шаҳарларидан бўлмиш Ганжада ўзига тўқ ҳунарманд оиласида 1141 йилда таваллуд топди. Бу даврга келиб ҳозирги Озарбайжон ўлқасида форс тилида ижод этувчи алоҳида адабий мактаб шаклланган, унинг Қатрон Табризий, Афзалиддин Ҳоқоний, Мужируддин Бойлақоний каби намояндалари шеърият оламида шуҳрат қозонган эдилар.

Бўлажак шоир форс ва араб тилларини пухта ўзлаштирди. У яхудий, паҳлавий ва (христиан Византиясиға оид бўлган) юонон тилларини ҳам озми-кўпми ўрганди. Илоҳиёт, фикр, ахлоқ илмлари, Шарқ ва Farb фалсафаси, илми нужум, тарих ва ўлкашунослик, кимё ва тиббиёт каби маҳсус илм соҳалари унга бегона бўлмаган. Даврининг қомусий билимдонларидан бўлгани учун ҳам Низомий номига доим “ҳаким”, яъни донишманд сифати қўшиб айтилган. Лекин у олим бўлишини ўз олдига мақсад килиб кўймади. «Улуг шайх» деб ҳурматланишига қарамай, муайян тасаввуф сулукини ҳам ихтиёр этмади. У том маънода мутафаккир шоир бўлди. Фалсафаси ҳам шеърияти, бадиий тимсоллари, бадиий тафаккури замирида шаклланди.

Низомий кўпчилик даврдошларидан фарқли ўлароқ муайян ҳукмдорлар саройида хизмат қилишни ихтиёр этмади, ўз мустақиллиги ва озодлигини сақлаб қолишини афзал билди. Унинг қасидалари, рубоий ва қитъалари турли манбалар орқали бизгача етиб келган, бироқ ўз кўли билан тартиб берган девони ҳанузгача фанга маълум эмас.

Низомий адабиёт оламида биринчи «Хамса» ёзган забардаст шоир сифатида донг тараттган. Аммо айтиб ўтмоқ жоизки, буюк озарбайжон шоири ўзи ҳеч қаерда «Хамса» ёздим, деб даъво қилган эмас ва балки бундай муайян мақсадни олдига кўйгани ҳам номаълум. У аслида б та достон ёзган. Биринчи достони «Маҳзан ул-асор» («Сирлар ҳазинаси») 1177 йилда, иккинчиси — «Хусрав ва Ширин» — 1181 йил охирларида, «Лайли ва Мажнун» — 1188 йилда, «Ҳафт пайкар» («Етти гўзал») — 1197 йил ўрталарида, бешинчи достон — «Шарафнома» — 1197—1200 йиллар орасида ва «Иқболнома» номи билан машҳур бўлган олтинчи достон шоир умрининг охирларида, 1202—1203 йилларда ёзиб тугалланди. Охирги

икки достон бир қаҳрамон — машхур Александр Македонскийнинг Шарқдаги бадиий тимсоли Искандар Зулкарнайн тасвирига бағишланган. Шу сабабли кейинчалик икки достонни қўшиб «Искандарнома» деб ном берганлар ва натижада «Беш хазина» («Панж ганж») ҳосил бўлган.

Ислом анъанасида бир кечакундузда ўқиладиган беш вақт намоз «Хамса» (аникроғи «Ал-хамсату») дейнлади, мусулмон динининг беш устуни — тавҳид (Оллоҳнинг ягоналигини тан олиш), намоз, рўза, закот ва ҳаж ҳам ўзига хос «Хамса» (бешлик)ни ташкил қиласди. Демак, Низомий умр бўйи яратган достонларидан «Хамса» туркумини ҳосил қилиши ва кейинчалик бу хайрли иш адабий анъана сифатида Амир Ҳусрав Дехлавий, Алишер Навоий сингари жаҳоншумул мутафаккир шоирлар томонидан изчил ривожлантирилиши бежиз ва тасодифий бўлган эмас.

Алишер Навоий «Садди Искандарий» достонининг муқаддима қисмида бу масалага маҳсус тўхталиб, «Хамса»нинг ҳар бир достони ёзилишини куннинг маълум вақтларида ўқиладиган сахар (фажр), пешин (зухр), аср, шом ва хуфтон намозлари билан қиёс этади ҳамда «Хамса»ни буюк бир тоғ чўккисига кўтарилиш мобайнида беш ўринда тўхтаб, нафасни ростлаш учун бино этилган беш оромгоҳга ўхшатади. Бу оромгоҳларни яратиш учун шоир «Билик тахти узра чиқиб ўлтурмаги», «Хаёл элчисини ҳар тараф чоптириши», «жон мулкидан», «маоний сипоҳини» (маънолар лашкарини) гурух-гурух («фавж-фавж») етказиб бериб туриши, маъно лашкарлари жам бўлгач, Ҳусрав Дехлавий лутф этганидек, инсонлар дилини забт этишга киришмоғи, яъни маънавият оламида жаҳонгирлик санъатини намойиш қилмоғи лозим эди. Демак, «Хамса» маълум мақсадга — инсоннинг руҳий (шуурий ва ҳиссий) тарбияси, маънавий камолот поғоналаридан бирма-бир кўтарилиши учун мадад бериш, унга асл инсонийлик йўлини ҳидоят этишга мўлжалланган асарлар мажмуаси эди.

Низомийнинг биринчи достони ички қурилниш ва мазмун йўналишига кўра тасаввуф руҳидаги пандномаларга жуда ўхшаб кетади. Шоир илк асарини Саноий Фазнавийнинг 1131 йилда ёзил тугаллаган машхур қомусий маснавийси «Ҳадиқат-ул-ҳақойик» («Ҳақиқатлар гулшани») таъсирида бошлаган бўлиши ҳам эҳтимол. Аммо ўн бир минг байти «Ҳадиқа»да ўн фасл бўлса, «Маҳзанул-асор»да кириш бобларидан ташқари 20 та алоҳида «мақолат» мавжуд. Ҳар бир мақолат тимсолий ҳикоят билан тугалланган. Бу

ҳикоятларнинг кўпчилиги воқеий ҳаёт лавҳалари бўлиб, уларда замон руҳи жуда аниқ акс этган.

Айтишларича, меъроj тунида Муҳаммад (сав) арши аъло остида қулфлоғлик бир хона кўриб Жаброилдан «Бу қандай макон?» деб сўрабди. Жавоб бўлибди: «Эй, расулуллоҳ, бу макон теран маънолар хазинасирид ва сенинг умматларинг ичида шоирлар тили ушбу хазинанинг калити туур». Достоннинг биринчи байти шу ривоятга ишорадир:

Бисмиллоҳир-раҳмонир-роҳим

Ҳаст қалиди дари ганжи ҳаким.

(«Шафқатли ва меҳрибон Оллоҳ номи билан» ояти
(Олий) донишманд ганжинаси эшигига калитдир).

Асар номи ҳам «Сирлар хазинаси», яъни, олий ҳақиқат сирларини қаърига яширган тилсим маъносидадир. У тавҳид (Олий борлиқ ягоналиги мадҳи), икки муножот, наът (пайғамбар мадҳи), меъроj васфи, давр ҳукмрони шаънига мадҳия-мурожаат каби муқаддима боблар билан бошланиб, сўнг шоирнинг бир фараҳбахш тунда кўнгил билан хилватдаги рамзий сұхбатлари тасвирига ўтилади.

Шоир бу асарни ёзишдан мақсади «**кўнгил қиссаси**»ни баён қилиш эканини алоҳида таъқидлайди. Инсон руҳият оламига кириб бориши учун кўнгилни йўлбошловчи қилиб олиши лозим. Чунки шоир тасаввурига кўра, инсоннинг ҳаёт фаолиятини таъминловчи ички аъзолари—етти халифа: ўпка, юрак, жигар, талок, ўт, меъда, буйрак бўлиб, улар устидан ҳукмрон **кўнгил**. У бир шамъ бўлса, қолганлари унинг атрофидаги парвоналар, барчаси ўз иши билан банд, **кўнгил** эса уларни **бирлаштирувчи марказни** ташкил этади. Рамзий бир ҳолатда шоир кўнгилнинг меҳмони, кўнгил унга айтадики: «мен сенинг ичиндега ҳам эмасман, аммо сендан ташқарида ҳам эмас. Мен бир хазинаман, аммо Қорун каби хасиснинг чўнтағидаги хазина ҳам эмас». Шоир **кўнгилни** Хожа, инсон табиатининг тарбиячиси деб атайди:

Хуллас, Ҳожса (яъни, кўнгил) бизнинг ихтиёrimизда,

Аммо у худо бўлмаса ҳам бизнинг соҳибимиздир.

У мен — тарбия кўрмаганга бўйсунган ҳолда,

Мени тарбия қилиб ўз йўлига юргиза олди.

Низомийнинг кўнгил (дил) моҳияти ҳақидаги шоирона ақидаси ниҳоятда теран мазмунга эга. Кўнгил бу ақл ҳам эмас, чунки у олий туйғулар манбаи. Инсон кўнгли уни олий ҳақиқат билан боғлаб турувчи тилсимдир, олий ҳақиқат сирларини ўзида жилвалантирувчи кўзгудир, фақат унга сайқал беришда

эринмаслик, сўнг занг ва чирк босишига йўл қўймаслик лозим. Кўнгил инсон вужудидан, моддийликдан ташқарида эмас, аммо моддийлик ва танҳо вужуд билан чекланган ҳам эмас. У инсонни инсонликда тутиб турувчи, **алоҳида бир вужудни олий маънавият билан туташлиқда асровчи моҳиятдир**. Шунинг учун шоир кўнгилни ўзига етакчи қилиб олади. Кўнгил мулкига эга бўлганлиги учун **инсон** шоирнинг тилидан энг олий таърифларга сазовор бўлади:

*Он ба гуҳар ҳамқадару ҳамсафий,
Ҳам маҳаку ҳам зару ҳам сайрафий.*

Яъни, у моҳиятга тенгдир ва моҳият билан бир сафдадир, у ҳам тилланинг ўзи, ҳам тилланинг соғлигини аниқловчи маҳак тоши, ҳам тилланинг баҳосини белгиловчи саррофдир.

Шоир Одам Атонинг яратилиши ҳақида гапирав экан, умуман бани одам моҳияти ҳақида мулоҳаза юритади. Низомий шоҳга мурожаат қиласр экан, аввало уни табиатдаги жами жонзоротлар ҳукмдори — **Инсон** деб англайди ва масалага шу нуқтаи назардан ёндошади, Шоирнинг шоҳга насиҳатлари айни замонда ҳам ўзига, ҳам барча инсонларга қаратилгандир.

Агар «Маҳзанул-асрор» панднома ва фалсафий мулоҳазалар руҳида ёзилган бўлса, **«Хусрав ва Ширин»** соғ воқеабанд достон. Унинг бош қаҳрамони **шахзода Хусрав** ҳам ҳар бир оддий инсон сингари фазилат ва айбу қусурлардан фориг эмас. **Ширин ишқи** унинг табиатини камолот йўлига етакловчи, инсонлик моҳиятини қадам-бақадам синовдан ўтказувчи **маҳак тоши** вазифасини ўтайди. Низомий яратган **тимсоллар** зохирда **шоҳ ва малика**, ботинда, моҳиятда инсонлик йўлининг бошланишида бир-бирига меҳри тушиб, сўнг шу табаррук оловда бирга тобланиб, **камолот пиллапоясидан бирма-бир кўтарилиб борган йигит ва қиз тасвири**дир. Бунда шоир Шириннинг Хусравдан баркамол ва покроқ эканини таъкидлайди, сабаби малика қиёфасида ўзининг суюкли ва эрта ҳаётдан кўз юмган жуфти ҳалоли — қипчоқ қизи **Оппоқ** (Офок)ни кўрар эди, Оппоқ вафот этиб, ўзи ҳаёт қолгани учун ичидан ўртана эди.

Низомий тасвир этган шоҳ Хусрав камолот йўлида нособит, аммо тошкесар **Фарҳод ишқ фидойиси тимсолиднр**.

Учинчи достон **«Лайли ва Мажнун»**да ишқ туфайли олий ҳақиқат сирларига ошно бўлган **ошиқ-шоир тимсоли** бор бўйи билан намоён бўлди. Мажнуннинг Лайлига ишқида оддий йигит-қиз

орасидаги муносабат тасвири эмас, балки ушбу афсона тимсолида руҳий дунёга оид кўп сир-синоат яширингандир.

«**Ҳафт пайкар**» достонининг воқеалар йўналишида, ички ҳикоя-қиссаларида инсоннинг ҳақиқат ва рўёлар қоришиклигига кечган бу мураккаб воқеликдаги **тентираш ва адашувларига** оид **мажозий тасвирлар** акс этгандир. Орзу-ҳавасларга ортиқча берилиш инсон зотини хароб қиласди, туби йўқ ҷоҳга бошлайди — асар мазмуни ушбу аччиқ огоҳлантириш асосига курилган.

Бешинчи достонда **Искандар Зулқарнайнинг жаҳонгирилик юришлари** орқали шоҳлар хатти-ҳаракати адолат мезонидан ташқари бўлмаслиги таъкид этилса, олтинчи достонда **«баҳт нима, иқбол нима?»** — деган жиддий фалсафий саволга жавоб қидирилади. Искандар жангномаларининг хуносаси шундан далолат берадики, жаҳонгўшойлик (янги янги ўлкаларни забт этиш), инсоннинг билиш уфқларини кенгайтиrsa ҳам унга иқбол келтирмас экан, чунки инсон абадий эмас ва кўлга киритган моддий бойлик, мулк ва сарҳадларини ўзи билан олиб кетолмайди.

Низомий Ганжавий охирги хуносасини айтмайди, ўзи асос солган янги тафаккур йўналишига ном бермайди, унинг учун ҳам кўп моҳиятлар мазмуни мубҳамлигича қолган, аммо у барибир кейинча **«Хамса»** деб аталган мутлақо янги маънавий оламнинг илк тарҳини амалда яратиб кетди, бу эса **мустақил бадиий тафаккур тариқати** деган гап эди.

Агар биз замондош ва қардошларимиз — бугунги Озарбайжон шоирлари бажарган улуг меҳнатнинг қадрига этиб уларнинг ижросидаги Низомий достонларининг озарбайжон тилидаги талқинини бироз ўзбек талаффузига мослаб, баъзи сўзларни изоҳи билан ҳозирги ёзувда нашр этсан, ўзбек китобхонини миннатдор этган бўлур эдик ва Навоий **«Хамса»**сининг Низомий асарларидан фарқи ҳам ёрқин кўринар эди. Ахир, озарбайжон тили ҳам ўзимизники, Фузулий ўзбекка бегона эмас.

Адабиётлар:

Низомий Ганжавий (1141-1202)
Куллиёт, Душанбе, “Ирфон”, 1982-1984,

Жилди I -1983, 464 сах. **Хусрав ва Ширин** – 6219 байт (с. 23-412)

Жилди II – 1982, 368 саҳ. - *Лайли ва Мажнун* – 4022 байт (с. 27-272)

Жилди III – 1983, 416 саҳ.- *Ҳафт пайкар* – 5093 байт (с. 27-334)

Жилди IV 1984, 496 саҳ.

Шарафнома– 6812 байт (с. 27-450)

Жилди V - 1984, 480 саҳ.

Иқболнома– 3659 байт (с. 25-254),

Махзан-ул-асрор– 2264 байт (с. 255-396),

Девони ашъор – 4022 байт (с. 397-440) – 56 газал, 5 қасида, 2 китъя,
9 рубой.

Низами Ганжави. Ҳафт Пайкар(научно-крит. текст). М.
“Наука”.ГРВЛ, 1987, 656+20 стр.

Е.Э.Бертельс. Избранные труды.Низами и Фузули. М.,
Изд.вост.лит., 1962, 556 стр.

Гулшани адаб (Намунаҳои назми форсу тожик.). Жилди 1
(Асрҳои IX-XIII). Душанбе, “Ирфон”, 1975, с.350-417.

Низами Гянджеви. Собрание сочинений в пяти томах. М.,
“Худ.лит.” 1985-1986.

3. Фаридидин Аттор ва унинг «Мантиқ ут-тайр» достони

Ўрта асрлар Шарқ мумтоз шеъриятининг энг ёрқин сиймоларидан бири, буюк форс суфий шоири Фаридиддин Аттор ижодида айни шу **мажозий тасвир ва талқиннинг бирлашуви ёрқин** бир тарзда намоён бўлди.

Шоир XII аср иккинчи ярми — XIII аср бошларида яшаб ижод килди. Бу давр ислом минтақа маданияти ривожида муайян сиёсий юксалиш босқичининг тугай бошлаганидан нишоналар берувчи дастлабки сиёсий, гоявий ва маданий инқизор үнсурлари юзага чиқа бошлаган замон эди. Салжуқийлар сулоласининг инқизорзи, Хиндистондан Фурийлар, Хоразмдан Абулмузаффар Такаш ва охирги Салжуқий сultonларининг ўзаро та-лашлари, айниқса, туркманларнинг ғуз кабиласи босқинлари шоир ватани Нишопур шахрини қатгиқ вайрон этди. Аттор умрининг сўнгги даврига тўғри келган мўғул босқини буларнинг барчасидан ўтиб тушди. Шоир асарларидаги чексиз алам билан йўғрилган умидсизлик кайфиятининг объектив асослари ушбу тарихий инқизор вазияти билан изоҳланса,

эҳтимол. У ўзининг бевақт туғилганини яхши билади, аммо барibir шун-дай фожиавий шароитда ҳам юраги баҳтга интиқ, ўзини интилган Олий кудратдан најот тилайди.

Шоир ҳаёти ва ижодини тадқиқ этган Хелмут Риттер, Абдулваҳоб Аъзам, Абдулхусайн Зарринкуб, Маҳди Ҳомидий ва бошқа бир қатор хорижий Шарқ ва Гарб олимлари унинг асарларида асосан ирфоний ғоялар ифодасини кўрадилар. Аттор ирфони алоҳида мавзу. Биз бу соҳадаги забардаст тадқиқотчилар билдириган фикр ва холосаларни жиддий қабул қиласиз ва улар билан бирор тарзда баҳсга киришувга ўзимизда журъат ва қувват сезмаймиз. Аммо Атгор аввало истеъодли шоир, бадиий тафаккур эгаси. Шу нуқгаи назардан, биринчи галда унинг шеърий сатрлари остида яширинган буюк ижодкор шахснинг дил дардлари, каттол замона зулмига қарши исёнкор руҳи, мазлум ҳалқ кўргуликларига қўйиниши, энг муҳими, давр тарихий воқелиги кўйган мушкул ва бешафқат саволларга ўттаниб жавоб излашлари бизнинг дикқатимизни тортади. Аттор тасаввуф шоири, Алишер Навоий таъбири билан айтганда, «ҳақиқат тариқи»нинг йўлчиси. Аммо у ўз табиатига кўра тасаввуф назариётчиси эмас, балки воқеликни бадиий идрок этувчи ва бадиий тимсолларда акс эттирувчи ҳассос шоирдир.

Аттор, дунёкарашига кўра, ўзини башариятдан, Борлиқдан айру кўрмайди, унингча инсон ва инсоният, барча жонзот ва бутун коинот бир бутун, яхлит. Шундай экан, атроф-жамиятдаги барча адолатсизлик, фасод, «булғанчлик» унинг назарида, ҳар бир инсонга, биринчи навбатда, шоирнинг ўзига, бевосита алоқадор. Бундай нуқтаи назар ўша даврдаги мураккаб сиёсий-ижтимоий воқелик ва унинг идроки даражасида инсон «нафси»ни, унинг моддийлигини, яъни унинг асл моҳиятига даҳлдор жиҳатларни мутлақо рад этиш кайфиятларини туғдириши табиий эди.

«Булғанчлик» манбаини моддий инсонга хос хирсу ҳавасларда, ҳудбин интилишларда кўрган шоир, жўшиб кетганди, ўзининг эҳтиросли вужудини ҳам инкор этади. Мавжуд жамиятнинг булғанчлигига, фасод бойлаб кетганига тоқат эта олмаган шоир бутун башарият учун айбни ўз бўйнига олади.

Аттор идеали, унинг интилган Ҳақиқати, аввало, Поклик тимсолида намоён бўлади. Унингча, Поклик Олий руҳий кудратнинг асосий сифатидир. Унинг тасаввуридаги «Мутлак пок борлик» ўша давр ислом ди-нига эътиқод этувчи кўпчилик тасаввуридаги Тавҳид тушунчасининг талқининидан фарқ қиласи. Шоир ирфоний шатҳиёт

жазабасида бაъзан ҳатто барча диний китоблар, жумладан, Қуръон матнининг талқинларини ҳам Олий моҳиятни англашга тўсқинлик килувчи бир парда деб ҳисоблаб, бутпарастлар топинувчи санамларга қиёс этишдан қайтмайди. Пайғамбар ва расулларнинг сўзларини илохий калом билан тенглаштириш тамойилларини кескин қоралайди.

«Атторнинг худо ҳақидаги тасаввuri, — деб ёзади А.Муҳаммадхўжаев «Фаридиддин Атторнинг дунёкараши» китобида, — Ибн Сино, Умар Хайём ва бошқа кўпчилик Яқин ва Ўрта Шарқ мутафаккирларининг худо ҳақидаги тасаввурларидан ҳеч нимаси билан фарқ қилмайди». Унинг тасаввуридаги Олий пок борлиқ — барча моддий дунё ашёларининг ягона мутлақ моҳиятидан иборат бўлиб, уни алоҳида кўриш ва тасаввур килиш мумкин эмас:

*Жумла олам бе ту мибинам аён,
Ва-з ту дар олам намибинам нишон.³⁹*

(Барча оламни сенсиз аён кўриб турибман,
Ва (бу) оламда сендан ҳеч бир нишона кўраётганим йўқ.)

XIII аср тасаввуф шеъриятининг бу буюк намояндаси, назаримизда, хаётий мураккаб жараёнларни изчил ички ривожланишда олиб қарамайди. Ушбу хусусият унинг асарларидағи умумий пессимистик рухнинг кучли намоён бўлишига сабаб бўлган ва кейинги асрларда унинг ижодини турли гуруҳлар ўз мақсаддари йўлида турлича талқин этишларига имкон берган.

Бу ўринда Аттор кўлёзмаларига атайин «тузатишлар» киритиш, шоирнинг исёнкорлик рухини ошкор этиб қўювчи маълум сатрларни «қисқартириш», кейинги асрларда «ижод килинган» ўта тенденциоз «асарлар»ни шоирга нисбат бериш каби соҳталашибонинг турли усуллари кўлланилган бўлиши мумкинлигини ҳам назардан соқит этиб бўлмайдики, ушбу ҳолатлар, биринчи навбатда, шоир мероси устида жиддий матншунослик тадқиқотларини талаб қиласди.

А.Муҳаммадхўжаев ёзишича, шоир ўша даврларда шаҳар ҳунарманд доиралари орасида урф бўлган футувва (жавонмардлик, саховатпешалик, ўз манфаатларидан ўзганинг манфаатини устун

³⁹ А.Муҳаммадхўжаев ўз китобида Техрон нусхаси асосида ушбу байт биринчи сатрини «жумла олам ба ту бинам аён» (Барча оламни сен туфайли аён кўриб турибман) шаклида келтиради. Бундай фарқлар яна бир марта Аттор асарлари матнига ёндошув гоявий мақсадлардан холи эмаслигини исботлайди.

қўйиш принципларига асосланган ўртоқлик жамоалари) таълимотининг тарафдори бўлган ва бу соҳада, ҳатто маҳсус «Футувватномай манзум» (Шеърий футувватнома) номли достон битган.⁴⁰ Бу достонда Аттор футувва ахлининг 72 фазилатини таърифлаб беради, жумладан, ростгўйлик, аҳдга вафо, ўзгага холис ёрдамга доим тайёр туриш, баҳти қайтган инсонларни баҳтли этиш йўлида фидойилик каби ажойиб умуминсоний хислатлар ушбу таълимотнинг асосини ташкил этарди.

Албатта, Аттор ижодининг бутун моҳиятини жузъий кузатишлар билан қамраб олишга уриниш бефойда. Унинг бой ва мураккаб бадиий олами кенг ва муфассал тадқиқотларни талаб қиласди. Бизнинг асосий мақсадимиз Фаридиддин Аттор ижодининг муфассал тадқики эмас, балки унинг Алишер Навоий туфайли ўзбек адабиёти ихлосмандлари орасида машҳур бўлган «Мантиқ ут-тайр» достони мазмуни ҳақида баъзи мулоҳазалар билдиришди.

Маълумки, Шарқ адабиётининг жонкуяр тадқиқотчиси академик Е.Э. Бертельс 1928 йилда ёзилган «Навоий ва Аттор» асарида Алишер Навоийнинг «Лисон ут-тайр» достонини «Мантиқ ут-тайр»нинг 1857 йилда

француз шарқшуноси Гарсин де Тасси тайёрлаган илмий-танқидий матнига қиёслаган эди. Биз француз олимининг жиддий меҳнатга жилла бўлса ҳам ҳурматимизни камайтирган ҳолда, Навоий даврига яқин кўлёзмани қидиришни лозим кўрдик ва шундай кўлёзмани Ўзбекистон Фанлар академияси Шарқшунослик институти фондидан топишга муваффақ бўлдик. Бу 813-инвентарь тартиб рақами остида сакланаётган «Ситтайи Фаридиддин Аттор» (Фаридиддин Аттор олтилиги) номли ноёб кўлёзма экан. «Мантиқ ут-тайр»дан ташқари яна тўрт достон ва шоир девонини ўз ичига олган бу китоб баъзи маълумотларга кўра 1424 йилда Ҳирот шаҳрида кўчирилган.

⁴⁰ Тадқиқоти бу достон ҳақида мукаммал маълумот бермайди, аммо Атторнинг биринчи издоши, XIV асрда ижод килган турк шоири Гулшахрий ёзган «Мантиқ ут-тайр» асари тўлиғича футувва гояларини тартиб қилишга багишиланганлиги марҳум навоийшунос олим Ш.Шариповнинг «Лисон ут-тайр» генезиси ҳақида ёзилган асаридан китобхонга маълум. Аммо шу нарсани афсус билан кайд этмоқ керакки, ўзбек кенг китобхон ахлига якнингча ҳам ахийлик, футувва, жавонмардлик жамоалари ва уларнинг фалсафий-социал асослари ҳақида етари маълумот берувчи адабиёт йўқ эди ва ҳатто 14 томлик «Ўзбек совет энциклопедияси»да ҳам бу каби атамаларнинг шархи берилган эмас. Ваҳоланки, Алишер Навоий ва мумтоз адабиётимизнинг бошқа вакиллари ўз даврида бу тушунчаларга алоҳида зътибор билан қарашган. Мустакиллик шарофати билан Воиз Кошифийнинг «Футувватномай сultonий» рисоласи Н.Комилов томонидан ўзбекчага ўтирилиб нашр этилганлиги бу соҳада катта ютук бўлди.

Достоннинг асосий сюжетига 200 дан зиёд ҳикоят-тамсиллар ва бир йирик қисса киритилган. Аттор «тавҳид», «ҳамд», «нафт» каби анъанавий боблардан сўнг «Акла хитоб» сарлавҳаси остида Худхудга мурожаат билан асосий мавзуга киришади:

*Марҳабо, эй Худҳуди ҳодийшууда,
Дарҳақиқат пайки ҳар водий шуда.
Эй ба сарҳадда Сабо еайри ту хуш,
Бо Сулаймон «мантиқ ут-тайр»и ту хуш...*

(Хуш келибсан, эй йўлбошловчи бўлиб етишган Худҳуд, Ҳакиқатни билишда сен ҳар бир врдийдан хабар берувчи бўлиб етишдинг. Сабо мамлакатига сенинг сайдинг қутлуғ бўлсия, Сулаймон билан қушлар тилида сухбатинг қутлуғ бўлсин...)

Бу сатрларнинг мажозий мазмуни жуда теран. Улар машҳур ривоятдаги Худхуднинг Сулаймон пайғамбар билан Сабо мамлакатининг маликаси Билқис ўртасидаги элчилигига ишора қилмоқда. Бундан ташқари, Аттор Худҳуд тимсолида Ақлни назарда тутади (Худхуднинг бошидаги тожи бу рамзга ишора ва Ақл инсон ҳис-туйғуларини етаклашда йўлбошловчи бўлиб етишгани, Ҳакиқатни англаб етишида инсон учун асосий восита деб тан олингани таъкидланмоқда). У Сабо мамлакатига — ишқ оламига сайд этади, Сулаймон, яъни Олий қудрат дарракчиси билан қушлар тилида сухбат қура олади. Кейинги сатрлар ушбу талқинни тўлиқ тасдиқлаш баробарида яна Атторнинг асосий концепциясига китобхон дикқатини қаратади:

*Девро дар банди зиндон боз дор,
То Сулаймонор боши роздор.
Девро вақти ки дар зиндон куни,
Бо Сулаймон қасди шодирвон куни.*

(Девни зиндонда банди этиб сақла, Шундагина Сулаймон сингари (ҳакиқат) сирини англай оласан. Девни зиндонга қамагачина, Сулаймон билан шоҳ чодирида сухбат куришни ўйласанг бўлади).

«Дев» деганда Аттор яна инсоннинг моддий хирсу ҳавасларини назарда тутмокда. Яъни, Инсон ақл қудрати билан моддий истакларини енгиб ўтгандагина, Олий ҳақиқатни англаш даражасига етиша олади, демоқчи.

Шу тартибда Аттор яна ўн икки турли тоифа қушларга мажозий мурожаат қиласи. Асар воқеалари қушларнинг йиғилишиб, ўзларига бир ҳукмдор танлаш ҳақида баҳсу мунозараларидан бошланади.

Шундан сўнг Худхуднинг қушлар жамоасига мурожаати берилади. Унинг сўзларидан маълум бўлишича, у ўз подшохини таниган, факат ҳузурига танҳо йўлга чиқишига қудрати етмайди. Лекин бошқа қушлар унга ҳамроҳлик қилишса, ул шоҳ ва ул олий даргоҳга маҳрам бўлиш насиб этиши мумкин. Бу олий ҳукмдорнинг номи Симурғдир. Қушларнинг саволларига жавобан Худҳуд уни таъриф этади ва барчалари Симурғга етишиш орзусида йўлга отланадилар. Аттор асосий сюжетда эпик тасвирга кўп мойил эмас, унинг достонида ҳис-ҳаяжон, туйгулар тошкини кучли, эпик ҳикоя кўп ўрин-да жуда кисқа ва шартлидир. Масалан, қушларнинг Худҳуд тарғиботи таъсирида йўлга отланишлари ва йўл қийинчиликлари атиги уч байтда мухтасар ифода этилган, холос. Кейин яна қушлар ва Худҳуд орасида баҳс-мунозара бошланиб кетади. Ҳар бир қуш йўл қийинчиликларидан зорланиб, ўз аҳволини баён этиб, умумий мақсад йўлида интилишдан тўхташга баҳона излай бошлайди. Худҳуд эса уларнинг ҳар бир узрига ўринли инкор жавоблари бериб, гапининг исботи учун ибратли ҳикоялар келтиради, уларни ўз интилишларида субитқадамликка ундаиди.

Кушлар йўлбошловчидан Симурғнинг ўзларига нисбатан қандай эканлигини суриштириб, шундай жавоб олишади:

*Сурати мурғони олам сар басар
Сояйи уст, ин бедон, эй бехабар.
Ин бедонисти, бубин онгаҳ бибош,
Чун бидонисти, макун он роз фош.*

(Оламдаги барча қушларнинг сурати Унинг соясидир, буни бил, эй, бехабар. Буни билдингми, кара, энди жим бўл, Билган бўлсанг, ул сирни фош этма.)

Аттор достоннинг ўзак ҳикояти Шайх Санъон қиссасидир. Бу достон ичра достон асарга куйидаги сабаб билан киритилади.

Қүшлар барча узр ва саволларига мукаммал жавоб олгач, «йўл кайфиятини» сўрайдилар, яъни Симурғ сари интилган йўлчидан аввало қандай сифат талаб қилинишини билмоқчи бўладилар. Худхуд айтадики, бу йўлда асосий сифат фидойи ва бегараз ишқдир. Аттор қаҳрамони тилидан ишқни таъриф этар экан, ниҳоятда жўшиб кетади:

*Гар туро гўянд аз имон бар ой,
Ва-р хитоб ояд туро к-аз жсон бар ой,
Ту гаҳ ипро ва гаҳ онро бар фишин,
Тарки имон гири жсонро бар фишин.
Сангари гўянд ки ин бас сангар аст,
Ишқ гўз куфру имон бартар аст.
Ишқро бо куфру бо имон чи кор,
Ошиёнро лаҳзае бо жсон чи кор!*

(Агар сенга имондан кеч деб айтишса,
Агар «жондан кеч» деб хитоб янграса,
Сен дарҳол бунисидан ҳам, унисидан ҳам воз кечиб қўй,
Имонни тарк этгину, жондан юз ўғир.
Бу тўсик (яъни куфр ва имон орасидаги тўсик) жуда маҳкам
дайишади,

Айтгники, ишқ куфр ва имон (аро зиддият)дан юксакроқдир,
Мұхаббатнинг куфру имон билан қанчалик иши бор?!
Ошиқларнинг бирор лаҳза жон билан ишлари борми ?!)

Шоир қалбидан тошиб келган бу эҳтиросли хитоблар тасаввуф маънавиятининг юксак парвоздаридир. Мургак Алишерни ўз сехрига чулгаган, унинг истеъодига чўғ туташтирган худди шу сатрлар бўлса, не ажаб! Ушбу чақмокли мисралар давомида баён эталган қисса ҳам «Мантиқ ут-тайр» достонининг авж пардаларини ташкил этади.

Каъбада эллик йил улуғ шайх бўлмиш Санъон тушида бир насроний маликани кўриб севиб қолгани ва барча обрўрутбаларидан кечиб, ўша тарсобачча санамнинг йўлига борлигини, дину имонини багишлагани ҳакидаги ҳаяжонли ҳикоя ўкувчига яхши маълум, бу ҳақда озар шоири Ҳусайн Жовид яратган драма ҳам кўп театрлар саҳнасида кўрсатилган. Алишер Навоий «Лисон ут-тайр» достонида воқеанинг асосий мазмунини мукаммал

гавдалантириб берган. Шу сабабли биз достон мазмунини такрорлаб ўтирамай, фақат баъзи жиҳатларига эътибор қаратамиз.

Аттор ўз достонини:

*Шайх Санъон сирри аҳди хеш буд,
Дар камолаи ҳар чи гўям беш буд —*

(Шайх Санъон ўз даврининг сири эди,
Камолоти, ҳар қанча таъриф этмай, ундан юқорироқ эди)

деб бошлайди. Бу сўзлар бутун қисса мазмунига калитдир. Дарҳақиқат, эллик йил Каъбада шайх бўлган, эллик марта ҳаж шартларини бажарган ислом динининг пешвоси аллақандай бир тарсо кизига хобида ошиқ бўлиб, ҳамма мартаба ва имтиёзларидан, ортирган обрўсидан воз кечиб йўлга чиқиши ва охир натижада тарсо қиз висолига етмоқ учун исломдан, имондан кечиб, ўзга динга ўтмолги, унинг учун энг табаррук китоб «Куръон»ни ўтга ёқиб, исломда энг ҳаром жонзот ҳисобланган чўчқаларни парвариши қилишга рози бўлмоқлиги — булар асло хирсу ҳавас тугёнининг белгиси бўла олмас эди. Унинг маънавий камолотини таъкидланиши ҳам бунга далолатдир. Аттор ирфонида Ҳақиқат ишқи, Навоий талқинидаги Мансур Халлож хаёл қилганидек, дунёдаги барча мазҳаб намояндаларини бирлаштира олиши мумкин бўлган умумий бир эътиқод сифатида тасаввур этиларди. Шу сабабли бўлса керак, Рум гўзалига ошиқ бўлиб, ўзлигидан буткул воз кечган шайхни ўз асарига марказий қаҳрамон қилиб олади.

Аммо XII асрда ҳануз шайх Санъон жасорати, маълум маънода, Атторнинг ўзи учун ҳам сир эди. Балким, шу сабабли буюк форс тасаввуф шоири ўз foяларининг ҳимоясида изчил бўла олмади, унинг зиддиятили тафаккури доимо «ишқ» ва «имон» орасида тараффудда турди. У ўз қаҳрамонини юрак билан ёқлайди, ақл билан қоралайди, ботиний эҳтирос билан кўкка кўтаради, зоҳирий мулоҳазалар билан ерга уради. Румдаги дайрда тарсо қизининг шоир томонидан ички ҳавас билан муфассал таъриф этилган сулув жамолини кўргач —

*Шайх имон дод, тарсойи харид,
Оқибат бифруҳт, расвоий харид.*

(Шайх имонини қўлдан бериб, тарсоликни сотиб олди,
Келажак дунёсини сотиб, расволикни олди.)

Аттор қиссасини бошлашдан бурун —

Ишқро дарди бебояд пардасўз,

Гоҳ жонро пардадар, гаҳ пардадўз, —

(Ишқ дарди пардани куйдирувчи бўлиши,

Гоҳ жон пардасини йиртувчи, гоҳ тикувчи бўлиши лозим.)

деган эди. Бу сатрлар мазмунни шоирнинг ўзига тамомила дахлдордир. Шайхнинг инсонлар орасидаги барча зоҳирий тўсиқларни куйдиргувчи алангали муҳаббати Аттор дилидан учкунлангандир, шайх Санъоннинг ўтли нидолари орқали Ошик шоир ўзи «пардани йиртиб чиқиб», дил дардларини тўкиб солади ва яна қаҳрамон эҳтиросларини парда қилиб ўзини пана-лайди.

Қисса бошида ишқни имондан юкори кўйган шоир якунлашда яна кушлар Санъон ишқини фақат бир тамсил, «ҳақиқий ишқ» (Симурғ ишқи) йўлида рамз (аллегория) деб қабул қиласларига ишора қиласди, яъни бадиий тафаккур даражасида замона ақидаларига риндана исён кўтарган холда, суфий сифатида яна мўътадилликни сақлаб қолади.

Кушлар бир муддат олга парвоз этиб, йўлнинг поёнсиз машаққатларидан толикадилар ва яна Худхуд билан ораларида баҳс бошланади. Қисқаси, то тариқат водийлари шархига ўтилгунча (такрибан 1,5 минг байт давомида) ўн бешга яқин күшининг Худхуд билан савол-жавоби берилади. Ҳар бир жавоб бир неча ҳикоят орқали далилланади.

Охирги қисм водийларга бағишиланган. Йўлбошли Худхуд навбатдаги күшининг саволига жавобан аввал 7 водий (талаб, ишқ, маърифат, истиғно, тавҳид, ҳайрат, факру фано водийлари)ни номма-ном санаб, сўнг ҳар бирини алоҳида васф этади ва ҳар сафар 5-6 ҳикоят билан тавсифни муайянлаштиради.

Асар охирида минг машаққат ичра ҳудудсиз йўл босиб, кўпчилиги сафар давомида қолиб кетган күшларнинг жуда оз қисми «ул Олий даргоҳ»га этиб борадилар:

Олами пур мурғ мибурданд роҳ,

Беш нарасиданд си он жойигоҳ.

(Улар йўлга тушгаида бир олам күш эдилар,

Ул даргоҳга ўттизтадан ортиғи этиб келмади.)

Аммо улар этиб келган жой жуда маҳобатли бўлиб, бунда юз минглаб офтоб бир зарра каби арзимас туюларди. Ожиз ва бенаво ўттиз күш қалбини яна кўркинч ва умидсизлик қоплайди.

Кай падид оем мо ин жойигоҳ,

Эй дариго, ранжбурди мо зи роҳ...

(Биз бу даргоҳда қандай ҳам кўзга ташлана олар эдик,
Эҳ, афсус, шунча йўл босиб тортган азоб-уқубатларимиз...)

Кушлар шундай тараффуд ичра турғанларида парда ортидан «Иzzат ҷовуши» (худайчиси) чиқиб келиб, улардан нега келганликларини сўрайди. Кушлар ўз аҳволларини баён этиб, биз шунча йўл босиб, дард чекиб, Симурғдан бизга подшоҳ бўлишини илтимое қилиб келдик, дейишади. Ҷовуш жавоб қиласлари, «агар сизлар жаҳонда бўлсангиз ҳам, бўлмасангиз ҳам у мутлоқ ва абадий подшоҳдир».

«Иzzат ҷовуши»нинг бу хитобига жавоб сифатида Аттор парвона ва шам ҳақида ҳикоят келтириб, кушлар кайфиятини билвосита изҳор этади. Шу пайт умидсизликка тушган йўлчилар олдида «ҳожиби лутф» (муруват дарвазабони) пайдо бўлиб, кушлар олдидағи пардаларни бирма-бир кўтаради ва уларни бир нурли парда қаршисига етказиб, «яқинлик остонаси»да «ҳашамат ва иззат курсилари»га ўтказгач, кўлларига бир руқъа (хат битилган қофоз) бериб, шуни охиригача ўқинглар, дейди.

Шоир шу ўринда Юсуф пайғамбар ва унинг биродарлари ҳақидаги ҳикоятни тамсил сифатида келтиради. Маълумки, отасининг севимли кенжা ўғли бўлмиш гўзал Юсуфни биродарлари рашқ қилиб, сахрова бир кудукқа элтиб ташлашган, сўнг савдогарга қул қилиб сотишган ва унинг кўйлагини қонга бўяб, йиртқичлар еб кетди, деб отасига хабар келтиришган эди. Орадан кўп ҳодисалар ўтиб, Юсуф тақдир такозоси, ўзининг соф кўнгиллиги ва ақл-идроқи туфайли Миср азизи даражасига етишади. Юртда қаҳатчилик бошланиб, очликдан қийналган акалари ўз биродарларини танимай, олдига нон сўраб келишади. Юсуф уларга айтади-ки, «менда бир яҳудий тилида битилган ёзув бор, ҳеч ким уни ўқий олмаётir, агар сизлар шуни ўкишга ёрдам берсаларингиз, сизга қанча бўлса нон бераман» (Юсуф ва акалари, ривоятдан маълумки, яхудий эдилар. Мисрнинг ўша даврдаги аҳолиси эса бошқа, аникроғи, қибитий тилида сўзлашар эдилар). Биродарлар шодмон бўлишиб, «хатни

келтир», дейишади. Юсуф хат ўрнига биродарлари олдига ўзининг қонли кўйлагини келтириб ташлайди...

Хикоят ниҳоятда ибратлиидир. Атторнинг юрагидаги бутун оғриқ яна бир карра шу тимсол орқали ярқ этиб юзага уради, шоир асос ғоясини қайта-қайта таъкид этади:

Чун нигоҳ карданд он си мурғи зор
Дар хати он руцайи пурэтибор,
Ҳар чи ишон карда буданд он ҳама,
Буд карда нақши он тобон ҳама.
Он ҳама худ буд саҳт, он буд лек,
К-он асирон чун нигаҳ карданд нек,
Рафта буданду тариқе сохта,
Юсуфи худро ба чоҳ андохта,
Жони Юсуфро ба хори сўхта,
В-онгаҳ уро бар сари бифрухта.

(Ул бенора ўттиз қуш эътиборга сазовор номадаги Ёзувга нигоҳ ташлагач, (кўришдики)
Улар ҳаётларида нимайики иш қилган бўлсалар, барчаси Ушбу (ёзув)да равшан акс этган эди.
У барчаси жуда оғир эди, лекин ул асиirlар яхшилаб Назар ташлашса, айни ўша қилмишлари эди,
Яъни улар ўзларига бир ўйналиш олиб йўл босишган,
Аммо (йўл бошидаёқ) ўз Юсуфларини чоҳга ташлаб юборган эдилар.

Юсуфнинг жонини хорлик билан куйдиришган,
Ва уни бир бегонага сотиб юборишган эди).

Аттор жўшиб кетиб хитоб қиласи:

Минадони ту — гадойи ҳеч кас,
Миғуруши Юсуфи дар ҳар нафас.
Юсуфат чун подшоҳ ҳоҳад шудан,
Пешгоҳу пешво ҳоҳад шудан,
Ту ба оҳир ҳам гадо, ҳам гўрисна,
Пеши у ҳоҳи шудан тан бараҳна.

(Сен — ҳеч ким бўлмаган гадо, ўзинг билмай —
Ҳар нафасда бир Юсуфнинг сотасан,

Юсуфнинг подшоҳ бўлиб етишганда эса,
Олий зот ва етакчига айланганда эса,
Ўзинг охир-натижада ҳам гадо, ҳам оч ҳолатда
Ялангоч тана билан унинг олдига (тиланиб борасан).

Кушлар бундай қиёсдан шарманда ва уят ичра қолиб, соғ йўқликка чўмдилар ва танлари тўтиёга айланди. Шундан сўнг улар буткул покланиб, янгидан жон пайдо қилдилар.

Чун нигаҳ карданд он си мурғ зуд,
Бешак он Симурғ он си мурғ буд.

(Ул ўттиз қуш тезлик билан нигоҳ ташласа,
Шак-шубҳасиз ул Симурғ ўша ўттиз қушнинг ўзи эди.)

Кушлар барчаси ҳайратдан бошлари қотади, «бу» қандай қилиб «у» бўлиб қолганини тушуна олишмайди. Ўзларига қарашса, «си мурғ» (ўттиз қуш), Симургга боқишишса, яна «си мурғ»нинг ўзи. Улар «тилсиз» (безабон) ул Олий даргоҳга савол қилишади, у ердан ҳам «безабон» жавоб келади:

...К-ойинаст ин ҳазрати чун офтоб,
Ҳар ки ояд хешро бинад дар у,
Жону тан ҳам жону тан бинад дар у.
Чун шумо си мурғ инжо омадид,
Си дар ин ойина пайдо омадид.
Гар чиҳш, панжоҳ мурғ оянд боз,
Пардаро аз хеш бегушоянд боз.
Гарчи бисёри ба сар гардидаид,
Хеш мибиниду худро дидайд.
Ҳеч касро дидабар мо кай расад.
Чашми мўри бар сурайё кай расад.
Дийдайи мўри ке сандон бар гирифт,
Пашша кай фили ба дандон дар гирифт...

(«...Бу офтоб каби (чараклаган) даргоҳ кўзгудир,
Унда ҳар ким келса ўзини кўради,
Жон ва тан ҳам унда жон ва танин кўради.
Сизлар ўттиз қуш бу ерга келгандаринг сабабли,
Бу кўзгуда ўттизта кўриндиларинг,

Агар башқа сафар киркта ё элликтә қүш келса,
Яна ўзларининг юзларидан парданы кўтариадилар.
Агарчи кўп нарсаларни бошдан кечирган бўлсаларинг хам,
Ўзларингни кўриб келдиларинг ва ўзларингни кўриб турибизизлар.
(Сиз каби) ҳеч ким бўлгандар нигоҳи бизга қаҷон етарди,
Чумоли кўзи билан сандонни яхлит кўриб бўладими?
Пашша филни тишида бутун тишлай оладими?..)

Шоир хулосасидан шуни англаш мумкинки, аввало Олий мутлак Борлик ўзга нарса, унга интилувчи «толиблар» — ўзга; қолаверса, камолот йўлининг охирида ҳам улар ўз аксларини, ўз килмиш-қидирмешларинигина кўрадилар, фақат улар ўз «Юсуф»ларини олдиндан чоҳга ташламасликлари маъқул, яъни доимо ўз сийратларини пок сақлаб қолишига уринмоқлари, булғанчликка берилмасликлари лозим. Асар бошида айтилган «ниманини излаётган бўлсанг, нимагаки интилаётган бўлсанг, ўша сен ўзингсан, ўзингни англа, яна юз маротаба ўзингни англа» деб қилинган хитобнинг маъноси ҳам шу, яъни инсондаги Поклик ундаги Олий зот нишонасидир, деган ақида. Шоир ғояларининг ижобий руҳи шунда. Аммо, кўриб ўтганимиздек, бу ижобий ният Атгорда изчил эмас. У бани башарнинг моддий ҳаёт чегарасида ўз поклигини сақлаб қола билишига ишончсизлик билан қарайди.

Атторнинг ирфоний қарашларида ўшд таҳликали замонлардаги адолатсизлик, ижтимоий нотўқисликлардан қоникмаслик, норизолик кайфияти намоён бўлди, аммо бу кайфият, объектив олганда, умидсизлик, моддий инсоннинг маънавий қудратига ишончсизлик кўринишида юзага чиқци. Биз агар шоирни тўғри тушунсақ, моддий ҳирсу ҳавасларга ружу кўйиш ўша жамиятда фақат бир гурӯҳ тўкликка шўхлик қилаётган фосик-ларгагина алоқадор эди, бир бурда ҳалол луқма учун астойдил тер тўкиб ўтаётган меҳнаткашнинг нима нопоклиги бор эди, ахир? Аммо Аттор инсон руҳидаги шаҳват ва гафлат, кибр ва газаб олудалигини ижтимоий жараёнлардан алоҳида, фақат бир умумий, мавҳум инсон фитратига хос нуксон сифатида кўриб, ҳалол ва меҳнаткаш инсонни ҳаромтомоқ, қорин тўклигидан эрмакталаблик кўчасига юз бурган фосик каслардан моҳиятан фарқ қила билмади. Унинг умри охиридаги асарларида намоён бўлган фожеъ руҳ, моддий дунё ислоҳидан умидсизлик кайфиятларининг илдизи ҳам, назаримизда, шу сабабдан эди.

4. Жалолиддин Румий. «Дилдаги нур...»
«Маснавий маънавий»нинг бош гояси ҳақида)

Даҳр аро нур - акси офтобу Суҳо,
Дилдаги нур — акси анвори Худо...⁴¹

Миллий маънавиятимиз ривожининг ҳар бир босқичида ўша давр мукаммал маънавият тизимини ифодаловчи улуғ китоблар яратилган. Улардан энг қадимиysi «Авесто» китоби бўлса, кейинги босқичларда қадим туркий битиклар, «Девони луготит турк» ва «Кутадғу билик» асарларини эслаш мумкин. Ислом минтақа маданияти даврида Форобий ва Мотуридий, Беруний ва Ибн Сино асарлари, Абу Ҳамид Газзолийнинг «Иҳёу улум ад-дин», «Кимёйи саодат» китоблари, буюк тасаввуф уламолари Абдуллоҳ Анзорий, Аҳмад Яссавий ва Сулаймон Бокирғоний, Саноий ва Фаридиддин Атторларнинг ирфоний мероси, Низомий ва Ҳусрав Дехлавий «Хамса»лари ва ҳоказоларни эслаш мумкин. Бундай яхлит маънавият тизимлари ислом минтақаси маънавий такомил тарихида кам эмас. Ушбу сирада улуғ мавлоно Жалолиддин Румий меросининг ўрни ва мавқеи алоҳидадир.

Алишер Навоий «ҳақиқат тариқининг суханвари» деб улуғлаган бу буюк ирфоний шеърият ижодкори кўп асарлар яратган. Аммо улар ичидаги энг машҳури «Маснавий маънавий»дир. Бу асарнинг маънавият оламидаги юксак мавқеини унга ёзилган шарҳларнинг кўплигидан ҳам билса бўлади. Мустақилликгача барча тасаввуф намояндалари сингари Румий ижодига ҳам «реакцион» тамғаси босилгани сабабли, ўзбек тилида унинг бирор асаридан тузукроқ парча ҳам эълон қилинган эмас, у ҳақда тадқиқот юритиш ҳам мақсадга мувофиқ саналмаган. Мустақиллик шарофати билан иқтидорли шоир Жамол Камол таржимасида «Маснавий маънавий»нинг 6 дафтари (жилди) тўлиқ нашр этилди. Бунга қўшимча марҳум шоир Асқар Маҳкам «Маснавий»ни туркиялик маснавийшунос олим Мавлоно Обиддин Пошшо шарҳлари билан биргаликда таржима қила бошлаган эди ва бу таржиманинг биринчи ва иккинчи жиллари ҳам нашрдан чиқди.⁴² Ўтган 2006 йилда атоқли олим, тарих фанлари доктори Маҳмуд Ҳасаний таржимасида Шайх

⁴¹ Мавлоно Жалолиддин Румий. Маснавий маънавий. Биринчи китоб. - Т., 2005. — С. 112.

⁴² Жалолиддин Румий. Маънавий маснавий. Куллиёт. Биринчи жилд. Биринчи китоб. Т., «Шарқ», 1999 йил, 368 саҳифа. Яна: Жалолиддин Румий. Маънавий маснавий. Куллиёт. Биринчи жилд. Иккинчи китоб. Т., «Янги аср авлоди», 2007 йил, 274 саҳифа.

Одина Мухаммад Хоразмийнинг «Мифтоҳ ул-асрор» («Сирлар калити») асари «Мусика» нашриётида чоп этилди. Бу асар ҳам «Маснавий маънавий»нинг шархиdir. Маълумки, улуғ ўзбек шоири Раҳимбобо Машрабга нисбат берилувчи «Мабдаи нур» асари ҳам Жалолиддин Румий китобининг шеърий шарҳи бўлиб, бу асар ҳам илк маротаба мустакиллик йилларида (1994 йилда «Фан» нашриётида) филология фанлари доктори, профессор Ҳожи Исматуллоҳ Абдуллоҳ ташабbusлари билан нашр этилиб, китобхонлар кўлига етиб борди. Бу асарда Исматуллоҳ Абдуллаев гувоҳлик беришича, «Маснавий»нинг 40 байтига шарҳ берилган. Олимнинг айтишича, бу асарни тўлигича Румийга шарҳ деб аташ қийин. Аммо «Маснавий маънавий»дан таъсирланиб ёзилгани аник. Мен Эрон сафаридан «Маснавий»нинг 1379-80 йилларда нашрга тайёрланган (милодий 1960 йиллар) нусхасини олиб келган эдим. Негадир бу нусхада байтлар сони Жамол Камол таржимасига асос бўлган нусхадан анча кўп. Ҳар ҳолда юқорида санаб ўтилган нашрларга таянган ҳолда «Маснавий маънавий»да ўз аксини топган миллий маънавиятимиз назариясига оид баъзи қарашлар ҳақида куйидаги қисқача мулоҳазаларни баён қилиш мумкин.

XIII аср иккинчи яримида яратилган «Маснавий маънавий» асари тасаввуф маънавиятининг олий такомилини ўзида ифодалаган қомусий асардир, уни ислом минтақа маданияти давридаги миллий маънавиятимиз такомил босқичларининг ҳар бирига хос бўлган муҳим тадрижий жиҳатларини тўғри англаб етмай туриб, Жалолиддин Румийнинг маънавият назарияси ривожига қўшган ҳиссасини тўғри белгилай олиш мумкин эмас. Ислом минтақа маданияти доирасида миллий маънавиятимиз такомилининг биринчи погонаси бўлмиш Сунна босқичида маънавият назариясининг диккат марказида имон-эътиқод ва у билан боғлиқ ҳолда, ислом ахлоқи ва ислом хуқуки масалалари турган бўлиб, буларнинг ечими асосан «Саҳиҳи сittа», яъни Мухаммад (с.а.в.)нинг энг ишончли ҳадислари йиғилган бу юк ҳадис тўпламлари ҳамда Имоми Аъзам ва шогирдлари ишлаб чиқкан фикҳ китобларида ўз ифодасини топган. Иккинчи погона - Ислом маърифатчилиги босқичида илм, яъни ягона Аллоҳ яратган оламни ақл ва тафаккурга таяниб ўрганиш долзарб масалага айланди. Бу даврда рационалистик билим, мантиқий тафаккурга эътибор бош мавзуга айланди. Форобий ва бошқа файласуфлар инсон танаси бир мамлакат бўлса, ақл унинг подшохидир, деб хуласа қилдилар. Бу нуктаи назар минтақада кенг ёйилди ва Ибн Синолар давригача ҳам ислом минтақасида етакчи

фикр бўлиб келди. Ушбу қарашга биринчилардан бўлиб имом Абу Ҳамид Газзолий жиддий тузатиш киритди. У «Кимёйи саодат» асарида «Дил - подшоҳ, ақл - вазир» деган гояни олга сурди⁴³ (Кимёйи саодат, Т.2005, с.36). Масаланинг бундай талқин этилиши сабаблари чуқур. Чунки имон дилда бўлади. Агар илм имон билан бирлашмаса, имондан жудо бўлган ақл инсонни залолатга маҳкум этиши мумкин. Яна Газзолий айтадики, «*дешнинг ич тарафидан олами малакут сори равзана - дарича, туйнук очиқдур*» (Уша китоб, с.46). Бу «равзана» очилмоғининг шарти инсон ўзини гуноҳлардан покламоғи керак. Газзолийнинг фикрига кўра, зоҳирий илмлар ақл билан эгалланади, дил равзанаси очилиши эса инсонни ботиний илмлардан боҳабар киласди. Газзолий бундай хуласа-ларга бирданига келган эмас, у ўз вактининг буюк муҳаддиси, фақиҳи, мутакаллими, файласуфи бўлган эди. Фақат умрининг охирларига бориб, тасаввуф илмлари ва амалиёти билан жиддий шуғулланишгина уни шундай хуласаларга олиб келди.

Жалолиддин Румий XIII асрда яшади (1207-1273). Бу даврда тасаввуф таълимоти энг юқори босқичга кўтарилган эди. Фаридиддин Атторнинг «Мантиқ ут-тайр», Ибн ал-Арабийнинг «Футуҳоти маккия» асарлари дунё юзини кўрган эди. Энди бемалол тасаввуф маънавиятининг мукаммал комусини яратиш мумкин эди. Мавлоно айни шу ишни қойиллатиб амалга ошириди. Демак, «Маснавий маънавий» асарида Ислом минтақа маданияти доирасида миллий маънавиятимиз тараққиётининг учинчи погонаси - Тасаввуф тариқатлари ёхуд ирфон босқичининг энг олий, энг мукаммал даражаси ўз ифодасини топгандир. Маълумки, бундан кейин, яъни XIV аср бошларидан «Мажоз тариқи» босқичига ўтилди.

«Маснавий»нинг дастлабки мисраларини ёдга келтирайлик:

Бешнав аз най чун ҳикойат микунад,

Аз жудойиҳо шекойат микунад.

К-аз найистон то маро бебуриде анд,

Аз нағирам марду зан нолиде анд.

Сийна хоҳам шарҳа-шарҳа аз фироқ,

То бегўям шарҳи дарди иштиёқ...

Най жудоликлардан шикоят қилимокда, мени яхлит қамишзордан қирқиб олиб кетдилар, энди мен айрилиқдан сийнам тилим-тилим бўлиб (ўз аслимга, «қамишзор»га қайтиш) иштиёқи дардини шарҳлаш билан овораман, демокда. Дил равзанаси олами малакутга очиқ бўлган ҳақиқий Ҳақ ошиғи ўз аслига интилмоқда, шу иштиёқ билан дили ўртамоқда. Ана шу ҳолатни нақшбандия пирлари

«Сафар дар Ватан» деб атаган, яъни ҳақиқий соликнинг руҳи баданда турган ҳолида бетиним ўз аслига интилишда эканлигини таъкидлаган эдилар.

Аллоҳ китобида «Сизлар менданисизлар ва менга қайтажаксизлар» - деган маънодаги оятлар кўп марта қайтарилади.

Ислом маънавиятининг ўзак тимсол-тушунчаси Тавҳид ҳақиқати бўлиб, миллий маънавиятимизнинг юқорида тилга олинган гурли босқичларида у турлича маъно кўламини ифодалаб келган. «Тавҳид» сўзининг луғавий маъноси «бирлик, ягоналикни тан олиш» дегани. Исломнинг моҳияти **тавҳиддадир**. Аммо бу тушунча ҳар босқичда турлича маъно эврилишларига эга бўлиб, тобора теранлашиб боради. Сунна босқичида унинг асосий маъноси Аллоҳнинг бирлиги ва борлигини, Муҳаммад (с.а.в.) унинг охирги Ҳақ пайғамбари эканлигини тан олиш, Аллоҳ ва пайғамбарига бўйинсуниш бўлса, Ислом маърифатчилигида Аллоҳ яратган Борликнинг моҳиятини ақл ва мантиқий тафаккурга, тажрибага таяниб англаб етишдир. Тасаввуф тариқатлари ёхуд ирфон босқичида эса, биринчи навбатда, Ҳақ ошиғининг Ҳақиқий Борлик (Бақо) сари чексиз иштиёқ билан интилиши ҳақида гап кетади. Суфий Ҳақ билан, Бокий борлик билан бирликка, ягоналикка интилади, унинг моҳияти, ҳаётининг мазмуни шунда. Лекин бу интилиш ниҳоясиз жараёндир, чунки инсон тирик экан «менга қайтажаксизлар» хукми фақат башоратдир, воқслик эмас. Балки шу сабабдан ҳам «Маснавий» тугалланмай колгандир. Шоир Ҳақка қайтган, китоб эса уч нуқта билан якун топган - чунки инсоният маънавий юксалишдан тўхтагани йўқ.

«Маснавий маънавий» беҳудуд маънавият уммонидир, биз ундан фақат бир маъно таъкид этилган 2 байтнинг шарҳига эътибор каратмоқчимиз. Бу байтларнинг биринчиси Жамол Камол таржимасида мақолага эпиграф килиб келтирилган. Асли форсий матнда бу байтда «нур» сўзи бевосита ишлатилмаган -

Ин бурун аз офтобу аз Суҳо
В-андарун аз аксе анворе Худо.

Аскар Маҳкам бу байт мазмунидан дили жўшиб кетиб шундай ўйирган:

Зоҳирий нур — офтобу моҳдан,
Ички нур Аллоҳдан, Аллоҳдан .

Маснавий маънавий. - Т., 1999. - С. 350.

Биз эътибор каратган иккинчи байт «Маснавий»да орадан бир байт ўтиб келади:

Боз нур нуре дилу нуре Худост,
К-ў зе нуре ақлу ҳис поку жудост.
(Нур — дининг нуридир, нури Худо,
У ақл, ҳис нуридин покдир, жудо).

Аскар Маҳкам нашр эттирган китобда яна байтнинг насрый баёни ҳам берилади: «Нур кўнгил нуридир. У аслида Худонинг нури. Бу нур ақл ва ҳисдан покдир».¹ Демак, шоир таъбирича, дилдаги нур Аллоҳ нурларининг аксланишидан туғилади («аз акси анвори Худо») ва у инсон вужудидаги моддий аъзолар функцияси сифатида намоён бўлувчи ақл ва ҳис-туйғуларнинг ҳосиласи эмасдир. Бу ўриндаги «илоҳий нур» рамз бўлиб, уни «файзи илоҳий» деб ҳам атайдилар.

Ғаззолий инсон дилидан «олами малакут»га «равзана», яъни дарича, туйнук очилиши мумкин деганида, бу қандай юз беришини аниқ изоҳламаган, фақат гуноҳлардан покланиши ҳақида гапирган. Румий эса ана шу гуноҳлардан покланган инсон қалби Аллоҳ нурини ўзида акс эттириши ҳақида бизга хабар бермокда. Аллоҳнинг раҳмати бутун оламга ёғилади. Аммо уни ўзида акслантира олиш учун инсон ўз кўнглини поклаши керак. Гап ана шунда.Faқат пок кўнгилгина ҳудди соғ кўзгу сингари Ҳақ нурини ўзида акслантира олади. Ғаззолий айтган «ботин илми» асосида ҳам айни шу ҳодиса яширингандир. Лекин бу ҳолатни ундан маҳрум инсонлар (кўнгил кўзгусини чирк босган, Аллоҳ берган пўлат кўзгуга сайқал беришини билмай ёки хоҳламай, уни занглатиб юборган зотлар) бу баҳтга муяссар бўлмайдилар, «ботин илми» уларга бегона, уларга Ҳазрати Хизр дуч келса ҳам «Ҳа, битта паҳмоқсоқол тиламчи чолдир-да» деб бепарво ўтиб кета берадилар. Шундай аҳволга тушишдан Аллоҳ ўзи сакласин.

Кўнгил кўзгусидаги зангни қандай восита билан кетказилади? Бу саволга Алишер Навоий аниқ жавоб берган:

«Гайр нақшидин кўнгил жомида бўлса занги зам,
Йўқдур, эй соқий, майи ваҳдат масаллик замзудо».

Яна гап «майи ваҳдат» (ягоналик майи)га келиб тўхтаяпти.

«Най» ва «найистон» (қамишзор) нисбатини тасаввуфий маънодан «мажоз тариқи» босқичига олиб ўтсан, энди «бани башар» (Одам ато авлодлари) ва якка инсон нисбати ҳосил бўлади. Саъдий айтади: «Бани одам аъзои ийек-дигаранд». Яъни, Одам авлоди барчаси бир-бирига нисбатда ҳудди бир тананинг аъзолари каби боғликдир, бармогингни тишласанг, бутун баданинг зиркирайди. Демак, кимки ўзини ўзга инсонлардан жудоликда ҳис қилса, ўзгаларни бегона деб тасаввур қилса, унинг жони азобда қолади, бу

дунёда яшashi жуда қийин бўлиб кетади. Мана шу мутлақ ҳакиқатни тушунсак ва унга риоя қилишга интилсак, шундагина маънавиятли бўламиз, қалбимиз Ҳак нурини акс эттира бошлайди. Қолган гаплар бекор.

Яна Аллоҳ оятларини эслаб, гапимизни тугаллаймиз:

«Сумма кана мин аллазина аману ва таваасу бис-сабр ва таваасу бил-марҳама. Улааика асҳааб ул-маймана» («Балад» сураси, 17-18 оятлар) Абдулазиз Мансур таржимасида шундай берилади:

«17. Сўнгра у (мазкур инсон) имон келтирган ва бир-бирларини сабр қилишга тавсия этган, бир-бирларини (бандаларга) марҳаматли бўлишга ундан зотлардан бўлди. 18. Ана ўша (фазилатларга эга бўлган зотлар) ўнг томон эгаларидир» («Ўнг томон эгалари» - «жаннатий инсонлар» деб тафсир қилинади).

Парвардигор ўзи яратган бандаларининг олдига қаттиқ талаф қўяётгани йўқ, чунки уларнинг ожизликларини яхши билади, шунинг учун аяди. «Сабрли бўлинг, марҳаматли бўлинг» дейилаётгани йўқ, “бир-бирингизни сабрли бўлишга ва марҳаматли (раҳм-шафқатли) бўлишга ташвиқ қилин”, дейилмокда. Шунга риоя қилсангиз, демак, маънавиятсиз эмассиз. Расулиллоҳ(сав) айтадилар: «... то бир-бирингизга меҳр қўймас экансиз, қалбингизга имон кирмайди».

Иловалар:

1. ИСЛОМ ОЛАМИДАГИ АСОСИЙ ТАСАВВУФ ТАРИҚАТЛАРИ

Асосий тариқатлар	Асосчилари	Келиб чикиш макони ва тарқалиш доираси
Бадави я	Ахмад ал -Бадавий (1199-1276),	Шимолий Африка
Дасуки я	Иброҳим ад-Дасукий (1246-1288),	Шимолий Африка
Рифоия	Ахмад бин Али ар-Рифоий (1106-1182)	Шимолий Африка
Шозилия	Абулҳасан Али аш-Шозилий (1196-1258),	Шимолий Африка
Сухравардия	Зийауддин Абу Нажиб ас-Сухравардий - 1037-1168, Шаҳобиддин Яхҳе ас-Сухравардий - 1155-1191,	Эрон

Яссави я	Шаҳобиддин Абу Хафс Умар ас-Сухравардий - вафоти 1234),	Марказий Осиё
Нақшбандия-хожагон	Ахмад Яссавий (вафоти - 1166 йил), Абдулҳолик Фиждувоний (вафоти 1179), Баҳовуддин Нақшбанд (1318-1383)	Марказий Осиё
Қодирия	Абдулқодир бин Абу Солих Жилоний - 1077-1166),	Эрон, Марказий Осиё
Кубравия	Нажмиддин Кубро (1145-1221),	Марказий Осиё
Чиштия	Муиниддин Мухаммад Чиштий (вафоти 1236),	Хиндустон
Мавлавия	Жалолиддин Румий (1207-1273)	Туркия

2. СУФИЙЛИК ЙЎЛИНИ ИХТИЁР ЭТГАНЛАРНИНГ МАЪНАВИЙ КАМОЛОТ БОСҚИЧЛАРИ

Шариат

(Барча мусулмонлар учун умумий қонун-қоидалар)

Тариқат

(1. Тавба, 2. “Фано фи-ш-шайх” - яъни, пирга қўл бершидан “фано фи-л-лоҳ”гача)

Маърифат⁴⁴

(“фано фи-л-лоҳ”дан “бақо би-л-лоҳ”гача)

Ҳақиқат

(“бақо би-л-лоҳ” ёхуд орифлик мақоми)

⁴⁴ Бу босқич асли “маърифатуллоҳ” аталиб, “Ҳақни таниш” маъносини билдиради. Мажозий киёса пири муршид куполга, мурид лойга, “тавба” мақоми лойнинг хашақдан тозаланишига. “маърифатуллоҳ” босқичи хумдонга ўхшатилади. Бу “хумдон”нинг олови эса “ишиқ илоҳий”дир.

6-дарс. ИСЛОМ МИНТАҚА АДАБИЁТИ РИВОЖИНИНГ УЧИНЧИ ДАВРИ. “МАЖОЗ ТАРИҚИ”

1. “Ҳақиқат” ва “мажоз”

Низомий Ганжавий тасаввуф шоирлари сингари факт инсон рухиятининг ички қатламларига теран назар ташлаш билан чекланиб қолмай, ўз достонларида шахснинг Ҳақ ва жамият олдиаги масъулияти масаласига ҳам алоҳида эътибор қаратишни лозим топди, яъни, унинг асарларида ирфоний ва ижтимоий муаммолар олий бир уйғунликда ифодаланди. Айни шу уйғунлик ифодасига кейинчалик Алишер Навоий томонидан “Мажоз тариқи” деб ном берилган эди.

Аммо XIII асрда ҳануз “Ҳақиқат” ва “мажоз” тазоди кун тартибига рўйирост қўйилган эмас, Низомий асарларида “мажоз” атамаси умуман истеъмолга ҳам кирган эмас эди, шу сабабли бўлса керак, Навоий ўз назарий тадқиқотларида Низомий номини бирор гурухга мансуб этиб тилга олмайди.

Сўфийлар Ҳақнинг асл зотини Ҳақиқат ва унинг мазҳари, қиёсан айтганда, кўзгудаги аксини “мажоз” (“иносказание”, метафора), деб атайдилар. “Ҳақиқат” ва “мажоз” тазоди шундан бошланади. Шу асосда тасаввуф адабиётида “ишқи ҳақиқий” ва “ишқи мажозий” тушунчалари шаклланди.

Агар Навоий “ҳақиқат тариқининг суханвари” деб атаган Фаридидин Аттор XIII аср бошларида инсонларни “мажоз”, яъни ташки моддий дунё ҳою ҳавасларига берилиб кетишдан қайтариб, Борлиқнинг асл (азалий ва абадий) Ҳақиқати сари интилишга, ташки суратга маҳлиё бўлмай, маънога, моҳиятга эътибор беришга чакирган бўлса, шу аср охирларида келиб **Фаҳриддин Ироқий** (1207-1289), **Авҳадиддин Кирмоний** (вафоти 1298 йил) каби суфийлар ижодида муаммонинг идроки теранлашди. Ибн ал-Арабий ғоялари таъсирида “Ламаъот” асарини ёзган Ироқий “мажоз” ва “ҳақиқат” нисбатини денгиз ва тузга қиёс этади. Туз денгиз суви таркибида бўлгани учун бу сувнинг ҳар қатрасида ҳам туз таъми бордир. Шайх Авҳадиддин Кирмоний ушбу нисбатни қуйидагича талқин этади:

З -он минигарам ба ҷаими сар дар сурат,
Зеро-ки зи маънест асар дар сурат.
Ин олами суратесту мо дар суварем,

Маъни натвон дид магар дар сурат.⁴⁵

(Шу сабабдан бошдаги кўз билан суратга тикиламанки, Суратда маънонинг изи бордир.

Бу олам суратдир, биз суратлар ичидамиз,
Маънони суратдан ташқарида кўриш мумкин эмас.)

Демак, Инсон руҳида Борлик ҳақиқати билан уйғунлик хосил бўлиши учун, биринчи навбатда, ўзга инсонлар билан ўзаро уйғунликка интилиш, улар дилидан Борлик ҳақиқатини қидириши лозим, бошқа йўл билан бу мақсадга эришиб бўлмайди. Мана шайхнинг холосаси. Аслида бу холоса Ирфоннинг ниҳоясиdir.

XIII аср охири - XIV аср бошларида Амир Хусрав Дехлавий (1253-1325) Низомий достонларида биринчи бўлиб жавоб ёзди ва бу асарда “ишқи мажозий”ни куйлашни ўзига мақсад қилиб кўйғанларигини очиқ намойиш қилди. Масалан, у “Ширин ва Хусрав” достонининг кириш бобларида ёзади:

*Фидойи ишқ шав, гар худ мажозист,
Ки давлатро дар-у пўшида розист,*

*Ҳақиқат дар мажоз инак падид аст,
Ки фатҳи он ҳазина з-ин калидаст.¹*

(Ўзингни ишқка бахш эт, агар у мажозий бўлса ҳам,
Чунки унда саодат сирлари яшириндир.

*Ҳақиқат мажозда шундай ўзини намоён этадики,
Ул ҳазинани кўлга киритмоқ имкони ушбу*

калит орқали бўлади.)

Амир Хусрав “Хамса”си шу даражада шуҳрат қозондики, ундан кейин ислом миңтақа шеъриятида “мажозий ишқ”ни куйлаш ва “Хамса” достонларида татаббу бағишлиш кенг кўламли анъанага айланди. XIV- XV асрлар минтақа маънавияти “Хамса” анъанаси таъсирида ривож олди, шоирнинг салоҳияти ва иқтидори ҳеч бўлмагандан “Хамса”нинг бир достонига муносиб жавоб ёза билиш билан ўлчанадиган бўлди⁴⁶. Бу жаҳон маънавияти тарихида бетакорор ҳодиса эди.

Ислом миңтақа адабиёти ривожидаги учинчи давр XIV-XV асрларни ўз ичига олиб, биз Алишер Навоийнинг бу ҳақдаги назарий мулоҳазаларига таянган ҳолда бу даврни “Мажоз тариқи” деб атадик. Навоий бу йўналишдаги улуг шоирлардан биринчи навбатда

⁴⁵ Алишер Навоий. Асарлар. 15-жилд. Т., 1968, с.166

⁴⁶ F. Алиевнинг “Темы и сюжеты Низами в литературах народов Востока» (М. 1985) китобида XIV- XV асрларда яшаб, форсий ва туркий тилларда Низомий ва Дехлавий достонларида татаббу бағишилаган 50га яқин шоир ҳақида маълумот берилган.

Амир Хусрав Дехлавий ва **Хофиз Шерозийларни** тилга олади. Улардан кейин **Дехлавий** изидан бориб ба ҳоли құдрат “хамсачилик” анъанасини давом эттирган **Хожуи Кирмоний**, **Салмон Соважий** ва **Котибийларни**, ғазалнависликда **Хожа Ҳофиздан** улту олиб “**мажоз тариқи** адоси алар назмiga голиб ва алар бу шевага күпроқ рогиб” бўлган” **Камол Ҳўжандий**, **Носир Бухорий**, **Шоҳий Сабзаворий** каби XIV-XV асрларда яшаб ўтган қатор машҳур форсийзабон шоирларни санаб ўтади. Навоий бошка асарида туркигўй шоирлардан Мавлоно Лутфийни ҳам “**мажоз тариқи**”га мансуб деб эътироф этади.

Алишер Навоий ўз ижодида **Амир Хусрав** ва **Ҳофизлар** изидан бориб, бутун умр асосан “**ишқи мажозий**”ни күйлади. Аммо “**мажоз ишқи**”ни инсонларнинг бир-бирига муҳаббати деб тушунилса, вокеликка бу масалани татбиқ этганда бир мураккаблик вужудга келарди. Яъни инсоний муҳаббат ҳаётда доимо бегараз бўлавермаслиги маълум бўлиб, бу энди ошиқнинг маънавий савиаси билан боғлиқ эди. Навоий ўзининг якуний асари “**Махбуб ул-кулуб**” рисоласининг иккинчи кисмидаги “**Ишқ зикрида**” атамиши 10-бобида бу туйгуни - **авом ишқи** (яъни, ўз шахвоний нафсини енгиб ўтмаган, маънавий баркамоллик касб этмаган оддий одамлар ишқи)⁴⁷ ҳавос ишқи (яъни, ўз нафсини енгиб ўтиб маънавий баркамолликка эришган ориф инсонларнинг пок ишқи) ва **сiddиқлар ишқи** (авлиёуллоҳ суфийлар ишқи) сифатида уч кисмга ажратиш билан ушбу муаммони мукаммал ҳал қилиб берди. Навоий ҳавос ишқи, яъни **пок инсоний ишқи** ошиқ учун ўзликни англаш йўли, “**Ҳақиқат асрори**” ганжинасининг қалити деб билади. “Лайли ва Мажнун” достонининг хотима бобида⁴⁸ шоир муҳаббатга **ғаройиб кимиё**, яъни мисни олтинга айлантира олувчи **сехрли куч**, инсонга **Борлик сирларини ошкор қилувчи кўзгу**, деб таъриф беради. У “**ишқ**” ходисасига, биринчи навбатда, **ижтимоий-ахлоқий** муносабатлар нуқтаи назаридан қарайди, шу асосда “**мажозий ишқ**”ни воқеъ ҳаётдаги **инсонлар аро муоммалада** биринчи ўринга чиқаради, ўзак **моҳиятга** айлантиради. Шу билан Фарҳод ва Ширин, Лайли ва Мажнун каби бошдан-оёқ пок туйгуларга йўғрилган “**алоҳида фазилат әгаларига хос ишқ**”нинг кўпчилик йигит-қизлар орасидаги оддий “**ошиқ-маъшуқ**”ликдан ҳам, тасаввуф аҳли “**ишқи ҳақиқий**” деб атаган ирфоний интилишларидан ҳам бутунлай фарқ қилувчи **мумтоз бир туйғу**, алоҳида ҳолат эканлигини маҳсус таъкид этишга

эришди. Бу ходисанинг моҳияти шунда эдик, унда инсоннинг Олий ҳақиқатга, Ҳакка, Борлиқнинг моҳиятига муносабати унинг ўзга инсонларга, атроф-воқелик, мавжуд жамииятга муносабати билан уйғунлик ҳосил қиласади.

З-жадвал. ИСЛОМ МИНТАҚА МАДАНИЯТИ ДАВРИДА МУМТОЗ АДАБИЁТНИНГ РИВОЖИ

Тарихий давр	Адабиётниң ривожланиш даврлари	Ҳар бир давр адабиётининг етакчи мавзу тамоиллари	Давр адабиётида ишқ мавзусининг талқини
VIII-IX Асрлар	Минтақада араб тилидаги адабиёт-нинг ҳукмронлиги	Мадҳиявий қасидалар, ишқий ғазаллар, ҳамриёт, зуҳдиёт, ҳажв	Дунёвий ишқ
IX аср охири – XI аср	Форс ва туркий тилларда дунёвий адабиётнинг шаклланиши ва гуллаб яшнаши	Мадҳиявий қасидалар, ишқий ғазаллар, ҳажв, тарихий ва ишқий достонлар	Дунёвий ишқ
XII-XIII Асрлар	Минтақада Фалсафий-ирфоний адабиётнинг гуллаб-яшнаши	Фалсафий қасидалар, ишқий-ирфоний ғазаллар, ирфоний достон ва маснавийлар	Ирфоний (илоҳий) ишқ (“ишқи ҳақиқий”)
XIV-XV Асрлар	Форс ва туркий тиллардаги “мажоз тариқи” адабиётининг гуллаб-яшнаши	Турли жанрдаги ишқий-ирфоний ва ижтимоий мазмундаги шеърлар, Мажозий ишқни куйловчи достонлар (хамсачилик анъаналари	Мажозий ишқ (“ҳавос ишқи”)

⁴⁷ Алишер Навоий. **Махбуб ул-кулуб**, Т., 1983, с.51-52

⁴⁸ Алишер Навоий. **Хамса**. Т., 1960, с.447

Шарқ мумтоз адабиёти ривожида **мажоз** атамасининг турли маънолардаги талқинини учратамиз. Жумладан, “**мажоз**” усули “**дунёвий адабиёт**” вакиллари учун воқеликдаги бирор оддий ҳодисани бадиийлаштириб **тасвирлаш воситаси** сифатида кўлланилган бўлса (масалан, Рудакийнинг “Модари май” касидаси, ёки Манучехрйнинг шу мавзудаги мусаммати), тасаввуф шоирлари (Масалан, Аттор ва Жомий достонларида) ундан ирфоний гояларнинг аллегорик ифодаси сифатида фойдаландилар. “**Мажоз тарики**” босқичида энди бу шунчаки бадиий тасвир воситаси эмас, балки **Борлик ҳақиқатини англаб етиш ва англатиш воситасига** яланланди.

Навоий охирги достони «Лисон ут-тайр»да Симурғ тимсоли орқали ўзининг асрий орзусини, улуг ва қимматли **ижтимоий гояни** ифодалади. Унинг талқинидаги Симурғ - камолотнинг олий босқичи -Тавҳид босқичига кўтарилиб етган ўттиз қуш (“си мурғ”)нинг бирлиги - маънавий ягоналиқ ҳосил қила билган ўйғун инсонлар жамоаси, яхлит инсоният. Ушбу уйғунликка эришувнинг ягона йўли эса инсонларнинг бир-бирига Ҳақ ризолиги йўлидаги пок ва самимий меҳридир.

Шундай қилиб, “**Мажоз тарики**” босқичи ислом минтақа маънавияти такомилининг энг олий погонаси, **Тавҳид таълимотининг энг мукаммал талқини** бўлди. Ушбу моддий борлиқни тадқиқ этиш, табиатни тушуниш, инсон қалбига кулок тутиш, самимий ва беғараз меҳр билан ўзгалар қалбига йўл топиш орқали Ҳақ асрорини, Тавҳид моҳиятини идрок этиш - “**Мажоз тарики**”нинг буюк аждодларимиз Хусрав Дехлавий ва Баҳоваддин Нақшбанд, Ҳофиз Шерозий ва Лутфийлардан мерос бўлиб, Алишер Навоий ижодида ўзининг энг мукаммал ифодасини топган ўзига хос дунёкарап, тафаккур тарзининг моҳияти, асл ўзагидир. Бу босқич ягона ислом минтақа маънавияти такомилининг қонуний якуни бўлиб, туркий тилда, ўзбек мумтоз адабиётининг бобоколони ижодида авж нуктага эришиди. Бу дунёкарапни бутун ички мураккаблиги, кўлами ва теранлиги билан ўша давр шароитида факат **бадиий адабиётда**, бадиий тимсоллар тили билангина ифодалаш мумкин эди. Зоро, “**мажоз**” тушунчаси ўзи бадиий адабиёт тилининг асосий хусусиятига оидdir.

2. Амир Хусрав Дехлавий

Куз. Боғларга ҳазонрезги шамоли ғорат солмокда. Бинафша ғамдан кўк либос кийиб сўфилардек саждага бош қўйган, Атиргул лиbosлари чок-чок, баҳор айёмида оловдек кўзни яшнатган лолазорлар гўё ўз алансида куйиб жизғанак бўлгандек. Садбарг дафтарининг вараклари пора-пора бўлиб, ерга сочишган, сарв соясидан нишон ҳам йўқ. Боғдаги барча гулу дараҳтлар изғирин шамолида яланғоч дийдирашиди.

Наргиз бу ҳолни кўриб кўздан айрилди, энди унга тикан— асо, шамол— етакчи. Сабзалар устини тупроқ босган, ёмғирдан тўлиқкан гул кўвачалари ерга тушиб чилпарчин бўлмокда, мажнунтоллар новдаларини чайқаб гирия қиласидар, бундан чумчук болалари озор чекади. Гуллар нозик тани — яланғоч, бу шармандаликтан булбуллар боши ҳам, тўтилар— гунг.

*Богни хароб этди бойўғли бутун,
Укки бўлиб унга шерик кун-бакун.
Пола шукуҳин йўқотиб қир-адир,
Каклик урнб тошга тўшин, хунбазир.
Тупроқ аро қолди ушоқ гунчалар,
Ҳасратидан нола этур навдалар...*

Бу мунгли манзара оддий бир куз фаслининг тасвири. Шоир қайғусининг боиси ийма? Амир Хусрав Дехлавийнинг илк йирик достони «Кирон ус-саъдайн» («Икки саодатли юлдузнинг учрашуви»)дан олинган бу парча асл матнда 50 байтдан ортиқ ҳажмдаги алоҳида васф бўлиб, Ҳинд юртига навбатдаги мўғуллар ҳамласи тасвир этилган бобнинг дебочасидир. Дарҳақиқат, XIII аср бошларидан Ўрта Осиёга ёпирилган мўгул балоси маҳаллий ҳалқларнинг юксалиб келаётган маданияти, осойишта турмушига ғорат солди. Шумқадам кўшин обод ўлкаларни вайронага айлантириди, гулдек киз-жуонлар номусини топтади, бегуноҳ гўдаклар танаси тупроққа қорилиб, мардлар боши ҳам, дийдалари гирён.

Илм ва санъат аҳллари, аҳолининг катта-катта катламлари ўз юртларини тарқ этиб, узок-узоқларга бош олиб кетдилар. Аҳмад Яссавий, Юсуф Хос Ҳожиб, Махмуд Қошгариylар тимсолида юксалиб келаётган туркий тилдаги адабиёт янга оғир зарбага учради. Она юртдан айру тушган истеъдод эгалари янга форс тили паноҳига бош эгдилар.

Ушбу даврда маданият марказлари Шимолий Ҳиндистон ва салжуқлар Туркияси бўлиб қолди. Агар 12 ёшли Жалолиддин (Румий)

отаси билан Балхни ташлаб, Кўняга отланган бўлса, бўлгуси шоир Амир Хусравнинг отаси Сайфуддин Маҳмуд ўз элати билан ватани Шаҳрисабзни ташлаб, Ҳиндистон сари юзланди. У туркий сулола бўлмиш Дехли сultonлари кўшинига хизматга кирди, ҳинд мусулмон аёнларидан бирининг қизига уйланди ва уч ўғил кўрди. Ўғилларининг кенжаси 1253 йилда Дехли яқинидаги Мўминпур (Патьёли) қалъасида дунё юзини кўрган Яминуддин Хусрав эди.

Мўгул истилочилари Ҳиндистонни ҳам тинч қўйганлари йўқ. Бўлгуси шоир 8 ёшга кириб-кирмай, отаси Амир Сайфуддин Маҳмуд босқинчиларнинг навбатдаги ҳамласини даф этар чогида ҳалок бўлди. Ёш Хусрав бобоси Имодулмулк ва онаси Давлатноз кўлида тарбия топди. У ўша давр илм-фанининг турли соҳалари бўйича кенг ва чукур билим олди, гўдаклик чогидан шеъриятга астойдил ихлос кўйди. Амир Хусрав турк, ҳинд, араб ва форс тилиларини мукаммал биларди. У анъанага биноан асосан форс тилида ижод килган бўлса-да, ҳинд, араб тилиларида ҳам шеърлар ёзганлиги маълум. Турк, ҳинд, араб тил унсурларидан унумли фойдаланиб, теран сўз ўйинлари, ёрқин бадиий тимсоллар яратди, шири шакар ғазаллар битди.

Албатта, шоир ватаним деб Ҳинд диёрини атади, Ҳиндистон мадҳида ажо-йиб васфлар, самимий сатрлар яратди. Аммо ўзининг турк элидан эканини ҳам бир лаҳза унгтади, турк сultonлари ҳинд ҳалқига, ўз ҳалқига ситам ўтказган пайтларида, шоир ўз-ўзига мурожаат қилиб: «Эй, Хусрав, сен вафопеша турк бўл!», деб ҳайкирди. Шоирнинг пири Низомиддин Авлиё ҳам унга ҳамиша «Эй, турк» деб мурожаат циларди. Хусрав мактаб ёшиданоқ «Сultonний» тахаллуси билан шеърлар ёза бошлади ва 18 ёшида биринчи шеърлар девони «Тухфат ус-сигар» («Ёшлик тухфаси»)ни якунлади. Шоир ижодининг шаклланиш даврида нисбатан мақбул шароитга тушиб колди. Давр сultonни Фиёсиддин Балбанинг катта ўғли, Мултон вилоятининг ҳокими Муҳаммадқоон ниҳоятда санъатни, шеъриятни қадрловчи шаҳзода бўлиб, саройига Хусрав Дехлавий, Ҳасан Дехлавий, Ҳожа Амидуддин Си-мавий каби даврнинг сара шоирларини тўплаган, тез-тез шеърият анжуманлари ташкил этиб, ўзи ҳам шеър машқ қиларди. Бирок бундай мароқли сұхбатлар узоқ давом этмади. Мўгуллар билан навбатдаги жангда Муҳаммадқоон ҳалок бўлди, Хусрав ҳам мўғуллар кўлига асир тушиб, оғир азоблардан икки йил деганда зўрга кутулди.

Бу даврга келиб иккинчи девон «Васат ул-хаёт» (Хаёт ўртаси) ҳам ниҳоясига етган ва шоирнинг оташнафас ғазаллари эл орасида

кенг шуҳрат қозона бошлаган эди. 1289 йилда Дехли ҳукмдори Муизуддин Кайқубод таклифига биноан Хусрав илк йирик эпик асари — 3944 байти «Кирон ус-саъдайн» («Икки саодатли юлдузнинг учрашуви») достонини ёзди. Достон мавзуи тарихий воқеа — сulton Муизуддин Кайқубоднинг отаси — Бангола ҳокими Носириддин Бугрохон билан низо ва келишувлари ҳакида эди. Достоннинг ёзилиши шоир ижодида янги давр бошланганини — унинг ғазал, қасида, рубоий, мўъжаз маснавийлар яратишдан йирик ҳикоябанд манзумалар битишига ўтганлигини билдирад эди. Биринчи достон ажойиб шаклий тузилишга эга: маснавийда битилган боблар алоҳида вазнданғи ғазаллар билан тугалланади, сарлавҳалар ҳам шеърий. Асарнинг умумий руҳидан некбин жўшқинлик уфуриб туради. Унда низо ва жангу жадалдан кўра сулҳ ва инсонлар аро меҳр-муҳаббат туйгулари устун турмоги мақбул экани тарихий воқеалар асосида таъкид этилади, Ҳиндистон табиати, одамлари, обу-ҳавоси васф этилади.

Кейинги Дехли сultonни — Жалолиддин Ферўзшоҳ даврида (1290—1296) шоирга алоҳида иззат-икром белгиси сифатида «камир» унвони берилди. Бу пайтга келиб учинчи девон — «Ғуррат-ул-камол» («Камолот ғурури») ҳам якунланган эди, Девоннинг дебочасида шоир шеъриятга бўлган назарий қарашларини баён қилган, бадиий ижоддаги мустакил ўйналишига таъриф берган. Унинг эътиқодича, шоир на воиз (насиҳатгўй), на суфий сингари ёзмаслиги керак, балки бадиий ижод конунларига риоя этиши лозим.

Амир Хусрав Дехлавий умри давомида 5 девон, 9 йирик достон, бир қатор йирик тарихий ва назарий асарлар яратди. Беш девонга унинг 2 мингдан зиёд ғазали, 273 қасида, 1200 дан ортиқ рубоий, 500 га яқин қитъя ва бошқа жанрлардаги бир қанча асарлари жамланган. Шоир ўзини ғазалда Саъдий, қасидада Саноий, Анварий, Ҳоқонийларга шогирд деб билса, воқебанд достонлар яратища асосан Низомийга эргашади.

Амир Хусрав илк бор Низомий «панжасига панжа уриб», унга жавобан «Хамса» яратган забардаст мутафаккир санъаткор эди. Ундан кейин жудд кўпчилик бу ўйналишда қалам тебратди. Аммо буюк Алишердан ўзга мард жаҳон адабиёти хазинасидан мустаҳкам ўрин ола билмади, Навоий эса, маълум-ки, ҳамсачиликда шайх Низомий ва Амир Хусрав Дехлавийларни ўзига устоз, салаф санаиди,

Амир Хусрав «Хамса»си сulton Алоуддин Хилжи ҳукмронлигининг (1296—1316) дастлабки чорагида 1298—1302 йилларда ёзиб тугалланди. Дехлавий «Хамса»сининг биринчи достони

«Матла ул-анвор» («Ёриткичларнинг уфқдан кўтарилиши») деб мажозий номланган. Яни бу асар кейинги достонларда муайян бадиий тимсоллар орқали кенг тасвир этилган мавзуларга умумий муқаддима вазифасини бажармоғи кўзда тутилган эди. У Низомий достони каби кириш кисм, 20 мақолат ва хотима бобларидан иборат бўлиб, ташки тасвир ва мавзулар танланишида тасаввуф руҳи кучли, аммо мазмунан ўша давр учун долзарб бўлган ижтимоий-ахлоқий масалаларга кўпроқ эътиборни қаратган эди. Ҳикоятларда давр шоҳларининг бегуноҳ қурбонига айланган гўдаклар, пок ахлоқли аёлларнинг фожеий тақдири ҳаяжонли мисраларда тасвир этилади, Ҳалқа зулм, «мусулмонлаштириш» байроғи остида олиб борилган талончилик урушлари ҳақидаги мақолатлар кучли норозилик руҳи билан суғорилган. Амир Хусрав ҳирс ва қаноат, ишқ ва зулмни бирбирига қарши қўяди, қаноат тушунчасини ўз ҳалол меҳнати билан бир бурда нон топиб ейиш маъносида талқин қиласи, олтин-кумуш, дур ва ёқутларни инсон учун нозарур, офтоб ва замин, олов ва покиза ҳавони энг улуғ ва қимматли бойлик эканлигини таъкидлайди.

«Хамса»нинг иккинчи достони «Ширин ва Хусрав»да тож ва меҳр орасидаги зиддият асосий ички конфликт манбаи сифатида юзага чиқкан. Шоҳ Хусрав ишқ йўлида, ҳалол меҳнат йўлида тахту тож баҳридан кечиб кўйган тошкесар шахзода Фарҳодга қарама-қарши турди. «Тожу тахтга қариндошлик ярашмас, бўри галасига кўйлик ярашмас» дейди шоир аччик заҳарханда билан.

«Мажнун ва Лайли» достони кўзда ёш ва дилда нур билан ўқиладиган ҳақиқий муҳаббатнома. Амир Хусрав бу достонининг Низомий руҳига ниҳоятда якин эканини, олдинги достонларидан услуги буткул фарқ қилишини ўзи ҳам таъкидлаб ўтади. У севишганлар фожиасида у ёки бу конкрет шахсларни (масалан Лайлининг отасини) эмас, мавжуд воқеъликни, ижтимоий муҳитни айблайди.

«Искандар кўзгуси» — бу Низомийдаги сингари одил шоҳ гояси ифодаси эмас, балки том маънода шоҳлар юзига тутилган кўзгудир. Адабий анъанада, дарҳақиқат, Искандар Зулқарнайн образи одил шоҳ тимсоли эди, аммо энг одил шоҳ ҳам Амир Хусравни кониқтирумайди. Искандарнинг Чин ҳоқони билан жанг, айниқса, ибратли тасвирланган. Чин ҳоқони ўз юрти ҳимоячиси, Искандар қўшини эса очиқдан-очиқ тажовузкор, талончи экани кўриниб турди. Амир Хусрав бадиий мушоҳадаси теранлиги шундаки, одил шоҳ бўлишни истаган хукмдор ҳам мавжуд ижтимоий мавқеидан

келиб чиқиб, адолатсизликка йўл кўйиши табиий эканлигини маълум даражада англай олган ва буни «Искандар кўзгуси»да акс эттирган.

«Ҳашт беҳишт»ни Амир Хусрав «Хамса»нинг бошқа достонларига қараганда узоқроқ тайёргарлик билан ёзди, уни бешинчи яқунловчи достон сифатида берди. Бунинг сабаблари асар мундарижаси билан танишганда маълум бўлади. Достон 8 қиссадан иборат бўлиб, «Бах-ром Гўр ва Дилором» қиссаси қолипловчи вазифасини бажарган. Қолган қиссалар, деярли ҳаммаси янги сюжетлар асосида, ҳинд адабий анъаналари руҳида қурилган, саргузашт ва ғаройиботларга бой. Уларнинг энг асосий хусусияти — оддий меҳнаткаш ҳалқ, косиблар, дурадгорлар, боғонларнинг ёрқин қиёфалари яратилганлиги, уларнинг садоқатли дўстлиги, улдабуронлиги сарой аҳли фиски-фасодликларига, фахш ва фитнакорликларига қарши кўйилганлигидадир. Бу ҳақиқий ҳаётchan руҳдаги асар ўзбек ҳалки томонидан доим севиб ўқилган, Оғаҳий эса уни насрда ўзбек тилига ўтирган.

Шоирнинг шоҳ асари «Дўвалрони ва Хизрхон» 1315—1316 ийлларда ёзилди. Асарнинг бош мавзуи муҳаббатdir. Унда тарихий шахслар — Султон Алоуддиннинг катта ўғли Хизрхон ва Гужарот рожаси Карннинг қизи Девалдиннинг бир-бирига муҳаббати зҳтиросли ва кўта-ринки мисраларда тасвир этилади. Хизрхон — мусулмон шаҳзодаси, Девалди — асира ҳинд маликасидир. Улар болалиқдан бирга ўсиб, бир-бирига меҳр қўйганлар, аммо бўй етгач, уларни ажратишиади, Хизрхонни мажбуран тогасининг қизига уйлантиришиади. Кўп қийинчиликларни енгиг севишганлар бир-бирлари висолига этишиади, бироқ яна сарой фитналари, тошбағир султон ва унинг фирибгар аёнлари ошиқ Хизрхон бошига кулфатлар келтирадилар.

Эътиборга сазовор жиҳати шундаки, Амир Хусрав достонга тахтдан маҳрум этилган Хизрхонни қаҳрамон қилиб олади, мавжуд хукмдорлар — Султон Алоуддин ва Кутбиддин Муборакшоҳларнинг хатти-ҳаракатини эса очиқдан-очиқ қоралайди. Ваҳоланки, биз ҳануз уни ушбу султонларнинг сарой шоирни деб хисоблаймиз, Бу достоннинг кириш кисмida «Подшоҳга насиҳат» деб номланган алоҳида боб бўлиб, замонасида «Искандари соний» номи билан машҳур бўлган Султон Алоуддинга шоир шундай ўғит беради:

Агар истар эсанг чин подшолик,
Кўнгиллар куйида этгил гадолик.
Яна уни огоҳлантиради:
Заифлар қудрати, бил, онча бўлгай,
Ки, золимлар қўлин чаппа қайиргай.

Шоир қасидалари ва қытъаларидан инсонларни маънавий камолотга ундайди, мол-дунё, тож-тахт, айш-ишратга бўлган хирсни қаттиқ қоралайди, ижтимоий воқеликка танқидий муносабатда бўлади. Унинг «*кўси шоҳ холи-ю, бонги ғулгулаши дарди сараст*» (подшоҳ ноғорасининг ичи бўшу, шовқин-сурони бош оғриғидир) деб бошланувчи «Дарёйи аброр» (Тақводорлар уммони) қасидаси, айниқса машҳур бўлиб, унга Жомий «Лужжат ул-асрор» (Сирлар теранлиги) ва Навоий «Тухфат ул-афкор» (Фикрлар тухфаси) қасидалари билан жавоб-татаббу битганлар.

Шоир ижод йўлининг охирги чорагида «Нуҳ сипехр» (Тўққиз осмон қабатлари) ва «Тўғлукнома» номли иирик достонлар яратди. Уларнинг биринчиси номидан кўриниб тургандек, 9 алоҳида кисмдан иборат бўлиб, ҳар бири бир сайдёра, куёш ёки ойга багишлиланган. Уларнинг мундарижаси турлича: давр тарихий воқеалари, ўқ-ёй ва тўпчавгон орасидаги мажозий мунозаралар, Ҳинд юрти табиати, ҳайвонот ва ўсимликлар олами, урф-одатлари васфи, турли тилларнинг қиёсий таҳлили, жумладан, санскрит, юонон, араб, форс, турк тиллари мукаммал таъриф этилади ва сўнгги уч тил (араб, форс, турк) ўша даврда жаҳон тиллари мавкеида бўлгани кайд килинади. Драматик фожиа руҳида бошланувчи шоирнинг охирги достони - сulton Муборакшоҳни ўлдириб, тахтни эгаллаб олган муноғиқ вазир Хусравхон фитнаси ва унга қарши курашга қўзғалган турк лашкарбошиларидан Фози Малик жасорати тасвирига багишлиланган. Фози Маликнинг Фиёсиддин Туғлук номи билан тахтга чиқиши туфайли асар «Тўғлукнома» деб аталган.

Амир Хусрав Султон Алоуддиннинг ҳарбий юришлари ҳакида «Хазойинул футух» («Ғалабалар ганжинаси») тарихий мансурасини, бадиий санъатлар, фармон ва мактублар битиш қоидалари ҳақида 5 рисоладан иборат «Эъжози Хусравий» («Хусрав мўъжизалари») мажмуасини ва яна бир қатор бошқа асарлар яратди, уларнинг баъзиларидан факат номларигина маълум, баъзиларининг хали қатъян шоир қаламига мансуб эканлиги аниқланган эмас.

Шоир ижоди замонасидаёқ Зиёуддин Бараний, Амир Хўрд каби тарихчилар дикқатини ўзига тортган эди. Аммо XV аср Ҳирот адабий мактабида Низомий билан баробар Дехлавийнинг таъсири ниҳоятда кучли бўлди. Навоий деярли ҳар бир асарида уни хурмат билан тилга олади. Унинг ҳақида Европа, Эрон, Ҳиндистон олимлари ёзишган. Совет даврида эса шоир ижодини ўрганлш бўйича ўндан ортиқ илмий рисола ёзилиб, кўплаб номзодлик ва докторлик илмий даражалари ҳимоя қилинди. Булардан Е.Э.Бертельс, А.А.Стариков,

Г.Ю.Алиев, тожикистонлик М. Бақоев, озарбайжонлик Т. Мұҳаррамов ва бошқаларни эслаш мумкин. Амир Хусрав Дехлавий 1325 йилда пири вафотидан бўйича дунёдан кўз юмди, Дечли шаҳрида Шайх Низомиддин Авлиё ва унинг пойига дағн этилган Амир Хусрав мақбаралари бугунги кунда ҳам Ҳиндистон ҳалқи учун, барча ихлосмандлар учун табаррук зиёратгоҳдир.

Амир Хусрав Низомий ва Саъдийлар изидан бориб бадиий ижодда мажоз тарикига асос солувчилардан бири бўлди, бунга унинг ўзи «Ширин ва Хусрав», «Дўвалрони ва Хизрхон» асарларида ишора қилиб ўтган бўлса, кейинчалик Алишер Навоий «Маҳбуб ул-кулуб» асарида аниқ таъриф берди.

3. Жомий «Хамса» ёзганми?

Баъзи адабиётларда хамсанавис шоирлар каторида Навоийнинг пири, тасаввуф назариясини чуқур англаб этишда унга устозлик килган улуғ форс-тожик шоири Абдураҳмон Жомий номи ҳам тилга олиб ўтилади. Шу масалага бироз аниклик киритиш, баҳонада Навоий ва Жомий ижодидаги умумий ва фарқли томонларга дастлабки даражада эътибор каратиш максадида ушбу мавзуни қаламга олдик.

Устоз — шогирд муносабатлари ҳеч қачон оддий бўлмаган. Айниқса, ижод масаласида. Аҳмад Яссавий — пир, Сулаймон Бокирғоний — мурид. Фоявий йўналиш бир хил. Аммо бу икки шахс шеърият оламида ҳар бири ўз овозига эга. Абдураҳмон Жомий ва Алишер Навоийнинг бадиий олами ҳам ҳар бири — ўзга бир руҳ, ўзга бир кайфият ифодасидир.

Маълумки, Алишер Навоий «Хамса» достонларининг ҳар бирида Низомий Ганжавий ва Амир Хусрав Дехлавийлар ҳақида баҳс юритгач, Жомийга ҳам алоҳида боб багишлиайди. Аммо олдинги икки салафидан фарқли ўлароқ, Жомийнинг «Хамса» яратганилиги ҳақида аниқ маълумот бермайди.

Агар биринчи достон — «Ҳайрат ул-аброр» муқаддимасида «Маҳзан ул-асрор» ва «Матлаъ ул-анвор» билан бир қаторда «Тухфат ул-аҳрор»ни ҳам тилга олиб ўтса-да (XIII боб), «Хамса»нинг иккинчи досто-ни — «Фарҳод ва Ширин»даги Жомийга багишлиланган VII бобда уни жуда кўтаринки руҳда мадҳ этганилигига қарамай, бирор асарини аниқ тилга олмайди. «Лайли ва Мажнун» дебочасида эса:

Гар “Хамса”ни этмай(ин) мураттаб...

(яъни, «гарчи «Хамса» ёзмаган бўлсанг-да»), деб қайд этади ва «Панж ганж» ҳисобида «Силсилат уз-захаб», «Тухфат ул-аҳрор», «Субҳат ул-аброр», «Юсуф ва Зулайҳо» («Аҳсан ул-қисас») ва «Девон»ни (сўз биринчи девон — «Фотихат уш-шабоб» устида кетган бўлса керак) санаб ўтади. Демак, Навоий «Лайли ва Мажнун»ни бошлагандаги Жомий ҳали бошқа достонларини ёзиб тутгатмаган экан. «Сабъай сайёр» ибтидосида Жомийнинг «Шархи Рубоиёт», «Лавомеъ», «Лавойих», «Ашиъат ул-ламаот», «Нафаҳот ул-унс» каби бир қанча насррий асарлари ҳамда «Силсилат уз-захаб», «Тухфат ул-аҳрор», «Субҳат ул-аброр», «Ошику маъшук» («Юсуф ва Зулайҳо» достонининг яна бир номланиши) достонлари, қасидалари, ғазалиёти тилга олинади. «Хамса» хусусида сўз йўқ. Охирги — «Садди Искандарий» достони муқаддимасида (VII боб) Жомий яратган маснавийлар хусусида Навоий шундай дейди:

Бўлиб жилвагар табыи кўзгусида,
Ки сабт айлади «Хамса» ўтрусида.
Эрур андин ортуқки, ўксук эмас,
Эл андин дер ортуқки, ўксук демас.

Демак, яна Жомийнинг «Хамса» яратгани хусусида эмас, балки «Хамса ўтрусида» (яъни, унга муқобил равишда) яратган маснавийлари бештадан ошиқ, аммо кам эмас, деб таъкидлайди. «Тухфат ул-аҳрор», «Субҳат ул-аброр», «Юсуф ва Зулайҳо»га кўшимча қилиб «Лайли ва Мажнун» достони яратилгани ва «Хирадномайи Искандарий» достони эса, ёзилиш жараённида эканлигидан хабар беради.

Алишер Навоийнинг Жомий вафотидан кейин, унинг хотирасига багишилаб маҳсус ёзган «Хамсат ул-мутаҳайирин» рисоласи «Учинчи мақолат»ида улуғ шоир ва алломанинг барча асарлари бирма-бир санаб ўтилади. Унда, жумладан, шундай сатрлар битилган:

«яна: «Ҳафт авранг»ки муштамилдур етти китобға;
аввал: «Силсилат уз-захҳаб»ки, уч дафтардур;
иккинчи: «Саломон ва Абсол»;
учунчи: «Тухфат ул-аҳрор»;
тўртунчи: ««Субҳат ул-аброр»;
бешинчи: «Юсуф ва Зулайҳо»ким «Ошиқ ва маъшук»га мавсумдур; олтинчи: «Лайли ва Мажнун»;
еттингчи: «Хирадномайи Искандарий».

Шундай қилиб, Жомийнинг «Хамса» ёзганлиги хусусида Алишер Навоий аниқ гувоҳлик бермайди. Савол тугилади: нега ўзбек шоирни ўз достонлари муқаддимасида Низомий ва Амир Хусравлар каторида

Жомийга ҳам алоҳида эҳтиром кўрсатган ҳолда, уни хамсанавис сифатида тилга олмаган? Бунинг биринчи сабаби жуда оддий, яъни Жомий ўз эпик маснавийларини Навоий билан хамнафасликда, яъни олдинма-кетин(бирини - олдин, бирини — кейин) ёзиб борган. Аммо, бизнинг назаримизда, бунинг иккинчи — гоявий ва мазмуний йўналишларга оид жиҳати ҳам бор.

Жомий достонлари ичida Навоий «Хамса»си дан олдин Низомий ва Дехлавий достонларига татаббуъ ўйсинида ёзилган асар юкорида кўп эслаб ўтилган «Тухфат ул-аҳрор»дир. Нақшбандия пирлари шарафига багишиланган ушбу достон ҳам «Махзан ул-асрор» ва «Матла ул-анвор» сингари асосий қисмида 20 мақолани («маколат» эмас) ўз ичига олади.

Улардан биринчиси Оламнинг яратилиши, иккинчиси — Одамнинг яратилиши мавзуларида булиб, навбатдаги 5 мақола (3 — 7-мақолалар) бирма-бир ислом арконларига (калима шаҳодат, намоз, рўза, закот, ҳажамалларига) бағишиланган. Кейин 2 мақола хомушлик (сукут) ва тунда бедор бўлишнинг хикматлари ҳакида. Ундан кейинги мақолаларда пир-шоир жамиятдаги турли тоифа ва амал эгалари — суфийлар, уламолар, сultonлар, вазир ва дабирлар(сарай миззолари) тўғрисида ўз қарашларини баён қиласди. 15 — 16 мақолалар қарип куйилмаган кексаларга танбех, ва мағрур ёшларга насиҳат бўлиб, 17 — 18 мақолалар гўзаллар хусн-жамоли ва ишқ борасидадир. 19-мақола шоирлар тоифасига оид бўлиб, охирги мақола шоирнинг ўз фарзандига насиҳатидан иборат. Ҳар мақола сўнгидаги унинг мазмунига алоқадор бир ҳикоят келтирилган.

Кўриб турганимиздек, асар татаббуъ қоидаларига тўла мувоғик ёзилган. Шу жиҳатдан, Жомий «Хамса» туркумини бошлагандек кўринади. Аммо шунга қарамай бальзи ўзига хос принципларни ҳам кузатиш мумкин. Масалан, ислом арконлари ҳакида Низомийда алоҳида мақолат йўқ. Дехлавий достонида ушбу мавзуга биргина мақолат (4-мақолат) ажратилган. Жомий эса ўз достонида бу мавзуни анча батафсил ёритади. Албатта, Низомий ва Дехлавий достонларидаги мақолатлар мундарижаси ҳам бир-биридан сезилларли фарқ қилишини назарда тутсақ, бундай фарқланишларга алоҳида эътибор бермаслик ҳам мумкин. Аммо Жомий достончилигининг кейинги ривожи бундай принциплар бежиз эмаслигини кўрсатди. Низомий ва Дехлавий изидан бориб Навоий иккинчи достонида шоҳлик ва ошиклик нисбати мавзуини тилга олган бир пайтда, Жомий ижтимоий масалалардан бутқул четланиб, соғ тасаввуфий мавзуга юзланди. Унинг «Субҳат ул-аброр» достонини 40 икдан

(Жомий достоннинг асосий бобларини шундай атайди) иборат бўлиб, унинг 4 — 6 иқдлари «ваҳдати вужуд» таълимоти ҳакида, 7-икд тасаввуф шархида, 8 — 30 иқдлар — иродат, тавба, вараб, зухд, факр, сабр, шукр, хавфу ризо, таваккул, ризо, муҳаббат, шавқ, ғайрат, курб, ҳаё, хуррият, футувват, сидқ, ихлос, саховат(базл), қаноат, тавозу каби суфийлик мақом ва ҳолларининг тавсифига бағишиланган. Кейинги иқдлар ҳам суфийлик одблари хусусида бўлиб, фактат 33- ва 34-иқдларда Оллоҳ яратган маҳлукотларга шафқат ва муҳаббат, сultonлар ва аркони давлатга хайриҳохлик билан насиҳат мавзулари тилга олинган. Бу достон мундарижаси ўз йўналишига кўра «Тухфат ул-аҳрор» мундарижасини изчил давом эттириб, пир ва шогирд (Жомий ва Навоий) ўз достончилик анъаналарида буткул бошқа-бошқа принципларни танлаганликларига яққол гувоҳлик беради.

Навоий биринчи достонидаётк ижтимоий таҳлил йўлини танлаганлиги ундаги мақолат мавзуларидан ҳам очиқ кўриниб туради. «Ҳайрат ул-аброр»нинг биринчи мақолати «Имон ҳакида», иккичиси «Ислом ҳакида» бўлиб, учинчи мақолат ҳукмдорларнинг салбий хатти-ҳаракатларининг кескин танқидига ва тўртинчи мақолат соҳта суфийларни аёвсиз фош этишга қаратилган. Кейинги бир канча мақолатлар ислом ахлоқига оид бўлиб, унинг карам, қаноат, вафо, ишқ, ростлик, илм каби умуминсоний қоидаларига бағишиланган. Айниқса, достоннинг ўн учинчи мақолатида ўзига хос мавзу танланган бўлиб, салафлардан бирортасида бундай мавзуга алоҳида боб ажратилган эмас. «Нафърасонлар ҳакида» деб аталган ушбу мақолатда Алишер Навоий ўз ижтимоий қарашларининг бош қоидасини ифода этган:

Нафъинг агар ҳалққа бешак дурур,

Билки бу нафъ ўзунгга кўпрак дурур.

Албатта, пир ва шогирд қарашлари орасида умумий томонлар кўп. Масалан, Навоий «Ислом ҳакида» мақолатида таҳорат, намоз, рўза, ҳаж ҳакида мукаммал тўхталиб, уларнинг ҳар бирини ҳам аҳли сунна талқинида, ҳам тасаввуфий талқинда баён қиласди. Имон масаласига, юқорида эслаб ўтганимиздек, алоҳида боб ажратади.

«Махбуб ул-қулуб» рисоласининг «Назм гулистонининг хушовоз булбуллари» бобида Алишер Навоий шоирларни адабий йўналиш нуқтаи назаридан «ҳақиқат тариқи» ва «мажоз тариқи» намояндаларига ажратар экан, Жомий ҳакида гапириб уни ҳар иккى йўналишда ҳам «воғир ва шомил» деб таърифлайди. Бундай мақтов асоссиз эмас. Жомий ўз ғазалларида ҳам, достонларида ҳам фактат ишқи илоҳий («ишқи ҳақиқий»)ни куйлаш билан чекланмаган. Унинг

соғ инсоний севги («ишқи мажозий»)ни завқ-шавқ билан тараннум этган ғазаллари де-вонларида кам учрамайди. Шу билан бирга пири муршиднинг «Юсуф ва Зулайҳо»(«Ошиқ ва маъшуқ»), «Лайли ва Мажнун», «Саломон ва Абсол» достонлари бир пайтнинг ўзида ҳам мажозий ишқни, ҳам Ҳақ ишқининг сирру асрорини кашф этувчи мураккаб мазмунли асарлардир.

Аммо улар ичида Навоийнинг шу мавзудаги асаридан кейин яратилган «Лайли ва Мажнун» достонигина «Хамса» туркуми достонлари билан ҳам мавзу, ҳам ғоявий йўналиш жиҳатидан уйғунлашади. Қолган икки достоннинг сюжети ҳам, ғоялар олами ҳам буткул ўзига хос бўлиб, уларни на «Фарҳод ва Ширин», на «Сабъай сайёр» билан бевосита қиёслаб бўлмайди. Жомийнинг «Хамса» туркуми мавзуларига бевосита алоқадор бўлган учинчи достони — «Хирадномайи Искандарий»dir.

Низомий ўз даврида Искандари Мақдуний билан боғлиқ икки алоҳида достон яратган бўлиб, уларнинг биринчиси «Шарафнома»да машҳур саркарда ва ҳукмдорнинг турли мамлакатларни фатҳ этиш учун олиб борган жанг жадаллари тасвиранланган эди. Иккинчи достон — «Иқболнома» деб номланган бўлиб, унда асосан Искандарнинг буюк юон ҳакимлари билан олиб борган фалсафий сұхбатлари баён қилинган. Бу икки асар ҳар бири алоҳида анъанавий мукаддима боблар билан таъминланган ва яхлит композицион системага эга бўлиб, уларни шоир қайта ишлаб бир достон холига келтирган эмас. Демак, аслида Низомий «Хамса» (ёки «Панж ганж» — Беш хазина) ёзишни режалаштирган ва ижодий ҳаётӣ давомида б мустақил эпик асар яратган. Аммо кейинчалик

котиблар томонидан охирги икки достон «Искандарнома» унвони билан ҳеч кандай ўзгаришсиз (ҳар иккисининг алоҳида анъанавий боблари ҳам сақланган ҳолда) бирлаштирилган ва шоирнинг 30 йиллик ижодий фаолияти самаралари туркум ҳолига келтирилиб, унга «Хамса» (Бешлик) номи берилган.

Низомий вафотидан деярли бир аср ўтиб, Амир Хусрав Дехлавий Низомий туркумига жавобан «Хамса» яратганда унинг охирги икки достони мундарижасига бир достон билан жавоб берган. Бунинг учун у асар композициясини мураккаблаштириб, ҳар бир қисмда аввал бир боб — Искандар саргузаштларига оид лавҳа, кейин бир боб муаяйн ахлоқий-фалсафий мавзуда мулоҳазалар, охирида бир ҳикоят шаклида бериб борган. (Низомий достонларида эпик принцип изчил сақланган бўлиб, «Иқболнома»да ҳам Искандарнинг ҳаётӣ саргузаштлари қисман баён этилган.)

Навоий Дехлавий анъанасини ривожлантириб, 1-боб Искандар хаётидан, 2-боб муайян ахлоқий-ижтимоий мавзуда мулоҳазалар, 3-боб — ибратли ҳикоят, 4-боб Искандар ва бир донишманднинг саволжавоби шаклида 4 бобдан иборат яхлит бўйимлар тузган.

Жомий ўз асарида бу йўлдан бормаган. Аслида, «Хирадномайи Искандарий» Низомийнинг машхур фотих ҳақидаги иккинчи достони «Иқболнома»га жавобдир. Бу ҳолат достоннинг номланишидаёк ўз аксини топган. «Иқболнома»да «Хирадномайи Арасту», «Хирадномайи Афлотун», «Хирадномайи Сукрот» деб номланган алоҳида боблар мавжуд (1746 — 2077-байтлар — жами 302 байт). Жомий айни шу боб сарлаваларига татаббуъ қилиб достонига ном берган.

Пири муршид достоннинг асосий қисмини бошлагач, 6 боб (410 — 618-байтлар — жами 218 байт) ўтказиб туриб, «Хирадномайи Аристотелис»га киришади. Олдинги 6 бобнинг ҳам учтаси алоҳида ҳикоятлар бўлиб, Искандар саргузаштларига аслида бори-йўғи 136 байт (410-455, 477-529, 563-599-байтлар) ажратилган, холос. Кейинги боблар машхур (ҳақиқий ва афсонавий) юонон ҳакимлари — Афлотун, Сукрот, Букрот, Файсогурс, Искалинус, Хермес хирадномаларидан иборат бўлиб, ҳар боб охирида ибратли ҳикоятлар берилган. Ушбу 7 «Хираднома» (ҳикоятлари билан) 579 байтни (619 — 1197-байтлар) таш-кил этган. Кейинги боб — «Достони жаҳонгирийи Искандар ва иморати шаҳрҳо ва ихтирои корҳои вей бар сабили ижмол» (Искандарнинг жаҳонгирилиги, шаҳарлар куриши ва ихтиrolари) деб аталган бўлиб, жуда катта мавзуни қамраб олса-да, ҳажми жуда ихчам — 45 байтдан (1198 — 1242-байтлар) иборат. Шоирнинг ўзи ҳам буни эътироф этиб «бар сабили ижмол», яъни «қисқача санағ ўтилди», деб маҳсус изоҳ берган. Кейинги 50 байтли (1262 — 1311-байтлар) боб — «Хирадномайи Искандар» деб номланган. Қолган боблар ҳам Низомийнинг «Иқболнома»си мазмуни билан тўла ҳамоҳанг ва тўлигича уларга татаббуъ йўсинида ёзилган. Уларда Искандар билан бир қанча донишмандларнинг сұхбатлари, ибратли мисоллар, Искандар ўлими ва шу муносабат билан ҳакимларнинг таъзиялари баёнидан ташкил топган. Шоир Дехлавий ва Навоий асарларидағи мураккаб композициядан воз кечиб, ҳар боб сўнгидга бир ибратли ҳикоят келтириш билан киояланган.

Хулоса қилиб айтганда, Жомий муайян муддат «Хамса» яратиш фикрида бўлганлигидан катъи назар («Хирадномайи Искандарий» достони муқаддимасида шундай истак сезилади), достонлар туркумини шакллантиришда ҳам ўз ҳаёт йўлида танлаган

принципларига содик қолган ва «Ҳафт авранг» асарини фақат ирфоний-ахлоқий ҳамда ишқий мавзулар билан чеклаб, ижтимоий-сиёсий мавзуларга чукур кириб боришдан сакланган. Шу сабабли «Етти таҳт»нинг тўрт достони ирфоний-ахлоқий мавзулардаги «Хираднома»лар ва қолган учтаси ҳам мажозий, ҳам ирфоний руҳда талқин этилган ишқий достонлардан ташкил топган.

Низомий, Дехлавий ва Навоий яратган «Беш ҳазина» туркумлари эса, ўз замонасининг ахлоқий-ижтимоий-сиёсий муаммоларини яхлит ва муқаммал акс эттириб, чукур таҳлил қилган асарлар бўлиб, бундай ёндашув ислом маънавияти такомилида янги йўналиш, ҳақли равища айтиш мумкинки, энг олий босқични билдирар эди.

ИТУТИТОНН ЭНДОНОЧИДАШ ТАВАДДУТ ТИСМОНОТ
ИТИҲАСИ ЙОҚСАВАТ СИРДАН ВА ИКТИЛОФ ДИҶУХ ВАЛІНАТИДАСИ НАДУСИДАСИ
(ВМОНИСАД ИСНОС-СИДИДАСИ НАДУСИДАСИ)

ИДОССЕЛСИИ ИТИҲАСДАД ТАҲХУЦ ВИҶАИҲ
АБ ГАЛАЕ 02 ЖЕДИТ 2017 Т.Д ИТИҲАСИ МАҲБОБ ТИМФОФ
ПОЛ. АЗИТБИНШАҲИ-ИҲАМ ИТУТИТОНН ЯНДОНОЧИДАШ ТАВАДДУТ ТИСМОНОТ
22 МЕВИҲИ ЕДВОНСОҲИЛЛАСИДАСИ ГИСЛАНДЕ

ИДОССЕЛСИИ ИТИҲАСДАД ТАҲХУЦ ВИҶАИҲ

Техник мұхарріп:
Компьютер таҳрири:

*М.М. ЗАРИФОВ
Д.У. АРИФЖАНОВА*

Мазкур ўкув кўлланма Тошкент давлат шарқшунослик институти
Ўкув-услубий кенгашида кўриб чиқилган ва нашрга тавсия қилинган
(23 декабрь 2011 йилдаги 3-сонли баённома)

Нашрға рұхсат берилгандың 23.12.2011.

© Ташкент давлат шарқшунослик институти, 2011

© Тошкент давлат шарқшунослик институти, 2011